



H1

انتشرون

حرب البهادرا

إسلام عبد الله





إتس وّن

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا

الكتاب: إتش وان
الكاتب: إسلام عبد الله
تصميم الغلاف: إسلام مجاهد
تدقيق لغوي: سارة صلاح
رقم الإيداع: 2018/34492
الترقيم الدولي: 978-977-778-143-5
الطبعة الأولى: 2018

20 عمارات منتصر – الهرم - الجيزة
ت: 011 27772007- 02 35860372
Noon_publishing@yahoo.com
جميع حقوق الطبع والتوزيع محفوظة للناشر



إسلام عبد الله

إتشن ورن

(حرب البهادارا)

رواية

للنشر
والتوزيع

زحامٌ شديدٌ بإحدى عربات المترو المكتظ براكبيه.. كان الوجود والضيقة هما السمة الحاضرة فوق الوجوه من هذا الاختناق الشديد.. كان الجميع لا يجد له موضع قدم للوقوف، ناهيك عن الحركة.. ووسط كل ذلك كان هناك رجل ينسل بين كل تلك الجموع كالسمكة الصغيرة بوسط الماء.. كان يتحرك بسرعةٍ وخفةٍ شديدةٍ لا يضاهاها إلا سرعة يده وهي تخرق حقيبة سيدة غافلة وتسحب منها هاتفها النقال دون أن تشعر.. لحظة واحدة وكان يضع الهاتف بملايسه ويتجه إلى شخصٍ آخر ليقف خلفه لعدة لحظات يتابعه وهو يتصفح هاتفه، وعندما وجد الرجل يتسم إلى أحد المنشورات كان هو أيضاً يتسم وهو يحمل محفظته بين يديه وينطلق مسرعاً جهة ضحيةٍ أخرى.. دققَ بوجوه الركاب سريعاً بنظرات فاحصة متمحصة ليلتقط بعينه الخبيرة شاباً يبدو على ملامحه أنه غارقٌ بالتفكير والشرود الشديد.. وهنا علم أنه وجد ضالته فاتجه صوبه مسرعاً ثم دفعه بكثفه برفقٍ، ثم وضع يده بجيبه وأخرج محفظةً وهبَّ مبتعداً، ولكنه تفاجأ بوجود شيءٍ يتعلق بيده وبها المحفظة.. نظر خلفه مضطرباً مذهولاً ليجد الشاب يتسم له وهو يمسك بيده محفظته وهي شاهدة على جرمه المشهود.. تملك الذعرُ وجهه

اللى فآخرآ من وسط ملابسه بيده الأخرى مطواة وفتحها بسرعة
وبمهارة شديدة.. ضحك الشاب أمامه ثم حدثه بثقة: «ما تخافش..
مش هقول لحد إنك حرامي.. ده أنا هكافأك وأديلك 500 جنيه لو
عملت اللي قولتلك عليه..»

اللى فرآحآ: 500 جنيه.. عايزني أعمل إيه؟
الشاب مبتسما بثقة: حاجة بسيطة جدآ.. هتفجر المترو..

بأحد شوارع القاهرة العتيقة، ووسط الزحام، وبين الطُّرقات كان هناك سائق سيارة أجرة في أوائل الخمسينيات يقود سيارة ومُسجَّله يصدح بإحدى أغاني أم كلثوم الشهيرة.. وأخذ السائق يحرك يديه مندجماً وهو يدندن كلمات الأغنية بعشق شديد وهو ينظر من خلف الزجاج إلى الزبائن وهي تشير إليه وهو ينتقيهم، ومَن لا يروق له يتركه سريعاً بعدم اهتمام.. نظر سريعاً إلى سيدة بدينة وهي تحمل حقيبة ضخمة وتشير له بأن يقف لها.. تطلَّع إليها سريعاً.. ثم حدَّث نفسه متأفِّفاً: «لا دي تخينة قوي وانا لسه مغير العفشة قريب.»

ترك السَّيِّدة وانطلق بسيارته سريعاً يخرق الشوارع بحثاً عن غايته.. لمح شاباً وسيدة يقفان بجواره فحدَّث نفسه بعد أن عاينهما جيداً: «نجيب دول.. دول خُفَّاف حلوين..»

توقف بسيارته أمامهما.. فحدَّثه الشاب مترجياً: «معلش يا أسطى ممكن تاخدي أنا ووالدي لعابدين..»

أخذ السائق يداعب ذقنه في تردُّدٍ للحظاتٍ: «عابدين.. عابدين..»

اركب تعالى..»

انتاب الشاب الفرح الشديد ونادى على أمه التي أتت مسرعة:
«تعالى يا حاجة.. وافق خلاص..»

أخذت السيدة تصدح له بالدعاء: «ربنا يكرمه يا ابني ويوسع
رزقه..»

واقتربت من باب السيارة الخلفى وشاهدت شيئاً بداخل
السيارة.. فضربت صدرها مصدومة.. وسحبت يد ابنها بسرعة
وركضت بعيداً: «يا لهوى.. يا لهوى.. يلا يا ابني من هنا.. يا لهوى..
يا لهوى..»

شاهد السائق رد فعلها المذعور وهي تتعد هي وابنها مندهشاً
ثم صرخ بهما غاضباً: مشيت ليه بنت المجنونة دي.. تصدقي أنا
غلطان وأستاهل ضرب الجزمة علشان وافقت إني أوصلكم يا زباين
هم.. يا ولاد...»

تحرك بسيارته سريعاً وهو غاضب من تصرف المرأة، وأخذ يسب
ويلعن بها طوال الطريق.. بعد عدة أمتار وقفت فتاة جميلة وأشارت
إليه أن يتوقف.. نظر لها مبتسماً ووقف بسيارته أمامها.. «أيوه كده..
هى دي الزباين اللي تفتح النفس.. على فين يهانم؟»

أجابته الفتاة سريعاً: «مصر الجديدة..»

ابتسم لها السائق: «والله لو رايحة السلوم لوصلك.. اركبي يلا..»

ابتسمت له الفتاة.. ثم توجهت لفتح باب السيارة الخلفى
لتركب، وهنا شاهدت شيئاً في الخلف.. فتركت الباب مفتوح
وأخذت تصرخ مذعورة وهي تمسك رأسها: «اااااااااااااا..»

في لحظات بسيطة تجمع المارة حول سيارة الأجرة ومنعوها من

التحرك في ظلّ تعجب السائق وهو يُحدّثها مدعورًا: «في إيه ياهانم..
في إيه؟»

اقترب أحد الفضولين من الفتاة وهو يسألها ماذا حدث..
فأشارت الفتاة إلى المقعد الخلفي للسيارة.. وهنا تجمع الناس واقتربوا
من مقعد السيارة ليظهر لهم جميعًا رجلٌ مطعون بالسكين في صدره
وممددٌ على الكنبة الخلفية للسيارة..

حدثت جلبة وصريخ وزعيق من الجموع حول سيارة الأجرة،
وأخرجوا السائق منها وهموا بطلب الشرطة..

بوسط لهيب الصحراء الواسعة وبحار الرمال المتأججة جلس
وحيدًا يُداعِبُ ذقنه بيده اليسرى وهو يضجع على جانبه الأيمن
يتربق ما سيسفر عنه صراع ذكريين ضخمين من الكباش الثمينة
يناطحون بعضهم بقرونها الحادة بقوة وبعنف وسط قطع
الحمالان غير المكترثة بما يفعل الكباشان، كل ما فعلوه أنهم ابتعدوا
قليلاً ليخلوا الساحة للغريمين ليتنافسا بحريّة أكثر.. ظل الراعي
يراقب الكباشين وهما يتباعدان عن بعضهم ومن ثم يتناطحان
من جديد بكل قوة وعزم ولم يوقفهما أو يحرك ساكنًا من أجلهما
واكتفى بمتابعة تلك الإثارة الرخيصة المتوفرة أمامه؛ فلا يوجد
بديل آخر لكي يسلي وقته حتى انتهاء الحملين من الرعي سوى
بتلك المشاهد أو محاولات النادرة بإبعاد الأسود أو الذئاب عن
قطيعه الكبير هذا.. قطع إثارته المحدودة تلك ثلاثة أشخاص
يرتدون الزي البدوي ويشهرون سيوفهم وهم يمتطون ظهور

خيولهم الضخمة القوية ويشقون غبار الصحراء بطريقهم جهته، بثقة وتحداً.. شعر الراعي بدنواً الخطر فقفز من مكانه متأبطاً سيفه بالحال، وأخذ يترقب وصول الفرسان صوبه، وعند اقترابهم شهر سيفه بالتو وعندها توقف الفرسان على بُعدٍ منه فصرخ عليهم بالحال: «لم أتيتم إلى هنا أيها الحمقى.. ألا تعلمون من أنا؟».. ضحك الفرسان بالحال ساخرين منه.. وصرخ أحدهم عليه بتحدٍ: «بل نعلم من أنت جيداً.. ولهذا جئنا طلباً لرأسك أيها العبد الأسود».. هنا اذهل الرجل مصدوماً وهو يُحدث نفسه غير مصدق: «ماذا؟ عبد أسود؟ أنا عبد.. أنا أسود؟».. قالها وهو يقلب سيفه بيده ليجد انعكاساً لصورةٍ على عرض سيفه ليجد نفسه بالفعل يرتدي ملابس العبيد الممزقة ووجهه أسود شديد القتامة.. صرخ الراعي بفرع شديد وألقى بسيفه بعيداً وأمسك رأسه وهو يتحسس ملامح وجهه بيده ويصرخ بصدمة شديدة: «أنا.. أنا عبد.. أنا أسود.. كيف.. كيف؟؟».. جاءه الرد سريعاً من أحد الفرسان وهو يركض جهته بحصانه المغوار ويحمل سيفه بتحفظ ويضحك بشدة وهو يصرخ على الراعي: «هل جنت يا عبد السوء لكي تلقي بحسامك أمامي.. إن رأسك لي الآن».. وهب سريعاً بسيفه على رأس الراعي فانتزعها بسيفه من فوق جسده وسقطت على الأرض بالحال.. آخر ما شاهده الراعي بحياته كان جسده الضخم وهو يهوي على الأرض بدون رأس أمامه.. صرخ بفرع شديد: «أنا...» ولكنه وجد نفسه لا يستطيع التحرك.. حاول أن يتحدث فلم يستطع أيضاً.. ظل يصرخ ويصرخ ولكن لم يخرج صوته أبداً.. ظل يحاول ويحاول بدون أي جدوى.. صرخ بأقصى قوةٍ لديه وهو يتحاول أن يتحرك بيأس شديد

قدمه فاعتدل بجلسته واتجه إلى هذا الشيء أسفله ومدَّ يده بأعماق أعماق أريكته ليجدها بالنهاية ويخرجها ليجدها عبوة مياه غازية معدنية قد قام بشرُّبها بمساء أمس مع بعض قطع العيش الفينو الطازجة المختلطة بقطع الجبن النستو أمام التلفاز.. فوضعها يجيى أمامه على المائدة وهو ينظر حوله فوجدَ غرفة المعيشة ممتلئة بالنفايات والأوساخ فشعر بتأنيب الضمير لأنه تسبَّب بهذه الكمية الكبيرة من الأوساخ وقام سريعاً بحمل سلة المهملات المتواجدة بأسفل أحد المقاعد بغرفة المعيشة وهمَّ بالتقاط مُخلفاته قبل أن تستيقظ زوجته سمر وتبدأ بسرِّد خطبتها المعتادة عن النظافة، وأنه يجب أن يكون المرء نظيفاً وهلمَّ جراً لآخر الحديث الذي سئم سماعه.. انتهى يجيى من جمع المخلفات وتعجَّب من مشاهدة غرفة المعيشة التي أصبحت نظيفة بلحظة، وبدأ يشعر بالمتعة التي تشعر بها النساء بعد أن ينتهين من نظافة أي شيء.. وضع سلة المهملات جانباً واتجه إلى غرفة نومه ليرى زوجته سمر، وفتح الباب برفق لأنه كان يتوقع أنها ما زالت نائمة ولكنه تفاجأ بأنها ليست بغرفتها وأن السرير لم يُمسس أي إنهما لم تنم بغرفتها بالأمس.. هنا علم وجهتها بالحال فأغلق باب غرفة نومه واتجه إلى غرفة صغيرة بنهاية الممر الأيمن من غرفة المعيشة ليفتح باب غرفة نوم ابنتها الصغيرة مروان ذي الثلاثة أعوام، ففتح بابها برفق ليجد أمامه زوجة سمر وهي نائمة وهي جالسة بجوار ابنتها مروان النائمة بعمق على سريرها وبجوارهم على الكومود الكثير من علب الأدوية وبعض أطباق الطعام بها بقايا كثيرة.. اعتصر هذا المشهد قلبه وهو يرى زوجته راقدة بجوار ابنه المريض وهو لا يستطيع أن يوفر لهم مكاناً جيداً بإحدى المستشفيات الاستشارية ذات

الأجنحة الفندقية فابتلع امتعاضه بأسى وجلس على مقعد صغير بجوار الحائط وظل يرقب زوجته وابنه بصمت.. ظل يدقق بملامح زوجته وهي نائمة بهدوء واندهش لدى ملاحظته لتفاصيل جديدة بوجهها.. فملامح سمر اختلفت كثيراً بعد أن تزوجته.. لم يعلم لماذا لم يشعر بهذا التغير المفاجئ بوجهها.. هل يعقل بأن الإنسان عندما يشاهد الشيء مراراً وتكراراً يتغافل بعد ذلك عن تفاصيله أن هذا لشيء عجيب.. تطرق بناظره إلى جسد زوجته، ظن أنه أصبح ضخماً وبديناً.. كيف لسمر تلك الغزال الرشيق التي كان دائماً ما يحلم بأن يمتلك هذا الجسد بيوم من الأيام وأن يظفر بإحساس تواجهه بين أحضانه تحول إلى هذه الكتل الهلامية من اللحم والشحوم بعد أربعة أعوام فقط من الزواج.. هل يعقل أن تغير تلك السنون من البشر بهذه السرعة.. عقله دخل بمقارنة سريعة ما بين جسد زوجته سمر ومديحة الفتاة الشابة التي معه بالعمل.. وبالطبع اكتسح جسد مديحة تلك المقارنة بكل سهولة، ولكنه طرد تلك الأفكار سريعاً عندما لاحظ بروز نتوء كبير من بطنه بمقياس خمسة سم أو أكثر ليُدَّكره بأن تلك السنون التي طالت زوجته قد طالته هو أيضاً فلا داعي لذكر تلك المقارنة لأنه إذا وُضِعَ مع مقارنة بأي شخصٍ آخر لن تكون له الغلبة بالغالِب، وقفَ متنهداً وهو يصفع بيده كرش «العز وأكل الوز» كما يجب أن يطلق عليه وتوجه إلى السرير الصغير ليطلع قبلة على وجنة ابنه مروان، ولكنه توقف بالحال عندما ترامت إلى أنفه رائحة كريهة تخرج من جسد الصغير فابتعد عنه مسرعاً وهو ينفض رأسه حتى لا يفقد وعيه وهو ينظر إلى طفله الصغير مندهشاً كيف لهذا الكائن الصغير المحمّل بالمخلفات والمشاكل والروائح الكريهة

أن يجعلنا نفعل المستحيل لكي نرى ابتسامةً على وجه الصغير أو نظرة رضا من عينيه الناعستين.. كيف لهذا الشيء أن يجعل شخصين بالغين مثلي ومثل أمه أن لا يستطيعا النوم بحرية وبدون قلقٍ إذا ما أصابه حمى أو رشح صغير كيف أنه لم يهنأ هو وزوجته براحة بال عندما اكتشف أن مروان الصغير هذا مصابٌ بثقبٍ بقلبه اليافع، وأنه لا يستطيع أن يركض أو يلعب بحرية مثل أقرانه لأننا نخاف عليه أن يبذل أي مجهود شاق حتى لا يكون بهذا نهاية حياته القصيرة.. أخذ يحيى ينظر إلى مروان بأسى وهو يتأمل ذلك الجسد الضئيل وتلك الأقدام والأيدي الشبيهة بأقدام السناجب ووجهه الأبيض الجميل الذي يحمل شفاة صغيرة بلون الفراولة الحمراء التي تجعلك حينما تراها ترغب بالتهامها وأنفه الصغير التي تحمل أنفاسه المعدودة من تلك الدنيا.. مشهد رائع يتمنى أن يراه كل أب دائماً وهو يشاهد أطفاله ينامون بهدوءٍ وراحةٍ بالٍ لم يتحمل يحيى من مقاومة تلك اللطافة الزائدة فأخذ نفساً عميقاً وأغلق أنفه وطبع قبلةً على جبين مروان الصغير فتفاجأ يحيى باستيقاظ سمر وهي فزعة وتنظر له مندهشة.. فطمأنها وهو يتسم «ما تخافيش يا سمر ده أنا».. نظرت له بعين ناعسة: «يحيى.. هو انت صحيت..»

«آه.. شكلي نمت على الكنبه إمبراح وانا بتفرج على التلفزيون..»

إنتي نمتي جنب مروان إمبراح..»

«آه.. أصله كان تعبان وسخن شوية.. ففضلت جنبه طول الليل

وشكلي رحت في النوم..»

«طيب أنا هاروح أعملكم أي حاجة تاكلوها».. حاول أن ينصرف

من الغرفة سريعاً فأوقفته سمر سريعاً وسألته بحدة: «رحت لخالك إمبراح يا يحيى؟».. شعر يحيى بالاضطراب وتنهَّد بضيق وحدثها وهو ما زال يعطي لها ظهره: «أيوه.. رحته..»

«وقالك إيه.. هيديك الفلوس؟».. التفت يحيى جهتها ببطء وهو يطأطئ رأسه وحدثها بنبرة خجلة دون أن ينظر لها.. «قالي.. إن ابنه خلاص هيتجوز بعد شهرين وإنه بيجهز في شقته دلوقتي ومحتاج لكل قرش معاه حالياً.. وإنه مش هيقدر يديني المبلغ الكبير اللي أنا طالبه».

بغضب: «يعني إيه؟ مش هيديك الفلوس؟ ده هو كان الأمل الوحيد اللي انت كنت معتمد عليه.. هانجيب منين 250 ألف نعمل بيها العملية لمروان؟!».. أجابها يحيى مضطرباً: «يا سمر.. لسه قدامنا وقت طويل ندبر فيه المبلغ.. العملية مش ضروري تتعمل بكرة يعني.. طالما واخدين بالناس من مروان مش هيحصله حاجة إن شاء الله».

«يعني إيه.. عايزنا مانعملش العملية.. وأفضل عايشة طول عمري خايفة على ابني يجري ولا يلعب زي باقي الأطفال التانيين.. ولو صبرت سنة ولا ستين تاني زي ما انت عايز ولا قدر الله مروان تعب واحتاج يعمل العملية الـ 250 ألف اللي مش عارفين نجيبهم دلوقتي هيبقوا مليون واتنين واحنا في بلد مالهاش كبير يا يحيى كل اللي عايز يغلي حاجة يغليها ولا في رقيب ولا مجيب ساعتها هتعمل إيه يا يحيى؟».. صمت يحيى قليلاً وهو يحاول أن يرد على حديثها المنطقي الذي يحمل الكثير من الواجهة فلم يستطع.. فاكتفى بأن أوماً برأسه لها مطمئناً: «ما تخافيش يا سمر.. أنا هتصرف..»

أنا هاعمل أقصى ما في وسعي علشان أجيب فلوس العملية لمروان».. وقفت أمامه سمر غاضبة وهي تصرخ بوجهه: «هتعمل ما في وسعك.. ماهو انت السبب في اللي حصلنا من الأول.. كنت عايز تبقى بطل ويقولوا عليك الإنسان الخير الملاك في دنيا البشر بيقطعوا بعضهم علشان الجنيه.. عملت فيها صاحب مبادئ وقيم حضرتك وضحيت بالملايين وبعيشة كريمة ليك ولمراتك وابنك كل ده علشان الناس الغريبة اللي ما حدش فيهم فكر ولا هيفكر يساعدك أو يساعد ابنك المريض ده».. نظر لها يحيى غاضبًا ممتعضًا وهو يصرخ بنفسه من داخله.. هاهي مرة أخرى تذكّره بذلك الأمر من جديد لكي تهينه وتجعله يشعر بغبائه وعدم قدرته على تحليل الأمور.. إنها تذكره بما حدث معه من قبل مع أنه لم ينسّه أبدًا.. غضبه الشديد جعله يريد أن يهم بالصراخ عليها هي أيضًا ومبادلتها ذكر عيوبها هي أيضًا.. فجميع البشر لا يخلون من العيوب وسمر زوجته بالذات تحمل منها الكثير.. ولكنه تراجع باللحظة الأخيرة وأخذ يتلع امتعاضه وغضبه بداخله واكتفى بالنظر إلى مروان الصغير وهو نائم وترك زوجته تتابع حديثها الغاضب وملامتها الدائمة له وظلت سمر تتابع إطلاق نيران لسانها على يحيى المستسلم أمامها حتى استيقظ مروان الصغير من صراخها وحدثها بصوتٍ ضعيفٍ: «ماما.. في إيه يا ماما؟».. هنا توقفت سمر عن ثورتها وتوجهت صوب مروان الصغير وهي تبتسم وتضع يدها على جبهته تتحسس حرارته وبتلك اللحظة نظر إليهم يحيى غاضبًا وحاول أن يللم شتات كرامته كرجل وانصرف إلى خارج الغرفة بهدوء..

وقف يجيى أمام مرآة الحَمَام الكبيرة وهو ينظر إلى وجهه المغطى بالمياه، وشعره المبلل ويتأمل تفاصيل وجهه بدقة شديدة.. لاحظ على الفور نمو بعض الشعيرات البيضاء على جانبي رأسه وأسفل ذقنه الصغيرة التى تركها تنمو ليس حُبًّا بها، ولكن مجرد كسلٍ لواجب الحلاقة اليومية لها ولاحظ أن أنفه وأذنه قد أصبحتا أكبر قليلاً عن السابق.. هو يعلم بأن الأنف والأذن هما الأعضاء التى لا تتوقف أبداً عن النمو.. ولكن أن تعلم معلومة علمية شيء، وأن تراها تتحقق بأعينك شيءٌ آخر تماماً.. ظهرت تجاعيد واضحة فوق جبهته على هيئة خطوط سوداء وهالات كبيرة تحت عينيه وبشرته القمحية أصبحت ذابلةً وغير نضرة مثل السابق.. نظر لنفسه مصدوماً وهو يصرخ بداخله: ما كل هذا؟ ما الذى يحدث لي؟! هل هذا وجه شاب بالخامسة والثلاثين من عمره! لماذا أصبحت يصيبني التعب من أي مجهودٍ بدنيّ.. لماذا أصبحت أقل قابلية للضحك عن ما قبل.. لماذا الشيء الذى كان يفرحني ويمتعني وأنا صغير أراه الآن سخيلاً ومُملًا.. لماذا هذا؟ هل هذا هو النضوج.. إذاً يا ليتني لم أكن ناضجًا.. تنهد تنهيدة كبيرة أخرجت ثاني أكسيد الكربون من صدره وأخرجت معها بعض همومه من قلبه.. وتذكر كلمات سمر الجارحة وأنها تُذكِّره بها كل مرة يتشاجرون مع بعضهم.. شعر بالضيق الشديد.. وأخذ يحدث نفسه بغضبٍ.. لماذا يعايرونني بالذي حدث معي من قبل.. لماذا يلومني بكل مرة.. لماذا الجميع يفعل ذلك لماذا لا ينظرون إلى الأمور من منظوري؟ لماذا لا يشاهدون العالم من عيني.. إذا حدث ووضعوا أنفسهم بحذائي فسوف يدعموني بالتأكيد ويرون أني اتخذت القرار الصحيح.. فالنقود ليست كل شيء أنا على

قناعة من داخلي بأن هذا هو الشيء الصحيح وأن هناك أشياء بهذا العالم أكثر أهمية وضرورة من النقود.. ولكن لماذا.. لماذا كل ما يحدث لي من ظروفٍ يشعرني بأخطائي.. لماذا جميع من أقابلهم يشعرني بأني غبي ومُغَيَّب ولست من هذا العالم.. هل أنا حالم.. هل النقود هي أهم شيء بهذه الحياة.. هل السعادة في أن تكون غنيًا.. هل هي تلك الحقيقة الوحيدة الثابتة والمؤكَّدة بهذا العالم كالموت.. إن جميع من يراني ويتعامل معي ينعتنني بمقولة واحدة فقط: أنت ذكي.. هل أنا ذكي بالفعل؟ لماذا جميع من أعرفهم يخبرونني بأني ذكي كما يقولون، ولكنني غبي لأنني لا أستغل ذكائي هذا بأن أكون غنيًا.. لا أعلم لماذا يقولون إنني ذكي.. إنني أرى نفسي بأني عادي للغاية.. لا.. بل أنا غبي لأنني قد استطاع صديق عمري أو ما كنت أعتقد أنه صديق عمري في خداعي وكاد أن يدخلني السجن.. وإن كنت أعتقد بأنه.. ما هذا.. ما كل ذلك.. اللعنة لقد فعلتها مرة أخرى.. لقد كنت أفكر بشيء ثم بعد قليل يأخذني عقلي للتفكير بشيء آخر.. ثم شيء آخر.. ثم شيء آخر.. اللعنة.. يجب أن أتوقف عن هذه العادة لأنني هكذا لن أتوقف عن التفكير إلى ما لا نهاية.. يجب أن أركز فيما أريد أن أفعل.. نعم.. أنا أعلم ما سوف أفعله الآن.. فسوف أخرج إلى خارج المنزل طوال اليوم.. سوف أجعل سمر تشعر بالندم.. أنا أعلم بأن سمر من النوع الطيب ولكنها صريحة وصراحتها تلك كالقنبلة المتفجرة تلقيها بوجهك بأي وقتٍ.. هي تفعل ذلك مع الجميع دون استثناء ولكنها سرعان ما تعود وتعتذر عن ما قالت.. أنا أعلمها جيدًا فهي حبيبتني وزوجتي وأم أولادي.. نعم أستطيع أن أبادها الكلمات الجارحة والشتائم واللكمات أيضًا.. إن بعض زملائي يتفاخرون بهذا

أمامي ولكن لا.. لم يكن هذا هو الحل أبداً.. الحل أن يعلم الرجل ما هي خصال حبيبته ويتعود أن يتعامل مع هذه الخصال.. ما يقال عن أن الرجال من الزهرة والنساء من المريخ وأن النساء صعب أن تعلم ما بعقولهم هذا محض هراء.. فالبشر جميعهم لا تزيد أنماطهم الشخصية عن خمسين نمطاً فقط.. جميعهم يتشاطرون ويكرّرون الصفات نفسها بشكل أو بآخر.. إذا علمت نمط الشخص الذي أمامك سوف تستطيع التعامل معهم مهما كانوا.. وأكبر دليل على صدق حديثي هو نجاحي دائماً بتحقيق «التارجت» الخاص بي ببيع الأدوية للصيديات وللأطباء.. فجأة يترامى إلى مسامعه صوت طرّق على باب الحمام ويستمع إلى صوت سمر من الخارج وهي تنادي عليه.. ابتسم يحيى بالحال وهو يعلم بأن زوجته قد أتت لتصالحه الآن ولكنه كان يتوقع بأن تتأخر قليلاً عن هذا.. فتح الباب بقوة وسرعة وهو يرسم على وجهه ملامح الغضب والجدية فوجد سمر تنظر له بترجّ وتحدثه بصوت هاديّ وخافت: «ماتزعلش منّي يا يحيى.. ماتزعلش مني أرجوك.. أنا عارفة إنك بتتعب جداً علشان خاطرني أنا ومروان ولكن...».. قاطعها يحيى بالحال عن طريق احتضانها واحتوائها ب صدره.. غابت سمر عن العالم بتلك اللحظة وارتمت بحضنه بقوة ووضعت يديها على ظهره وضغطت بقوة شديدة وترامت إلى مسامعه تنهيداتها القوية الخارجة من صدرها وهي تضغط على صدره بقوة.. تمت سمر بتلك اللحظة أن تتوقف عقارب الزمن وتظل بحضن زوجها للأبد وتغوص بداخله بين أحشاء هذا الرجل الذي لم تسمع منه كلمة يجرحها بيوم من الأيام.. أو أهانها بأي شكل من الأشكال..

شعرت بسعادة غريبة تجتاحها لا تعلم من أين تأتي شعور ممتع ليس له وصف أن تظل بحضن محبوبك وبين يديه.. رفعت رأسها ونظرت بعينه التي كان باديًا عليها نظرات اللهفة والاشتياق فيما بينهما.. وهمت به وهمَّ بها لولا أن وجدا جسد مروان الصغير يحتضن أقدامهم ويفعل مثلهم؛ فشعر يحيى وسمر بالإحراج مما حدث ونظرا إلى مروان الصغير وظلا يتضحكان بخجلٍ.. حمل يحيى الصغير مروان على يده ووضع يده الأخرى على كتف سمر وتوجها إلى غرفة المعيشة..



لفيف من رجال الشرطة بزيمم الرسمي وعرباتهم ذات الإضاءة المعروفة تلتف حول أحد الأجزاء من الشارع وهم يحاوطون سيارة التاكسي وسائقها .

يقترّب من هذا اللفيف المقدّم ياسين حسن بشاربه الكث الغليظ وملابسه المدنية وهو يضع سيجارة في فمه ويخترق الصفوف بلا مبالاة.. فيقابله أحد الضباط أقل منه رتبة.

«تمام يا باشا.. قفشنا الواد القاتل واتحفّظنا على الجثة والتاكسي وخبراء المعمل الجنائي والطبيب الشرعي بيعاينوا الجثة ومسرح الجريمة دلوقتي».

يسحب ياسين سريعًا أنفاس السيجارة بقوة مرتين متتابعتين ثم ينفث الدخان من جانب فمه وهو يهز رأسه للضابط بلا مبالاة.

«تمام.. تمام يا حمادة.. الواد القاتل فين.. هاتهولي خالينا نخلص»

ينظر له الضابط بضيق:

«حمادة.. حاضر يا باشا.. هاجبهولك.»

يتوجه الضابط سريعاً إلى أحد الأماكن ثم يحضر سائق التاكسي
المكبلش مع أحد أمناء الشرطة بالزى المدني .

«الواد آهو يا باشا..»

ياسين ينظر نظرات حادة إلى سائق التاكسي الذي أخذ يقف
أمامه مرتعشاً ثم تحدث إلى أمين الشرطة بلهجة أمره .

«فكله الكلابش ده يا ابني..»

أمين الشرطة ينزع الكلابشات عن يد السائق.. بينما أخذ ياسين
يسحب دخان سيجارته فيجدها انتهت فألقاها بعيداً ثم توجه إلى
السائق بالحديث .

«قولي يا ابني اسمك إيه؟»

أجابه السائق خائفاً:

«اسمي سعيد يا باشا..»

أخذ ياسين يقلب في ملبسه سريعاً وهو يتحدث إلى السائق
بدون مبالاة.

«قولتلي اسمك إيه؟!»

السائق بالعاريقه:

«اسمي سعيد.. سعيد يا باشا..»

ياسين يخرج من جيبه علبة سجائر، ولكنه يجدها فارغة.. فيلقاها
غاضباً.

«هي ناقصاكي انتي كمان على الصبح»

يتوجه ياسين بحديثه إلى أمين الشرطة الذي يقترب منه مسرعاً.

«بقولك إيه يا حمادة..»

«أؤمرني ياباشا..»

ياسين يخرج نقوداً من جيبه ويعطيها لأمين الشرطة.

«بُص عايزك تجبلي علبة سجائر جامدة.. عايزها تبهدلي صدري..»

أنا عايزها تجبيلي السرطان وقتي.. فاهم؟»

«عيوني ياباشا»

أمين الشرطة يتعد مسرعاً، والضابط يقوم يدفع السائق ليقرب

أكثر من ياسين الذي حدثه في الحال:

«آه.. كنا بنقول إيه يا حمادة.. قتلت الواد اللي في العربية ده

ليه؟!»

السائق خائف بشدة ويتحدث بتلعثم:

«والله ياباشا ما قتلت حد.. أنا ما أعرفش القتل ده ولا عمري

شفته وكنت هتجنن لما الناس لقوه في التاكسي بتاعي.. أكيد حد

موتّه وحطه في التاكسي بتاعي من غير ما أشوفه».

ياسين يتسم ساخرًا:

- إيه يا حمادة.. إنت هستعبط ولا إيه.. حد هيخرج بالتاكسي

بتاعه من الجراج لحد وسط البلد من غير ما ياخذ باله إنه فيه قتل

في الكنبه اللي وراء.

- والله ياباشا هو ده اللي حصل.. وما أعرفش مين اللي عمل

معايا كده..

ياسين أخذ يهرش في عينيه ثم أنفه وتحدّث إليه سريعاً:
- ماشي.. هفترض إني هصدقك.. عايزك تحكي لي بالظبط عملت
إيه من أو لما صحيت لحد مالقيت الجثة.

السائق يتحدّث بخوف شديد:

- والله يا باشا ما فاكرك.. أنا مش فاكرك أي حاجة النهارده غير
إني لقيت نفسي بسوق في وسط البلد، وبعدين لقيت واحدة مصوطة
ولقيت البلوة دي في عربيتي..

ياسين يقرب أذنه جهة السائق ويحدّثه مستنكراً:

- نعم ياروح أمك.. مش فاكرك اللي حصلك..

السائق بترجّ:

- والله يا باشا.. والله العظيم ده اللي حصل.. وحياة بنتي ما انا
فاكرك أي حاجة حصلت لي من الصبح.

ياسين مستنكراً:

- إنت مصر صر يلا ولا شارب كولا ولا حكاية أهلك إيه.

ياسين يتحدّث إلى الضابط بجواره:

- فتش لنا الواد ده وطلعنا اللي في جيوبه.. يمكن نلاقي حبايتين
حمر ولا حباية زرقا زي وشه ولا حاجة.

الضابط يقوم برفع يد السائق بجانبه ويبدأ في تفتيشه.

- إرفع إيدك يلا..

ياسين يتحدّث إلى السائق الذي كان مرتعداً والضابط يقوم

بتفتيشه.

- بص يا حمادة.. إنت شكلك بتشتغل اللي جابونا وسكتك
معايا مش دوغري.. يا تجيلي دوغري.. يا إما هاقفش عليك وانا
قفشتي وحشة..

يدخل جندي جهة الضابط فيتوقف عن تفتيش السائق وينظر في
الورقة ثم يتحدث إلى ياسين.

- اتوصلنا لهوية القتل يا باشا.. القتل طلع رجل الأعمال
عمر فودة.

ياسين مندهشاً:

- عمر فودة.. ابن محمد فودة؟

- أيوه يا باشا هو..

ياسين يسحب السائق من جيبه ويوقفه أمامه ثم يمسك رأسه
بين يديه.

- قتلت ابن محمد فودة.. ما القتش غير ابن محمد فودة اللي تقتله..

ياسين يتسّم ساخرًا في وجه السائق وهو يضع يديه على رقبته.

- يا نهار أبوك إسود.. ده انت هتعلق من الترتره .

أمام هايبر ماركت

يقف يحيى أمام أحد متاجر الهايبر ماركت الضخمة وهو يمسك
ورقة ينظر بها ويحدث نفسه بضيق:

- يعني مكتوب عليّ يا ربي أنزل في يوم أجازتي أجيب طلبات
البيت كمان.. ماشي يا عم مروان.. كله علشان خاطر ك، علشان
إنت عيان..

توجّه إلى داخل الماركت مسرعاً ليتفاجأ بالزحام الكبير داخل الماركت نظراً لأن هذا اليوم هو عطلة رسمية.. سحب عربة التسوق وجرّها أمامه فوجد عند المدخل القسم الخاص بالخضروات والفاكهة فالتقط بعضها سريعاً ووضعها بداخل عربة التسوق ثم نظر إلى القائمة بيده وانطلق بداخل الهايبر يتفقد أقسامه الكبيرة.. سحب العربة أمامه وهو يحاول أن يتلاشى نظرات النساء خلفه المتباينة ما بين الإعجاب والتعجب.. انتابه الخجل من نظراتهن وظلّ يبحث بعينه سريعاً عن بعض الرجال مثله يتسوقون حتى لا يكون هو الوحيد من يفعل ذلك.. ولكنه عندما وجد بعضهم وجد معهم زوجاتهم وأطفالهم فشعر بالاستياء للحظات، ولكنه طرد تلك الأفكار سريعاً وهو ينظر إلى القائمة بيده ثم التقط بعض العُلب والمنتجات من فوق الأرفف ويضعها بعربة. استمر على هذا المنوال لفترة من الوقت ثم نظر إلى القائمة بيده مرة أخرى فوجد أنه قد أحضر معظم المكتوب وتبقى فقط 4 سلع كان ثلاثة منهم عند مدخل الماركت فتركهم للنهاية وهو عائد ثم نظر إلى السلعة الأخيرة فوجدها نصف كيلو جبنة روكفور.. تذكّر حينها أول مرة طلبت منه زوجته سمر أن يحضر هذا النوع من الجبن وحينما اشتراه تفاجأ بصدور رائحة منفرة منها، وعندما تذوقها لم يستيغ طعمها بالبداية، ولكن بعد ذلك أصبح تناولها إدماناً لديه.. وتعجب كثيراً عندما بحث عن ميزة هذه الجبنة فوجد أنها بسبب وجود عفنٍ بها.. نعم، فإن الجيوب الزرقاء التي تنتشر داخل قطعة الجبن هي مجرد مستعمرات من عفن البنسليوم التي وجدت في كهوف روكفور بفرنسا.. وأن تلك الجبنة يُعتقد بأنها السبب بنسبة كبيرة بحدوث

«المفارقة الفرنسية» الشهيرة التي طالما كانت حديث العلماء في العالم..
سال لعابه في الحال وهو يتذكر مذاق تلك الجبن فتوجه سريعاً بعربته
ليبحث عنها وظل يبحث ويبحث كثيراً بأنحاء الماركت، ولكنه لم
يجد قسم الألبان أبداً.. وقف أمام قسم المنظفات وهو في حيرة من
أمره.. أراد أن يسأل أي شخصٍ عن مكانه ولكن كان كل ما يصادفه
من السيدات وشعر بالخجل من أن يسأل إحداهن.. ولكن شعر
بدنو الفرج عندما شاهد أحد العاملين بالتجريم أمامهم فاستوقفه
سريعاً: «لو سمحت يا أستاذ».. توقف العامل أمامه متردداً. «أيوة يا
افندم..» بلهفة: «هو قسم الجبن فين لو سمحت».. فنظر له العامل
بضيقةٍ وأشار خلفه: «هناك».. ثم تركه ومضى سريعاً بطريقه.. نظر
يحيى خلفه سريعاً فلم يجد شيئاً خلفه غير أقسام السكر وأنواع
الشاي.. نظر حوله يبحث عن العالم مرة أخرى فلم يجد أي أثرٍ
له.. ف شعر بالغضب الشديد من هذا الموقف، ولكنه تفاجأ بسيدة
تحدثه من الخلف: «يا أستاذ.. يا أستاذ؟».. نظر يحيى خلفه سريعاً
ليجد سيدة بدينة تجر عربة ممتلئة بمعلبات طعام القطط.. وتبتسم
له وتشير إليه بيدها: «لو عايز قسم الجبن هتلاقيه بعد قسم اللحوم
علشان هما نقلوه هناك من يومين.. وفي مكان متطرف شوية»..
«جنب قسم اللحوم.. اااه.. متشكر.. متشكر جداً لحضرتك»..
ثم ابتسم إليها فبادلته الابتسام ثم تركته وانصرفت.. فتوجه سريعاً إلى
قسم اللحوم.. وبالفعل وجد قسم الجبن خلفه.. فنظر إليهم معاتباً:
«دوختيني يا ست ريكفورت».. ثم قام بشراء الجبن وتوجه مسرعاً
إلى مدخل الماركت لشراء باقي السلع وتوقف عند قسم الجبوس
وأخذ ينتقي بعض معلبات الشوفان.. ولكنه سمع صوت رجلٍ

«مين الي كسر العصائر دي كلها؟»

نظر الرجل إلى العامل مترجياً وهو يشير له بيده أن يتعد وهو يهمس له: «أمشي.. أمشي دلوقت».

صرخ به العامل غاضباً: أمشي.. أمشي إيه.. والحاجة الي اتكسرت دي!

أجابه الرجل هامساً ومترجياً: هدفع تمنها.. إمشي بسرعة دلوقتي..

توجّه العامل إلى الداخل وهو ينادي لعامل النظافة: يا سيد.. تعالي نضف هنا..

أخذ الرجل يتابع حديثه في الهاتف متوسلاً: لا.. ما بيكلمنيش أنا يا حبييتي.. ده كان بيكلم واحد جنبي.. لا.. لا.. مش بضحك عليكى.. ماهي وقعت غصب عني يا لولا.

أخذ الرجل يتحدث فجأة بجدية وصرامة: لولا.. لولا.. قلنا بلاش شتيمة.. خلاص اخصميهم من مصر وفي لكن ماتهنقنيش كل شويه..

ثم صرخ في الهاتف فجأة بغضبٍ: كده.. إنتي مصرة على الي بتقوليه ده؟!!

ثم تحدّث بصوتٍ مُنخفضٍ فجأة: ماشي يا لولا.. ماشي.. الله يسامحك.

ثم سحب السماعات من أذنه، ونظر حوله فوجد جميع المتسوقين توقفوا عن التبضع وهم يشاهدونه ويضحكون.. فتصنع أنه يسعل ونفخ صدره وأخذ ينظر في زجاجات العصير أمامه.

ابتعد المشترون وتابعوا ما كانوا يفعلونه.. استغل الرجل ابتعاد الجميع عنه فأخذ يدفع الزجاج المحطم بقدمه أسفل أرفف العصير.. وأخذ يتلفت حوله ثم انطلق راكضاً مبتعداً بعربة مشترياته.

طابور طويل للغاية أمام الكاشير ويقف عشرة أشخاص أمام يحيى حتى يصل للكاشير ويستطيع محاسبته بالنهاية.. ترمى إلى مسامعه صوت شخص يتحدث بصوت عالٍ.. فشعر يحيى بالفضول تجاهه فنظر إليه فوجده الرجل السابق الذي كان يتحدث بالهاتف يسبقه في الطابور بأربعة أشخاص.

- أيوه يا لولا يا حبيتي.. أنا واقف أهو قدام الكاشير.. معلى الطابور زحمة قوي.. ماتخافيش يا لولا.. هعدّ الفلوس كويس قبل ما أمشي.. ماشي سلام يا حبيتي..

ظلّ يحيى يتبادل النظرات مع بعض الواقفين في الطابور ويتضحكان في همسٍ.

الكاشير وقف فجأة من على مقعده وهو يتحدث إلى العملاء أمامه.

متأسف يا جماعة.. السيستم بيتعمله تحديث وهنضطر نستناه عشر دقائق.

أخذ العملاء يتحدثون إلى بعضهم بضيقٍ.. قام أحد العملاء بالصراخ على الكاشير: العشر دقائق بتاعتكم بتخشلها في الساعتين.. حاجتكم أهى.. مش عايز حاجة.. بلا قرف.. ثم ترك مشترياته ورحل.. تبع الرجل بعض العملاء بعد أن تركوا مشترياتهم غاضبين.

سناني.. أصل أنا واكل ملوخية الصبح..

أخذ يحيى يحاول كتم ضحكك بشدة: لا.. مش انت.. مش انت..

أخذ الرجل يتسم وهو يحدثه: أو مال إيه الي ضحكك كده..
بالله عليك يا شيخ لا تقول.

شعر يحيى بالاضطراب: لا مفيش حاجة.. كل الموضوع إني
افتكرت نكتة حلوة ضحككتني جداً..

- بجد.. طيب بالله عليك يا شيخ لا تقولي النكتة دي.. وحياتة
أبوك يا شيخ لا تقولها..

شعر يحيى بالتوتر.. فأخذ يُحدِّث نفسه بدون صوتٍ: بعدين
بقي.. هو الراجل ده عرف إني كنت بضحك عليه وعايز يجر جني
ولاً إيه..

نظر الي وجه الرجل فوجد ملامحه تعلوها البلاهة الشديدة
ويتسم بحماقة . فابتسم يحيى وهو يُحدِّث نفسه: مستحيل يكون
وَش زي ده بتاع واحد خبيث.. ده وش واحد أهبل.. قوله أي حاجة
يا عم يحيى.. وأهي كلها دقائق ومش هتشوفوا وش بعض تاني..
حدِّثه يحيى مبتسماً: طيب اسمع النكتة دي يا سيدي.. مرة واحد
بيحب جري.. لكن يجري مايبحبوش.

أخذ الرجل يضحك بشدة وبصوتٍ عالٍ لفت انتباه العملاء..
واحمرَّ وجهه من كثرة الضحك.. وأخذ يحيى يضحك معه لدقائق..
ثم تحدَّث الرجل إلى يحيى وهو يتسم: هي النكتة حلوة
بصراحة.. بس قديمة وسمعتها قبل كده..

أخذ يحيى يهرش في رأسه حرَّجًا: أنا عارف إنها قديمة وسمجة..
واستغربت جدًا بصراحة إنها ضحكك للدرجة دي..

جاوبه الرجل سريعًا وهو يتسّم: بص أنا بعمل بوصية المرحوم
أبويآ.. قالي يا ابني أي حاجة ممكن تضحكك.. أضحك.. حتى لو
مابتضحكش.. لأن بعد ماتكبر مش هتلاقي حاجة تضحك.. لازم
انت اللي تدور إنك تضحك وتسعد نفسك.. ومن ساعتها أي
حاجة فيها ضحك بضحك على قد ما بقدر حتى لو مابتضحكش..
ابتسم له يحيى: الظاهر إن والدك كان حكيم جدًا..

ضحك الرجل بشدة: هو أبويآ كان حكيم آه.. بس ماكانش
بيغني.. ههههههه

اكتفى يحيى بالابتسامة على مضض. توقف الرجل عن الضحك
وهو يمد يده إلى يحيى ويحدثه: صحيح أنا ما اتعرفتش بيك.. أنا
سامي فكري.. وانت؟

بادله يحيى المصافحة وهو مبتسم: أنا يحيى كامل..

- تشر فنا يا أستاذ يحيى..

أخذ سامي يدقق في ملامح يحيى للحظات: إيه ده.. أنا متهيألي
شُفتك قبل كده.. إنت طلعت في التلفزيون قبل كده صح.

ابتسم يحيى فخراً: إيه ده انت فاكر بقى.. فعلاً من خمس سنين
تقريباً.. فاكر موضوع التريفون..

أخذ سامي يشير له بإصبعه: أيوه.. أيوه التريفون.. مش ده كان
فيلم اتعمل وكسّر الدنيا ساعتها.. إنت مثلت فيه صح؟!!

نظر له يحيى مستنكرًا للحظات ثم ابتسم ساخرًا: فيلم.. آه..
التريفون كان فيلم فعلاً..

- طيب إيه التواضع ده.. فيه نجم بينزل يشتري حاجاته بنفسه..
ده انت متواضع قوي..

أخذ يضحك سامي بشدة.

فجأ يرن هاتف سامي فكري بموسيقى أجنبية (مقطع من أغنية
long nights للمغني eddie vedder)

ينظر سامي بهاتفه ثم يغلقه ويتحدث إلى يحيى: لا مؤاخذه لولا
مراقي بتستعجلني.. أصلها بتغير عليًا قوي..

ابتسم يحيى ساخرًا: آه.. آه طبعًا.. ربنا يخليكم لبعض.

- بس إيه رأيك في الأغنية بتاعة الموبايل؟ تحفة..

- فعلاً جميلة جداً.

- دي أغنية من أغاني موسيقى تصويرية

لفيلم حزين بس تحفة اسمه into the wild إنتاج 2007، والأغنية

دي لمطرب اسمه eddie vedder.. اسمها long nights.. أعجبت بيها

جداً من ساعة لما شفت الفيلم وحاططها عندي في كل حته.. على

الكمبيوتر والموبايل وحتى في سماعات الصب عندي في الشغل..

لدرجة إن بتاع الدليفري لما بيجيلي يجلي البيتزا بيقول إنه كره

الأغنية دي وبقى مايطقش يسمعها.. أصل أنا بحب البيتزا جداً..

وباكلها على طول عندي في الشغل من مطعم حلو قوي.. هو بعيد

شويه عني بس يستاهل الصراحة.. عنده كل أنواع البيتزا حتى

النادرة منها زي البيتزا اليابانية.. إنت بتحب البيتزا؟

يحيى بضيق: لا للأسف..

سامي بحماسة شديدة: لازم تجرب البيتزا الياباني دي تحفة بتتصنع زي البيتزا العادية، ولكن بنوع من العجين الرقيق، ويتحط فوقها شوية نودلز ولحوم وذرة بس تحفة التحفة لازم تجربها..

يحيى يشعر بالملل من حديث سامي فيهز رأسه وهو يستمع لحديثه ويجاوبه باقتضاب: آه طبعًا هبقى أجرب البيتزا دي إن شاء الله..

تقرب من الصف بعض الفتيات الفاتنات وهن يحملن منتجات لعرضها على العملاء.. تدخل إحدهن على سامي وهي تحمل طبقًا من الجبن الشيدر وتحمل قطعة وتعطيها له.

- ممكن حضرتك يا افندم تجرب الجبنة بتاعة شركتنا..

أخذ سامي الجبنة من الفتاة بتردد وهو خجل وتناولها سريعًا وهو يشكرها: متشكر جدًا.. حلوة.. هابقي أشترى منها إن شاء الله..

- تشرفنا يا افندم طبعًا بشرائك منتجاتنا..

تعطي الفتاة الجبن ليحيى فيشكرها معتذرًا.

تدخل بعض الفتيات وتعطيهم جميعًا عينات مجانية من منتجات الشامبو والعصائر والأطعمة المختلفة ويوزعونها على العملاء المصطفين..

تدلف فتاة جميلة للغاية وهي تحمل بعض المشروبات وتقف أمام يحيى وتحديثه: ممكن يا افندم حضرتك تجرب مشروب الطاقة الجديد «باور فانك»..

- متشكر لحضرتك جدًا.. شكرًا..

- حضرتك منتجنا آمن جدًا وحاصل على شهادة الأيزو 9001
وحاصل على تقرير السلامة من منظمة الصحة العالمية، ومبيعاته في
124 دولة، ومبيعاتنا بقت رقم 3 في الولايات المتحدة بعد صدوره
بشهرين، ومبيعاته تخطت المليار 200 ألف عبوة في أقل من سنة،
والعبوة الواحدة منه فيها كافين وتاورين ومجموعة فيتامينات ب
و... ومصنعه من أجود أنواع المياه الموجودة في جبال الألب.. عبوة
واحدة منه تدي لحضرتك طاقة لمدة 48 ساعة.. خلالها مش هتحس
بأي جهد أو توتر وبتساعد على التركيز ورفع الكفاءة في إتمام المهام..
وحضرتك تقدر تحصل على عبوة دلوقتي مجانًا علشان تجربّه بنفسك
وتقدر تحكم على جودة المنتج.

شعر يحيى بالفضول ومدّ يده لتناول العبوة من يد الفتاة: واو..
لا إحنا ناخذ عبوة ونجرب بنفسنا..

هنا مدّ سامي فكري يده مسرعًا وأخذ العبوة من يد الفتاة، ثم
ابتسم لها: شكرًا.. أنا هاخذها خلاص..

ابتسمت الفتاة: عادي يا افندم.. أنا ممكن أجيب للأستاذ واحدة
تانية.. معايا عبوات مجانية كتير..

يحيى مبتسمًا: لا.. ماهو أنا هابقى أقوله حلوة ولّا وحشة..

تحدث الكاشير في الصف أمامه: السيستم اتحدّث خلاص..
أسفين على التأخير يا افندم.. اللي عايز يحاسب يتفضل..
انصرفت فتيات الدعاية ووقف الجميع في الصف مرة أخرى.
رفع سامي عبوة مشروب الطاقة أمام يحيى.

- معلش بقى يا يحيى يا صديقي.. كلامها فتح نفسي مع إنه
كلام إعلانات أنا عارف.

ثم وضع العبوة في وسط مشترياته.

أخذ ينظر له يحيى للحظات مندهشاً وهو يهز رأسه مستغرباً من
أفعال سامي الحمقاء تلك .

دخل عميل بمشترياته فجأة الصف أمام يحيى وحدثه مقتضباً:
«أنا كنت واقف هنا يا أستاذ..»

نظر له يحيى بضيقٍ للحظاتٍ: ماشي، اتفضل..

وقف يحيى أخيراً أمام الكاشير وحدثه سريعاً: حساب حضرتك
554 جنيه يا افندم.

يحيى مصدوماً: كام.. 554 جنيه..

- أيوه يا افندم..

متنهداً: اتفضل ياسيدي..

أخذ يحيى يخرج الأموال متحسراً وأعطاهما للكاشير.. وأخذ
حقيبة مشترياته وهم بالخروج.

فجأة أوقفه الكاشير: يا أستاذ.. يا أستاذ..

يعود إليه يحيى سريعاً: إيه.. في إيه؟

يرفع هاتف من على الكونتر أمامه ويعطيه ليحيى: تليفون
حضرتك.. نسيته على الكونتر وانت بتحاسب.

يحمل يحيى الهاتف سريعاً في يده ويتحدث إلى الكاشير مبتسماً:
التليفون.. آه.. معلش.. متشكر جداً ليك.. مش عارف أنا حصلي إيه..

- لا يا افندم.. بتحصل معانا كثير ومتعودين على كده..
يحمل يحيى الهاتف وحقية مشترياته وينطلق مسرعاً إلى خارج
المتجر.

أمام الهايبر

أخذ يحيى يتحرك سريعاً ليعبر الشارع ووضع يده بالهاتف في
جيبه ولكنه شعر بشيء في جيبه.. فتوقف في الحال ووضع الحقية
على الأرض بجواره وأخرج ما في جيبه ليجد هاتفه به.

- إيه ده.. ده تليفوني في جيبى.. أو مال ده تليفون مين؟

أخذ ينظر في الهاتف بتمعن فوجد لونه ذهبياً من الخلف.

- ده لونه ذهبي..

خبط رأسه بكف يده.

ده أكيد تليفون الراجل الأهل اللي اسمه سامي.. طيب
أرجعهوله إزاي دلوقتي.. التليفون مقفول ببصمة.

مش هعرف أتصل بيه أو أكلم حد متسجل عنده.. طيب أعمل
إيه.. أروح أسيبه في الهايبر يمكن يرجع يسأل عليه.. هي مش مضمونة
قوي.. بس على الأقل أبقى عملت اللي عليا وأخليت مسئوليتي..

وضع يحيى هاتفه في جيبه وحمل حقية مشترياته واتجه عائداً جهة
الهايبر مرة أخرى.

هنا رن الهاتف الذي يملكه فجأة.. نظر يحيى إلى شاشة الهاتف
فوجد اسماً على الشاشة «عم سليم البواب».

أجاب يحيى على الفور على الهاتف وسمع صوت سامي يحدثه
من الجهة الأخرى.

«ألو..»

«ألو.. أيوه.. إنت سرقت موبايلي ليه يا عم انت.. في أرقام
وحاجات مهمة.. رجعهولي وهديك 200 جنيه..»

ابتسم يحيى عند سماعه سامي يفأوضه: أنا يحيى يا أستاذ سامي
اللي كنت وراك في الطابور بتاع الهايبر.

أجابه صوت سامي سريعًا: يحيى اللي كان ورايا في الطابور..
إنت الممثل؟

ابتسم يحيى بسخرية:

- أيوه.. ههه.. بالظبط.. أنا الممثل..

- كده تسرقني يا يحيى بعد ما بقينا أصحاب.

يحيى مصدومًا: أسرقك إيه يا أستاذ سامي.. حضرتك نسيت
موبايلك على الكونتر بتاع الكاشير ومشيت.. والكاشير افتكر إن
الموبايل بتاعي أنا وادهولي.. وكنت هاكلمك علشان تاخده بس..
التليفون ليه بصمة ماعرفتش أفتحه..

- طيب يعني التليفون معاك إنت، ما اتسرقش.. الحمد لله.. ده

أنا كنت خايف يتسرق ولولا لو عرفت ممكن تطلقني فيها..

أخذ يحيى يتسّم: مادام اتظمنت على الموبايل وعرفت هو فين..
أنا هاسيبهولك مع بتوع الأمن عند الهايبر ابقى ارجع خُده بقى..

سامي مترجياً: أبوس إيدك.. لا.. ده أنا ما صدقت إني اتظمنت عليه.. ده هدية من مراتي.. إنت ماتعرفش لو حصل للتليفون ده حاجة لولا هتعمل فيا إيه.. بص خليه معاك وهاتولي البيت عندي لو مافهاش تقل عليك.

يحيى ساخرًا: بيت إيه اللي أجهولك فيه.. هو أنا فاضي يا أستاذ سامي..

- يا يحيى يا صديقي أبوس إيدك.. بيتي هيتخرب لو مراتي عرفت إني نسيت التليفون.. أنا بكلمك من تليفون البواب علشان ما أعرفهاش إنه ضاع مني.. اركب تاكسي وهاتولي دلوقتي من غير حد ما يعرف.. أنا ساكن قريب تاكسي في السريع للعنوان اللي هديهولك وربع ساعة هتكون عندي.. وهحاسبك على التاكسي..
- يا أستاذ سامي.. يا أستاذ سامي.. أنا والله ما فاضي.. أنا هسيبك التليفون عند الأمن بتاع الهايبر زي ما قُلتك وتعالى خُده براحتك..

- يحيى يا صاحبي.. بقولك إنقذ بيتي هيتخرب.. مراتي بتسألني رايح فين وجاي منين ومش هعرف أنزل من غير ما أقولها رايح فين.. وأول لما بنزل بتتصل على التليفون زي ما انت كنت شايف.. هتعرف إن التليفون مش معايا وهاروح في داهية.. بَص تعالَى وهديلك 250 جنيه وحق التاكسي فوقهم في مشوار ربع ساعة.. ماشي.. وافق بقى يا عم..
أخذ يحيى يهرش في أذنه.

- 250 جنيه.. هي المسألة مش مسألة فلوس.. إنت عارف..
بس علشان خاطر لولا ماتزعلكش هاجبلك التليفون لحد عندك..
قولي بقى العنوان إيه؟

أحد الشوارع الهادئة

ترجّل يحيى من سيارة التاكسي وهو يضع الهاتف على أذنه
يتحدث إلى سامي.

تحدث إلى السائق سريعاً: هو ده الشارع متأكد يا أسطى؟

- أيوه متأكد يا أستاذ..

- طيب عايز كام؟

- العداد عامل 38 جنيه..

- طيب خليك معايا ثواني..

أخذ يحيى يتحدث بالهاتف: أستاذ سامي.. هو انت ساكن فين
أنا في شارع 18 أهو..

أجابه صوت سامي في الحال: بص سيب تالت عمارة على يمينك..
أنا ساكن في العمارة الرابعة على طول الدور الثالث.. شُفتها..

أخذ يحيى ينظر خلفه على العمارات: آه شايفها قُدّامي أهو..
بقولك إيه؟ ما تنزل أديلك التليفون تحت هنا..

- لولا هتسألني رايح فين وهتطلع تشوفني من البلكونة.. إنت
هتطلع لي على السريع هقابلك على الباب آخذ منك الموبايل وأديلك
الفلوس من غير ما تحس ماشي؟

تنهّد يحيى وهو يُحدّثه: طيب ثواني هكلم السواق يستناني..
مال إلى السائق وحدّثه: بقولك يا أسطى.. أنا طالع العمارة دي
أودّي حاجة وهنزل تلات دقائق بالظبط استناني نرجع سوا..
السائق مترددًا: يا بيه أحسن تتأخر وتعطلني معاك.. لو هستناك
هشغلّ العداد.. ماشي؟

يحيى نظر إليه متنهّدًا: ماشي.. شغله.. هاحط الشنطة دي هنا
خلي بالك منها لحد ما أرجع..

- حاضر.. بس ماتتأخرش يا بيه..

- لا مش هتأخر تلات دقائق.. وأجيلك على طول..

وضع يحيى حقيبة مشترياته في السيارة..

نظر يحيى خلفه وتوجه إلى العمارة الرابعة في الشارع وهو يُحدّث
سامي:

- أنا داخل العمارة أهو يا أستاذ سامي.

- تمام جدًّا.. الدور الثالث هتلاقني باب الشقة مفتوحة.. وأنا

معاك على الموبايل أهو مستنيك..

سلام العمارة

أخذ يحيى يصعد الطابق الأول والثاني ثم الثالث وهو يلهث..
وضع الهاتف على أذنه بضيق: يعني عمارة زي دي وفي مكان زي ده..
ومفهاش أسانسير..

إجمد يا بطل.. ده انت لسه شباب.. خلاص انت قربت أهو..

بعد إنهاء يحيى صعود الطابق الثالث يجد شقتين أمامه.. واحدة مفتوحة على اليمين.. وأخرى مغلقة على اليسار.

- إنت في الشقة اللي بابها مفتوح صح؟

- أيوه الله ينور عليك.. خش بالراحة علشان ماتسمعكش لولا.. وانا مستنيك.

أخذ يحيى يتنهد وهو يتقدّم جهة باب الشقة متنهداً: ماشي..

دلف يحيى إلى داخل باب الشقة ليجد غرفة المعيشة التي كانت تحتوي على أثاثٍ راقٍ وثمانين.. أدار يحيى رأسه بها مدققاً يبحث عن سامي.. وهو يكلمه على الهاتف..

- إنت فين.. أنا جوه الشقة أهو..

- إنت جوه الشقة طيب تمام جداً.. هابعت دلوقتي البواب يدخلك عندي في مكتبي.

فجأة يقف أمام يحيى شخص يرتدي قميصاً وبنطالاً ويضع فوق وجهه قناعاً لشخصية ميكي ماوس الشهيرة.

يشير الرجل إلى يحيى لكي يأتي معه.

يتحدث يحيى بالهاتف وهو يتبع الرجل.

- الراجل جالي أهو وداخلك..

- طيب تمام.

دلف الرجل إلى غرفة واسعة.. ودلف خلفه يحيى.

نظر يحيى أمامه بالغرفة، فوجد أكثر من عشرين رجلاً يجلسون على مقاعد خشبية مرصوفة أمام مسرح صغير مُعداً أمامهم وفوقه منصة.

لفت نظره أن جميع الرجال يضعون أقنعة ميكي ماوس.
تحدث يحيى بالهاتف مندهشًا: إنت فين يا سامي.. ومين
الناس دي؟!!

أجابه صوت سامي سريعًا: لا ماتقلقش دي حفلة معمولة علشان
الأولاد.. شايف قدامك المنصة اللي على المسرح دي؟
نظر يحيى إلى المنصة أمامه: آه شايفها..

- اقف عليها يلا أنا جايلك.. ثم أغلق سامي الهاتف سريعًا.
تحرك يحيى بتردد جهة المنصة ووقف أمامها وعيون الجميع تراقبه
بتحفظ من خلف الأقنعة.

أخذ ينظر لهم يحيى متطلعًا فوجدهم يرتدون زيًا أشبه بزي
الأطفال في حفلات التنكر ويجلسون على مناضد مثل التي تلك في
المدارس.. ويرتدون أقنعة ميكي ماوس.

أخذ يضحك يحيى على ملابسهم وزيمهم السخيف على الرغم من
مظهر أجسادهم الضخم البالغ. تحدث إليهم وحيًاهم: سلام عليكم
يا جماعة.. منورين..

لم يجبه أحدٌ منهم على تحيته؛ فشعر بالاضطراب والخرج، وهم
بالنزول من على المنصة، فرنَّ هاتف سامي فجأة.

حملة يحيى سريعًا وأجاب على الفور: ألو.. أيوه يا سامي.. إنت
فين يا عم؟

أجابه صوت سامي سريعًا وبجدية: اسمعني كويس يا يحيى
وركز معايا.. مراتك سمر وابنك مروان عندنا بيعملوا عملية ترقيع
للثقب في القلب بتاع ابنك.. العملية هتاخذ ثلاث أيام.

ملاحح الدهشة أخذت تعلقو وجه يحىى .

أثناء التلات أيام دول.. إنت هتنفذ فيهم مهيات هنطلبها منك على التليفون ده.. من غير ما تعرف السبب أو تتناقش فيه.. هتنفذهم مراتك وابنك هيرجعولك بالسلامة.. هتحاول تتصل بالبوليس أو تخل بالمهيات دي هنعرف وانت عارف إيه اللي هيحصل ساعتها. أخذ يضحك فجأة يحىى بالهاتف بشدة، وجميع الحضور أخذوا يرمقونه بفضول وهو يشاهدهم ويضحك.

- مهيات إيه وعمليات إيه.. وناس لابسة ميكي ماوس وبتاع.. إيه يا عم سامي الفيلم الهندي اللي انت عامله ده. أخذ يتحدث بالهاتف وهو يضحك.

أخذ صوت سامي يضحك في الهاتف.

- شكلك مش مصدق يا يحىى.. بس عامة اللي هيحصل دلوقتي هيجليك تصدق..

اللي انت قاعد قدامهم دول قتلة مأجورين من منظمة عالمية اسمها وايت هاند.. وهما في اجتماع مع زعيمهم هنا في مصر.. وهما فاكرينك دلوقتي البهادرا الرئيس بتاعهم اللي هتقولهم على المهام بتاعتهم..

أخذ يحىى ينظر إليهم غير مصدق وهو يستمع إلى سامي.

أخذ صوت سامي يهنئه ضاحكًا: مبروك يا بطل بقيت رئيس منظمة.

ثم أخذ يحدثه بجدية: لكن عندي ليك خبرين وحشين..

الخبر الأول ان رئيس المنظمة البهادرا الحقيقي على وصول بعد

عشر دقائق. والخبر الثاني إن البوليس هيهجم على الشقة دي بعد عشر دقائق بردو .

- مهمتك الأولى النهارده.. إنك تهرب من البوليس والمنظمة.. وهكلمك تاني لو.. كنت لسه عايش.. لو انت لسه فاكر إن الكلام ده مش حقيقي.. سهل جداً تستنى العشر دقائق دول وهتشوف بنفسك.. أو تقول الكلمتين دول.. سوتير هاموشييع..

هنا ردّد يحيى في الحال الجملة التي سمعها:

- سوتير هاموشييع ..

هنا فجأة أخذ جميع الحضور من مرتدي أقنعة ميكى ماوس بإخراج مسدسات نارية ضخمة ووضعوها على صدورهم ويرفعونها بأيديهم ثم يضعونها على صدورهم ويكررونها وهم يصرخون بقوة وعنف ويرددون جملة واحدة بصوت جماعي وضخم يردد:

سوتير هاموشييع.. سوتير هاموشييع ..

سوتير هاموشييع.. سوتير هاموشييع ..

سوتير هاموشييع.. سوتير هاموشييع ..

سوتير هاموشييع.. سوتير هاموشييع ..

سوتير هاموشييع.. سوتير هاموشييع ..

وأخذ يستمع اليهم يحيى مصدومًا مشدوهمًا وصوتهم الضخم الجمهوري يهز أركان المكان.

بداخل غرفة معيشة بإحدى البنايات الفارهة كان هناك شاب في
أوائل الثلاثينيات يجلس على أريكة ساهماً وذقنه طليقة ويبدو عليه
الاكتئاب الشديد ويتابع إعلانات التلفاز في صمتٍ.

صوت إعلان صادر من التلفاز .. مع مشروب الطاقة باور
فانك .. حطم كل قيودك .. معجون أسنان هان ديمون يحافظ على
اللثة ويقاوم التسوس» .. واستمر التلفاز بعرض الإعلانات بصوت
صاخب دون ان يظهر على ملامح الشاب أي اهتمام .. فجأة سمع
صوت طرق شديدٍ على باب الشقة خارج منزله .. ظل الطرق يزداد
عنفًا أكثر فأكثر .. والشاب لا يُبدي أيَّ رد فعل.

فجأة يسمع صوت هبِّ شديدٍ على الباب ثم يفتح بعنف بعد
أن يكسر.

يدلف من الباب شاب في نفس سن الشاب المكتئب اسمه محمود
ويُحدِّثه بقلقٍ:

- علي .. علي إنت كويس .. أختك سماح بتقول إنك ما بتردش
عليها من إمبراح .. قلقتها عليك جدًا.

علي ينظر له بعيون حمراء فجأة ويحدثه بهدوءٍ: إحنا عايشين ليه
يا محمود؟

سؤال علي المفاجئ أربك محمود.. الذي نظر إلى منضدة أمام علي
فوجد سكيناً كبيرة عليها.

محمود يتلع ريقه في قلقٍ: إنت بتسأل السؤال ده ليه يا علي..
إحنا مش اتفقنا إنك تنسى الكلام ده وتشيله من دماغك خالص
قبل كده..

لم يتحدث علي إليه بل اكتفى فقط بأن أشار بوجهه إلى التلفاز
مرة أخرى.

- جاوبني.. إحنا عايشين ليه؟ إحنا مش في الآخر هنموت..
يبقى نعيش من الأول ليه؟

التفت إليه وصرخ به بعنفٍ: قولِّي إحنا عايشين ليه؟

شعر محمود بالارتباك واتجه إلى السكين بسرعة وأمسكها بيده..
نظر له علي بعيون شرسة وهو يحمل السكين أمامه.. شعر محمود
بالتوتر من نظرات علي المرتابة منه وهو يحمل السكين فألقاها بعيداً
بجواره ثم تحدّث مرة أخرى إلى علي بتودد:

- علي أنا عايزك تيجي معايا.. هنروح نقعد مع سماح والولاد،
إنت واحشهم قوي وعايزين يشوفوك..

قفز علي من مكانه صارخاً: أنا زهقت من الدنيا.. زهقت من
الكذب والخداع والفساد.. زهقت من عيشتي ومن حياتي.. أنا
وقتي في الدنيا انتهى وما حدش هيقدر يمنعني المرة دي..

شعر محمود بخوفٍ شديدٍ فأخرج هاتفه سريعاً وقام بتصوير علي وهو يحدثه:

- علي.. إعقل يا علي وارجع عن اللي في دماغك.. لو في أي حاجة في الدنيا مضايقتك هنصلحها مفيش حاجة مالهاش حل.. بلاش علشان خاطري علشان خاطر أختك وولادها..

دمعت عينا علي الحمر او ان وهو ينظر لمحمود ثم نظر إلى ساعة أمامه واقفة على الساعة 12 إلا ثلاث دقائق.

- وقتي انتهى يا محمود.. قول لسماح تنساني وتعيش حياتها معاك انت والولاد..

شعر محمود بالخطر فظلاً يقوم بتصوير علي وهو يحاول الاقتراب منه ليثبته عن فعله:

- إعقل يا علي.. إعقل يا علي وتعالى معايا ربنا يهديك..

أخرج علي سكيناً بسرعة من ملبسه وأخذ يجرها بعنفٍ بالهواء وهو يصرخ: ماتقربش مني.. ماتقربش مني.. ماحدثش هيقدر يمنعني من إني أسيب الدنيا.. ماحدثش هيمنعني..

ابتعد محمود خائفاً من تلويحه بالسكين.

نظر على الساعة فوجدها 12 بالضبط: ميعادي جه..

استغل محمود تلك اللحظة وهمَّ بالهجوم على علي الذي رفع سكينه وكاد يهوي بها على محمود فتراجع سريعاً: إبعد عني..

هنا نظر علي سريعاً أمامه بجوار التلفاز وجد نافذة مفتوحة.

اتجه سريعاً إلى النافذة وهو يركض.

صرخ عليه محمود بسرعة وهمَّ بالركض نحوه وهو يقوم بتصويره
من هاتفه.

- علي .. علي ..

قفز على من النافذة بالحال وهشَّم زجاجها.

وصل محمود إلى النافذة وأخذ يصور علي وهو يهبط من الدور
السادس ليسقط فوق سيارة فارهة كانت تتحرك أسفل البناية.
(صارخًا مصدومًا) .. علييييييي ..

السيارة تتحرك وفوقها جسد علي لأمتار قليلة ثم تتوقف
وصوت بوقها يدوي.

تجمّع المارة حول السيارة وهم مندهشون مصدومون وتتعالى
صياحتهم مختلطة بصيحات محمود الحزينة على علي مختلطًا بصوت
بوق السيارة المحطمة الذي ظل يدوي بأرجاء المكان.

وقف يحيى واجمًا ينظر إلى القتلة أمامه وهم يجيونه ويصرخون
بسوتير هاموشيع وهو مصدومٌ.

الرجال ما زالوا يجيونه بصراخ قوي: سوتير هاموشيع .. سوتير
هاموشيع ..

ترامي إلى يحيى صوت ضحكات سامي بالهاتف وأخذ يحدثه:

- صدقتني دلوقتي ولا لسه .. أنا عايزك تفوق وتركز قوي لي
جاي .. زي ماقتلك قبل كده مراتك وابنك عندنا بيعملوا العملية
لابنك .. إذا كنت بتحبهم وخايف عليهم هتنفذ اللي هقولك عليه

بالحرف الواحد.

معالم الصدمة ما زالت على وجه يحيى: إيه ده انت بتتكلموا جد
ولا إيه.. مرااتي وابني فين انطق حالاً.

بهدوءٍ شديدٍ:

- هتتكلم بالتفاصيل بعدين، الوقت بيمر بين إيدينا.. البهادرا
زعيم المنظمة هيجي حالاً دلوقتي.. وكمان البوليس، قدامك 8 دقائق
تقريباً.. مهمتك الأولى إنك تهرب منهم ولو نجحت هتتكلم تاني.
فجأة يسمع يحيى صوت إغلاق الهاتف، فيصرخ بالهاتف غاضباً:
ألو.. ألو.. سامي.. مرااتي وابني فين؟

يحيى يبدو على وجهه الارتباك الشديد.. عيون القتلة المأجورين
تنظر بتحفظ جهة يحيى الذي بادهم بنظراته المليئة بالقلق والحيرة
وأخذ العرق يغزو جسده ورأسه..

فجأة أصدر هاتف سامي صوت رسالة فالتقط يحيى الهاتف
سريعاً ليجد صورة لزوجته وابنه يرتديان ملابس العمليات،
ومكتوب أسفل منها 5 دقائق.

تصاعدت ملامح الغضب على وجه يحيى.

نظر للجميع أمامه وصرخ بهم بالإنجليزية:

The police are coming now we must leave immediately.

أحد الرجال صرخ بالباقي بالإنجليزية: all of you protect te

pahadra now

هرج ومرج بالغرفة والجميع يتحرك بأسلحتهم.. البعض حمل

سلاح قناصة واتجه إلى الشرفة.. البعض الآخر أخذ يتموضع بأنحاء الشقة.. ثلاثة قتلة اتجهوا جهة يحيى، وقاموا بوضع قناع على وجهه وتحركوا به إلى خارج الشقة وهم يحمونهم.
هبط يحيى ومعه حراسه الشخصيين يحاوطونه أمام بوابة العمار وتحادث أحدهم بجهاز لا سلكي:

the pahadra need a drive now

فجأة تخرق المكان سيارة إسعاف تتوقف أمام العمارة. يهبط من سيارة الإسعاف ثلاثة حُرَّاسٍ يرتدون الأقنعة ومعهم شخص بالمنتصف يرتدي قناعاً لكائن خرافي.. القتلة ينظرون إلى بعضهم البعض مندهشين، فيتحدث أحدهم إلى من أتى بسيارة الإسعاف.

who is this

يحييه الرجل سريعاً: this the pahadra

أخذ الحرس ينظرون إلى بعضهم مندهشين.

صرخ عليهم البهادرا الذي كان يرتدي قناع الكائن الخرافي وهو

يشير إلى يحيى وسطهم.» - who this man.. take his mask off

نزع أحد الحراس القناع من على وجه يحيى فظهر لهم جميعاً:

صرخ البهادرا عليهم بالحال:

- kill him now

بتلك اللحظة ظهرت سيارة شرطة بصوتها المدوي المميز وهي قادمة من مدخل الشارع.. فارتبك الجميع لحظة ظهور سيارة الشرطة.. استغل يحيى لحظات الارتباك تلك فدفع أحد القتلة

وركض هاربًا.. قام القتلة بتلك اللحظة بحماية البهادرا الحقيقي بالحال.. وأطلقوا النيران جهة يحيى الذي ركض مسرعًا كالظليم.. ولكن مع اقتراب سيارة الشرطة أصبح قتل يحيى هدفًا ثانويًا لهم وانصب جل تفكيرهم على حماية البهادرا.. فقاموا على الفور بدفعه من جديد بداخل سيارة الإسعاف وانطلقوا هاربين بينما قام رجال البهادرا بأعلى المنازل بتغطية هروبهم بإطلاق النيران بكثافة على سيارة الشرطة، وبادلتهم الشرطة إطلاق النيران.

ظل يحيى يركض ويركض ويركض وهو يستمع إلى أصوات طلقات الرصاص وهي تخف من حذتها خلفه رويدًا رويدًا.. وعندما شعر بأنه بعيدًا عن كل ذلك الجنون توقف بالحال ليلتقط أنفاسه ويكاد عقله أن يجن.. ما الذي يحدث.. كيف تطورت الأمور هكذا.. هل ما حدث منذ قليل حقيقي.. هل كل ما عينه منذ لحظات لم يكن مجرد خيالات من رأسه تحدث بأحلام اليقظة مثل ما كان يحدث معه كثيرًا.. ولكن رائحة البارود التي مازالت بأنفه، وأذنه التي ما زال بها هدير طلقات الرصاص وجسده الذي يتنفض مرتعشًا ومتعرقًا، جميعهم يخبرونه بأنها بالتأكيد ليست مجرد أحلام أو خيالات من رأسه.. لم يستوعب كل تلك الأحداث التي صعدت على رأسه فجأة، هدفه الوحيد كان هو الاطمئنان على زوجته وطفله.. كيف هو حالهما وسط كل هذا الجنون.. التقط هاتفه بالحال وقام بالاتصال بزوجته وانتظر للحظات مرت كالدهر على أعصابه ثم سرعان ما تحطمت تلك الأعصاب عندما استمع إلى صوت آلي

جاف وهو يخبره بأن الهاتف الذي اتصل بيه غير متاح حاليًا وأنه يجب أن يحاول بوقت آخر.. صرخ يحيى غاضبًا وقام بالاتصال مرة أخرى سريعًا ليجد نفس الصوت الجاف يعيد الرسالة مرة أخرى.. ظل يصرخ وهو يضرب كل شيء حول بقدمه غاضبًا.. ثم فجأة وجد الهاتف يرن بيده فنظر إلى الهاتف ليجده هاتف سامي فكري، وأنه مازال محتفظًا به.. وجد على الشاشة اسم «سليم البواب».. قام يحيى بالرد على الهاتف بالحال وأخذ يصيح على سامي فكري غاضبًا: «مراقي وابني فين.. مراقي وابني فين.. انطق بقلك ياما هوديكم كلكم في داهية.. انطق قول..»

هنا فجأة سمع يحيى صوت موسيقى انتظار على الهاتف.. شعر بالغضب.. وأخذ يصرخ: «ألو.. ألو».. استمر صوت الموسيقى لثوانٍ.. ثم ظهر صوت سامي فكري وهو يحدثه: أيوه يا يحيى.. خليك معايا ثواني ماتقفلش» ثم تحدّث سامي إلى شخصٍ بجواره: أيوه.. أنا معاك.. آه.. عايز البيتزا محشية أطراف جبنه.. آه.. وعايزها أربع أنواع جبنه».. هنا شعر يحيى بالغضب الشديد من سامي الذي بعد أن وضعه بكل هذا الهراء يستمع إليه وهو يطلب البيتزا.. فصرخ عليه حانقًا: «إنت يا زفت انت.. انت بتعمل إيه؟».. هنا وجد نفسه يستمع إلى الموسيقى بعد أن وضعه سامي على الانتظار مرة أخرى.. شعر يحيى بالغضب الشديد يتتابه وأمسك الهاتف بغلٍ شديد وأراد أن يحطمه أرضًا ولكنه توقف عند اللحظة الأخيرة ونظر بجواره إلى سيارة بجوار الرصيف فأخذ يركلها بقدمه وهو غاضبٌ ويصرخ على سامي ويسبه هو وعائلته وأخذت السيارة بالصياح

بضيقة: «مش هيتكرر تاني».. سامي مبتسمًا: «أيوه كده اسم الله عليك.. زي ماقتلك يا بطل مراتك وابنك عندنا بالحفظ والصون بيعملوا العملية لمروان الصغنون الكيوت ربنا يقومهولك بالسلامة ومصاريف العملية والعلاج والدكاترة وكل حاجة كادوه مننا ليك في مقابل كام حاجة صغيرة كده هتعملهالنا خلال ثلاث أيام.. ثلاث أيام هو الوقت اللي هتستغرقه عملية مروان بالملاحظة بالنقاهاة بكله وهيبقى إن شاء الله صاغ سليم وينام في حضنك من تاني».. قاطعه يحيى سريعًا: «ومراتي.. هتبقى فين؟».. أجابه سامي سريعًا: «مدام سمر هتبقى مع مروان طبعًا وهي مش عارفة أي حاجة من الاتفاق بتاعنا ده.. هي معتقدة إنك انت اتقابلت مع حد من صحابك الدكاترة المشهورين وهو اتوسطلك بالمستشفى وبالفلوس وانت معاه بتخلصوا الإجراءات».. سأله يحيى سريعة: «بس أنا مراتي سمر مش هتصدق الكلام ده أبدًا»..

ضاحكًا: «ماتقلقش.. الإنسان هيصدق أي حاجة مادام فيها مصلحة له.. ومادام ابنها حبيب قلبها هيعمل العملية بقدره قادر مش هتفرق مع سمر انت عملت إيه ولأشغال مع مين.. ماتقلقش من الناحية دي.. سيب الموضوع ده عليًا.. أنا عايزك تركز في المهمات الصغيرة اللي هطلبها منك دلوقتي.. هو ده المطلوب.. وكل ماتخلصها بدري.. كل ما تبقى في حضن مراتك وابنك بدري»

سأله يحيى بفضول: «مهمات إيه.. فهمني إنت عايز تعمل إيه بالظبط؟»

«ماتقلقش.. هتعرف كل حاجة في وقتها.. عايز بس أفكر إن

احنا عارفينك كويس و عارفين بتفكر ازاي .. ماتحاولش تشغل مخك
علينا أبدأ.. أي محاولة للاتصال بالبوليس هتبقى مصيبة ليك إنت
مش علينا، تعرف ليه؟»

ابتلع يحيى ريقه بقلقٍ: «ليه؟»

ضحك سامي ساخرًا: «من غير ليه.. إنت ناسي يا بطل إنك
كنت في مقر البهادرا من شويه ولسه ضاربين نار على البوليس
من شويه.. يعني انت تعتبر قدام البوليس البهادرا.. وماتنساش إن
البهادرا وعصابة وايت هاندا مش هيسيبوك بالذات بعد ما اخترقت
منظمتهم وتقمصت دور البهادرا ودول أعضاء أقوى منظمة قتلة في
العالم.. يعني لو عرفوا مكانك انت أو حد من عائلتك قول على
نفسك يا رحمن يا رحيم».. صرخ عليه يحيى غاضبًا: «اخ يابن ال..
انتم بتعملوا معايا كده ليه.. هو أنا عملتكم إيه.. انتم بتتقموا مني
كده ليه.. حرام عليكم أنا ما أذتس حد في حياتي!»

أجابه سامي مطمئنًا: ماتخافش يا يحيى.. احنا مش هنسيبك
ماحدثش هياذيك طول ما انت بتسمع كلامنا وبتنفذ أوامرنا بالحرف
الواحد.. أنا مش بقولك كده علشان أخوفك.. أنا بقولك كده
علشان أفهمك وضعك كويس.. ثلاث أيام.. اسمع الكلام فيهم..
وهترجلك حياتك تاني ولا كأن حاجة حصلت..»

أخذ يحيى يستمع إلى حديث سامي بقلب مقهور وهو مختار لا
يدري ماذا يفعل أو ماذا يقول: «طيب أنا عايز أتطمئن على سمر
ومروان.. عايز أسمع صوتهم ويسمعوا صوتي».

سامي مطمئنًا: «هيحصل.. هيحصل يا بطل.. لكن بعد ما تنفذ

اللي هنقولك عليه.. ماتقلقش هتتفد مهمات سهلة جدًا.. يلا إجمد
يابطل.. مهمتك الأولى إنك تروح أقرب ماكينة ATM وتسحب منها
10000 آلاف جنيه تخيلهم معاك..»

مصدومًا: «إيه.. 10000 آلاف جنيه.. أجيبهم منين.. حسابي
مافهوش المبلغ ده!»

«لما تروح هتلاقي في المبلغ ده.. يلا مهمات النهارده ابتدت
خلاص»

مندهشًا: «اسحب 10000 جنيه من حسابي.. هي دي المهمة..»
مبتسمًا: «مش بقولك مهمات سهلة.. نفذ المهمة واتصل بيَّا على
نمرة سليم البواب» ثم أغلق الهاتف سريعًا.. اندهش يحيى من قطع
الاتصال «ألو.. ألو.. سامي.. سامي»

قام بالاتصال على رقم سليم البواب، ولكن سامي كان يغلق
عليه اتصاله كل مرة.. وضع يحيى الهاتف بجيبه ثم تحدّث إلى نفسه
بضيق: «مهمات إيه وبتاع إيه بس.. ليه كده بس ياربي.. أنا عملت
إيه لده كله».. ثم تنهد بشدة وتحرك جهة أقرب ماكينة ATM..

الضابط ياسين يتقدم صوب مسرح الجريمة وسط حشدٍ من
الفضولين الذين يحاوطون رجال الشرطة ويشاهدون ما يفعلون
باهتمام شديد.. تخطّى ياسين الجميع ووقف أمام السيارة المحطمة
من أعلى والدماء تغطي بعض سقفها وتسيل بغزارة على زجاجها..
أخذ ينظر إلى السيارة وهو يشير بيديه بحدة: «الله هو مفيش غير
أم ياسين في المباحث ولا إيه.. انتم كل قضية هتجروني فيها»..

أجابه أحد الضابط الأقل رتبة منه: ياباشا المديرية طلبتك بالاسم
علشان تحقق في القضية دي». ياسين بضيق: «هو يعني أم المديرية دي
مش عارفة أنا ماسك قضية بتاعة ابن محمد فودة».. الضابط سريعًا:
«ماهو ياباشا القضية دي تبعها بردو».. ياسين مندهشًا: «تبعها
ازاي؟».. الضابط يشير إلى أحد الجسدين المغطيين بقماش أبيض على
الأرض وبهما بعض الدماء: «أصل اللي مات المرة دي يبقى محمد
فودة نفسه.»

فتح ياسين فمه مصدومًا مشدوهمًا وهو يقترب من الجسد أكثر
ويرفع الغطاء عن وجهه: «ياصلاة العيد.. محمد فودة وابنه ماتوا في
نفس اليوم.. وده اتقتل ولا إيه؟»

أجابه الضابط سريعًا: «لا ياباشا ماحدث قتله ده هو مات كده
قضا ربنا.. أصل في واد كان ساكن في الدور السابع انتحر.. نط من
الشباك ولحظ محمد فودة المهيب كان خارج بعربيته ساعتها الواد
المنتحر وقع على عربيته والاتنين ماتوا»..

«إمممم».. أشعل ياسين سيجارته سريعًا وسحب منها نفسًا
كبيرًا وأخذ ينظر إلى السيارة المحطمة أمامه: «إممم.. تمام.. تمام..
طيب ومحمد فوده إيه اللي جابه هنا.. هو مش ساكن في التجمع؟»
«آه ياباشا.. كان جاي يعط مع واحدة هنا، وبعد ماخلص نجاسة
ومروح مات زي ما انت شايف.»

أخذ يمصص ياسين شفثيه: «اخ.. آدي آخرة المليطة يافودة..
آديك هتعلق في جهنم من الزنقلة.. فين البت اللي كان بيعط معاها..
استجوبتوها؟»

«لا ياباشا.. هنتسجوبها بس بطريقة ودي وعلى جنب كده».

ياسين مستنكرًا: «وليه بقى هنتسجوبها في الاستخبص كده ياعم حمادة.. هي تبع حد مهم؟»

«يعني يا باشا.. دي الممثلة اللي انت عارفها دي بتاعة فيلم حب تحت اللحاف.. البت اللي اسمها فادية عماد».

ياسين متقززًا: «إخييي.. إخييي ياجدع.. مالقاش غير أم بوز دي.. هيخش جهنم على دي.. ده انت هتتشوي وتتخوزق يا فودة.. قولي يا ابني.. في شهود في الحوار ده؟»

«آه يا باشا.. وفي فيديو كمان للي حصل».

ياسين مندهشًا: «فيديو.. هي البت أم بوز دي كانت بتسجِّلُه.. وريني كده..»

أخرج الضابط هاتف ووضع بيد ياسين: «لا ياباشا.. ده تسجيل الواد اللي انتحر». كان في واحد صاحبه سجِّل عملية انتحاره.. أخذ ينظر ياسين إلى الفيديو مندهشًا وهو يضع سيجارته بفمه: «سجله وهو بيتتحر.. وصاحبه.. وريني يا ابني إيه ده».. ظهر له بمقطع الفيديو الشاب علي وهو يتحدث إلى محمود ويصرخ عليه للحظات ومحمود يصور بيده مهزوزة ثم يراه يقفز من النافذة ليسقط على السيارة.. شعر ياسين بالاضطراب عندما سقط علي فوق السيارة فأعطى الهاتف للضابط بجواره وهو متأثرًا: «إمسك يا ابني البتاع ده.. والعياذ بالله».. ألقى ياسين بسيجارته سريعًا.. ثم نظر إلى السيارة متقززًا للحظات ثم تحدث إلى الضابط بجانبه: «هاتلي الواد اللي صور البتاع ده».. تحرك الضابط سريعًا ثم أحضر محمود

الذي كان مقيداً بالكلبشات وعلى وجهه الآسى الشديد.. فنظر له ياسين للحظاتٍ ثم فتش بملابسه عن علبة سجائره وأخرج واحدة وأشعلها ونفث دخانها سريعاً وتحدث إلى محمود: «إنت اللي صورت الفيديو ده ياحمادة».. حرك محمود رأسه بالإيجاب.. فتابع ياسين أسئلته: اسمك إيه ياحمادة؟

«اسمي.. محمود عبد الهادي..»

«تعرف الواد اللي انتحر ده ياحمادة؟»

«أيوه اعرفه.. يبقي صاحبي وأخو مراتي».. ظل ياسين يتطلع به وهو ينفث دخان سيجارته «أخو مراتك.. آه.. إممم.. طيب صورته ليه ياحمادة.. مش شايف إنها غريبة بدل ما تنقذ صاحبك وأخو مراتك تسيبه ينتحر وتصوره بالموبايل..ها.. مش غريبة دي!»
دافع محمود عن نفسه حانقاً: «أنا صورت اللي حصل علشان عارف اللي هيحصل ده..»

أخذ ياسين يحك بطنه بيده: «هيحصل إزاي مش فاهم!»

«يعني ياباشا أنا عملت كده علشان ما أخشش في سين وجيم وأتهدل.. على مش أول مرة يحاول ينتحر فيها عملها قبل كده خمس مرات ومرتين فيهم كان هيموت وبنلحقه كل مرة.. لكن لما قابلته المرة دي بعد ما أخته قالتلي إنه مابيردش على تليفونات حد وإنها قلقت.. طلبت مني إني أروح وأتظمن عليه وساعتها قلبي اتقبض.. حسيت إن المرة دي الموضوع مش هيعدي على خير.. وفعلاً لقيته قافل على نفسه كل حاجة ومعاه سكينه.. سهيته وخبتها منه ولكن كان مخبي معاه سكينه تانيه هوّشني بيها.. خفت على نفسي قلت

أصور كل حاجة علشان أبقى في أمان وحاولت آخذ منه السكينة
لقيته سهّاني ونط من الشباك وماكنتش متوقع كده أبداً..

أخذ ياسين يحك راسه..» بصراحة.. هو اللي انت عملته صح..
تمام.. بس شكلها مش حلو.. مش مستريح لها بصراحة.. وانت
ياحمادة انت مستريح للحركة دي..»

محمود غاضبا «أيوه مستريح.. الحمد لله أن مات وانا مصور كل
حاجة علشان محدش يتهمني بأي حاجة..»

ياسين مبتسما: «إيه ده.. ده انت شكلك مبسوط إنه مات.»

بضيق: «أيوه مبسوط.. إنت ماتعرفش كان معذبني أنا وعائلة
ازاي.. كل شويه ماورانا ش حاجة غير إننا نجري وراه في المستشفيات
والأقسام والمصححات كل يوم مكتوب علينا أنا وأخته نتصل بيه
ونتظمن عليه زي ما يكون عيّل صغير بيرضع.. كنا بنخاف في اليوم
100 مرة إنه يكون عمل حاجة في نفسه.. لكن وقوع البلا ولا
انتظاره.. يموت أحسن دلوقتي أفضل من إننا نبقى عايشين طول
عمرنا خايفين ومتوقعين يموت بعدين.. وده رأيي وإحساسي ومش
هغيره..»

أخذ ياسين نفساً عميقاً من سيجارته ثم نفثه بعيداً وتحدّث
إليهم: «إمم.. ماشي.. خُده دلوقتي يا حمادة على القسم ونستجوبه
هناك براحتنا وبعدين نبقى نحوله على النيابة.. وظبطلي مكان أطلع
أستجوب البت المثلة أم بوز دي دلوقتي.. أنا مش فاضي ليها بروح
أمها.. لو مش عاجبها هاتوالي بالبوكس على القسم..» أوماً الضابط
إلى ياسين: «حاضر ياباشا..» وتحرك ومعه محمود وأعطاه الضابط

لأحد أمناء الشرطة واتجه إلى البناية.. بينما تحرك ياسين وهو يرفع القماشة البيضاء عن جسد محمد فودة والشاب على بجواره وهو ينظر لهم متقززا.. أثناء تلك اللحظة رن هاتفه.. فوقف سريعاً ثم وضع السيارة بفمة وأخذ يخرج هاتفه ونظر إلى شاشة ليجد اسم (يحيى ترييفون).. اندهش ياسين من الاسم أمامه وحدث نفسه مستغرباً: «يحيى تريبي مش عارف إيه.. مين ده».. ثم قام بالرد على الهاتف: «ألو».. أجابه يحيى بصوت ممتلىء باللهفة: «أيوه يا ياسين بيه.. أنا يحيى كامل.. عايز حضرتك في موضوع مهم جداً».

فجأة دخل بالمكالمة صوت شخص آخر: «أيوه يا سليم.. مش قتلك مية مرة امسح سلم العمارة دي كويس».. اندهش كل من ياسين ويحيى عندما سمعا صوت سامي فكري يحدثهما.. فصمت يحيى مصدوماً.. فتابع سامي حديثه إلى ياسين: «إنت يا زفت يا بواب انت.. سيب التليفون ده من إيدك حالياً واطلعي».. هنا شعر يحيى بالخوف الشديد وأغلق المكالمة.. اندهش ياسين من تلك المكالمة وأخذ ينظر إلى هاتفه مستغرباً: «بواب إيه ولاد الكلب دوول.. اخ بس لو كنت فاضي كنت علقتم من الزنقلة».. وضع هاتفه بجيبه وتحرك مسرعاً جهة الضابط الذي أشار إليه من داخل البناية..

قبل ذلك ببضع دقائق..

كان يحيى يقف أمام إحدى ماكينات ATM وأمامه بعض الأشخاص وحينها استغل تلك الفرصة وهو يفكر بما حدث له وتطور الأحداث معه وهو يحاول أن يعلم من سامي فكري هذا

ولماذا خدعه هكذا وهل سامي فكري هذا اسمه بالفعل.. وظل يفكر هل الأمر مجرد خدعة يصنعونها به ولكنه شاهد رجال البهادرا وبالفعل كانت عيونهم عيون أناس متدربة قاتلة ولولا هجوم الشرطة على مقرهم لكان هو في عداد الموتى بحق.. فكّر كثيراً وكثيراً ولم يجد أي مخرج إلا الاتصال بالشرطة فكّر أن يستغل هذا الزحام ويقوم بالاتصال بالشرطة وهداه تفكيره للاتصال بالضابط ياسين حسن لأنه كان هو المسئول عن التحقيقات معه منذ خمس سنوات مضت وهو أكثر من سيساعده بمحتته هذه وينقذ زوجته وابنه وحينها اتصل من هاتفه وكانت صدمته كبيرة عندما وجد صوت سامي فكري على الخط معه هو وياسين فأغلق الاتصال سريعاً.. وكان مرتبكاً للغاية.. وجد سامي يتصل به في الحال على هاتفه هذه المرة.. انقبض قلب يحيى بالحال وخشي أن يجيب على الهاتف ولكنه كان مضطراً فاجاب اتصاله ليصله صوت سامي وهو هادئ ورزين ولكن بنبرة حادة: «أي مكالمة هتعملها لأي حد في أي مكان في العالم هنبقى عارفين . ده أول وآخر إنذار ليك».. ثم أغلق الهاتف سريعاً.. ابتلع يحيى ريقه بقلق وهو مندهش كيف استطاع سامي أن يخترق مكالمته هكذا.. هل يضعون جهاز تنصت بهاتفه أم ماذا.. وفي كل الأحوال علم أن هاتفه الآن أصبح مصدر خطر أكبر عليه.. انتهى الصف سريعاً ووقف يحيى أمام ماكينة النقود وسحب منها 100000 وكم كانت دهشته عندما وجد رصيده قد غطى هذا المبلغ هذا.. يعني أنهم استطاعوا الوصول لحسابه البنكي أيضاً.. سحب النقود وابتعد عن الصف منسحباً ووضع النقود بملابسه بحرصٍ وتحرك إلى مكان هادئ بالشارع وقام بالاتصال بسامي

فكري الذي ردّ عليه سريعًا: «أنا سحبت الفلوس زي ما قُلت أهو».. سامي مهنتًا: «مبروك عليك نجاح تاني مهمة من مهماتك يا بطل، شفت بقى الموضوع سهل ازاي».. تنهد يحيى بضيق: «قول عايزين مني إيه تاني أنا عايز أخلص»..

«عيوني هقولك حالاً، بس أنا عايزك تطلع موبايلك من جيبك اليمين».. اندهش يحيى بالحال كيف علم أن هاتفه بجانبه الأيمن.. وضع يده بجيبه وأخرج الهاتف فتحدّث إليه سامي «أيوه شاطر.. شايف بقى العربية الكبيرة اللي جاية ناحيتك دي.. عايزك ترمي موبايلك تحت العجل بتاعها».. نظر يحيى حوله مذهولاً ليجد بالفعل سيارة نقل كبيرة تتقدم جهته.. انتظر قليلاً حتى اقتربت منه ثم ألقى بهاتفه أسفل عجلها فتهمش في الحال.. نظر يحيى إلى هاتفه المهشم بالقرب منه وصرخ على سامي غاضبًا: «إيه ده إنتم شايفني وبتراقبوني».. سامي مبتسمًا: «طبعًا.. مش لازم نتطمئن على البطل بتاعنا».. أخذ يحيى ينظر حوله مترقبًا يبحث عن كاميرات قريبة فتحدّث إليه سامي: «بتدور على إيه يا بطل.. الكاميرة وراك على اليمين فوق أهو».. نظر يحيى خلفه سريعًا إلى الجهة التي أخبره بها سامي ليجد الكاميرة بالفعل.. وهنا علم يحيى أن سامي يرسل له برسالة أنهم يراقبونه عن طريق الكاميرات ويعلمون خطواته ويبدو أنهم لا يعيرونه اهتمام أن يعلم أنهم يراقبونه أم لا.. تابع سامي حديثه إلى يحيى: «يلا يا بطل.. المهمة الثالثة المرة دي أبسط من اللي فاتت كمان.. عارف شارع طلعت حرب طبعًا».. يحيى سريعًا: «أيوه عارفه».. سامي ملاحظًا: «طيب تمام جدًّا.. هتروح هناك بالقرب من عمارة في وسط الشارع مفهاش ولا أبواب ولا شبابيك وتقف

قدامها وتشحت 200 جنيه أو أكثر.. ولما تتجمع الفلوس كلمني»..
هذا الأمر سقط على رأس يحيى كالصاعقة: «نعم.. أشحت؟! إنت
اتجننت!»

سامي بحدة: «آخر مرة بفكرك.. أوامرنا مُطلّقة.. تتنفذ بدون
نقاش ولا جدال..»

أجابه يحيى مستنكراً: «أشحت.. أشحت ليه.. ما انا لسه صاحب
10000 جنيه كاش معايا دلوقتي».. سامي بحدة: «200 جنيه أو
أكثر.. قدامك نصف ساعة من دلوقتي.. نفذ».. ثم أغلق الهاتف..
أخذ يحيى يفكر مذهولاً.. «أشحت.. أنا أشحت.. أشحت ليه وانا
معايا كل الفلوس دي.. وفي طلعت حرب.. إشمعنى في طلعت
حرب.. واشمعنى 200 جنيه.. أنا مش فاهم حاجة.. الموضوع مش
منطقي أبداً».. أخذ يتحرك مسرعاً وهو ينظر بساعة ثم ظل يتطلع
بالشوارع وهو يخترقها سريعاً جهة ميدان طلعت حرب وهو يحاول أن
يعلم سبب هذا الطلب العجيب منه.. استمر بطريقه متفكراً متعجباً
حتى وصل إلى وجهته واخترق شارع طلعت حرب ثم لمح غايته
من بعيد.. مبنى مكون من ثلاثة طوابق، يبدو على طابعها الشكل
القديم فتشعر وكأنك داخل أستوديو للتصوير السينمائي.. البناية
مهدمة، لا يوجد بها أبواب أو حواجز تفصل شققها عن بعض..
كان مشهد تلك البناية مريباً بوسط شارع طلعت حرب التجاري
المليء بالحركة والمارة.. مر على المبنى سريعاً وهو ينظر له بتمعن..
فلم يجد شيئاً مريباً به إلا منظره المتهدم وهو بوسط الشارع التجاري
هكذا.. ظل يتأمل المبنى لعدة دقائق وأخذ يبحث عن الكاميرات

حول المنزل فلم يجد.. أي إنه الآن ليس تحت أنظار سامي فكري.. فكيف سيتأكد من أنه نفذ مهمة بالتأكيد سوف يكون تحت مراقبة لصيقة من رجاله.. وبالفعل تأكد يحيى من ظنونه عندما شاهد ثلاثة رجال يتقفون أثره وهو يتحرك بالقرب من المبنى.. طرأت فكرة على رأس يحيى تمنعه من أن يقوم بالشحاحة فعليًا؛ فإنه سوف يتصنع أنه يقوم بالشحاحة لبعض الوقت ويقف بمكان بالقرب من المبنى الخالي تقريبًا من المارة ثم يتصل بسامي يخبره بأنه تحصل على 200 جنية كما أخبره أن يفعل.. هذا ما قد اعتزم أن يفعله يحيى وليكن ما يكون، إنه سينفذ مهمته كما أرادوا ولكن بشروطه هو.. فهو بعد تفكير شديد لم يجد أبدًا أي فائدة أو ضررًا يحدث من مهمة الشحاحة تلك ولماذا 200 جنية.. تنهد يحيى ووقف أمام المبنى بجهة تكاد تكون شبه خالية ثم قام بتصوير نفسه بهاتف سامي وخلفة المبنى حتى يثبت أنه فعل المهمة.. وضع الهاتف بجيبه ثم أغلق عينيه وتنهد سريعًا ثم وقف مطأطأ الرأس وهو يمد يده أمامه وهو يشعر بكرامته الممزقة تتناثر من فوق رأسه.. لم يكن يحلم بيوم من الأيام أن يفعل ذلك.. ولكن كل شيء في العالم يهون في مقابل سلامة أسرته.. وكما توقع لم يجد أي شخص يقترب من هذا المكان ووجد بعض الصبية الذين كانوا ينظرون إليه وهم يتفاوتون بردود أفعالهم.. فمنهم من كان مندهشًا من رؤية يحيى يشحت هكذا ومنهم من كان يضحك على فعله هذا.. ولكن لفت انتباه يحيى أن ملامح وملابس هذه الأطفال ممتلئة بالقذارة ومهلهلة.. لمح بطرف عينه الثلاثة رجال الذين يرقبونه من طرف سامي يشاهدونه من بعيد وتحدثون فيما بينهم ثم انسل واحد منهم سريعًا صوب يحيى الذي كان متوقعًا أن

يطلبوا منه أن يقوم بالشحاته بمكان يكون به مارة فهو يشعر بأنهم يريدون أن يذلوه ويتقصوا من كرامته بتلك المهمة.. ليستغلوا ذلك معه فيما بعد.. اقترب منه الرجل وسأله سريعاً: «أحلى مساء عليك يا برنس».. أجابه يحيى مقتضباً: «أهلاً».. تابع الرجل الذي كانت على ملامحه علامات الشراسة وسجل إجرامه مخططاً على وجهه.. «إنت واقف هنا ليه لا مؤاخذه؟».. أجابه يحيى مقتضباً: «واقف بشحت زي ما الراجل بتاعكم طلب مني»..

الرجل بضيق: «بتشحت.. هو انت حكومة ياباشا».. نظر له يحيى مستنكراً: «حكومة.. لا حلوة دي.. منكم انتم بالذات».. اقترب منه الرجل مرتاباً: «يعني انت مش حكومة؟»

متنهداً: «لأ مش حكومة.. في حاجة تاني.. عايز أشوف شغلي واخلص من أم الشغلانة بتاعتكم دي».. ابتسم الرجل سريعاً: «عايز تخلص.. حبيبي».. نظر خلفه سريعاً وصرخ بصوت جهوري: «بيكا.. بيكا».. وهنا صدح المنزل بكل أركانه بتلك الكلمة الغريبة.. «بيكا.. بيكا».. سارت تتقاذف على الألسنة كما تتقاذف الكرة فوق أمواج البحار.. الجميع ينطقها.. الأطفال والسيدات ولمراهقين.. اكتظ المكان فجأة بما يقارب الخمسين شخصاً أو يزيد من كل الفئات والأعمار وبعضهم كان به عاهات بجسده وبوجهه.. هذا الموقف واجتماع كل هؤلاء الأشخاص حوله أسقط قلب يحيى بقدمه وشعر بأنه بداخل كابوس بشكل ما.. وتحول كابوسه إلى واقع سريعاً عندما أخرج الرجل من ملابسه سكينه طويلة وضخمة ووضعها بالقرب من رأس يحيى وهو يصرخ عليه.. «إنت

عبيط يالا ولا بتستهبل.. مين اللي بعتك منطقتنا.. جالك قلب يالا
تيجي تقف تشحت قدام عمارة الشحاتين.. تلك الكلمات وقعت
كالصاعقة على رأس يحيى وهو يسأل نفسه.. لماذا أرسله سامي
ليشحت أمام عمارة الشحاتين.. ولكن ضربه من قبضة السكين فوق
رأس يحيى جعلته يتناسى هذا الأمر الآن.. وهو ينظر إلى الرجل وهو
يصدح بصوته الجهوري: «قولي مين اللي بعتك يلا بسرعة قبل ما
أطلع روحك هنا دلوقتي».. حاول يحيى أن يتكلم، ولكن عيون
الجميع وهي تنظر إليه وصدمة الموقف لم يجعلاه يستطيع أن ينس
بنت شفة.. أمسك الرجل بتلابيبه وصرخ عليه: «مش هتنطق.. أنا
هخليك تنطق حالاً.. طلع اللي في جيوبك يلا بسرعة».. هنا تذكر
بالحال يحيى أن معه عشرة آلاف جنيه وإذا وجدوا معه هذا المبلغ المالي
الكبير لن يخرج من هنا حياً بالتأكيد.. وهنا فكر سريعاً بفكرة وحاول
أن يطبقها لقد وضع يده وأمسك ببعض النقود من جيبه ثم سحبها
بسرعة بيده وألقاها أعلى منه فوق الشحاذين الذي يحاوطونه.. كان
الجميع بصدمة ولم يفهموا ماذا فعل يحيى إلا عندما التقت عيونهم
بفئات المال المختلفه وهي ترف رفاً فوقهم وهنا اجتاح الجميع
الجشع وأخذ يجمع النقود مسرعاً.. هنا دفع يحيى الرجل الذي يحمل
السكينة بكل قوة وهم بالهرب.. ولكن تبعه رهط من الشحاذين
وهم يصرخون عليه ويطاردونه بداخل شارع طلعت حرب.. مشهد
مطاردة يحيى من قبل البلطجية والشحاذين أثار اندهاش واستغراب
المارة الذي تابعوا ما يحدث ببرودٍ شديدٍ من بعيدٍ وأخذت تلتقط
مطاردتهم تلك بعض الهواتف وتلتقط لها صوراً وفيديوهات.. كان
يحيى يركض كالجحيم لا يولي أي شيء بطريقه اهتماماً.. صرخات

مطارديه وسبابهم له خلفه يجعلونه يدرك بأنه إذا توقف للحظة واحدة فسوف يكون مصيرة الموت الأكيد وعلى أعين الجميع.. حاول أن يضع يده ليخرج بعض النقود ولكن سرعة ركضه منعته من ذلك.. لم يجد له مخلصًا ولا مُنجدًا إلا حلاً واحداً هو الذي لاح له بتلك اللحظة لقد اتجه مسرعاً صوب السيارات بوسط الشوارع وأخذ يركض تجاهها وهي مندفعة عكس اتجاهه.. كان يركض بسرعة شديدة جهة السيارات التي كانت تحاول مفاداته بصعوبة شديدة ولكنها لا تستطيع مفاداة من يطاردونه وسقط بعضهم بعد أن صدمتهم تلك السيارات.. هذا التكتيك أربك مطاردي يحيى وجعلهم بحيرة من أن يتبعوه.. انطلق يحيى مسرعاً جهة منطقة الإسعاف المكتظة بالسيارات والمارة وكان يتبع تلك الخطة المجنونة التي كادت تكلفه حياته مرتين ولكنه كان يهرب من الموت عن طريق الهرب إلى الموت لم يكن لديه خياراً آخر.. صدمته سيارة ميكروباص من جانبه الأيمن فسقط على الأرض متألماً بالقرب من أحد أرصفة الشارع وهاجت الأرض وماجت من السائقين والمارة ويحيى ساقط على الأرض بالقرب من الرصيف لا يتحرك.. اقترب منه مطارذوه ولكنهم عندما وجدوه ملقى على الأرض لا يتحرك.. نظروا إلى بعضهم البعض بقلق ثم أشاروا إلى بعضهم بالانسحاب سريعاً من المكان.. قام أحد الأشخاص بوضع يحيى بسيارته مع بعض الأشخاص الذين يحوقلون وتصيح ألسنتهم بالدعاء ليحيى الذي صرخ سريعاً من الألم عندما وجد السيارة تتحرك وهو يمسك جانب قدمه اليمنى بعد أن كان يحاول كتمان ألمه وكان لا يتحرك طوال كل تلك الفترة حتى يظن مطارذوه أنه هلك.. حاول سائق

السيارة أن يطمئن عليه ولكن يحيى شكره وأخبره أن يتوقف لأنه أصبح أفضل ويريد أن يتابع طريقه.. رفض السائق بالبداية وأراد أن يذهب به للمشفى، ولكن بعد إصرار شديد من يحيى رضخ الرجل وأنزله بالقرب من ميدان التحرير.. ترجل يحيى من السيارة وشكر السائق الشهم ذاك وأخذ يتلمس موضع الألم بقدمه وبدأ يشعر بأنه يخف تدريجيًا.. وضع يده بجيبه يتحسس باقي النقود المتبقية معه وهو يشعر بالغضب الشديد من ما حدث له منذ قليل.. قام بالاتصال على سامي فكري وهنا لم يرد عليه قام بالاتصال من أكثر من مرة ولكن بالنهاية لم يجب عليه إطلاقًا.. أخذ يسب ويلعن سامي وحظه الذي أوقعه معه.. لحظات قليلة ومن ثم رنَّ هاتفه فقام بالرد عليه وهو يصرخ غاضبًا: «إيه اللي عملته ده تبعنتني عمارة الشحاتين ليه.. إنتوا عارفين كانوا..»، قاطعه سامي بحدة: «جمعت الفلوس المطلوبة».. يحيى بقلق مترددًا: «الفلوس.. آه.. جمعت 200 جنيه».. أجابه سامي سريعًا: «تمام جدًّا.. اسمع كلامي كويس جدًّا لأنني مش هعيده تاني.. تطلع على موقف الميكروباصات في التحرير.. تدور على عربية ميكروباص تويتا رقمه (ن س و 825) لما توصل للميكروباص كلمني.. نفذ».. قال كلماته هذه سريعًا ثم أغلق المكالمة.. حاول أن يتحدث معه يحيى حينها.. «ألو.. ألو.. قفل ابن الكلب.. اخخخ.. لو شفتك.. ميكروباص إيه بس ولاد الذينَ دول.. ميكروباص إيه اللي هدور عليه.. رقمه كام بسرعة قبل ما أنسى.. (ن س و 825).. ن سو 825.. ن س و 825.. لا أنا أكتبها أحسن أنساها».. قام في الحال بتسجيل رقم سيارة الميكروباص على الهاتف معه ثم نظر

خلفه سريعًا واستوقف سيارة أجرة: «موقف ميكروباصات ميدان التحرير يا أسطى».. أو مأل له السائق بالموافقة فدلف يحمي بداخل السيارة وسرعان ما قد وصل إلى وجهته.. فترجل من السيارة ونظر إلى موقف السيارات الممتلئ بصفوف الميكروباصات الطويلة.. أخذ يمسك رأسه بحيرة وهو يفكر كيف سيبحث عن السيارة بوسط كل تلك السيارات الكثيرة.. هل يجب أن يبحث عن رقم سيارة سيارة.. ولكن هذا الحل سيأخذ وقتًا طويلًا للغاية وهو يحتاج كل دقيقة من وقته الآن.. ظل ينظر للسيارات حائرًا للحظات حتى اختمرت برأسه فكرة قرر أن يجربها سريعًا.. اتجه مسرعًا جهة أحد بائعي الشاي والقهوة الجائلين بالموقف وتحدث إليه سريعًا: «السلام عليكم».. بائع الشاي: «وعليكم السلام».. «لامؤخذه يا صاحبي.. أنا طالب منك خدمة صغيرة وبما إنك البرنس في المنطقة هنا فانت اللي هتخلصهالي».. البائع مرتابًا.. «أو مر..»

«الأمر لله.. المدام بتاعتي كانت راكبة ميكروباص من هنا الصبح ونسيت أوراق التحاليل والأشعة بتاعة ابني في العربية.. ولحسن حظنا افكرت بعد ما نزلت بس مالحقتش الميكروباص ولكن لقطت نمرة أهو».. ثم قام بعرض الرقم على هاتفه ونظر إليه بائع الشاي بفضول.. «آه.. عربية تويوتا رقم لوحتها «ن س و 825».. أخذ ينظر بائع الشاي للهاتف قليلاً ثم داعب ذقنه.. «آاه.. طيب ماقتلكش كانت راكبه خط إيه ولا رايحه محطة إيه؟»

يحمي مبتسمًا: «هي قالتلي بس للأسف أنا نسيت.. وهي في المستشفى مع الواد ومحتاجين التحاليل دي ضروري.. همتك انت

معانا يا صاحبي.. إنت أكيد عارف الناس هنا كلها وحبايك..
شوفلي المصلحة دي وانا هديك 200 جنيه..»

بائع الشاي فرحًا: «200 جنيه.. طيب بقولك إيه تعالى معايا»..
ثم نادى على شخص يقف بعيدًا عنه قليلًا.. «ماندو.. خلي بالك
من الفرشة بتاعتي لحد ما أجيلك».. ثم تحرك مسرعًا جهة الموقف
وخلفه يحيى يتبعه بهمة.. لم يلبث كثيرًا ثم توقف بائع الشاي أمام
تجمع بعض السائقين ثم أشار إلى أحدهم.. «هيما.. أحلى مساعليك
يا صاحبي».. بادلته السائق التحية.. «مساعليك يا أوكا.. جبتي
المصلحة الي قتلتك عليها؟»

«فوت عليا بالليل خدها يا صاحبي.. حبة مستوردة وآخر
حلاوة ومفعولها طويل مش بيخلص بسرعة بس سعرها أعلى من
الي فات».. أجابه السائق ضاحكًا: «يا عم عادي هو احنا بندفع
حاجة من جيبنا ما هو كله من جيب الزبون».. نظر السائق إلى
يحيى مبتسمًا.. «ازيك يا برنس».. يحيى مجيبًا.. «أهلاً بيك».. قاطعها
بائع الشاي موجهًا حديثه للسائق.. «بقولك يا هيما.. الكابتن ده نسي
حاجات في عربية في الموقف هنا ومش فاكر فين وعازين نلاقيها»..
السائق ضاحكًا.. «يلاقي إيه بقى كل سنة وانت طيب.. زمانها
اتباعت خلاص».. أجابه يحيى سريعًا.. «لأ ما هي مش حاجة مهمة
..ده شوية أوراق وتحاليل عاملهم لابني بعيد عنك وصارف عليهم
دم قلبي ومش عايز أدفع مصاريف ووجع قلب في عمائلهم تاني»..
السائق: «لأ.. مادام ورق وبتاع هتلاقيهم.. بس على الله مايكونش

السواق رماهم ولا حاجة.. إنت نسيتهم في خط إيه».. قاطعه بائع الشاي: «ماهو مش فاكر يا هياما بس معانا رقم العربية وعايزينك تشوفهم.. وريله النمرة ياكابتن».. هنا قام يحيى بإخراج الهاتف فوقفه السائق.. «استني.. استني.. لو معاك نمرتها.. يبقى عليك وعلى الولا فاروق بتاع الكارثة.. هو اللي حافظ العربيات بنمرها بسواقينها بركابها ابن الهرمة.. روح اسأله علشان أنا ما بكلموش».. بائع الشاي مستنكراً: «ليه بس ياهياما.. إنتوا كل شوية تتخانقوا مع بعض ولا إيه».. هنا أمسك يحيى بيد بائع الشاي.. «بقولك إيه أوكا يا صاحبي.. عايزين نخلص موضوعنا وابقى اتكلم مع هياما بعد كده زي ما انت عايز».. تحدث إليهما السائق.. «روح معاه يا أوكا واقضي المصلحة وبعدين نبقى نرغي وأرسيك على الحوار كله».. بائع الشاي.. «ماشي ياهياما.. هجيلك تاني».. تحرك بائع الشاي بصحبة يحيى وتوجها إلى فاروق المسئول عن الكارثة وكان شاباً أسمر اللون يرتدي بنطالاً ترنج أزرق وفانلة بيضاء ويقف أمام مخرج السيارات ويحاوطة بعض السائقين ويحمل العديد من العملات النقدية بيده.. توجه إليه أوكا وأخذ يتحدث معه دون أن يبدي فاروق أي اهتمام وأجابه باقتضاب: «عايز إيه انجز مش فاضيلك»..

أجابه أوكا سريعاً.. «احنا بندور على العربية اللي رقمها ده (ن س و 825).. استمع فاروق إليهما بتمعن ثم تحدث إليهما مرتابا وهو ينظر ليحيى: «بتدوروا عليها ليه؟».. أجابه أوكا متلعثماً: «أصل . الب.. الكابتن.. نسي ورق بتاع».. قاطعهم فاروق بلا مبالة: «عربية محمد رمضان موقف العاشر».. ثم تركهم وأخذ يخبط على باب

سيارة منطلقة أمامه.. ابتسم أوكا سريعًا.. «موقف العاشر كويس ده ورانا على طول».. هنا شكره سريعًا يحيى وقام بإعطائه مبلغ 200 جنيه فنظر أوكا النقود بيده فرحًا «ما تخلي يا صاحبي..»
«الله يخليك تسلم».. سأله أوكا سريعًا.. «تحب آجي معاك أوريك المكان..»

يحي مقاطعًا.. «لا تسلم.. متشكر جدًا الله يخليك مش عايز أعطلك أكثر من كده»

«طيب خلاص هتكل أنا على الله.. لو عايز شاي ولا حاجة تعالي في أي وقت..»

«حبيبي تسلم يارب».. هنا تحرك أوكا عائدًا وهو فرح بينما تحرك يحيى سريعًا جهة موقف العاشر ليجد الموقف فارغًا من السيارات نهائيًا ولا توجد سيارة إلا السيارة التي حدثه عنها تقف أمامه سيارة بيضاء تويوتا ورقمها ن س و 825 وبداخلها زبائن وحوها عدد كبير من الركاب من لم يجدوا أي سيارة غير هذه.. قام يحيى على الفور بالاتصال على سامي فكري فأجابه سريعًا عكس كل مرة.. «ألو».. أجابه يحيى سريعًا.. «أيوه.. أنا واقف قدام العربية هنا في موقف العاشر في موقف التحرير».. أجابه سامي ملاحظًا.. «تمام قوي.. مهمتك الجاية تركب العربية دي وتوصل الركاب واحد واحد لحد بيته».. أثار هذا الحديث حفيظة يحيى الذي صرخ عليه مستنكرًا.. «نعم.. هو انتم عايزين إيه بالظبط.. مرة شحات ومرة سواق ميكروباص.. انتم بتعملوا فيا كده ليه»..

باقتضاب شديد: «كل واحد في العربية يوصل لحد بيته وبعد

ما تخلص كلمني.. نفذ..» ثم أغلق الهاتف.. أمسك يحيى الهاتف بيده غاضباً يريد أن يحطمه ولكنه حاول أن يهدئ أعصابه وهو ينظر إلى السيارة المحملة بالركاب وهو يحدث نفسه متنهداً.. «أوووف.. إهدا.. إهدا يا يحيى.. هيحصلك إيه أكثر من اللي حصلك يعني.. طيب هاروح العاشر ازاي.. أنا ما أعرفش الطريق.. أشغل الجي بي إس.. طيب هركب العربية.. طيب والسواق بتاعها.. طيب أوصل الناس لبيوتها إزاي.. هقولهم إيه.. مش عارف أنا بيحصلي كده ليه.. لا إله إلا الله».. تحرك يحيى جهة السيارة قلقاً وفتح بابها ودلف إليها، وما إن دلف إليها حيث وجد سيلاً من الصرخ عليه من جميع الركاب.. «كنت فين يا أسطى وسايينا ملطوعين كده.. أيوه ماهو انتم بتركبوا طوب مش بني آدمين.. يا جدعان اسكتوا يا جدعان ما صدقنا السواق جه.. ياعم إحنا راكبين بفلوسنا. يا كابتن يا إما تسكت يا إما تنزل خرينا نمشي عندنا أشغال وحياة أبوك».. ووجد يحيى نفسه فجأة بمواجهة موجة عارمة من غضب الراكبين بسبب شيء هو لم يكن له سبب به.. وهنا لم يجد سوى حلٍّ واحدٍ فقط لمواجهة هذه الموجة الغاضبة إلا أن يتقمص الأعصاب الباردة لسائقي الميكروباص وبالفعل فعل ذلك حيث قام بالنزول من السيارة ووقف بعيداً عنها.. فصرخ عليه بعض الركاب «يلا يا أسطى مش ناقصة عطلة..» أجابهم يحيى بحدة: «والله أنا كده واللي مش عاجبه ينزل وفي ألف غيره مستنيه ينزل».. وبالفعل التم عدد كبير من الركاب الذين يبحثون عن توصيلة لهم بجوار السيارة وحاوطوها وكانوا مترقبين لأي فريسة تقع ضحية هذا الاستفزاز ليركبوا هم بدلاً منه في الحال وهنا نزل على رؤوس ركاب السيارة الطير ولم ينطق

أحدهم بنت شفة.. هنا تحرك يحيى جهة مقود السيارة وتقمصه روح سائق المايكروباص بداخله.. فقام بتشغيل كاسيت السيارة وصرخ الكاسيت بإحدى أغاني المهرجانات السمجة التي كان يستمع إليها يحيى وهو متقززا ولكنه كان يتبع كود سائقي المايكروباص على الرغم عنه.. وأخذ يبحث عن مفاتيح السيارة فوجدها وسط بعض الحاجيات على تابلوه السيارة.. قام بتشغيل الجي بي اس ووضع الهاتف أمامه ثم تحرك من الموقف وسط حيرة العشرات من الراكبين الذين لم يسعدهم الحظ بتواجدهم بتلك السيارة.. ظل ينظر يحيى إلى الركاب خلفه بقلق وهو لا يجد مبرراً كيف سيخبرهم أنه سيوصله إلى بيوتهم ولكنه بعد تفكير عميق أراد أن يجرب حظه معهم بالنهاية فقام بإغلاق كاسيت السيارة وهم بمخاطبتهم بصوت عالي وهو قلقا.. «إحم.. لا مؤاخذه يا جماعة على التأخير بس غضب عني والله».. هنا سأله أحد الفضولين: «قولي يا أسطى.. هو انتم ليه عاملين إضراب النهارده؟ ما حدش من السواقين نزل خالص ليه».. نظر له يحيى مندهشاً.. «إضراب.. إضراب إيه».. سأله شاب آخر.. «الله.. هو انت مش سواق معاهم ولا إيه».. ازاى مش عارف».. هنا ابتسم يحيى عندما سنحت له فرصة لي طرح فكرته.. «آه معلش أصلي طول اليوم كنت مش موجود عقبال عندكم بقى الجماعة جابت حمزة النهارده بعد حرمان خمس سنين».. هنا صدحت ألسنة بعض الركاب بالتهنئة والدعاء له ولوليّ عهده الجديد.. فسألته إحدى السيدات البدينات في الحال.. «طيب هو في حد يسيب مراته وابنه يا ابني يوم ما ولدت وينزل الشغل».. هنا ضحك يحيى في الحال «أصل لو ما كنتش نزلت النهارده يا حاجة كان

زمانك واقفة في الشارع مع الواقفين».. هنا شعرت السيدة بالإحراج الشديد وصمتت في الحال وهنا تابع يحيى حديثه إليهم.. «أصل أنا كنت نادر ندر بصراحة.. إذا ربنا كرمني بالخلف الصالح في نفس اليوم هنزل الشغل واركب الناس كلها ببلاش وكان هو صلهم لحد بيوتهم كمان واحد واحد».. وهنا نظر يحيى إلى الركاب خلفه فوجدهم جميعاً صامتين.. فشعر بالقلق الشديد.. هل فشل مسعاه.. هل سيرفضون طلبه.. هل ستفشل مهمته أم ماذا.. كان صمتهم يدب الرعب في قلبه.. ولم يدر ما يقول.. وهنا جاءت إجابة سريعاً عندما قامت سيدة بإطلاق الزغاريد وهي تهنئه وتدعي له بالنجاح له ولولي عهده الجديد.. وصدق معظم الركاب بشكره والثناء على فعله الكريم هذا.. هنا ابتسم يحيى وشعر بالفرح لنجاحه في إقناع الركاب بمهمته وهي توصيلهم لمنازلهم..

ياسين جلس بسيارته بالقرب من مسرح الجريمة وأخذ يدون بورقة أمامه وهو يضع اسمي عمر فودة ومحمد فودة ويخرج من تحت كل اسم عدة خطوط وكتباً ملاحظات كثيرة أسفل كل اسم منهم.. ظل يحدق بالورقة أمامه كثيراً وهو يفكر بتمعن شديد ويحدث نفسه بصوت غير مسموع «عمر فودة اتقتل من سواق تاكسي بالليل.. والنهارده الصبح مات أبوه محمد فودة.. الاتنين كانوا من أكبر رجال الأعمال في المجال الطبي، ومحمد فودة كان في كلام إنه هيمسك وزارة الصحة للمرة الثالثة خلال أيام.. طيب عمر اتقتل ده شيء أكيد والقاتل بينكر إنه يعرفه أو شافه قبل كده وإنه

مش فاكر إنه قتله.. لكن كل الشواهد والأدلة أثبتت إنه هو اللي قتله.. بس لسه ما عرفناش الدافع إيه.. طيب اللغز هنا محمد فودة.. هل هو مات مقتول هو كمان زي ابنه.. ولكن الشهود والأدلة والبراهين بتقول عكس كده؛ إنه مات قضاء وقدر مع انتحار الشاب علي.. طيب صدفة إن الأب والابن يموتوا في خلال ساعات وفي أماكن مختلفة.. نظرياً آه.. لكن عملياً مستحيل إن الصدفة تبقى متقاربة كده.. الدافع وراموت عمر فودة هو اللي ممكن يكشف حل اللغز في القضية دي.. تقرير الطبيب الشرعي والأدلة الجنائية هتوضّحلي حاجات كتير لسه.. قطع تفكيره هنا دخول ضابط آخر أدنى منه رتبة وهو يحضر له بعض الأكياس البلاستيكية ويعطيها له بداخل السيارة.. «الحاجة آهي ياباشا».. طيب تمام قوي يا حمادة جبت المخلل والسلطة».. الضابط متأففاً.. «جبتهم.. جبتهم ياباشا.. وعلى فكرة أنا اسمي أشرف.. إنت ماسكلي اسم حمادة ده من الصبح».. أخذ ياسين يقضم الطعام بسرعة ويحدث ويتناثر الطعام من فمه.. «يا عم عادي.. ماهي.. كلها أسامي ربنا.. حمادة زي عبادة زي شحاتة.. أهو كله بيمشي.. ثم هو أنا عقلي دفتراً أنا كل يوم بقابل خلق ياما...» أخذ يشير إليه أن يأتي.. «تعالى تعالى.. تعالى خد سنادوتش طعمية.. دي بايته ومعمولة بزيت العربيات وطعمها زي الزفت تعالى».. شعر أشرف بالتقزز.. «لا يا باشا.. شكراً.. أنا بعثت الأمين يجيلي غداء والله».. سحبه ياسين من يده بقوة: «تعال يا عم دوق الزفت ده.. هاتسيني أروح المستشفى لو حدي.. خد.. إمسك».. فتح كيس الطعام وأخرج منه ساندوتش وأعطاه إياه.. وجلس يتناول طعامه بنهم شديد.. عندما شاهده أشرف هكذا

ابتلع ريقة وأمسك بالساندوتش بيده وقضم منه قطعة فبصقتها في الحال.. «إيه القرف ده».. أخذ يحدثه ياسين وهو يلوك الطعام بفمه بسرعة: «كل يابا مايمكش.. أو مال جايبين كل الممثلين علشان يتبرعوا لمستشفيات السرطان لله.. مش لازم يلاقولهم عيانيين.. كل.. كل ماتخافش.. معايا فول بالسوس تاخد؟».. نظر له أشرف بتقزز شديد وأمسك فمه وركض مبتعداً مسرعاً.. فأخذ ياسين يقضم من الساندوتش بيده وهو يضحك ساخرًا.. «باين عليه ظابط نونو من بتوع التجمع.. أو مال لما يشرب مائة مجاري هيعمل إيه..»



تعدت الساعة السابعة والنصف مساءً.. وكان يحيى يقوم بتوصيل آخر راكبة معه بالسيارة أمام مسكنها وأخذت تصدح له بصالح الدعاء.. كان مرهقا للغاية من كثرة أحداث هذا اليوم والمجهود الذي بذله.. شعر بالجوع الشديد والإرهاق يدب ببدنه فتوقف بالسيارة على أحد الأماكن الهادئة وقام بالاتصال على سامي فكري.. الذي كان في تلك اللحظة يقف أمام إحدى السيارات بمحطة وقود بملايس العاملين بالمحطة وأخذ يمسح زجاج إحدى السيارات بهمة شديدة وعندما سمع صوت هاتفه يرن ونظر عليه ليجد يحيى فقام بالانتهاء سريعاً من مسح السيارة الذي أخذ سائقها يضع بيده بعض الجنيهات كإكرامية فأخذهم سامي وهو يشكر بشدة ويحييه بيده.. ثم اتجه إلى مكان هادئ بجوار المحطة وقام بالرد على يحيى.. «ها.. نفذت المهمة».. جاءه صوت يحيى من الهاتف».. أيوه.. ووصلت كل الزباين لحد باب بيتهم بس في كام زبون مارضيش ونزل في محطته..»

سامي بلامبالاة: «مش مهم.. أهم حاجة باقي الزباين كانت مبسوطه.. شفت بقى مهاتك سهلة ازاي..؟»
بضيق: «سهلة قوي فعلاً»..

«طيب بمناسبة نجاحك في المهمة تحب تسألني عن أي حاجة؟»
بلهفة: «أيوه.. إنتم اخترتوني ليه.. وليه بتعملوا معايا كده؟»
ابتسم سامي بالحال: «وانا اللي كنت فاكرك هتسأل على ابنك ومراتك ياراجل..»

شعر يحيى بالخجل فسأله سريعاً: «أيوه فين مراتي وابني.. عاملين إيه دلوقتي؟»

أجابه سامي سريعاً: «ماتقلقش، ابنك خرج من العمليات من عشر دقائق والعملية نجحت وهو دلوقتي تحت الملاحظة.. هيقعد هناك لمدة يومين وساعتها تكون خلّصت باقي المهمات وتروح لهم بالسلامة..»

يحيى فرحاً: «العملية نجحت.. بجد.. طيب أنا عايز أتأكد.. أنا عايز أكلم مراتي سمر وأتطمئن منها بنفسي..»

سامي مبتسماً: «حقك طبعاً.. هخليك تكلمها بعد ما تنفذ آخر مهمة النهارده.. هي مهمة سهلة بس عايز منك مجهود شوية.»
يحيى قلقاً: «مهمة إيه؟»

معقّباً: «هتروح مستشفى الدقي الساعة ثمانية وربع.. تسأل عن الدكتورة منى الشيمي وتقابلها.»

يحيى بفضول شديد: «أيوه أقابلها وبعدين؟»

سامي بحدة شديدة: «تقنعا إنها تموت بنتها..»
يحيى مصدومًا: «إيه.. إيه إلى انت بتقوله ده انت اتجنتت.. أعمل
كده ازاي.. مستحيل طبعًا..»
سامي بثقة شديدة.. «نقد اللي يتقالك.. لو مانفذتش المهمة
دي اعتبر كل المهات اللي فاتت اتلغت وانسى انك هتشوف ابنك
ومراتك تاني..»

يحيى بغيظ شديد.. «اخ يا اولاد الكلب.. انتم مش بني آدمين أبدًا..»
بهذوء شديد.. «الموضوع واضح وصريح.. ياما تختار بنت مني
الشيبي ياما تختار ابنك..»

ابتلع يحيى ريقه وهو مندهش.. فتابع سامي حديثه: «الساعة
ثمانية وربع.. مستشفى الدقي.. منى الشيبي.. تخليها تموت بنتها..
نقد».. ثم أغلق الهاتف وتوجه مسرعًا وهو مبتسم جهة إحدى
السيارات بمحطة الوقود ويقوم بمسح زجاجها بهمة وهو يتحدث
إلى سائقها مبتسمًا: «كل سنة وانت طيب ياباشا».

بينما شل عقل يحيى بعد أن أنهى مكالمته مع سامي مصدومًا وهو
يحدث نفسه: «أقنعا تموت بنتها ازاي.. أعملها ازاي دي بس.. هو
في أعلى من الضنا في الدنيا دي».. أخذ يمسك رأسه مصدومًا يائسًا..
«أعمل إيه ياربي.. أعمل إيه؟»

تقف سمر أمام سرير ابنها وهي تنظر له بشفقة شديدة وهو مغطى
بمختلف الأنابيب والخرطوم الطبية وحوله العديد من الأجهزة الطبية..
ظلت تنظر له وهي تتم لنفسها: ربنا يشفيك يا حبيبي..

إن شاء الله كنت أنا.. ربنا يشفيك ويقومك بالسلامة يارب».. ثم نظرت بهاتفها غاضبة.. «هو راح فين يحيى بس.. إزاي يسبيني لو حدي كده أنا ومروان.. أكيد في حاجة مش طبيعية أنا مش متطمنة».. ثم قامت بالاتصال عليه من هاتفها.. ولكن بعد لحظات أغلقته بضيق..» مقفول برده.. من أول اليوم وهو مقفول.. لا دي حاجة ماتطمنش أبداً.. أنا لازم أسأل عليه الدكتور اللي جانبني هنا».. وهمت بالتحرك سريعاً إلى خارج الغرفة، ولكن عندما فتحت الباب وجدت على الفور سامي فكري أمامها وهو يتسم ويرتدي نظارة طبية ومعطفًا أبيض وحيًاها بترحاب حين رآها.. «أهلا يا مدام سمر.. حضرتك كتي خارجة ولأ إيه»..

سمر مرتبكة.. «أيوه.. كنت خارجة اسأل على دكتور معتز».. أجابها سريعاً وهو مبتسم: «وكتي عايزة معتز ليه يا مدام.. أو ميري..»

بقلق: «هو حضرتك مين؟»

مبتسمًا وهو يخلع نظارته ويمسكها بيده: «آه.. أنا آسف.. نسيت أعرفك بنفسي.. أنا الدكتور سامي فكري صاحب يحيى اللي معتز قالك عليه».. هنا شعرت سمر بالسرور «هو حضرتك الدكتور سامي.. أنا متشكرة جدًا جدًا لحضرتك.. إنت أنقذتنا أنا ويحيى بعملية مروان النهارده، أنا مش عارفة أشكرك إزاي»..

ابتسم سامي ووضع النظارة على وجهه مرة أخرى.. «لا شكر على واجب يا مدام سمر.. يحيى ده زي أخويا ودي أقل خدمة أقدر أعملها معاه.. هو ما حلكيش عني قبل كده ولأ إيه؟»

مرتبكة: «بصراحة لأ.. ولا مرة جاب سيرتك قبل كده»..
سامي ضاحكاً.. «أخ يحيى الخلبوص ده.. أصل أنا كنت أعرف كل
غرامياته والمواقف المحرجة بتاعته قبل الجواز.. فطبعاً مش هيقولك
على الصندوق الأسود لفضايحه.. بس أنا زعلان منه بردو.. إزاي
ماحكال كيش على... يمكن علشان أنا كنت مسافر بقى..»

«هو حضرتك كنت مسافر؟»

«أها.. أنا كنت مسافر كندا بقالي سبع سنين.. وكنت راجع
مصر من شهر ولحسن الحظ النهارده قابلت يحيى في السوبر ماركت
وماتعرفيش كنت مبسوط أدّيه من الصدفة السعيدة اللي جمعتني بيه
في اللحظة دي.. اتكلمنا عن حاجات كثير ومنها حالة الكتكوت
الصغير مروان وهنا ولحسن الحظ كان جاي معايا من كندا دكتور
متخصص في جراحة القلب لكنه لازم يسافر بكرة تاني كندا وعلشان
كده عملنا المستحيل أنا ويحيى النهارده علشان نوّفّر الظروف
لإجراء العملية النهارده قبل ما يسافر.. وعلشان كده يحيى ياعيني
من أول اليوم وهو مسحول في المواضيع دي ومش لاقى وقت حتى
يأكل.. بصراحة جوزك ده يستاهل ياخذ جايزة.. أنا للأسف هسافر
بعد يومين أنا كمان علشان كده مش فاضي لكن لولا كده كان زماني
مع يحيى دلوقتي خطوة بخطوة ماسبتوش».. ابتسمت سمر إليه:
«بصراحة أنا مع كلام الدكتور معتز ودربة موضوع العملية فجأة
الصبح ماكتتش فاهمة حاجة ومقلقه لكن دلوقتي حضرتك وضحتلي
الصورة كلها دلوقتي.. إنت ماتعرفش انت ربنا بعثك لينا نجدة من
السماء.. من غيرك ماكتتش هعرف أنا ويحيى هنعمل إيه..»

«ماتشكر نيش أنا.. اشكري الظروف السعيدة الي حطت يحيى في
طريقي..»

«بس أنا كنت قلقانة بصراحة ونفسي أتطمئن على يحيى.. لكن
تليفونه مقفول ومش عارفة أوصله».. «أها أنا قابلته من شوية
وقالي إنه تليفونه فصل شحن وهو مش فاضي دقيقة واحدة يشحنه
حتى.. سلم عليا على الواقف ومشي على طول»..
بلهفة شديدة: «إيه ده.. هو هنا؟»

«آه هنا.. تحبي تشوفيه؟ تعالي ورايا..»

تحرك سامي وتحركت خلفه سمر وتوجهها إلى خارج الغرفة
ووقفوا بالقرب من درابزين السلم وشاور بيده ناحية الكونتر بمكان
استقبال المشفى ليظهر لهما من بعيداً يحيى وهو يتحدث إلى إحداهن
منهمكاً: «آه يحيى هناك أهو.. شايفاه».. نظرت له سمر وهي فرحة
«آه فعلاً هو يحيى.. ده متبهدل كده ليه؟».. حدثها سامي سريعاً:
«مش بقولك مسحول من الصبح في الإجراءات والأوراق.. إنتي
عارفة الروتين في مصر عامل ازاي.. لو تأخر لحظة في الي بيعمله
كل الإجراءات دي هتبوظ ويبقى عمل العملية بشكل غير قانوني
وممكن يتحبس فيها.»

سمر مصدومة: «يانهار اسود يتحبس..»

«أومال إيه.. إنتي معتقدة إن الموضوع سهل للدرجة دي تعمل
عملية في يوم وليلة كده.. دي كانت فرصة ومجازفة كبيرة وكويس
إننا عرفنا نعمل عملية مروان».. بشفقة شديدة.. «ياعيني يا يحيى..»

وانا اللي كنت بلومك علشان مش جنبى أتاريك شايل كل الهم لوحدك».. أخذ يومى سامي لها برأسه متعاطفًا معها.. «الله يكون في عونہ.. تجبي أندهلك عليه؟».. ثم نادى على يحيى سريعًا.. «يحيى».. قاطعته سمر سريعًا.. «لا سيبه.. سيبه.. خليه يركز في اللي هو فيه.. ربنا معاه».. ثم نظرت إليه للحظات وعادة مسرعة إلى الغرفة ورمقها سامي وهي تنصرف ثم نظر إلى يحيى وأخذ يومى برأسه.. «ربنا معاه»..



قبل بضع دقائق كان يقف يحيى أمام المشفى وهو ينظر له بعيون حائرة لا تدري ماذا تفعل.. تنهد وهو يخطو بخطوات مترددة بداخل المشفى وهو متأكد أنه بمهمة مستحيلة التنفيذ.. ولكنه كان يطرد أفكاره السلبية تلك وهو يتقدم بخطواتٍ محسوبة جهة مكتب الاستقبال وهو يتتوي أن يتحصل على أهم سلاح بأي خطة وهي المعلومات.. وقف سريعًا أمام إحدى الفتيات باستقبال المشفى وحدثها بثقة: «سلام عليكم».. أجابته الفتاة سريعًا بلامبالاة: «وعليكم السلام.. أوامر».. يحيى مبتسمًا: «أنا رفعت حسن.. مُعد بقناة الحدث اليوم.. وكنا بندور على دكتورة تطلع معانا في برنامج طبي على القناة.. وأكثر من حد شكر في الدكتورة منى الشيمي.. هي عندكم هنا صح..» «أيوه هي هنا على طول».. «طيب ممكن أحصل على شوية بيانات كده عنها قبل ما أتكلم معاها علشان أشوفها مناسبة ولا لأ للبرنامج قبل ما أكلمها وماتنفعش وأتخرج وأخرجها معايا».. أجابته بارتياح: «معلومات زي إيه؟».. مبتسمًا:

«لأ عادي معلومات طبية عن التخصص بتاعها.. حاجات عادية يعني.. أنا معايا ليستة بالأسئلة لو تحبي تقريها..»

أجابته باقتضاب: «لأ والله ما عنديش بيانات عنها وكم ان مش فاضية».. هنا ابتسم يحيى وأخرج من جيبه 200 جنيه وأعطاهها لها: «طيب ممكن تدليني على حد يكون عنده بيانات كافية وفاضي».. أخذت منه النقود وهي مبتسمة: «اسأل عن الممرضة منال في الدور الثاني.. قولها إنك من طرف سهام وراضيها وهي تقولك على كل اللي انت عايزه».. هنا سمع يحيى شخصاً ينادية فنظر خلفه سريعاً فلم يجد أحداً.. فنظر إلى فتاة الاستقبال مبتسماً: «طيب متشكر جداً».. ألف شكر».. ثم تحرك إلى الطابق الثاني وسأل أكثر من شخص حتى وجد ضالته؛ الممرضة منال وهي سيدة بدينة في نهاية العقد الخامس من عمرها كانت تجلس بغرفة مع ثلاث ممرضات أخريات يرتشفن الشاي ويتضحكن.. فدلف يحيى جهتهن وألقى السلام عليهن: «السلام عليكم.. مدام منال هنا».. أجابته إحداهن: «وعليكم السلام.. أيوه مين؟».. أجابها يحيى سريعاً: «أنا رفعت حسن مُعد بقناة الحدث اليوم جاي من طرف سهام بتاعة الاستقبال بعثتني لمدام منال علشان أعرف منها كام حاجة كده».. هنا حدّثته منال مبتسمةً: «أهلاً.. أهلاً بالصحافة والتلفزيون.. أنا منال.. أو مرني».. «الأمر لله.. بس كنت عايز أتكلم مع حضرتك خمس دقائق كده على جنب»..

أجابته مبتسمة: «آه طبعاً طبعاً من عيوني يا بيه».. تحدثت إحدى زميلاتهما إليها: «طيب هنسيبك دلوقتي يا منال ونرجعلك تاني»..

أجابتها سريعاً: «ماشي يا بنات..» تركاها زميلاتها وجلس يحيى بجوارها سريعاً وهي تسأله بفضولٍ: «أؤمرني يابيه».

«الأمر لله.. إحنا في القناة بنعمل برنامج طبي ومرشحين دكتورة عندكم هنا اسمها منى الشيمي وطبعاً قبل ما نكلمها لازم نعرف معلومات عنها كويس علشان انتي عارفة فيه فئات في الدكاترة عندنا فيه اللي بنديهم فلوس كتيرة لو دكتور مشهور وفيه اللي بنديله حاجات بسيطة وفيه اللي بيدينا إحنا فلوس.. علشان كده لازم أعرّف معلومات عن كل دكتور بنجيبه علشان نحدد هنتعامل معاه ازاى.. وطبعاً ماتقلقيش كلامك ده هيبقى في الحفظ والصون وفي نفس الوقت هنعوض تعبك ده.. القناة هتديكي في الخمس العشر الدقائق اللي هنقعد مع بعض 500 جنيه.. ها إيه رأيك؟»

بفرحٍ شديدٍ: «500 جنيه.. عيوني يابيه.. اللي انت عايزة اسأل عنه..»

هنا أخرج يحيى من جيبه ورقة وفردها أمامها: «دي قائمة بالأسئلة اللي بنسألها عن كل الدكاترة.. الأول بيانات عن الحالة الاجتماعية وكده.. متجوزة.. متطلقة.. مخلفة أولاد.. الحاجات العادية دي».. أخذت تفكر قليلاً: «هي مطلقة دلوقتي.. وجوزها كان دكتور مشهور شغال معانا هنا.. لكن من ساعة اللي حصل لبتها يا عيني وقعدوا يتخانقوا مع بعض فترة طويلة وبعدين انفصلوا».. هنا سألتها يحيى متلهفًا: «حصل إيه لبتها طمينيني؟»

«كانت بتلعب مع صحابها في المدرسة يا عيني ووقعت على راسها من مكان عالي ودخلت في غيبوبة بقالها خمس سنين بعيد عن السامعين»..

بدا التأثير على وجه يحيى: «لا حول ولا قوة إلا بالله.. طيب والغيبوية دي ماهاش علاج؟»

«هو أنا كنت متابعة الموضوع ده فترة ساعتها سمعت إن الغيبوية دي نادر جدًا لما تزيد عن أسابيع ولو قعدت أكثر من كده بتتحول لحاجة اسمها.. اسمها إيه ياربي.. أنا كنت معلماها بالخضرة.. حالة.. حالة نباتية.. لأ استنى.. آه حالة إنباتية.. لأن المريض فيها يبقى بيتنفس وينمو لكن مش واعى ولا بيتحرك زي النبات.. هولها كلام علمي كثير بس أنا مش فاكره خالص دلوقتي».. أخذ يحيى يحدث نفسه مندهشًا: «غيبوية.. علشان كده.. فهمت دلوقتي..»

منال بفضول: «فهمت إيه؟».. هنا جاوبها يحيى سريعًا: «يعني مفيش أي أمل لعلاج البنت دي من الغيبوية؟».. منال بصوت خافت: «ماهو ده اللي زعل الدكتور منى مع جوزها.. بعد سنتين من دخول البنت الغيبوية ياعيني.. أبوها كان عايز يفصل عنها الأجهزة علشان هو قالها كان ممكن في أمل لو البنت في الحالة الإنباتية دي.. لكن بنتهم ياعيني كانت في موت دماغي.. يعني مخها ميت تقريبًا.. وقالها إن الحالة دي ماهاش علاج وإن البنت تعتبر ميتة خلاص.. لكن الدكتور منى رفضت ياعيني وهي لسه عندها أمل إنها ترجع تاني مع إن تكاليف العلاج بتاعة البنت بتخرب بيتها كل شهر بس هي صابرة ومستحملها ربنا ما يوري الي فيها لحد يارب».. هنا تحدث إليها يحيى سريعًا: «لأ دي كده لازم نساعدتها بقى.. أنا هخلي البرنامج يتفق معاها ويديها فلوس كمان».. منال بلهفة: «آه والنبى.. دي ولية غلبانة ومحتاجة الي يساعدوها».. مبتسمًا:

«واضح إنك بتحبي الدكتوره منى قوي يا ست منال..»
«طبعا دي ست سكرة وسمحة وعمرها ما قالتلي كلمة وحشة
ولا اتنكت عليا زي ما باقي الدكاترة بتعمل.. دي حتى ضايفاني
عندها على الفيس بوك والانستجرام».. هنا ابتسم يحيى في خبث..
ثم أخرج من ملبسه نقوداً وأخذ يعدها أمام منال التي ابتلعت
ريقها عندها مشاهدتها للنقدية أمامها: «طيب أنا كنت عايز أبص
بصة سريعة كده على صفحات الفيس والانستجرام عندها يا ست
منال لو تسمحني يعني؟».. منال أخذت تنظر للنقود وهي مترددة:
«أيوه يابيه.. بس دي حاجات خاصة واحنا حريم لامؤخدة وكده»..
يحيى ملاحظاً: «متقلقيش ده أنا هبص بص سريعة من على موبايلك
وانتي هتبقي جنبي وشايفة كل حاجة.. بس دي حاجات مهمة
علشان تقيّمها في البرنامج.. إنتي مش عايزة تساعديها ولا إيه».. ثم
أعطاهم النقود مبتسماً.. فأمسكتها بسرعة ولهفة وهي تعدهم بالحال:
«لا طبعا عايز أساعدها.. عيوني حاضر يابيه..»

ثم أخرجت هاتفها من ملبسها وأخذت تضغط على بعض
الأرقام عليه وأعطته وهي مترددة إلى يحيى وظلت بالقرب منه
ترقب ما يفعل.. أخذ يبحث يحيى سريعاً على الفيس بوك ولكنه
تركه سريعاً وأخذ يتعمق في صفحات الانستجرام ويرى صور منى
الشيخي مع ابنتها في أماكن مختلفة وهي تلهو وتلعب ويبدو على
الصور أنها قديمة.. أخذ يقرأ عناوين الصور بتمعن والتعليقات
أسفل منها وظل هكذا لفترة طويلة قاربت على النصف ساعة
وشعرت منى بالضجر منه ومن وجوده خاصة بعد أن امتلكت

النقود.. فتنهدت سريعاً.. فهم يحيى سريعاً ما بحلقها.. فأعطاها الهاتف وهو يشكرها: «متشكر جداً جداً لتعبك معاً يا ست منال.. ممكن بقى تقوليلى ألاقى الدكتور منى فى فى؟»

«لا شكر على واجب يا بيه.. الدكتور منى هتلاقىها فى الدور الخامس أوضة 78.. دي الأوضة اللي فيها بنتها ربنا يشفيها».. ابتسم يحيى وهو ينصرف فى الحال مودعها.. اخترق المشفى سريعاً وتوجه إلى الطابق الخامس وظلَّ يبحث عن غرفة 78 حتى وجد ضالته.. انقبض قلبه فى الحال عندما شاهد الغرفة أمامه.. على الرغم من معرفته بحالة الفتاة الميؤس من شفائها ولكن محاولة إقناع أمها بالتخلي عن حياتها مازال شيئاً صعباً ومؤملاً فى نفس الوقت وقد يكون مستحيلاً.. ولكنه لم يكن لديه أى بديل سوى أن يجرب حظه مع تلك التجربة.. طرق الباب وهو يتلع ريقه للحظات ومن ثم سمع صوتاً نسائياً هادئاً يجيبه: «ادخل».. فدخل يحيى إلى داخل الغرفة التي كانت صغيرة الحجم وممتلئة بالأجهزة الكهربائية وتقف أمامه منى الشيمي التي كانت بيضاء ممتلئة قليلاً وببداية العقد الرابع من العمر.. وبجوارها سرير تنام عليه فتاة غير واضحة الملامح وجسدها ووجها ممتلئان بالأنابيب والأجهزة الكهربائية ويبدو عليها أنها فى سن 11 أو 12 عاماً تقريباً.. قابلته منى بالحال بملامح ممتلئة بالفضول: «أيوه.. أوامر حضرتك».. تحدّث إليها يحيى بالحال: «حضرتك الدكتور منى الشيمي»..

أومأت برأسها بالحال: «أيوه أنا منى الشيمي».. اقترب يحيى من السرير وهو يشير إلى الطفلة فوقة.. «يبقى أكيد دي نادين بنت

حضرتك».. مستنكرة: «أيوه هي.. حضرتك مين؟».. نظر إليها مبتسماً: «أنا محمد شلبي».. ثم تابع حديثه وهو ينظر إلى الطفلة: «حضرتك بتؤمنى بالقدر يادكتورة».. نظرت له باقتصابٍ: «مش فاهمة»..

«قصدي إنك بتعتقدي إن كل حاجة بتحصل هي بإذن ربنا..»

«آه طبعاً ده شيء مافهوش نقاش».. مبتسماً: «طيب يبقى تمام جداً.. حضرتك هتسهلي عليا كلام كتير من اللي عايز أقولهولك».. سألته بحدة: «حضرتك مين وعايز إيه؟».. ابتسم لها: «هقولك حالاً.. أنا زي ماقلتلك اسمي محمد شلبي.. واحد لا يعرفك ولا تعرفيه.. مش معروف أو مشهور.. مفهوش أي شيء مميز في حياته إلا إنه بيزوره ناس طيبة في منامه.. منهم واحدة جميلة ورقيقة وعلى طول بتضحك وتلعب.. جات تقوله عايزاك تبعت رسالة لماما.. تقولها إنها فاكرة لما كانت بتروح الفسطاط معاها.. وفاكرة لما كانوا بيروحووا ياكلوا دُرّة في البلد مع خالته.. وفاكرة لما اتعورت وتعبت وماما مانامتش علشانها وعارفه إن ماما بتحبها جداً.. حتى لما كانت بتزعقلها وتتخانق معاها».. نظرت له منى مصدومة من حديثه ولذكرة أحداث حدثت مع ابنتها نادين من قبل.. وظلت تتابع حديثه باهتمام شديدٍ وبدت عيناها تنضحان بالدموع.. فأشاح يحيى بناظره عنها وأخذ ينظر للطفلة ويتابع حديثه: «كانت فاكرة إن ماما بتزعقلها علشان متضايقه منها.. لكنها فهمت دلوقتي إن ماما كانت بتعمل كل ده علشان بتحبها.. بس هي بتعاتب ماما.. بتقولها إنها تعبت.. تعبت كتير وعايزة تستريح.. ليها صحاب كثير بيحوا يلعبوا

معاها وبيروحا مكان كله خضرة ويقولوها تعالي معنا.. وهي بتقولهم ماما مش راضية».. هنا سمع منى خلفه وهي تنفجر باكية بعد سماعها تلك الكلمات.. بكاؤها هذا أشعر يجي بالاضطراب وحاول أن ينظر إليها ولكنه تراجع سريعاً وظل يكمل حديثه وهو يستمع إلى نحيبها خلفه».. قالتلي قول لماما.. أنا عايزة ألعب وأجري من تاني وأبقى مبسوطة مع صحابي».. صرخت عليه منى وهي تبكي: «إنت.. بُصلي.. إنت عرفت الحاجات دي كلها منين؟!».. ابتلع يجي ريقه ونظر إليها ووجها قد أصبح أحمر اللون وعيناها تنضحان بالبكاء الشديد.. مشهد دموعها هوى بقلبه أرضاً وشعر بالشفقة الشديدة عليها، ولكنه تذكّر وجه ابنه فأغلق عينيه بصعوبة وهو يحاول التركيز: «زي ماقلتك يادكتورة.. أنا أول مرة أشوفك وتشوفيني.. لكن مش أول مرة أشوف نادين وأقعد أتكلم معاها.. كانت بتجيلي كل يوم في منامي ونقعد نتكلم مع بعض بالساعات».. أمسكت منى بفمها بصدمة للحظات وهي تبكي ثم سألته سريعاً: «إنت بتكلم بجد.. إنت شفت نادين وقعدت معاها؟».. أوما يجي براسه بالإيجاب: «أيوه.. أيوه.. بقالها إسبوعين بتجيلي كل يوم».. نظرت له بتحدّ: «إنت بتكذب عليا.. إنت كذاب.. مسعود طليقي اللي بعثك علشان تكذب عليا مش كده؟!».. شعر يجي بالاضطراب هنا للحظات.. ثم ابتلع ريقه وحدثها: «والله العظيم أنا ماشفت طليقتك ده ولا سمعت عنه إلا منك دلوقتي.. يادكتورة أنا عارف إن الموضوع صعب عليكى ولكن فكري للحظات كده.. أنا هستفاد إيه من إني أكذب عليكى.. أنا أول مرة أشوفك.. ولولا رسالة نادين اللي كانت عايزة تبعثها ليكي ماكتتش حطيت نفسي

في الموقف المحرج ده أبدأ..».. أمسكت منى رأسها وهي تبكي
مصدومة، فتابع يحيى حديثه إليها: «أنا عارف اللي بقولهولك ده
صعب.. أنا حاسس بيكي».. ثم نظر إلى نادين وهي على سريرها
وأخذ يتحدث بصوت هادي: «الأطفال دول كائنات غريبة.. على
الرغم من كل مشاكلهم والقرف اللي الواحد يشوفه علشانهم..
ولكن بينسى كل التعب والهمل ده بمجرد ما يشوف ابتسامتهم.. ده
بساوي الدنيا واللي فيها عنده».. أخذت تستمع منى إليه وهي
تتحسس رأس ابتها.. وتابع يحيى حديثه إليها وهو مبتسم: «أنا
اشتغلت سواق ميكروباص واشتغلت شحات ومستعد أشتغل أي
حاجة وأعمل أي حاجة علشان ابني.. ولكن في نفس الوقت أنا
بعمل كل ده علشان أسعده بأي طريقة.. حتى لو كانت إني أضحي
بسعادتي أنا وأسيبه يرجع لي خلقه»..

هنا نظرت له منى مصدومة وهي تبكي: «لكن في أمل.. كل يوم
الطب بيتقدم.. في أمل في يوم من الأيام ترجع زي الأول»..

تنهد يحيى وأخذ يُحدثها بهدوء: «أنا متأكد إنك عايزة بنتك تخف
وترجع زي الأول.. لكن هي نفسها قالتلي إنها بتتعذب. تحبي انتي
تبقي مرتاحة وانتي عندك أمل بعلاجها ولكن في الحقيقة نادين
متعذبة.. صدقيني ده مش حب.. دي أنانية.. الحب يخلينا نتخلي
عن اللي بنحبه علشان يعيشوا سعداء ومرتاحين في أي مكان تاني..
مش لازم يكون معانا.. ليه نتمسك بحياة صغيرة مليانة ألم وعذاب..
مدام هنقدر نعيش مع بعض في مكان تاني للأبد..»

هنا انفجرت منى في البكاء وهي تحدثه بأسى: «كان نفسي أشوفها

بتجري حواليا من تاني.. كان نفسي تسمع ودني ضحكتهازي الأول..
كان نفسي تقولي أنا عايضة آكل بيتزا من اللي بتعملها ياماما.. كان
نفسي أفرح بيها وأشوفها بفستان الفرح مع جوزها وألعب مع
ولادها.. هنا لم يستحمل قلب يحيى هذا الحديث وكاد يبكي ولكنه
حاول التماسك بعد أن دمعت عيناه فمسحها بالحال.. وهنا اتجهت
إليه منى وأمسكته من ملابسه بترج: «إنت بتشوفها بجد.. طيب
قالتلك إيه.. احكي لي كانت بتقولك إيه؟.. أرجوك».. هنا قام يحيى
بمحاولة التماسك وهو يتذكر عدة صور برأسه لنادين ومعها أمها في
أماكن مختلفة وكانت تضعها على الانستجرام.. وأخذ يسرد لها من
مخيلته مواقف من وجهة نظر نادين حينها.. واختلق الكثير منها..
واستعان بأشياء حدثت معه هو شخصياً وابنه مروان وأخذ يُحدثها
بكل ذلك وظلت تستمع إليه منى باهتمام شديد وفوق وجهها
الحزين ابتسامة خافتة.. مرّ الوقت سريعاً إلى ما يقارب الساعة.. هنا
تحرك يحيى من مكانه بهمة وقد لاحظ مدى التأثير على وجه منى
فسألها سريعاً: «أنا هضطر أمشي دلوقتي.. بس كنت عايز أعرف
منك.. لما نادين تسألني النهارده.. ماما هتخليني أروح لأصحابي ولا
لسه سايباني أتعذب.. أرد ساعتها وأقولها إيه؟»

هنا وقفت منى وهي تمسح دموعها: «الناس كلها كانت بتقولي
مفيش أمل.. الدكاترة والإخصائين كلهم قالوا كده.. وانا كنت
بهاجمهم وصدهم دائماً.. حتى جوزي مسعود سييته علشان خاطر
نادين.. ومستعد أقف في وش الدنيا كلها علشان خاطر بنتي.. لكن
ماقدرش أبداً.. أبداً.. أعذب بنتي.. لو سمحت سيبي مع بنتي
لو حدي».. هنا شعر يحيى بالاضطراب الشديد.. فلقد طلبت منه

منى المغادرة ولكنه لم يدرِ ما الذي ستفعله بعد.. هل نجحت خطته أم لا.. لم يكن له بد سوى أن نظر إلى نادين فوق سريرها ورمق منى التي أشاحت بنظرها عنه فوق قلبه بقدمه.. وتحرك إلى خارج الغرفة وأغلقها خلفه.. ووقف خلف الباب يلوم نفسه على ما فعله وتلاعب بمشاعر تلك الأم المكلومة.. هو لم يعلم هل ما فعله هذا جيد أم لا.. ولكنه تذكر ابتسامة منى الخفيفة عندما استمعت إلى حكايته وأشعره هذا بالاطمئنان قليلاً.. تنهَّد وهو ينظر إلى الساعة التي كانت تقترب من العاشرة وهو لا يعلم ماذا سيقول لسامي.. هل نجحت مهمته أم فشلت ولكن جاءه الرد سريعاً من داخل الغرفة عندما سمع إلى صوت ماكينة توقف القلب وهي تدوي بقوة ولم يغلبها إلا صوت منى الشيمي وهي تصرخ من داخل الغرفة وتبكي وتنادي على اسم ابنتها نادين.. صوت منى وهي تناجي ابنتها مزق قلب يحيى ولم يستطع أن يغالب دموعه التي انهمرت وهو يغادر من خلف الباب..

تغلَّب يحيى على دموعه وهمَّ بمغادرة المشفى وقام بالاتصال على سامي الذي أجابه سريعاً: «مبروك لنجاح مهمتك يا يحيى.. بصراحة ما كنتش متوقع إنك تقدر تعملها..»

أجابه يحيى: «أنا مش هسامحك أبداً.. أبداً على اللي إنت عملته فيها ده.. أنا عايز أكلم مراتي دلوقتي».. أجابه سامي سريعاً: «طبعاً هتكلمها زي ما اتفقنا.. أهم حاجة ماترو حش بيتك أبداً الفترة دي رجالة البهادرا مستنينك هناك.. روح في أي مكان يكون بعيد عن العيون.. مهماتك النهارده انتهت.. إستنى اتصال من مراتك الساعة 11..»

سلام يا بطل».. أغلق يحيى الهاتف وهو يحاول أن يعلم ما الأسباب التي خلف تلك المهات غير المفهومة أبداً.. ولكنه لم يجد مغزى مهما حاول التفكير بعقلانية.. ظلّ يتحرك على غير هدى وتوقف بإحدى الحدائق العامة وفرش جسده على الأرض ليتسريح، لم يمضِ كثيراً حتى وجد هاتفه يرن فقام بالرد عليه فاستمع إلى صوت زوجته وهي تحدّثه: «يحيى.. إزيك يا حبيبي».. هنا انتفض قلب يحيى في الحال وهو يستمع إلى زوجته مصدوماً.. فهو كان يمنيّ نفسه بأن زوجته وابنه ليسا مع سامي وأن الأمر كله مجرد خدعة ولكن ها هو يستمع إليها.. شعر بالحيرة وعدم التصديق لثوانٍ: «سمر.. إزيك يا سمر».. أجابته وهي تشعر بالفرح الشديد: «أنا الحمد لله.. مروان عمل العملية يا يحيى ونجحت الحمد لله».. سأها بفضول شديد وهو فرح: «بجد يا سمر العملية نجحت؟».. «آه والله.. العملية نجحت وإن شاء الله مروان هيبقى كويس وزى الفل».. هنا سمع صوت شخص يتحدث بجوارها.. «هاتيه أسلم عليه».. تحدث إليه سمر في الحال: «خد الدكتور سامي فكري صاحبك عايز يسلم عليك».. هنا قفز قلب يحيى في الحال من مكانه عندما استمع إلى صوت سامي يحدثه ثانية: «أيوه يا يحيى.. إزيك يا بطل.. أنا مع المدام ومروان أهو بتظمن عليهم».. صرخ عليه يحيى غاضباً «إنت يا وسخ انت إبعد عن مراتي وابني إنت فاهم؟».. أجابه سامي مبتسماً وبلامبالاة: «أيوة يا حبيبي ماتقلقش.. دول في عيني.. خد كلم المدام وهسيبكم أنا على راحتكم».. ثم عاد صوت زوجته من جديد يحدثه: «يحيى».. أجابها سريعاً: «أيوه معاكي يا سمر».. فرحة: «أنا متشكرة أوي أوي على اللي عملته النهارده.. سامي فكري صاحبك قالي على التعب

اللي تعبته النهارده علشاننا».. يحيى مصدومًا: «قالك.. قالك إيه بالظبط..؟»..

«قالي على التعب والتنظيط من مكان لمكان علشان تخلص اجراءات العملية لمروان النهارده قبل الدكتور الكندي مايمشي».. مضطربًا.. «اه.. اه.. فهمت.. لا كل حاجة تهون علشانكم يا حبيبتى.. معلش ياسمر أنا مشغول قوي ومش هتقدرى تشوفيني اليومين الجايين دول..»

«آه يا حبيبي ماهو سامي قالي.. وانا كمان شفتك النهارده وكان باين عليك البهدلة يا عيني..»

يحيى مصدومًا: «إيه.. شفتيني.. شفتيني فين؟»

«شفتك من كام ساعة كده في المستشفى وانت بتخلّص الورق وسامي نادى عليك بس مارضتش أقلقك».. هنا كان سينفجر يحيى من الغيظ الشديد.. ولكنه أتبعها متسائلًا: «إنتي لسه في المستشفى دلوقتي يا سمر..»

«لا يا حبيبي.. ودونا مستشفى تانية بس مش عارفة فين علشان كنت جوه عربية الإسعاف مع مروان.. يقولوا دي المستشفى اللي مروان هيقعد تحت الملاحظة فيها.. سامي قالي إنه بلغك.. هو مابلغكش؟».. يحيى متلعثمًا: «لأ.. قالي قالي.. بس كنت فاكر إنكم هتروحوا بكرة مش النهارده».

«أصلهم قالولي إنه لازم يبقى في مستشفى متخصصة للعمليات دي وكان لازم ينقلوه النهارده»

في صباح اليوم التالي كان الضابط ياسين يجلس على مكتبه وهو يبدو عليه أنه لم ينام جيداً.. ظل يقرأ في الأوراق أمامه وصور عمر ومحمد فودة ومنهم على المنتحر ويسجل بعض الملاحظات.. قام أحد الأمناء بالطَّرق على الباب ثم دلف سريعاً إليه ووضع له قهوة على المكتب أمامه.. فحدثه ياسين سريعاً: «متشكر يا حمادة.. معلش الواد العسكري حمادة بعته يجيلي سجائر وخرمان أوي».. الأمين ضاحكاً: «إنت تأمرني ياباشا.. أنا خدّام ساعتك».

أخذ ينظر للتلفاز خلفه وهو يصدر إعلان بصوت عالٍ: «باور فانك أفضل مشروب طاقة تبدأ بيه يومك.. باور فانك معاك طول اليوم الساعة 10 تشربه وانت راكب عربيتك».. أخذ ينظر ياسين إلى الأمين وهو يتابع الإعلان باهتمام فابتسم وهو يرتشف قهوة: «إيه يا حمادة.. إنت أول مرة تشوف حريم في الإعلانات ولا إيه».. الأمين محرّجاً: «لا والله ياباشا.. أم العيال كفياني والله.. أنا بتفرج على الإعلان بتاع باور فانك.. أصله مشروب حلوقوي».

ساخرًا: «إنت بتأكل من الكلام ده يا حمادة؟ ياد ده شغل

إعلانات.. مشروب إيه اللي يخليك عندك طاقة.. وتقعّد تجري في الشوارع زي ما عاملين.. ده الواحد بيطلع السلم ينهج دلوقتي». مبتسماً: «لا يا باشا لا مؤاخذة جلت منك المرة دي.. أنا مجربه بنفسي وبصراحة طلقة.. بص هو عامل زي التامول كده بس الفرق إنه مُرخص ومش ممنوع..»

ياسين يداعب ذقنه باهتمام: «ياراجل زي التامول.. ويعمل نفس مفعوله في كل حاجة؟»

الأمين مبتسماً ويشير له بعلامة ok.. «يعمل مفعوله في كل حاجة يابيه.. عن تجربة..»

متردداً: «طيب.. طيب لو كده.. روح هاتلي علبتين منه.. أنا جسمي مهدود وعايز حاجة تفوقني.. خصوصاً إني رايح المديرية بعد شوية».. الأمين يحرك سبابته أسفل عينيه: «بس كده.. عيوني ياباشا.. بس انت رايح ليه المديرية بدري كده؟»

متنهداً: «عاملين لنا اجتماع.. شكله في تكليف كبير هيتم».. وضع يده في جيبه وأخرج مبلغاً مالياً وأعطاه للأمين.. «خُدد.. هاتلي اتنين من الباور حمادة ده.. على السريع.. هشربه وأطلع على المديرية على طول».. الأمين يمد يده بالنقود مرة أخرى.. «ما تخلّوها علينا المرة دي يا باشا».. ياسين بضيق: «يا عم يلا انت هتمثل.. ده انت لو لقيتني جنيه هتاخده.. يلا اتكل على الله.. عايزهم على السخان.. مش تروح تموت زي العسكري ابن.. بيحبلي سجاير من الصومال بروح أمه».. تحرك الأمين إلى خارج المكتب مسرعاً.. بينما ظل ياسين

يحدق بشاشة التلفاز ويتابع الإعلانات وهو يحدث نفسه: «أنا إيه اللي دخلني الشرطة بس.. ماكنت دخلت طب بيطري ولا زراعة مادام كده كده بتعامل مع بهائم.. يلا.. كلنا في الآخر هتعلق من الترتره».



وقف يحيى يتناول طعام الإفطار أمام إحدى عربات الفول بأحد الشوارع وهو يبدو عليه الإنهاك الشديد وأخذ يتابع بعينه بتمعن محيطه بحرص شديد ويتتبع حركة المارة ليرى هل هناك من يراقبه فلم يجد.. ظل يدقق في الكاميرات حول المباني فلم يجد منها الكثير.. انتهى من تناول طعامه وأعطى للبائع بضعة نقود وتحرك مغادراً بثقة وبهدوء شديد فهو قد أعد كل شيء برأسه مسبقاً ولم يتبق إلا أن ينفذ خطته الآن.. تحرك يحيى في الشوارع المختلفة حتى وجد ضالته؛ شارعاً هادئاً قليلاً لا يوجد به أي كاميرات فتوقف بوسط الشارع متأهباً وهو ينظر للمارة بتمعن فوجد ضالته؛ شخصاً ملابسه ممتلئة بالألوان ويحمل حقيبة ممتلئة بأدوات النقاشة فتوجه له يحيى مبتسماً: «سلام عليكم يا أستاذ».. الرجل مرتاباً: «وعليكم السلام».. يحيى سريعاً: «ممكن أعمل من عندك تليفون صغير.. أصل تليفوني فصل شحن ومحتاج أكلهم في الشغل أقولهم إني هتأخر شوية.. وهديك 200 جنيه أهم..» ثم أخرج 200 جنيه وأعطاهم للرجل الذي أخذهم متردداً: مكالمة.. ها.. طيب.. حاضر».. ثم قام بإخراج هاتفٍ صغيرٍ من ملابسه وهو يشير ليحيى عليه: «بُص وانت بتكلم اقلبه علشان صوته واطي شوية.. معلش بقى تليفون رخيص كده

جايه علشان مابدلش التليفون الثاني في الشغل».. أمسك يحيى الهاتف بيده فرحاً: «لا ده كده هو عز الطلب.. ده أحلى حاجة التليفونات الرخيصة ولا جي بي اس ولا حد يتتبعك ولا أي حاجة.. تسلم هعمل مكالمة على السريع حالاً».. أمسك الهاتف وأعطى ظهره للرجل الذي ظل يتابعه بتحفزٍ شديدٍ ويحيى ينظر إلى الهاتف قلقاً ثم نظر حوله فلم يجد أيَّ شخصٍ بالشارع غيرهم فابتلع ريقه وضغط على رقم النجدة 122.. ثم انتظر حتى سمع صوت رنين الهاتف على الجهة الأخرى فدق قلبه بشدة وهو يترقب ما سيحدث.. لحظات قليلة حتى سمع صوتاً هادئاً وواضحاً: «122 بوليس النجدة».. انقبض قلب يحيى في الحال وأخذ يجيبه مسرعاً: «ألو.. لو سمحت أنا عندي مشكلة كبيرة قوي ومحتاج مساعدتك فيها».. هنا لم يسمع يحيى أي إجابة نظر إلى الهاتف فوجد المكالمة قد انقطعت.. فنظر للرجل صاحب الهاتف سريعاً ثم ضغط على الرقم 122.. ليستمع إلى صوت رنين مرة أخرى ثم انقطعت المكالمة.. نظر يحيى باندهشٍ إلى الرجل.. «المكالمة كل شويه بتقطع كده في حاجة في التليفون ولا إيه».. أخذ الرجل الهاتف من يده سريعاً وتفقدته: «لأ.. هو الصوت واطي لكن مايقطعش».. هنا رن الهاتف بيد الرجل.. فنظر إلى يحيى ثم أجاب الهاتف سريعاً.. «ألو.. لأ مش أنا.. هو جنبي أهو».. ثم أعطى الرجل الهاتف ليحيى.. «في ناس عايزينك».. التقط يحيى الهاتف سريعاً وهو فرح.. «ألو.. بوليس النجدة».. ليظهر له صوت سامي فكري وهو يصرخ به بحدة.. «عايز بوليس النجدة ليه يا يحيى؟».. هنا شعر يحيى بالصدمة الشديدة وأخذ ينظر حوله بتمعنٍ عن أي شخص يراقبه فلم يجد.. بينما تابع سامي حديثه

بغضبٍ.. «أنا بحذرك يا يحيى للمرة الثانية والأخيرة.. أفعالك هتخسرك مراتك وابنك.. ماتفتكرش علشان إحنا مش شايفينك بالكاميرات يبقى مش عارفين انت فين وبتعمل إيه.. لو كررت الموضوع ده مرة ثانية أو ضيعت التليفون أو حاولت تتخلص منه.. هيبقى جيم أوفر.. ومفيش تحذير تاني».. وأغلق سامي الهاتف سريعاً وأصبح يحيى ينظر إلى الرجل أمامه مصدوماً.. فأشار الرجل إلى يحيى ليعطيه الهاتف فأعطاه له وهمّ منصرفاً وهو مندهش.. كيف استطاع سامي فكري الوصل إلى الهاتف الذي اختاره عشوائياً وتأكد أنه من موديل رخيص لا يسهل التجسس عليه أو متابعته عن طريق الجي بي إس.. ولقد تأكد أيضاً أنه لا يوجد حوله كاميرات تراقبه أو أشخاص تتابعه.. فكيف علم سامي بأنه يتصل بالشرطة.. انطلق يحيى بطريقة مصدوماً مدهوشاً لا يدري ماذا يفعل بعد الآن لكي يُخلص نفسه من تلك الورطة.. يستطيع أن يفعل الكثير لولا وجود أسرته رهائن تحت رحمة سامي فكري.. شغل هذا الأمر تفكير يحيى كثيراً وهو يتحرك إلى ناحية أحد الميادين المكتظة بالمارة.. أخرج الهاتف وظلّ يحدق به بين يديه وهو يتردد بأن يتصل بسامي ليخبره عن مهماته التالية ليخلص من ذلك الأمر للأبد على أمل أن يحافظ سامي على وعده معه ويُحلي سبيل زوجته وابنه.. كان يراوده هاجس أن يخلف سامي وعده معه، ولكنه كان يطرده دائماً من رأسه لأنه لا بديل آخر غير أن يتشبث بهذا الأمل.. قام بالنهاية بالاتصال على سامي ووضع الهاتف على أذنه وهو يستمع إلى رنينه فأغلق عينيه وهو يتوقع أن يستمع إلى صراخ سامي وتوبيخاته له.. ولكن فجأة وجد الهاتف ينزع من يده.. فتح عينيه سريعاً ليجد أن الهاتف ليس بيده،

نظر على يساره سريعاً ليجد أن هاتفه قد أمسك به شخصان يقودان دراجة نارية وظلا يحدقان به وهما فوق الدراجة ويتعدون سريعاً.. تجمّد يحيى بمكانه للحظاتٍ وهو غير مصدّق أن هاتفه قد سُرق وبتلك اللحظة من بين كل تلك الأعوام التي عاشها.. ترددت كلمات سامي إلى أذنه في الحال إنه إذا فقد الهاتف سينتهي كل شيء.. هنا تحرّك جسده بدون وعي منه وهو يطارد السارقين فوق دراجتهما النارية وقد ابتعدا عنه كثيراً.. لم يملك نفسه حينها وأخذ يصرخ بعلو صوته.. «حراااامي.. حراااامي..» وهو يطارد الدراجة البخارية التي أخذ سائقها يقودها مُسرّعاً أكثر فأكثر لابتعد عن صراخ يحيى خلفه.. لقد قاما بتلك السرقات كثيراً ولم يُقم بمطاردتهما أحدٌ أكثر من لحظات معدودة بعد أن يستوعب ما حدث له ويكونا هما مبتعدين عنه تماماً.. أما تلك المرة فالوضع مختلف.. فلقد وجد أن من سرقاه تلك المرة يُطاردهما كالثور الهائج ويصرخ عليهما بصوت جهوري وينعتهما باللصوص.. وهنا حدث ما كانا نخشيانه دائماً.. فلقد تجمع بعض سائقي السيارات والدراجات النارية الأخرى وقاموا بمطاردتهم بسرعة شديدة وهم يصيحون عليهما أن يتوقفا.. ارتبكا أكثر وأكثر وقاما بالاصطدام ببعض الأشخاص والمارة وهما مرتاعان وأفعالهما تلك جعلت مطارديهما يصرون على ملاحقتها أكثر فأكثر.. تحولت الشوارع إلى كتلة كبيرة من البشر يتتابهم السرعة والغضب وهم يطاردون الدراجة النارية التي كانت كالشظية الخشبية الطافية بين نوبات الموج العاتية.. اللسان ظلا يتصارخان على بعضهما البعض وهما مرتاعيان من مطارديهما وهنارنّ الهاتف الذي سرقه اللص بيده.. نظر إلى الهاتف بسرعة وقام بغلق الاتصال ولكن

عاد الاتصال مرةً أخرى فنظر اللص إلى شاشة هاتف ليجد اسم سالم البواب.. وهنا صرخ عليه زميلة..» اقل أم التليفون.. مش كفاية اللي ورانا دوول».. بادلله اللص الصريخ وهو يغلق الهاتف.. «ما انا بقفل أمه أهو.. دوس بنزين خرينا نهرب من ولاد ال.. دول».. وهنا ضغط السائق على مقود الدراجة وظل يتصارع وسيارة يقودها شابان تكاد تكون ملاصقة لهما وتحاول أن تجعلهما يتوقفان ولكن هنا قام أحد اللصوص بإخراج قطعة حديدة قصيرة من ملابسه وقام بتحطيم زجاج سيارة الشابين ليتناثر حطام الزجاج فوقهما ويختل مقود السيارة من يديهما ليصطدما بسيارة أخرى بجوارهما بقوة.. أخذ اللسان يتضحكان على مشهد السيارة المحطمة وظلا يراقبان بعض مطارديهم خلفهما وهم يتراجعون عن مطارديهما خوفاً مما حدث لزملائهم السابقين.. وأيقن اللسان بنجاحهما وقرب خلاصهما.. ولكن فجأة شعر اللص الذي بحوزته هاتف يجيي بسخونة شديدة بجسده.. فتحسّس مكان تلك السخونة ليجدها من الهاتف الذي أمسكه بحيرة ليجد أن شاشة الهاتف عليها أرقام تمر بسرعة شديدة وترتفع حرارة الهاتف بسرعة فتحدث إلى زميله.. «التليفون سخن قوي يا عوكه».. تحدث إليه زميله مندهشاً.. «سخن ازاى يالا.. ما تجمد أومال».. وهنا سخن الهاتف بيده بشدة لدرجة أنه لم يتحمل أن يحمل بيده وأمسكه بملابسه وهو مندهش من تلك الأرقام التي توقفت على الشاشة فجأة ثم انفجر الهاتف بقوة بجسده.. وبسبب ذلك الانفجار الصغير اختلت الدراجة النارية التي كانت تلتهم الطريق بسرعة ويسقط اللسان وجسدهما ظلا يُسحلان على الأرض بقوة وعنف شديد لعدة أمتار بسبب قوة

الدفح بينما أخذت الدراجة النارية تتحطم وهي تطير بالهواء تارة
وتسقط على الأرض تارة وتتناثر أجزاءها بالطريق للحظات قبل أن
تسكن بعد أن اخترقت زجاج سيارة كانت ترتكن بالقرب من أحد
الأرصنة.. كان المشهد مخيفاً وغريباً على المارة الذين حاوطوا اللصين
اللذين كانا يتألمان ويد أحدهما قد بترت منها أصابعها وجرحت
معدته بشدة، والآخر ظلّ مُمسِكاً بقدمه وهو يصرخ ويتسجد لأحد
أن ينقذه.. لحقهم مطار دوهم السابقين وتباينت ردود أفعالهم مابين
الشفقة عليهم وما بين التشفي بهم من مبدأ الجزاء من صنف
العمل.. وكان آخر الملاحقين يحى الذي هبط من سيارة أجرة وأخذ
ينظر إلى اللصين وهما محاطين بين عددٍ كبيرٍ من الناس ودراجتهما
النارية محطمة فوق سيارة أخرى بعيداً.. شعر يحى بالشفقة على
اللصين للحظاتٍ ولكنه غير اهتمامه وأخذ يبحث بعينه سريعاً ما
بين الحطام عن الهاتف الذي كان مصدر الاتصال الوحيد بينه وبين
أسرته.. ولكن ما وجدته هو جزءٌ صغيرٌ مُحترقٌ من الهاتف كان
بالقرب من أحد المارة فالتقطه بيأسٍ شديدٍ وهو يندب حظّه الذي
أوقعه بتلك المعضلة غير المفهومة.. وانصبَّ كل تفكيره حينها كيف
سيصل بسامي فكري الآن.. وهل سيعتقد سامي بأنه قد قام
بالتخلص من الهاتف متعمداً.. ماذا سيفعل بزوجته وابنه حينها..
سيناريوهات سوداء دارت برأسه حينها وكاد أن يجن من التفكير
والقلق ولكن ما حدث بعدها جعله ينسى كل ذلك من كثرة غرابته
حيث بلحظة واحدة كان قد حدث أن بدأت هواتف جميع الحضور
بالرنين بوقتٍ واحدٍ.. تخيل أن تقوم هواتف أكثر من 300 شخص
كان متواجداً بتلك اللحظة بالرنين بذات الوقت وبنغمات مختلفة..

ساد الصمت وخيم على رؤوس جميع الحضور من غرابة هذا الموقف وهم يشاهدون هواتفهم تعمل معاً.. جميع الموديلات والأحجام الحديثه منها والقديمة كانت تعمل وترن بصوتٍ صاخبٍ.. قام الكثير من الحضور بتلك اللحظة بالرد على هواتفهم.. أكثر من 200 شخص قالوا «ألو» بذات اللحظة.. أجابوا على هواتفهم ليستمعوا إلى صوت سامي يحدثهم من الجهة الأخرى بوضع كلمات مقتضبة: «قولوا ليحيى يشترى تليفون بي إكس 360 ويحط فيه أي خط..».. ثم أغلق المكالمه.. تباينت ردود أفعال المتواجدين ما بين الدهشة والضحك والاستنكار ولكن كان رد فعل معظمهم متسائلاً: «يحيى.. يحيى مين؟».. عندما استمع يحيى إلى اسمه من أكثر من شخصٍ أثاره الفضول فتحدث إلى بعض القريبين منه «في إيه.. حد اتصل بيكم يسأل على يحيى.. قال إيه..».. أجابه شخص منهم: «آه.. واحد كلمني قالي بلغ يحيى يجيب موبايل مش عارف إيه كده».. تدخل بحديثه أحد المتواجدين.. «بي إكس 360».. اقترب منه يحيى بفضولٍ شديدٍ.. «بي إكس 350.. قال حاجة تاني؟».. أجابه سريعاً شخصٌ آخر.. «اه.. يحط فيه أي خط».. «إيه ده.. هو كلكم جالكم نفس المكالمه».. أجابه شخصٌ آخر بحيرة.. «أنا بردو جاتلي نفس المكالمه.. بس مين ده وجاب نمرتي منين؟».. هنا تبادل الحضور أسئلتهم واستفساراتهم عن من هذا الشخص الغامض الذي حدثهم منذ قليل.. ومن يحيى هذا؟».. هنا انسحب يحيى من المشهد سريعاً مبتعداً حتى لا يعلم أحد منهم أنه يحيى المنشود فيغرقه ببحر أسئلتهم واستغرابهم ويضطر ليخبرهم إجابات هو من البداية لا يعلمها.. اتجه سريعاً إلى أقرب متجر للهواتف النقاله وقام بشراء

هاتف بي إكس وخط هاتف ببيانات وهمية بعد أن أجزل العطاء للبايع قليلاً وغادر المتجر سريعاً ولكنه توقف أمام كاميرا مراقبة التي أمام المتجر لعدة دقائق ليجد أن هاتفه يرن سريعاً ولكن الأغرب من ذلك أن اسم سليم البواب كان مسجلاً على شاشته على الرغم أن الهاتف والخط ما زالوا جديدين ولا يحتويان على أي بيانات ولكن بعدما شاهد سامي يخرق المئات من الهواتف أمامه لم يستغرب يحيى من أي شيء بعد الآن.. أجاب على الهاتف سريعاً وتحدث إلى سامي بقلق.. «ألو.. أيوه يا سامي.. أنا عايزك نعرف إن الموبايل اتسرق واني ماليش يد بالي حصل ده خالص».. أجابه سامي بلامبالاة.. «هاتروح المريوطية اللي في شارع فيصل دلوقتي وكلمني لما توصل هناك».. ثم قام بغلق الهاتف في الحال.. كان يشعر يحيى بالضيق من طريقة سامي المقتضبة هذه في الحديث، ولكنه شعر بالارتياح قليلاً بعدم لوم سامي له على ما حدث.. أخذ يتوجه إلى أحد الشوارع الرئيسية ليقف إحدى سيارات الأجرة ليتجه إلى شارع فيصل أحد أشهر الشوارع التجارية بمصر ليخوض من خلاله رحلة أخيرة بسلسلة مغامراته غريبة الأطوار التي تحدث له منذ أمس.. كان هناك شكٌ قد نبت بداخله منذ أمس ولكنه تيقن منه اليوم.. أن سامي فكري لا يراقبه بالكاميرات فقط ولكنه يضع مايكرفون بملابسه وهكذا علم بأنه قد قام بالاتصال بالشرطة عن طريق ذلك ولكن ما حيَّره بشدة هو كيف استطاع سامي أن يخرق أي هاتفٍ بسهولة شديدة كما حدث معه ومع بعض المحاوتين به منذ قليل.. أيًا كانت الطريقة فلقد تيقن يحيى بأن سامي يتحكم على امكانيات ضخمة للغاية وأنه بالتأكيد ليس لديه القدرة الكافية على

معادته على الأقل بوجود زوجته وابنه رهائن لديه.. أوقف سريعاً
سيارة أجرة وانطلق بطريقة إلى شارع فيصل لبدأ مهمة الجديدة..

بعد مرور 4 ساعات كان ياسين يجلس بهو واسع أمام باب
مكتب يقف أمامه جنديان ويجلس بجواره 7 ضباط برتب مقاربة
له.. أخذ ينظر لساعة متأففاً يُحدّث زملائه.. «هو هنفضل مستنين
كثير كده.. هو احنا مستنين نحلق ولا إيه؟».. ابتسم بعض زملائه
وحدثه أحدهم محذراً.. «يا ابني لم لسانك شوية لاحد يسمعك
وتروح في داهية».. ياسين بضيق.. «يا عم أنا اتخنقت مش كفاية
وقفت قد كده في الإشارة وأنا جاي.. الترتره ورميت يا جدع»..
أجابه أحد الضباط الآخرين.. «هههه إنت ظابط يا ابني في ظابط
يقف في إشارة».. ياسين بضيق.. «أيوه يا عم.. لما يكون في وزير
معدّي الضابط بيتنيل يقف في الإشارة مستنيه».. ضحك الضابط..
«ههههه.. إنت اللي حظك فقري بقى أعملك إيه».. لفت انتباه أحد
الضباط وهو يشاهد هاتفه باهتمام شديد وهو مبتسم.. فحدّثه ياسين
مناكفاً.. «إيه يا حمادة.. بتتفرج على إيه؟ إوعى تكون بتشوف سيكو
سيكو في مديرية الأمن».. نظر له الضابط ضاحكاً: «لا يا عم والله..
أنا بتفرج على الواد اللي مصورينه في الفيس بوك».. اتجه ياسين إليه
وأمسك الهاتف بفضول.. «ماهم بتوع الفيس بوك بيضحكوك على
إيه؟ وريني كده».. أعطى الضابط الهاتف لياسين مبتسماً.. «شوف
الواد ده.. مصورينه وهو راكب جمل ويبجري بيه بين العربيات في
شوارع فيصل».. ياسين مبتسماً.. «راكب جمل.. هو فاكر نفسه في

قريش بروح أمه».. ظلّ يشاهد ياسين يجيى وهو يتمسك بسنمة جمل بخوف شديد وهو يركض بين السيارات وسط صخب أصحاب السيارات ما بين مستنكرٍ وما بين مهللٍ ومصفرّ.. شارك بعض الضباط مشاهدة الفيديو باهتمام شديد.. فتحدث إليهم مستنكرًا.. «انت جنن الناس.. كل واحد دلوقتي يعمل حاجة غريبة ويصورها على النت علشان يتشهر وبعدين يمثل ويتغنى وياخد ملايين واحنا اللي في الآخر بنتشتم ويطلع عين أبونا وناخد ملايم».. أجابه أحد الضابط مصدقًا على كلامه.. «آه والله عندك حق.. ده اللي بيحصل دلوقتي كل عيل بشخة يطلع على النت يعمل كام فيديو وبعدين نلاقيه في المسلسلات والأفلام ويريلي شنبه ويعمل نفسه ظابط ما يعرفوش احنا بنتنفخ إزاي في الحقيقة.. استنى استنى.. مش الواد ده اللي كان متصور إمبراح والشحاتين بيجروا وراه في وسط البلد.. ده أنا طلع عين أهلي امبارح بسببه ونزلنا لمينا العيال الشحاتة دي كلها إمبراح وهيهدوا العمارة اللي كانوا حاطين أيديهم عليها».. ابتسم الضابط إلى أحد زملائه.. «ده نزل على فيصل عندكم.. شكلك هتتنفخ زي امبارح».. أثار هذا الحديث فضول ياسين.. فظلّ ينظر إلى يجيى بالفيديو ولكن الجودة كانت سيئةً ولكنه تعرف على ملامحه فحدّث نفسه: «الواد ده مش عارف شفته فين قبل كده.. حاسس اني أعرفه بس مش فاكر اسمه».. ضحك أحد الضباط ساخرًا.. «إيه ده.. ياسين زهايمر أخيرًا افتكر حد.. ده أنا خلاص كنت شاكك إنك تفتكر اسمك.. زهقتنا من أم اسم حمادة بتاعك ده.. الوزارة كلها عندك اسمها حمادة».. أمسك الضابط هاتفه غاضبًا.. «إيه يا جدعان إنتم مالمقتوش غير أم تليفوني عمالين تتفرجوا عليه.. ما كل واحد

فيكم معاه تليفون..».. وهنا انفضَّ الجمع وعاد الجميع إلى مقاعدهم من بينهم ياسين الذي عاد إلى مقعده ولكنه تحدث إليه.. «بقولك إيه يا حما.. يا صديقي.. ابعثلي الفيديو ده على الواتس اب عندي..».. وهنا فتح باب المكتب سريعاً وخرج منه مجموعة من اللوات بزيمهم الرسمي.. فانتفض الجميع واقفين لهم وحيوهم بالتحية العسكرية.. وهنا أطل شخص في بديّة الستينيات يرتدي ملابس مدنية بدعوتهم للدخول إلى مكتبه فتبعه الضباط ليجلس على مقعد يتوسط منضدة الاجتماعات وتوزع الضباط حول المائدة.. فتحدّث إليهم مساعد وزير الدخلية بجادية شديدة.. «اجتماعنا النهارده مهم جداً.. يمكن ده أهم اجتماع هنعمله من ساعة ما دخلنا وزارة الدخلية.. لأنه هتتكلم فيه عن حاجة ما حصلتش في تاريخ الوزارة قبل كده».. ثم قام مساعد الوزير بفتح ملف أمامه وأخرج بعض الصور.. وأخذ يعلق على كل صورة.. «ده.. عمر فودة.. رجل أعمال مشهور وصاحب مشاريع استثمارية ضخمة.. اتقتل أول امبارح.. وده أبوه محمد فودة.. وزير الصحة السابق واللي كان مرشح يمسك الوزارة تاني بعد ما وزير الصحة الحالي مات بأزمة قلبية.. محمد فودة هو كمان مات في حادثة انتحار أحد الشبان.. أظن إنت عارف الكلام ده كويس يا ياسين».. ياسين ابتلع ريقه واعتدل بجلسته.. «أكيد.. أكيد.. يا حما.. ياكهال باشا.. وأنا بحقق في كل حصل وبدقق في كل سنتوفه في القضية دي يا باشا».. أخذ يومئ كمال برأسه إليه.. «عارف.. عارف.. إنك عارف».. لكن اللي ماتعرفوش.. إن امبارح دول كمان ماتوا.. ثم أخرج بضع صور وقام بالتعليق عليهم.. «مسعود حامد.. رجل الأعمال المشهور واللي كان مرشح لوزارة السياحة..

رؤوف بنداري .. مؤمن مروان .. سعيد سمير .. محمد فضيل .. عاصم درهام .. هشام ماجد .. كرليس وهيب .. سعود مسعد .. كل دول ماتوا امبارح .. بطريقة مختلفة .. كلهم ليهم خلفيات وصفات مختلفة ولكنهم كلهم من رجال الأعمال المشهورين في الاقتصاد المصري .. 40% من فلوس البلد في إيدين الناس دي .. فاهمين الكارثة الي احنا فيها دلوقتي .. معظم رجال الأعمال دي عندهم جرايد وصحفيين وإعلاميين شغالين تحت إيديهم .. عارفين ممكن يعملوا فينا إيه وهما بيقلبوا علينا الرأي العام ..» .. الضباط يستمعون إليه بقلق وبإنصات شديد ..» .. وهو يتابع حديثه إليهم .. «أنا عارف إن كل الي حصل ده مش ذنبكم ولا لكم يد فيه .. ولكن أهالي الضحايا والصحافيين بتوعهم هيقلبوا علينا الدنيا .. لكن كل ده ما يهمناش .. الي يهمننا إن كل الناس البريئة دي ماتت وده الي مش ممكن نسمح بيه أبداً .. حد هو السبب ورا موت رجال الأعمال دول علشان يعمل ببلدة في البلد ويبين إن الشرطة في مصر مقصرة وده الي مش هنسمح بيه أبداً .. أنا هفتحللكم قنوات مع طباط الأمن الوطني علشان تتبادلوا المعلومات معاهم .. كل الي نعرفه دلوقتي من التحقيقات إن كل رجال الأعمال دول ماتوا بسبب حوادث أو بسبب ناس عادية خالص .. مفيش بينهم وبين رجال الأعمال أي اختلاط أو احتكاك .. ومفيش دافع يخليهم يقتلوهم ولا انتقام ولا سرقة ولا أي دافع ملموس .. والأسوأ من ده كله إن كل الي قتلوهم دول بينكروا إنهم قتلوهم .. أو حتى شافوهم قبل كده .. وبيقولوا إنهم مش فاكرين أي حاجة خلال 24 ساعة الي فاتت .. فاهمين ده يعني إيه .. يعني الي بيحصل ده مش اعتباراً .. ده شيء مُحطَّط له كويس جداً .. ووراه ناس منظمة للغاية

وممولة بمبالغ ضخمة.. أنا في حياتي المهنية كلها عمري ماشفت
تخطيط وتنفيذ لجرائم بالسرعة والدقة دي أبداً.. عايزكم من اللحظة
دي تشتغلوا بسرعة ودقة شديدة على قضاياكم وتتبادلوا المعلومات
مع بعض وكل المعلومات دي تنصب في الآخر قدامي على المكتب
هنا.. ماشي.. مش عايز اقولكم أن القضية دي مش الوزير اللي
متابعها بس.. ده السيد الرئيس بنفسه بيتابعها شخصياً.. اللي ماتوا
دول مش أي حد من الشارع.. دول صفوة المجتمع.. واللي يمس
صفوة المجتمع.. المجتمع كله هينهار فوق دماغنا.. يلا.. مش
هعظلكم.. إتكلموا على الله واشتغلوا يلا.. ربنا معاكم..»

تحرك الضباط بهمة وبنشاط وأخذ ياسين يفكر بعمق شديد..
بما يحدث وهو يسترجع استنتاجاته بأن تلك القضايا لم تكن مصادفةً
أبداً.. تحرك الجميع خارج المكتب فأوقف ياسين سريعاً الضابط
الذي معه الهاتف.. «حمادة.. صاحبي.. ابعثلي الفيديو بتاع الجمل
ده..».. نظر إليه الضابط مستنكراً.. «يا ابني إنت في إيه ولا في إيه..
إنت ماسمعتش المصيبة اللي شفناها جوه.. ده الدنيا هتقلب علينا
خلال ساعات..».. ياسين بضيق.. «يا عم إبعث الفيديو وبطل
حوارات..»

الضابط مستسلاً.. «خلاص هابعثلك أهو.. إنت رقم الواتس
بتاعك كام؟»

ياسين بضيق.. «يا عم أنا مش فاكر اسمك.. هفتكر رقم
تليفوني.. ابعتهولي على الفيس بوك بسرعة.. يلا بسرعة قبل ما علقك
من الترتره..»

نظر له الضابط مستنكراً للحظات ثم تنهد وهو يفتح هاتفه..

بأحد أحياء المعادي الراقية كان رجل رجل أجنبي ببداية الخمسينيات يركض بملابسه الرياضية ويمسك بيده اليمنى سلسلة كلبه الأليف وهو يركض معه وأخذ يتبادل التحية بشكل ودود مع أي شخص يقابله بطريقة.. لحظات ورن هاتفه النقال فأخرجه من ملابسه وظل ينظر على شاشته وهو مازال يركض ليرى صورة واضحة ليحيى وهو يركض من شيء ما غير ظاهر ومكتوب أسفل الصورة «the bird has wings».. ثم أسفل تلك الجملة «faisal street».. ابتسم الأجنبي ساخراً وهو يركض «Ah poor bird»..

راقصة باليرينا أجنبية تتراقص برشاقة بداخل إحدى غرف التدريب وزميلاتها يتبعن تحركاتها خلفها.. فجأة رن هاتفها فحدثتهم بالروسية... فأومأوا إليها برؤوسهن وتابعن تدريباتهن بينما هي أمسكت بهاتفها من حقيبتها لتشاهد صورة يحيى وتحتها موقعه بفيصل فنظرت إليه بتمعن شديد.. وحدثت نفسها: «xopomo».. خرشو»... ثم وضعت هاتفها بحقيبتها وحملتها مبتعدة إلى غرفة الملابس..

رجل ببداية الأربعينيات يرتدي جلباباً رمادي اللون ويجلس بمقهى بلدي غير نظيف يتابع بعض الإعلانات على التلفاز باهتمام شديد وهو نفث دخان نرجيلته باستمتاع شديد.. رن هاتفه فجأة فأخرجه من طيات ملابسه ونظر إلى شاشته ليجد صورة يحيى ومكتوب أسفل منها فيصل بالإنجليزية.. أمسك الرجل بهاتفه

بسرعة وترك النرجيلة على المنضدة بجواره وصاح بصوت عالٍ
وبنبرة صعيدية واضحة.. «الحساب ياواد عمي..».. فتحرك جهته
شاب قصير في الحال يحمل بعض الفحم المشتعل.. «جايلك حالاً
يامعلم..».. حاسبه الرجل سريعاً ثم تحرك خارج المقهى بعزمٍ
شديدٍ..



يحيى ينظر خلفه للجمل الذي يقف شاخاً كالجمال وراءه بعد
أن لم يجد سبيلاً للنزول من فوقه الا أن ألقى بنفسه أرضاً.. ابتعد
يحيى أخيراً عن مغامرة الجمل العنيفة تلك التي لم يجد لها كالعادة
أيّ تفسيرٍ مثل باقي مهامه السابقة غير أنه أصبح أضحوكة ومسار
سخرية من قبل الناس العادية.. ألقى بنفسه على أقرب مقعد رآه
بأحد المقاهي بميدان الجيزة وأخذ يلتقط انفاسه.. حضر العامل
بالمقهى وطلب يحيى مشروباً بارداً ليروي حلقه الذي كان أجف من
الصحراء الغربية.. ابتلع بعض دفعات الكوكا الباردة سريعاً ليخرج
زفرة طويلة مريجة بالنهاية.. نظر إلى ساعته التي اقتربت من الواحدة
والنصف ظهراً.. أمسك هاتفه وقام بالضغط على اسم سليم البواب
وقلبه ينبض بسرعة خوفاً من قدوم مهمة تودي بحياته بالنهاية..
استمر صوت رنين الهاتف لعدة لحظات ثم استمع لصوت سامي
الهادئ اللعين يجيبه سريعاً: «ألو..».. أخذ يحيى يهدئ من روعه
قليلاً ثم تحدث إليه.. «أنا نفذت مهمة فيصل وركبت الجمل
زي ماقلتلي.. وطبعاً انت مش هتقولي أنا بعمل كل ده ليه زي
العادة..».. ابتسم سامي ساخراً.. «ها.. جاهز للمهمة الجديدة»..

قاطعہ یحییٰ سریعًا.. «عايز أتطمئن على مراتي وابني..».. سامي مطمئنًا.. «ماتقلقش هتطمئن عليهم زي إمبراح.. أهم حاجة إنك تنفذ مهماتك بدقة وسرعة.. مش عايز هفوات زي ما حصل للتليفون الصبح.. فاهم؟».. یحیی بقلق.. «فاهم.. فاهم.. أوعدك مش هتكرر تاني..»..

«قُدامك ساعتين من دلوقتي.. عايزك تجمع فيهم عشر فئران.. وبعد ما تجمعهم اتصل بي».. یحیی مندهشًا.. «بتقول أجمع إيه..».. سامي صارخًا عليه.. «جری إيه یا یحی انت هتستعبط.. عشر فيران.. ماتعرفش الفيران.. جمع عشر فيران في ساعتين..».. ثم أغلق الهاتف سريعًا بوجه یحیی الذي أخذ يحدث نفسه مذهولًا.. «فيران.. أجمع عشر فيران.. أجيبهم منين دول.. فيران.. هيعمل بيهم إيه ابن المجنونة ده.. أنا إيه بس اللي وقعني في الورطة دي ياربي..».. اقترب منه عامل المقهى في الحال وأخذ يمسك كوب الماء الفارغ وصينية التقديم ومسح المنضدة بقماشة في يده.. فتحدث إليه یحیی سريعًا.. «بقولك إيه يابرنس..».. العامل سريعًا.. «أؤمر يا أستاذ عايز حاجة؟».. یحیی يضع بيده بجيبه سريعًا ويخرج بعض النقود.. «بقولك إيه.. ماتعرفش حد بيبيع فيران هنا الله يخليك..».. نظر له العامل مستنكرًا.. «إيه.. فيران؟» «یحیی بترجّ..» «آه.. ماتعرفش حد و حياة ابوك وهحليلك بقك..».. أمسك العامل بزجاجة الكولا بعنف وصرخ على یحیی.. «بقولك إيه يا عم.. العملية مش ناقصاك.. إنت عامل دماغ وجاي تطلعهم علينا ولا إيه.. قال فيران قال..».. ثم نظر إلى یحیی نظرة المصاب بالجدام وتركه وانصرف لداخل المقهى غاضبًا وهو يسبه.. راقبه یحیی وهو يختفي من أمامه ثم

وقف بمكانه يحدث نفسه..«والله عنده حق.. حقه.. فيران إيه الي هتتباع بس.. أنا هاديله بقشيش بزيادة».. فوضع بعض النقود على المنضده وتحرك مبتعداً قليلاً.. ثم عاد مرة أخرى وأخذ بعض النقود وهو يحدث نفسه.. «لا بقشيش إيه.. ده ابن كلب ما يستاهلش..» ثم وضع نقوده بجيبه وانصرف مبتعداً..»



بإحد القرى السياحية الساحلية كان يقف والد بمنتصف الثلاثينيات بصحبة ابنته الصغيرة ذات الثانية أعوام أمام سيارته الفارهة ليخرج منها بعض البالونات الملونة الكبيرة ويحمل بعض الحقائب المجهّزة للذهاب للشاطئ.. فقام بإعطاء البالونات لابنته التي ظلت تضحك وتقفز وهي فرحة ويدها البالونات.. «هيه.. هيه.. أخيراً وصلنا بابا».. والدها ضاحكاً على رد فعلها.. «وصلنا يا ستي.. وهانلعب مع بعض طول اليوم.. وهجيلك أيس كريم بالشوكليت الي بتحبيها».. ظلت الفتاة تقفز من الفرح.. «هيه.. هيه.. هاتجيلي سوفت كريم ولا هارد كريم؟»

والدها يمسك ذقنه ليفكر قليلاً وهو يرفع حاجبيه.. «إمممم.. اختيار صعب.. لكن علشان أنا عارف إنك بتحبي الاثنين.. فهجيلك الاثنين السوفت والهارد كمان».. أخذت تركض الفتاة بمكانها من الفرح وأمسكت والدها واحتضنته «بحبك بابا».. بس ماما لو عرفت هتزعقلي».. والدها قلقاً.. «اوعي تقولي لمامي.. هتقولي بدلعك ومش هتجيبك معايا تاني».. الفتاة خلاص.. خلاص مش هقولها.. يلا بقى بسرعة بابا».. عايزة أروح البيتش بسرعة»..

والدها يخرج بعض الحاجيات من صندوق سيارته..» اصبري بس
ثانيتين.. هاطلع الحاجات بتاعتنا من العربية..» أخذت الفتاة تنظر
إلى الشاطيء والبحر الذي كان لا يبعد كثيرًا عنهم.. بينما والدها
ظل منهمكًا بإعداد حقائبهم وهنا وقف شخص خلفه وربت على
كتفه فالتفت والدها إليه فسأله الرجل عن مكان ما فدللّه والدها
عن المكان.. فابتسم الرجل وتحرك سريعًا وهو يشكر والد الفتاة
ويتحرك بطريقه.. بتلك اللحظة رن هاتف الفتاة الصغيره فأخرجت
هاتفها من ملابسها وهي بمواجهة الشاطيء ووجدت صعوبة بمسك
الهاتف بيدٍ واحدة مع حملها للبالونات بأنٍ واحدٍ ولكن بعد لحظات
قليلة استطاعت فتح الهاتف ووضعته على أذنها واجابت وهي
مبتسمة: «هاي مامي.. فاين.. الحمدلله.. أنا مع بابي أهو رايجين
البيتش أهو.. بابي بيطلع الحاجة من العربية.. هاخليكي تكلميه..»
نظرت الفتاة الصغيرة خلفها وهي تنادي على والدها.. «بابي.. كلم
مامي».. ولكنها وجدت صندوق السيارة مفتوح والحقائب بداخلها
ووالدها غير موجود.. فنظرت حولها مستغربة ونادت عليه..
«بابي.. بابي».. وسمعت صوت تحطم زجاج قوي فجفلت للحظات
وشعرت بالخوف يجتاحها.. فصرخت على أبيها.. «بابي.. انت فين..
أنا خايفه..».. صوت أمها كان يصدر من الهاتف بيد الصغيرة،
ولكنها لم تُجِب أمها وأخذت تتحرك وهي تبحث عن والدها.. فجأة
صدر صوت إنذار سيارة بالقرب منها وصوت بوق بذات الوقت..
ألقت الفتاة بالهاتف من يدها ولكن يدها الأخرى ظلّت متشبثة
بالبالونات التي معها والتصقت بالسيارة وحاولت أن تتحرك ببطءٍ
من خلفها.. وبعد تحرك بطيء وحذر ألقت نظرة خاطفة من وراء

ومش هنزل المجاري مش ناقصة قرف.. هعوم في المجاري علشان
أصطاد فيران.. يبقى ماقداميش غير الزبالة.. جبت كل حاجة قريتها
لصيد الفيران على النت.. وربنا يستر ويبقى حقيقي..».. تحرك
يحيى بين عدة طرق حتى وجد ضالته بالنهاية.. مكان رائحته قذرة
وممتلئة بالمهملات والنفايات الموضوعة بالقرب من صندوقي قمامة
صدئين باللون الأخضر مكتوب عليهم النظافة من الإيمان وممتلئين
بالنفايات وموضوعان بالقرب من أحد أسوار الأبنية المهدامة..
ابتسم يحيى للحظات ولكنه كتم أنفاسه سريعاً من الرائحة النتنة..
نظر إلى ساعته فوجد أنه ما زال لديه خمس وأربعون دقيقة على نهاية
مهلة سامي له.. اضطربت معدته هنا عندما وجد أن الوقت تحرك
بسرعة وخشي ألا يتمكن من صيد الفئران بذلك الوقت ولهذا تحرك
بسرعة بعد أن اطمأن بأن هذا المكان لا يتطرق إليه البشر كثيراً لأنه
اضطر أن يغير المكان أكثر من مرة بسبب مرور البشر عليه وهو
يتأكد بأن الفئران كائنات خجولة لن تظهر بظهور الإنسان.. أخرج
من حقيبة بلاستيكية صندوقاً بلاستيكيّاً قوياً مُرَبَّع الشكل ولونه
أخضر مغطى من الأعلى بغطاء أبيض قوي ولكن من المنتصف به
باب صغير يسقط أي شيء يقف عليه إلى داخل الصندوق.. فوضع
يحيى الصندوق بين النفايات وهو مشمئز ليغطيها.. ثم أخرج من
الحقائب البلاستيكية الأخرى بعض المعلبات التي سيستخدمها كفخ
للفئران أمسك برطماناً زجاجياً بأسى..» نوتيلاً.. هاكل الفيران
نوتيلاً.. ده أنا ما بكلهاش.. ذوقهم في الأكل أعلى من البني آدمين
كمان.. وهحطلهم شوكلاته.. هدلعكم يا ولاد.. الفيران..».. وضع
الكثير من النوتيلاً فوق الباب المتحرك ثم وضع قطع شوكلاته

وفتتها فوقها.. ثم حدّث نفسه بقلق.. «مفيش وقت أستناهم.. لازم أغريهم للفخ ده..».. فقام على الفور بإلقاء بعض قطع النوتيل على الأرض بالقرب من الفخ وبعض قطع الشوكلاته الصغيرة بخط مستقيم جهة الفخ الذي صنعه وجلس بهدوء بالقرب من مكب النفايات وهو يحاول أن يكتم أنفاسه من الرائحة وهو خائف أن يفشل بمهمة وأن لا تظهر الفئران أبداً ليقعوا بفخه.. اضطربت معدته مرة أخرى وبدا القلق عليه ولكنه لم يكن له أيُّ حلٍ آخر سوى الانتظار وأن يتمنى أن يُوفَّق بخطته لجمع الفئران التي لا يعلم ماذا سيفعل بها حتى إن أمسكها..

الضابط ياسين يجلس إلى مكتبه ويرتدي نظارة طبية ويقلب بأوراق أمامه تظهر بها صورة يحيى وأخذ يقارنها بالفيديو الذي لديه للحظات ثم ابتسم وهو يحدث نفسه: «أيوه.. أنا كنت متأكد إنني عارفه.. هو يحيى كامل.. أنا مش فاهم أنا كنت ناسيه إزاي..».. ثم أخذ يقرأ الملف بيده بصوت مرتفع.. «يحيى كامل.. 37 عام.. متزوج ولديه طفل.. اسم الزوجة سمر وفتق 32 عام.. يحيى كامل خريج كلية الصيدلة جامعة القاهرة.. عمل بعدة معامل وصيدليات ومستشفيات ومعامل أبحاث بعد تخرجه لمدة ثلاثة أعوام.. عمل بمعمل أبحاث خاصة لمستشفى استثماري ألماني مع صديقه وزميله في الدراسة فؤاد علام.. صنع يحيى كامل بعد بحث لمدة خمس سنوات عقاراً يسمى التريفون.. وهو عقار طبي لعلاج مرض السكري حيث ينتج إنزيمًا يجعل الجسم له القدرة على رؤية

مستويات الإنسولين بشكل صحيح بداخل الجسم ويجعله يتحكم بمستوى السكر بالدماء مرة أخرى دون أن يحتاج المريض استخدام أي أدوية أخرى.. ومع تكرار العلاج يستطيع جسد المريض الشفاء من مرض السكر نهائياً.. نجح عقار التريبيفون بشفاء جميع الفئران التي خضعت للتجربة وأصبح التريبيفون محض اهتمام كبرى شركات الأدوية بالعالم وعرضوا على يحيى كامل شراء حقوق الملكية الفكرية لعقاره ولكنه رفض المبالغ الضخمة التي تم عرضها عليه لأنه كان يريد أن يجعل حقوق الملكية الفكرية مجانية حتى يتشئ لجميع المرضى بالعالم الاستفادة من هذا العقار دون أن تتحكم شركات الأدوية وتبسط جشعها على المرضى، ودخل يحيى بصراع عنيف مع صديقه ومساعدته بالبحث فؤاد علام وبمساعدة شركة سماركو إحدى أكبر شركات الأدوية بالعالم.. تم رفع قضية بالمحاكم على يحيى كامل وادعاء فؤاد بأن يحيى قد قام بسرقة بحثه ونسبه لنفسه.. وبنفس الوقت قامت العديد من المستشفيات والأبحاث التي عمل بها يحيى كامل من قبل برفع قضايا على يحيى تتهمه بها بالسرقة وتبديد ممتلكات تلك المنشآت. وبعد عدة أشهر ما بين السجون والمحاكم خضع يحيى بالنهاية لتسوية من صديقه الأسبق فؤاد علام وشركة سماركو تنازلت بها عن حقوق ملكية عقار التريبيفون لشركة سماركو بدون أن يتحصل على أي تعويضٍ مادي في مقابل التنازل عن كل القضايا والبلاغات المُقدّمة ضده. وبعد خروجه من تلك المشاكل وقع يحيى بمشاكل أخرى بعد أن سلط الإعلام الضوء عليه أثناء تلك الحوادث لم ترغب أي منشآت طبية بضمه ضمن طاقم عاملها خشية من تسليط الأضواء عليها ليعمل بالنهاية كمندوب مبيعاتٍ

لمستحضرات التجميل الطبية ويتزوج من خطيبته سمر بعد ذلك وبعد فترة قصيرة خفت عنه الأضواء والأعين تماما.. توقف ياسين عن قراءة الملف وارتشف من فنجان القهوة أمامه وألقى الملف من يده.. «أيوه أنا فاكرا الفترة دي.. كنت ماسك أنا القضية بتاعت يحيى وكنت مقتنع ببراءته.. أصل مش معقول واحد زي ده كان حرامي وعمّال يسرق المستشفيات والمعامل اللي شغال فيها ويرفض عرض بملايين الدولارات من شركات الأدوية.. بس الموضوع ده كان من فتره طويلة.. إيه اللي رجع يحيى للمشهد تاني.. ويا ترى اتصل بيا ليه إمبراح الصبح؟».. أخذ يداعب ذقنه قليلاً.. ثم أخرج سيجارة وقام بإشعالها وأخذ نفساً منها ثم أخرج هاتفه وضغط على بعض الأرقام ووضعها على أذنه.. «أيوه.. يا حما.. أيوه يا أشرف.. إخلص يا أشرف أنا مفينش دماغ.. عايزك تجبلي أي تفاصيل عن اللي همليك اسمه ده يحيى كامل عادل عبد السلام.. أيوه.. استنى همليك رقم ملفه عندنا.. أيوه.. ولا أقولك هابعتهولك رسالة وأبعثك معاها رقم موبايله.. عايزك تعرف النمرة دي فين.. هي مقفولة دلوقتي.. إعرفلي آخر مكان الرقم ده كان فين.. وسجل مكالماته كلها آخر عشر أيام.. ماشي يلا هابعثك الرسالة دلوقتي».. أغلق الهاتف ثم قام بكتابه رقم أعلى ملف يحيى أمامه ثم وضع رقم هاتف يحيى وأرسله للضابط أشرف ووقف أمام مكتبه وأخذ ينفث دخان سيجارته وهو يداعب شعر رأسه.. «ممكن يحيى يكون ليه علاقة بموت رجال الأعمال والوزراء اللي بنحقق فيهم.. ولا الموضوع مجرد صدفة.. امم.. لكن صدفة.. هيتصل بي ليه.. أكيد في حاجة.. وايه حكاية مسح السلم اللي جات في المكالمة دي.. الموضوع غريب ومريب..

وانا لما في حاجة بتشغلني يبقى لازم اعرفها.. يا ترى نخبي إيه وراك
يا يحيى؟».

بتلك الأثناء كان يجلس يحيى على الأرض كاتمًا أنفاسه بضيقٍ وهو
يشاهد بعض الفئران كبيرة الحجم تتحرك ما بين أرجاء النفايات
بمهارة وجسارة على الرغم من مشاهدتها ليحيى الذي كان يراقبهم
دون أن يحرك ساكنًا خشية أن يجفلوا ويهربوا ولكن تفاجأ بلامبلة
التي استقبلوه بها فيبدو أنهم اعتادوا رؤية البشر وهم يهربون من
أمامهم نظرًا لضخامة حجمهم المبالغ فيها فلقد كان حجمهم كبيرًا
وملفت بالفعل.. أخذ يراقبهم وهم يأكلون النوتيلًا وقطع الشوكلاته
بسرعة شديدة ومن ثم يتحركون جهة الفخ المنصوب ثم يسقطون
بداخله.. وكان قلبه يطرب فرحًا كلما سمع صوت ارتطام واحدٍ
منهم بداخل الصندوق.. أخذ يرقب ساعته بقلق وهي توشك على
الثالثة والنصف وبذلك تنتهي مهلة سامي التي أعطاها له.. سقط
أكثر من فأر بداخل فخه ولكنه لم يعلم عددهم نظرًا لتوتره الشديد
الذي جعله ينسى أعدادهم على الرغم من تذكره بأنهم أكثر من
أربعة فئران بالتأكيد.. وهنا قرر أن يتصل بسامي ويخبره بأنه قد قام
بجمع الفئران وأنهم عشرة كاملة وليكن ما يكون؛ فسامي بالنهاية لن
يكون حاضرًا لعددهم معه.. لم يكمل تفكيره العميق هذا حتى سمع
صوت الهاتف يرن ويرى اسم سليم البواب أمامه.. إذا إنه سامي
يتصل به.. ابتلع يحيى ريقه بقلق وقام بالرد على الهاتف ليستمع إلى
سامي.. «جمعت الفيران كلها؟» يحيى قلقًا.. «آه.. كلها.. كلها..»..

سامي بفرح.. «تمام.. تمام جداً.. عايزك دلوقتي تروح مصر الجديدة في أسرع وقت ممكن اركب تاكسي.. اركب طائرة.. المهم هتكون هناك حالاً.. تدور على مطعم اسمه لاجور مانديز.. احفظ الاسم كويس.. لاجور مانديز..».. يحيى مردداً: «لاجور مانديز.. مطعم لاجور مانديز.. خلاص حفظته.. اعمل هناك إيه في المطعم ده؟»

سامي ملاحظاً.. «هتاخذ الفيران معاك وتخبيهم.. وتطلب أي أورد.. وبعد عشر دقائق بالظبط تطلق الفيران في المطعم وتهرب بسرعة».. يحيى مندهشاً كالعادة بعد أي مكالمة لسامي.. «أسيب الفيران في المطعم.. ليه أنا مش فاهم حاجة؟».. سامي ملاحظاً.. «مش مهم تفهم.. المهم تنفذ.. يحيى.. مش عايز أي أخطاء، نفذ المهمة حالاً».. ثم أغلق الهاتف بوجه يحيى كالمعتاد ليتركه لحيرته من جديد.. ولكن يحيى وضع الهاتف بجيبه بلا مبالاة وهم بالاقتراب من مصيدة الفئران التي كان تحيطها عددٌ كبيرٌ من الفئران فأخذ يزيحهم باشمئزاز من فوق المصيدة التي أصبحت ملطخة ببقع النوتيل والشوكلاته وأقدام الفئران وأمسكها بيده ليجد وزنها ثقيلاً للغاية وما زالت بعض الفئران تقف فوقها فأزاحها يحيى مشمئزاً وهو ينظر إلى النفايات خلفه ويحيطه عبق تلك القذارة المتراكمة فأمسك أنفه متأففاً وهو يُحدّث نفسه مهوناً.. «كله علشان خاطر ك يامروان.. على الله يطمر فيك لما تكبر يا ابن الكلب.. ماتعرفش ابوك بيعمل إيه علشانك».. تحرك يحيى مبتعداً عن مكان القمامة التي شاركها بعض رائحتها فتوقف عند مدخل أحد المتاجر ليشتري شيئاً يغيّر به رائحته ولكنه تفاجأ بإصدار أصوات قوية من الفئران بدأت تثير الريبة بمن حوله وهذا بالطبع سيلفت أنظار عمال المطعم

وسيمنعون دخوله وتفشل مهمته.. لهذا هداه تفكيره لابتياح بعض الأشياء التي يعتقد أنها هامة لتنفيذ مهمته..

كانت الساعة الرابعة والثُلث تقريبًا عندما وصل يحيى بالقرب من المطعم وهو بداخل سيارة أجرة.. عندما توقفت السيارة التفت السائق إلى يحيى وأخبره أنهم قد وصلوا إلى وجهتهم ليتفاجأ يحيى يمسك عبوة نوتيلو ويصب محتوياتها بداخل صندوق بلاستيكي يحملة ويصدر من الصندوق بعض الأصوات الغريبة.. عندما شاهد يحيى السائق وهو يراقبه ارتبك بشدة ولكنه ابتسم بالحال وألقى عبوة النوتيلو بأكملها بداخل الصندوق ثم أغلقه ووضع قطعة قماش ثقيلة فوقه وتحرك إلى الخارج بعد أن أعطى السائق بعض النقود.. انطلقت سيارة الأجرة ووقف يحيى أمام مطعم لاجورمانديز الذي كان اسمه مكتوبًا بحروف لاتينية أنيقة بواجهة فاخرة أسفل مبنى تجاري كبير.. دقت ضربات يحيى كالطبول وهو يتوجه إلى داخل المطعم ويده صندوق الفئران ويتمنى أن تسير خطة كما يتمنى.. دلف إلى المطعم بتأنٍ وتعدى بوابته ليستقبله سريعًا هواء التكييف البارد وإضاءة المكان الساطعة.. جال بعينه متفحصًا بين أرجاء المطعم فوجده فخم التصميم شديد الأناقة ذا بصمة أجنبية واضحة وجميع رواده من الفئات العليا والكثير منهم أجنب.. قبض بقوة على الصندوق البلاستيكي بيده وفوقه قطعة القماش الثقيلة وهو يبحث عن أقرب طاولة بالقرب من مدخل المطعم تحسبًا لساعة هروبه فلم يجد إلا طاولة بمنتصف المطعم تقريبًا هي التي تبدو شاغرة.. تقدم إليها بثقة وسرعة وجلس على المقعد ووضع الصندوق بخفة أسفل الطاولة.. رمقه بعض الحضور بنظرات

مستهجنة نظراً للملابسه غير المهندمة وغير النظيفة.. رمقه بالحال نادل
أجنبي يعمل بالمطعم بزيه الرسمي المعتاد وصدمة بشدة عندما شاهد
يحيى بملابسه الرثة غير المهندمة.. شاهد يحيى نظرات النادل إليه
فأشاح بوجهه عنه سريعاً ونظر أمامه.. تحرك النادل جهته بعزم
وتحدث إليه بالإنجليزية.. «كيف أستطيع خدمتك ياسيدي؟»..
أجابه يحيى بالإنجليزية محترفة.. «أريد قائمة الطعام من فضلك»..
ابتسم النادل من إنجليزية يحيى الجيدة وابتعد عن ناظره سريعاً..
بينما أخذ يحيى يغمض عينيه وهو يُطمئن نفسه.. «اطلب اوردر..
وسيهم وامشي.. الموضوع سهل يا يحيى.. ماتقلقش..».. فتح عينيه
سريعاً عندما سمع صوت النادل يحدثه.. «القائمة ياسيدي».. أوماً
يحيى له شاكرًا برأسه وتوقف النادل أمامه منتظرًا.. فشر يحيى
بالتوتر.. ففتح القائمة سريعاً وجال بعينه سريعاً واختار وجبة
وأشار إليها.. نظر النادل إلى الوجبه ثم ابتسم إلى يحيى وحدثه.. «
هذه الوجبة ب 1200 جنيه».. نظر له يحيى غاضباً من كلماته..
فأخرج عددًا كبيرًا من النقود بجيبه وأظهرها أمامه.. «هل تريدني أن
أدفعها لك مقدمًا».. ابتسم له النادل.. «لا ياسيدي.. سوف تحاسبنا
بعد أن تستمتع بوجبتك.. سوف أحضرها لك حالاً».. وتحرك
النادل مبتعداً عن يحيى الذي كان مغتاضاً منه ولكنه كظم غيظه
سريعاً وأخذ يتابع مهمته من جديد.. ظل يترقب رواد المطعم من
حوله وهم يشيخون بأنظارهم عنه بتقزز.. فشر بالضيق أكثر ولكنه
شعر بالامتنان على الرغم من ذلك حيث بسبب ضيقه هذا قد
تخلص من توتره.. لاحظ الكاميرات الصغيرة الموزعة بشكل غير
واضح حتى لا تشعر رواد المطعم بعدم الراحة.. نظر إلى ساعته

فوجدتها تعدت الرابعة والنصف.. فجأة سمع جلبة من أسفل طاولته.. فأزاح قماش الطاولة بيده بهدوء ليشاهد الصندوق البلاستيكي يتحرك من على الأرض بقوة.. يبدو أن الفئران التهمت جميع الطعام الذي كان يضعه يحيى لهم بالصندوق حتى يهدأوا.. وأخذوا بالصياح وهم يضربون الصندوق البلاستيكي بقوة.. هنا شعر يحيى بالقلق وعلم أنه إن لم يتخلص من هذا الآن فسوف يفتضح أمره وتفشل مهمته.. فرفع قماشة المنضدة وتحرك بيده تحت غطاء الصندوق ولكنه توقف مذعورًا عندما سمع صوت النادل وهو يقف خلفه ويحدثه بالإنجليزية: «ماذا يحدث هنا ياسيدي.. ماذا تفعل؟».. ارتعشت يد يحيى وغزا العرق وجهه وارتفعت درجة حرارة جسده.. هل انتهى كل شيء.. هل ستفشل مهمته؟ ماذا يفعل.. إن حياة أسرته على المحك الآن.. توقف عقله عن التفكير وشل جسده عن الحركة.. حتى سمع صوت النادل يحدثه من جديد بضيقٍ شديدٍ.. «لقد سألتك ماذا يحدث هنا ياسيدي».. وهنا لمعت أعين يحيى وابتسم ثم تصنَّع الغضب على وجهه وحاول أمسك يد النادل.. فسحب النادل يده بعنف وابتعد عن يحيى الذي تجاهل فعله وأخذ يصرخ عليه بصوتٍ عالٍ بالإنجليزية حتى يسمعه الجميع.. «أنا الذي أوجه لك هذا السؤال.. أنا أتيت إلى هنا لكي أنعم بوجبه هادئة ولكن على الرغم من ذلك أجد هذا الشيء الغريب أسفل طاولتي.. ما هذا الشيء؟.. أنا آمرك أن تفتح ذلك الصندوق الآن.. هل هناك شيء خطير بداخله.. هل هناك قبلة أو ما شابه؟».. بدا القلق على رواد المطعم وظهر الذعر بينهم وتعالَت الأصوات الهامسة المستهجنة.. نظر النادل بقلقٍ إلى الصندوق

البلاستيكي ثم إلى يحيى مندهشاً.. فحدثه يحيى: «افتح هذا الصندوق الآن لنرى ما فيه».. شعر النادل بالقلق وتراجع وهو ينظر إلى يحيى مستنكراً.. استغل يحيى تلك اللحظة وأمسك بالصندوق سريعاً من تحت الطاولة ووضعها أعلاها وقام بفتح الغطاء البلاستيكي ليتفاجأ هو بالفئران المغطاة بالشوكولاتة والنوتيلات وأصبح منظرهم مقزراً ومخيفاً بنفس الوقت.. وقفزوا بوجه يحيى إلى خارج الصندوق وكانت أعدادهم وأحجامهم كبيرة.. ففزع يحيى من أشكالهم وسقط على الأرض وبسقوط يحيى وانتشار الفئران بين أرضية المطعم ورواد.. انقلب المكان رأساً على عقب وتعالى الصرخ وقفز الرجال من أماكنهم وسقطت بعض النساء مغشياً عليهن.. وساد الهرج والمرج المكان.. حاول عمال المطعم السيطرة على الموقف ولكن تحرك الفئران العشوائي أصابهم هم أيضاً بالذعر وعندما دلف أحد تلك الفئران إلى بنطال عامل منهم أخذ يصرخ مثل النساء ليزيد الطين بلة.. ابتسم يحيى على هذا المشهد الذي تحقق بسببه ولكنه لمح بمن يراقب تلك الابتسامة.. إنه النادل الذي كان يسخر منه منذ قليل شاهده وهو يبتسم فنظر له النادل غاضباً.. «أنت من فعل ذلك».. بتلك اللحظة سقط رجل عجوز أشيب الشعر بصحبة زوجته على الأرض بالقرب من النادل وتعلق بملابسه وهو يحاول النهوض.. فأمسك النادل بيده وساعده على النهوض وأخذ يطمئن عليه.. فشكره العجوز هو وزوجته وأخذ يربت على يديه.. استغل يحيى هذه اللحظة وانشغال النادل بالعجوز وفرَّ هارباً إلى خارج المطعم تاركاً وراءه حالة من الهرج والمرج وأصوات جلبة وصل صداها له حتى بعد أن أطلق ساقيه للرياح هرباً من رواد المطعم المذعورين..

لم يعلم هنا لماذا كان يشعر بالعادة وهو يركض.. إحساس الانتعاش
والسرور كان يملأه على الرغم عنه.. لم يعلم لما كان يضحك بسرورٍ
شديدٍ وهو يتلفت خلفه ويرى المطعم وهو يتعد رويدًا رويدًا.. قد
يكون بسبب شعور الإهانة الذي قد ألمَّ به عندما شاهدوه رواد
المطعم وكانوا يعاملونه كأقلَّ منهم قد يكون هذا السبب الحقيقي..
أم إن السبب يرجع أنه قد استطاع إنهاء مهامه الغربية تلك حتى الآن
وهذا جعله يشعر بالنشوة والغرور.. فهو قد حقق جميع مهامه مهما
كانت صعوبتها أو غرابتها.. لقد أكملهم على أكمل وجه.. عندما
شعر يحى بهذا الشعور الغريب يجتاحه للمرة الأولى توقف عن
الركض في الحال وأخذ يلوم نفسه.. إنه يفعل هذا منذ البداية لإنقاذ
زوجته وابنه وليس ليرضي غروره الشخصي.. عاد إلى رشده سريعًا
وأوقف سيارة أجرة وتحركت به، وأثناء ذلك قام بالاتصال على
سامي فكري.. ولكن هذه المرة لم يجبه سامي.. كرر اتصاله أكثر من
مرة.. فهو لا يعلم أين يتجه بوجهته الآن.. ويخشى أن يذهب إلى
أقصى المشرق ويختار حينها سامي أن يذهب إلى أقصى المغرب ويضع
له وقتًا محدودًا فيزيد الصعوبة على نفسه.. ولكن حيرته لم تدم كثيرًا
حينما رنَّ هاتفه بمكالمة سامي الذي كان صوته مختلفًا هذه المرة.. كان
يبدو عليه السرور بكلامه.. «برافو عليك يا يحيى.. نفّذت مهمتك
مضبوط».. أخذ يحيى يتصنع الغضب.. «أنا بعمل كل ده علشان أرجع
مراقي وابن اللي خطفتوهم».. هنا توقف قائد سيارة الأجرة فجأة
ونظر إلى يحيى خلفه بخوف.. «خطف.. خطف إيه يابيه.. إنزل من
العربية وحياة أبوك.. أنا مش ناقص مشاكل».. شعر يحيى بالحرق

من قوله هذا الأمر أمام قائد سيارة الأجرة.. وتمالك نفسه في الحال وأخذ يتسم له وهو يضحك..» هههه لا مؤاخذه يا أسطى.. هههه ده أنا بهزر أنا وواحد صاحبي..».. السائق حدّثه بقلق.. «يابيه بالله عليك العربية عليها أقساط ومش ناقص مشاكل».. يحيى مرتبگًا.. «يا أسطى قتلتك ماتخافش.. أنا بهزر أنا وواحد صاحبي.. ثم انت رامي ودنك معانا ليه..».. ضرب السائق مقود السيارة أمامه.. «لا إله الا الله.. ماشي.. رايح على فين لا مؤاخذه بقى ياباشا علشان لو مش في طريقي تبقى تنزل معلش..».. ضحك سامي ساخرًا بالهاتف.. «هههه إيه يا يحيى.. إبقى امسك لسانك شوية.. قول للسواق يأخذك ويطلع على قسم إمبابة.. واديله فلوس بزياده علشان مايعملكش مشاكل.. لما توصل قسم إمبابة كلمني..».. ثم أغلق الهاتف.. أمسك يحيى بهاتفه وهو مندهش كالعادة ويفكر بعمق.. «قسم إمبابة.. ماذا سيفعل هناك..».. ولكن قطع تفكيره نظرات قائد السيارة الذي ظل ينظر له بالمرآة الأمامية.. فأشار له يحيى حينها.. «اطلع على قسم إمبابه يا أسطى..».. أخذ سائق السيارة يضرب مقود سيارته.. «لا إله إلا الله.. قسم إمبابة.. يابيه بالله عليك أن مش عايز مشاكل..».. أجابه يحيى بضيق.. «في إيه يا أسطى.. أنا بقولك حاجة غريبة.. أنا ساكن جنب قسم إمبابة فيها حاجة دي.. ماتخافش مفيش حاجة.. اطلع يلا بسرعة وهديلك 100 جنيه زيادة فوق العداد».. أثارت 100 جنيه لعاب السائق فأمسك بمقود السيارة من جديد وأخذ يتحرك بطريقة.. «لا إله إلا الله.. ربنا يسترها علينا يارب».. شعر يحيى بالاستياء من هذا الموقف

وتذكر مواقف سائقي سيارات الأجرة معه من قبل وما مدى
جشعهم وتحكمهم بالراكبين.. فأخذ ينفخ بطريقه وهو ينظر إلى
الشوارع من نافذة السيارة..

وصلت سيارة الأجرة إلى قسم إمبابة وتابع السائق يحيى بترقب
وهو يهبط من سيارته ويعطيه أجرة السيارة وفوقها المائة جنيه كما
وعده فابتسم السائق وحيّاه وتركه مسرعاً.. نظر يحيى بتمعن إلى
قسم إمبابة الذي كان موضوع أمامه بعض الحواجز الحديدية ويقف
أمامه بعض الجنود وبالقرب منه تقف سيارة أمن مركزي وكان
المواطنون يتدفقون من وإلى داخل القسم بكثافة.. مشهد القسم أثار
الخوف بقلب يحيى نظراً لسمعة القسم السيئة المعروفة على مستوى
البلاد كلها.. مضطرباً متعرقاً أعطى يحيى ظهره للقسم وتحدث إلى
سامي على الهاتف لسمع صوته سريعاً.. «أيوه يا يحيى..».. يحيى
مقتضباً.. «أنا قدام قسم إمبابة أهو.. أعمل إيه؟ سامي بثقة..
«هتخش جوه القسم وتسال عن الأمين متولي..».. ثم صمت..
فسأله يحيى ملاحظاً.. «أيوه وبعد ما أسأل عن الأمين متولي.. أعمل
إيه بعديها؟»..

سامي بثقة شديدة: «هتقرب منه وتضربه بالقلم على وشه بأقصى
قوة عندك».. يحيى صارخاً وهو مصدوم.. «إيه.. إنت بتقول إيه..
عايزني أخش قسم إمبابة وأضرب أمين شرطة جوه بالقلم.. إنت
اتجنت.. إنت مش عارف هيعملوا فيا إيه..»..

سامي باقتضاب.. «يحيى.. نفذ..».. ثم أغلق الهاتف سريعاً

ليتركه في صدمة شديدة للغاية.. جميع المهمات كانت صعبة بالتأكيد ولكن تلك المهمة هي انتحار بلا شك.. أن يعاديك أحد رجال الشرطة في مصر فسوف يذهب بك إلى وراء الشمس ولن يكون خلفه مراقب أو محاسب.. فما بالك بأن تذهب أنت إلى رجال الشرطة لكي تعاديهم.. هذا هو الانتحار بعينه.. أخذ يحيى يمسك رأسه يأساً.. وهو يفكر مجهداً.. «لماذا يفعل معه سامي هكذا.. وكيف سينفذ هذا الأمر.. ألم يخبره من قبل ألا يبلغ الشرطة.. إذا لماذا يجعله يذهب إلى الشرطة بعقر دارهم.. أفعال وطلبات سامي كانت غير منطقية أبداً أبداً.. ولكن هذه المرة تخطت كل المعقول.. وظل يحدث نفسه مختاراً.. «أعمل إيه بس ياربي.. أعمل إيه.. أخش أقولهم إنهم خطفوا مراقي و عيالي.. طيب وهو باعتني هنا ومش عامل حسابه إني هعمل كده.. أكيد طبعاً عامل حسابه ومحضّر نفسه لكده.. مش هينفع أبلغ.. مراقي وابني هيبقوا في خطر.. واشمعنى يعني قسم إمبابة.. ومين الأمين متولي ده.. أعمل إيه ياربي؟ أعمل إيه؟!».. ظل يحدق بالسما فوقه قليلاً ثم أغلق عينيه وتنهد بقوة ثم توجه بثقة تكذّبها قدماه المرتعشتان.. دلف إلى داخل القسم فوجده مزدحماً وممتلئاً بالمارة.. تحدّث إلى أحد العساكر بالقرب منه.. «لو سمحت هو الأمين متولي فين».. فجاوبه العسكري بلامبالاة.. «إستنى دورك واقف في الصف».. نظر يحيى مستغرباً إلى العسكري الذي كان يقف أمامه بعض الأشخاص يصرخ عليهم وظن أن يحيى منهم.. فتركه يحيى سريعاً وأخذ يبحث عن أحد ما يدلّه على متولي ولكن كان القسم يشغل بالعمل والمارة كخلية النحل.. ولكن لفت أنظاره رجل عجوز يحمل صينية حديدية عليها بعض المشروبات الساخنة

ويتجول بطرقات القسم بمهارة متمرسة.. فاستوقفه يحيى سريعاً..
«لو سمحت يا حاج..».. توقف العجوز أمامه.. «أيوه يا أستاذ
أؤمرني».. يحيى مرتباً.. «معلش أنا كنت عايز أسال عن الأمين
متولي ماتعرفش هو فين؟».. انتفض العجوز في الحال واخذ ينظر
خلفه مترقبا واقترب من يحيى هامساً.. «إنت عايز الأمين متولي»..
أوماً يحيى إليه برأسه «أيوه كنت عايزه في حاجة كده».. أخذ
العجوز ينظر حوله مترقباً مرة أخرى ثم همس ليحيى.. «يا ابني
أبعد عن الأمين متولي ده وكل عيش ده راجل مفترى وقادر.. حتى
الظباط بيتقوا شره.. لو ليك مصلحة ولازم تخلصها أدلك على حد
تاني.. الأمين متولي ده لو صباeck تقطعه».. ابتلع يحيى ريقاً خوفاً
من تحذيرات العجوز وانقبض قلبه وشعر بوجع بمعدته.. «يانهار
اسود.. للدرجة دي!».. العجوز هامساً.. «وأكثر.. ده شخصية ربنا
مايرمي حد في طريقه»..

يحيى بأسى.. «معلش يا حاج.. أصل أنا مضطر أتعامل مع الأمين
متولي ده بالذات».. نظر له العجوز بشفقة ثم أشار بيده إلى الخلف..
«هو بيقعد في المكتب اللي في آخر الممر على الشمال.. ربنا معاك..
وياريت ماتقولوش إني قُلتلك حاجة.. أنا راجل غلبان وعندي عيال
بربيهم الله لايسئك».. أخذ يحيى يتسم له وهو يومئ له برأسه..
«حاضر يا حاج».. ثم تركه العجوز وانصرف وارتعدت قدما يحيى
مما سمعه وكادت تهوي به.. وفكر للحظات بأن يعاود أدراجه
عائداً.. ولكن لاحت ابتسامة ابنه مروان أمامه فجأةً وهو يتمسك
بقدمه ويحتضنها.. تذكره لهذا الموقف أسعده وألقى بأي شك
بقلبه.. إنه سيذهب للجحيم من أجل إنقاذ ابنه حتى لو كان هذا

الجحيم متمثلاً بداخل قسم إمبابة على هيئة الأمين متولي.. بخطوات عازمة وب عقلية مرتبكة تحرك يحيى جهة مكان الأمين متولي ليجده بنهاية الممر كما وصف العجوز على شمال الممر غرفة صغيرة بابها مفتوح ويتواجد بها ثلاثة أشخاص يرتدون الملابس الرسمية بأجسام متفاوتة ما بين الضخم والعادي وهم يتضحكون بشدة فيما بينهم.. ابتلع يحيى ريقه عندما شاهدهم واقترب سريعاً وهو يفرك يده اليمنى بقوة وبسرعة وحدثهم بصوت مرتبك.. «السلام عليكم.. لو سمحتوا كنت عايز الأمين متولي..».. نظر له أمناء الشرطة الثلاثة باستنكار دون أن يتحدثوا إليه.. ولكن سأله أحدهم سريعاً.. «عايز الأمين متولي في إيه؟».. نظر له يحيى بترقب «كنت عايزه في حاجة خاصة كده على انفراد..».. نظر له أمين الشرطة لثوانٍ ثم انفجر ضاحكاً «على انفراد.. هههههههه».. أخذ أصدقاؤه يتشاركون الضحك معه ويحيى ينظر لهم مستنكراً لعدة لحظات ثم أجابه أمين الشرطة.. «أيوه.. خير أنا الأمين متولي..».. هنا أمسك يحيى بيده اليمنى وفركها بسرعة بأصابعه وقام بالاستعداد لإطلاق عنان يده قبل أن يوقفه فجأة صوت أمين آخر معهم.. «يا أخي بطل هزار بقى ليصدق..».. ثم تحدث الأمين الثاني إلى يحيى.. «أيوه ياكابتن عايز إيه؟ أنا الأمين متولي.. هتديني فلوس ولا إيه؟ ارتبك يحيى هنا.. فلقد وجد اثنين يدعيان أنهما الأمين متولي.. وزاد ارتبائه عندما دخل الأمين الثالث على الخط وكان أكثرهم ضخامة وقوة وبشارب كَثُّ كَثيف.. «بطل هزار يا ابني انت وهو.. أنا الأمين متولي عايز إيه؟».. إذاً الثلاثة يدعون أنهم الأمين متولي.. إذا الحل الوحيد هو أن يصفعهم جميعاً وبالطبع سيكون متولي أحدهم وبهذا سيكون قد قام بمهمته..

ولكنه بنفس الوقت سوف يزيد الطين بلة.. بدلاً من أن يتلقى غضب أمين شرطة واحد سوف يواجه غضب ثلاثة دفعة واحدة.. وهداه تفكيره لحل آخر أقل ضرراً من الأول.. فتحدث إلى إليهم بثقة.. «أنا جاي النهارده مخصوص علشان أقول إن الأمين متولي ده شخصية قدرة بنت كلب».. هنا وقف الأمين الثالث ضخم الجثة كثيف الشارب وصرخ به بغضبٍ.. «إنت جاي تشتمني يلا..».. هنا ابتسم يحيى عندما نجحت خطته وثار الأمين متولي الحقيقي لكرامته وبالحال وبدون تردد صفعه صفعه قوية للغاية بيده اليمنى وصل صوتها إلى خارج الغرفة.. نظر متولي إلى يحيى مصدوماً مشدوهاً وهو يضع يده على وجهه الذي امتقع بحمرة الغضب الشديد.. بينما الأمينان الآخران ظلاً ينظران إلى المشهد مصدومين من فعل يحيى غير المتوقع هذا.. لم يتوقعا أبداً أن يتجرأ أحد من المواطنين أن يفعل ذلك بفرد شرطة أبداً وبداخل القسم.. فعلة يحيى عقدت ألسنتهم وظلوا ينظرون إلى متولي الذي كان يغلي من داخله وهو ينظر أمامه إلى يحيى الذي كان يكاد ينفجر من الإثارة والخوف بذات الوقت.. كان المشهد غريباً للغاية ومربكاً.. لم ينطق أو يتحرك أي شخص بداخل الغرفة لعدة لحظات قبل أن يتحرك متولي من مكانه وهو يمسك يحيى بقبضته الضخمة من ملابسه ويدفعه دفعاً ليأتي معه.. وهنا وقف صديقا متولي وأمسكوا يحيى من ملابسه أيضاً وهم يسبونه ويصرخون عليه ويتوعدانه بالهلاك.. «إنت هيطلع.. أمك النهارده.. إنت هتعلق من رجلك.. إنت هتتنفخ يا ابن...».. صرخ متولي غاضباً على زميله.. «ماحدش يقرب منه.. سيوهولي أنا هتصرف معاه».. أخذ أمناء الشرطة يتحدثون إلى يحيى ساخرين..

«إحنا كنا هنرحمك شوية.. ولكن متولي هي...».. شعر يحيى هنا أنه هالك لا محالة بينما متولي يسحبه سحباً بقوة وغضب شديد إلى غرفة أخرى بجوارهم وأغلق عليهما الباب.. ونظر إلى يحيى وهو مشتعل من الغيظ.. وأخذ يتحسس وجهه الذي تورّم قليلاً.. ابتلع يحيى ريقه وهو يشاهده يغلق الباب بالمفتاح ببطء.. حاول أن يتحدث إليه بمنطقية قليلاً.. «أنا عارف إن اللي أنا عملته معاك غلط.. بس لو ادتني فرصة إني أشركك بس هتفهم أنا عملت كده ليه..».. نظر له متولي نظرات حادة للغاية ثم وضع يده بجانبه وأخرج سلاحه من جرابه وتحرك ببطء جهة يحيى ووضع سلاحه على المكتب أمام يحيى الذي نظر إلى السلاح قلقاً.. هل سيعقل أن يستخدمه ضدي.. فكر حينها يحيى بأن يمسك هو بالسلاح الناري ويقوم بالإطلاق على متولي ولكنه تردد قليلاً.. ولكنه قد قرر إذا حاول متولي أن يهاجمه فإنه سيدافع عن نفسه وليكن ما يكون.. تحرك متولي ببطء جهة المكتب وفتح درجه ومدّ يده بداخله وهو ينظر ليحيى بغيظ شديد ثم اقترب منه سريعاً وضرب المكتب بيده فجفل يحيى منه للحظات ثم نظر إلى متولي فوجده ذهب ليجلس إلى مكتبه وأخذ يتحسس وجهه متأماً.. شعر يحيى بالاندهاش من فعل متولي هذا ونظر أمامه على المكتب ليجد أن متولي وضع أمامه ظرف أبيض صغير فمدّ يده إليه متردداً وهو ينظر إلى متولي الذي أخذ يتحسس وجهه دون أن يعيره أي اهتمام، أمسك يحيى بالظرف سريعاً وهنا ضرب متولي المكتب بقبضة بعنف فجفل يحيى مرة أخرى وصرخ عليه متولي.. «قولهم أنا نفذت اللي هما طلبوه بالظبط أهو.. الظرف في إيدك.. قولهم بعد كده يشوفوهم حاجة تاني بدل القلم ده.. مش هستحمل

كل مرة أتضرب بالقلم وبالذات من غبي زيك رايح يضربني قدام
زمايلي انت اتجننت؟!.. نظر له يحيى مندهشاً دون أن يتحدث.. بينما
أخذ متولي يفرك وجهه بغيظ.. «إيه ده.. إنت إيدك ثقيلة قوي..
مش عارف تخفها شوية..».. ابتسم يحيى متشفيًا.. «هما اللي قالولي
كده..».. نظر له متولي بضيقٍ.. «وهما قالولك كمان تشتمني..»..
يحيى مبتسماً.. «دي أوامرهم بردو وانت عارف مقدرش ما أنفذش
الأوامر».. وقف متولي غاضباً.. «طيب يلا غور من قدامي يلا بدل
ما اتجنن وأكسر على دماغك المكتب كله..».. يحيى قفز فرحاً..
«حالا.. هامشي أهو حالا..».. وضع الظرف بجيبه سريعاً ثم قفز
جهة باب المكتب ثم تحرك بسرعة شديد إلى خارج القسم ولم يصدق
نفسه أنه أصبح بالخارج.. أخذ يتلفت حوله قلقاً وهو مبتعد حتى
قطع مسافة كبيرة واختفى القسم من أمامه فقفز فرحاً بالشارع وظل
يهلل فرحاً بنجاته من هذا الموقف العسير.. لقد خرج من الجحيم
الذي اعتقد بأنه به نهايته.. لم يصدق أبداً أن يؤول هذا الأمر إلى
ذلك.. تنفس الصعداء وجلس على أحد الأرصفة ليلتقط أنفاسه..
فلقد شعر بأنه فقد نصف عمره بتلك الدقائق الماضية.. «مش
معقولة.. أنا مش مصدق نفسي.. الحمد لله يارب.. الحمد لله..»..
أمسك الظرف بيده وأخذ يتفقد.. «يا ابن الإيه ياسامي.. لعبت
بأعصابي لحد ماكنت هتشلني.. مش عارف تقول هتروح لمتولي
تاخذ منه ظرف لازم الدراما دي كلها علشان تشيب شعري كده..
عايز توصلي إن حتى الشرطة ليكم فيها رجالة.. الرسالة وصلت
ياسامي.. الرسالة وصلت».. أمسك الظرف بيده.. «طيب وأعمل
إيه بالظرف ده.. مكتوب فيه مهمتي الجاية ولّا إيه؟!».. أمسك

الظرف ومزقه ليجد ورقة مكتوبة بداخله بخط كبير (محمد أحمد..
بنطلون أسود وقميص أبيض.. محطة السادات خط حلوان الساعة
8).. أخذ يقلب بالورقة فلم يجد أي شيء غير ذلك.. فلم يفهم منها
شيئاً.. ثم قام بالاتصال على سامي ليجيبه سامي سريعاً.. «نفذت
المهمة».. يحيى متأففاً.. «خلصتها ياعم.. ومتولي إيداني ظرف».. سامي
باهتمام.. «ظرف.. الظرف ده في إيه؟».. هنا شعر يحيى بالاندهاش..
هل يعقل بأن يكون سامي لا يعلم بمحتويات الظرف أم إنه يختبره..
وبالنهاية قرر أن يخبره بالحقيقة.. «الظرف كان في ورقة مكتوب
عليها.. محمد أحمد بنطلون أسود وقميص أبيض محطة السادات
الساعة 8».. سامي صمت قليلاً ثم تحدث إليه.. «ركز معايا يا
يحيى.. المهمة الجاية دي عايزة تركيز كبير جداً.. احفظ البيانات اللي
في الظرف ده كويس جداً.. هاتروح لمحطة مترو السادات.. تدور
على واحد اسمه محمد أحمد.. لابس قميص وبنطلون ألوانهم زي
اللي في الورقة معاك وتسلمه للبوليس».. ضحك يحيى بهستيرية لعدة
دقائق.. وسامي يستمع إليه بالهاتف ثم سأله مستنكراً.. «بتضحك
على إيه يا يحيى».. يحيى يجاوبه وهو مازال يضحك: «بتضحك
..ههههه.. بضحك على كلامك.. ههههه.. عايزني أدور في المترو
اللي بيركبه 3 مليون كل يوم على واحد اسمه محمد ولابس قميص
وبنطلون.. فأنت أكيد بتهزر».. صرخ عليه سامي.. «يحيى.. ركز
كويس.. ركز علشان مراتك وابنك.. أنا ما بهزرش.. دي مهمتك
فعلاً.. هتمسك محمد أحمد ده وتسلمه للبوليس وضروري الكلام
ده الساعة 8.. لو الساعة عدت ثمانية ونصف ومالقتوش.. هاتبقى
فشلت في مهمتك».. صمت يحيى فجأة وأخذ يستمع له بتركيز..

فتابع سامي حديثه.. «أنا عارف إن المهمة المرة دي صعبة.. ولكن لازم تقوم بيها.. آه.. نسيت أقولك حاجة مهمة.. محمد أحمد معاه 2 كيلو متفجرات سي 4..».. يحيى مصدومًا.. «سي فور.. يانهار أسود..»..
«أنا عارف إنها مهمة صعبة طبعًا..»

«صعبة إيه.. دي مستحيلة..»

«ركز.. ركز يا يحيى..».. ثم أغلق الهاتف.. هنا شعر يحيى باليأس ووضع يده على عينيه وافتش الرصيف بجسده.. «أعمل إيه ياربي.. أنا كل ما أخلص من مصيبة تطلعي كارثة أكبر».. نظر بساعته فوجدها السادسة والرابع.. فقفز واقفًا.. «مفيش وقت.. لازم أروح المترو دلوقتي وربنا يجلها ساعتها..».. وتحرك بطريقة سريعًا وهو ينفض التراب من على ملابسه ويوقف سياة أجرة.. «مترو التحرير يا أسطى».. ثم صعد بداخل السيارة وانطلق بطريقه..

ياسين يقف أمام مكتبه ويضع لوحة بيضاء أمامه صور ليحيى بأماكن مختلفة ويضع أسلاكًا وروابط بينها والضابط أشرف بجواره.. أخذ يبحث ياسين عن سجائره بملابسه فلم يجدها فتحدث إلى أشرف.. «سجايري خلصت.. هات سيجارة ياحمادة..» أشرف بضيق يعطي له سيجارة.. «باشا خنقتني من إسم حمادة ده.. أنا لما بيندهولي بأشرف في البيت ما بردش.. مخي لزق عليه إسم حمادة ده خلاص..».. ياسين أخذ يشيح له بيده بضيق.. «يا أخي بقى فكك من الحوار ده.. اعتبره إنه إسمك الدلع..».. أشرف بضيق.. «على فكرة لو إسم دلع بردو مش هيبقى حمادة..».. ياسين بضيق..

«يووووه.. عايزني أدلعلك أشرف أقولك إيه.. ياشر شر.. عجبك الإسم ده.. تحب أقولك ياشر شر».. أشرف متقززا.. «لا.. شر شر إيه.. خلاص حمادة أحسن».. قام بإعطاء ياسين السيجارة التي أشعلها وقام بتدخينها بالحال ثم قام بزفير دخانها وهو مستمتع ويحرك يديه باسترخاء فوق صدره.. «ياه يا جدع.. أحلى إحساس في الدنيا وانت بتحس إن النيكوتين داخل يحرق صدرك من جوه».. نظر إلى أشرف بجواره وأخذ يشير إلى صور يحيى على اللوحة أمامه.. «قولي يا حمادة.. حصلت أي عمليات اغتيال لرجال أعمال أو وزراء أو حتى لناس عادية في الأماكن اللي ظهر فيها الواد ده..؟».. أجابه أشرف سريعاً.. «لا ياباشا.. أنا تحريت في الأماكن دي زي ما بلغتني ومالقتش أي جرائم قتل حصلت فيها خالص».. ياسين ينفث دخان سيجارته وهو يفكر بعمق.. «يعني إيه.. إحساسي غلط والواد يحيى ده ماوروش حاجة؟»..

«ياباشا ركز في القضية بتاعتنا.. تقارير الأمن الوطني قالت إن كل اللي ماتوا دول كانت في مشاورات كبيرة إنهم يبقوا في الحكومة الجديدة اللي هتشكل خلال أيام وإن عمليات الاغتيال دي عاملة ذعر للوزراء الجدد والقدام كمان..4 وزراء قدموا استقالتهم النهارده وأكثر من مرشح اعتذر عن المنصب».. أخذ ياسين يداعب رأسه.. «إممم.. يعني الاغتيالات دي خلت الوزراء القدام يخافوا هما كمان.. ودي حاجة ماتطمنش.. الأمور اتطورت بسرعة شديدة قوي خلال أيام قليلة».. أخذ ينظر إلى صور يحيى خلفه فوق اللوحة.. «مش عارف على الرغم إن مفيش دليل بس حاسس إن ظهور الواد ده في الوقت ده مش صدفة وممكن يكون ليه علاقة بالقضية

بتاعتنا.. على العموم أنا عايزك تركّز عليه ولو ظهر في أي مكان
تبلغني فوراً..» ثم ألقى السيجارة من يده بعد أن انتهت وأشار إلى
أشرف بجواره.. «هات سيجارة».. قام أشرف بإخراج علبة سجائره
فأخذها منه ياسين..».. فصاح عليه أشرف مستنكراً.. «إيه ياباشادي
بتاعتي..».. ياسين أشاح له بيده.. «خلاص ابقى اشتريك واحدة
غيرها».. وأشعل سيجارة منها ونفث دخانها في وجه أشرف الذي
ظَلَّ يسعل بضيقٍ..

السابعة إلا عشر دقائق.. هذا ماكنت تُشير إليه عقارب الساعة
الكبيرة المعلقة على رصيف محطة السادات بالمترو وسط الآلاف من
ركاب المترو الذين لا يتناقصون قيد أنملة كل دقيقة يختفون لتظهر
دفعات أخرى أكبر من سابقتها.. واقفاً وحيداً وسط الجموع لا
يفعل شيئاً غير مراقبة المارة وملابسهم.. لاحظ هنا أن الجميع
تقريباً يرتدي اللون الأبيض والأسود اليوم.. لا يعلم هل هذا بفعل
مخيلته أم إن مصر كلها تتآمر لتفشله بمهمته.. أخذ يفكر كيف له
أن يمسك محمد أحمد المزعوم هذا وهو معه متفجرات سي 4.. هو
يعلم أن مادة السي 4 مادة شديدة الانفجار وأنها مصنوعة من موادٍ
بلاستيكية ولهذا لا تستطيع أجهزة الكشف عن المتفجرات اكتشافها
بسهولة ولكنها لا تنفجر بمفردها يجب أن يكون هناك مفجّر ولا
يستطيع محمد أحمد بالتأكيد الدخول بالمفجر ومتفجرات السي فور
معاً لأنهم سيظهرون على جهاز كشف الحقائق وستعلم الشرطة
أنها متفجرات بالحال.. إذا يجب أن يكون هناك شخصٌ آخر معه

المفجر وأنه سيتقابل مع محمد ويصنعون قنبلة السي فور.. ولكن كيف علم سامي ومتولي عن محمد أحمد هذا.. إذاً على ما يبدو أنهم استطاعوا القبض على الشخص الذي يحمل المفجر من قبل ولكنه لم يستطيعوا الحصول على معلومات غير التي أعطاها لي متولي.. إذاً لا خوف من أن يتم تفجير القنبلة بالمترو اليوم ولكن إذا استطاع محمد أحمد الهرب مني فالتأكيد سوف يستخدمها بمكان آخر ويستطيع الحصول على مفجّرٍ آخر بسهولة.. إذاً يجب أن أنجح في الحصول على السي 4 اليوم.. ولكن السؤال هنا لماذا يرغب سامي بالقبض على محمد أحمد وحصول الشرطة على السي 4.. بالتأكيد هذا الأمر سيكون مفيداً له بالمستقبل.. هذه معلومة جيدة.. لقد حصلت على معلومات كثيرة من تنفيذي لمهامه ولكني لم أجد رابطاً لهم حتى الآن..».. أثناء انشغال يحيى بالتفكير العميق هذا تعثر شخصٌ به فنظرَ له يحيى بضيقٍ فتأسف له الرَّجُلُ وانسحب مبتعداً.. هنا خشى يحيى أن يكون قد سرق من الشخص الذي تعثر به فتحسس ملابسه وهاتفه سريعاً ولكنه وجد كل شيء بمكانه طبيعياً فتنفس الصعداء أخيراً وهو يحمد الله أنه لم يسرق هاتفه ليزيد الطين بلة مرة أخرى.. تحرك إلى الورااء ليستند إلى الحائط حتى لا يتعثر بأحدٍ ويستطيع أن يشاهد المارة بشكل أوضح أيضاً.. تعدت الساعة السابعة والرابع ودق ناقوس الخطر بعقل يحيى.. يجب عليه أن يتصرف الآن ولكنه لم يجد أي شيء يثير تفكيره لكي يضع خطة ما.. كيف سيستطيع أن يبحث عن شخصٍ بتلك المواصفات الشائعة.. هناك بعض المعلومات التي تجعله يقلل دائرة بحثه قليلاً أولها أن الشخص الذي يبحث عنه اسمه محمد أحمد أي إنه رجل وبهذا يستبعد أي سيدات

عن طريق بحثه والثاني أنه يحمل متفجرات سي 4 أي إنه يحمل حقيبة بشكل ما والثالث هي ملابسه الخليط ما بين الأبيض والأسود هو لا يعلم هل هي ألوان خالصة أم إنها مختلطة بألوان أخرى.. وعلى الرغم من تقليل دائرة بحثه قليلاً ولكن لماذا الأمر صعبٌ وأقرب إلى المستحيل.. فتح باب عربة المترو لتخرج دفعات من البشر يدفعهم للداخل دفعات أخرى معاكسة لهم والكل باستعجال شديد كان مشهداً سيرياً مضحكاً إذا دقق أحدٌ به من بعيد ولم يكن طرف بوسط تلك المعجنات من البشر بداخل عربة المترو.. لفت انتباه يحيى رجل قصير ونحيل يقف وراء سيدة وهي تحاول أن تدلف إلى عربة المترو وهو يدفعها للخلف.. علم يحيى بالحال أن هذا الرجل هو شخصٌ غير سوي يريد أن يتحرش بالسيدة.. تابعه يحيى باهتمام شديد ليرقبه وهو يمسك بالجرم المشهود ولكن تراجع الرجل فجأة وترك السيدة بداخل عربة المترو.. شعر يحيى بالاندهاش من فعل الرجل.. هل ترك ضحيته هكذا بسهولة أم إنها شعرت به ودرءاً للفضائح انحسب الرجل بهدوءٍ ولكن عندما شاهد الرجل يضع الهاتف بملابسه بحرصٍ شديدٍ أيقن هنا أن هذا الرجل ليس متحرشاً.. بل إنه لصٌ.. وتأكد عندما تذكر لون الهاتف لقد كان له لون وردي وبجرابه بعض الأشياء اللامعة.. هذا لا يمكن أن يكون هاتف لرجل أبداً.. أخذ اللص يجول بعينه بترقب حوله ليرى هل شاهده أحدٌ ما بجرمه المشهود وهنا قام يحيى بوضع يده على وجهه وتصنع بأنه يسعل حتى لا يرى وجهه اللص.. نظر اللص إلى يحيى فوجده يسعل فلم يشك به وأخذ يقف من جديد وسط

الأفواج الجديدة القادمة لتركب عربّة المترو.. هنا ارتسّمت على وجهه يحيى ابتسامة غريبة وهو ينظر إلى الرجل فأخرج محفظته ووضع بها بعض النقود بشكل غير مرتب حتى يكون شكل المحفظة منتفخاً.. ثم وضعها بأعلى جيبه الخلفي قليلاً ووقف بمكانه يراقب اللص دون أن يشعر.. وهنا اقترب قطار المترو من الرصيف.. فتحرك يحيى سريعاً ووقف خلف اللص الذي دخل من باب العربّة التي أمامه.. وهنا تحرك يحيى مسرعاً ليقفز بداخل باب العربّة الثاني بحيث يكون اللص خلفه.. وقف يحيى يراقب اللص من بعيدٍ وشاهده وهو يتحرك وينسلُّ بين الناس بسهولة شديدة.. وعندما اقترب قليلاً من يحيى وقف يحيى بزاوية جانبية بعربّة المترو ليظهر جيبه المنتفخ بمحفظته وأخذ ينظر بأسى أمامه ويتصنع أنه يفكر بعمقٍ شديد.. وقف اللص خلفه ولكن لم يبدِ يحيى أي رد فعل نهائياً حتى بعد أن شعر بأصابع الرجل تسلسل إلى جيبه ثم ارتطم به برفق وتحرك مبتعداً.. تعجب يحيى من سرعة ودقة اللص الذي انتشل محفظته بسهولة وبِحرفيّة على الرغم من أنه يعلم بأنه سيسرقه ولكن فعلها بسرعة شديدة.. خشي يحيى أن يفقد اللص فأمسكه من يده بسرعة وهو يحمل محفظته.. ارتبك اللص عندما شاهد يحيى يبتسم أمامه فانسلت يده الأخرى وحملت سكيناً صغيراً شهرها بوجهه.. يحيى مبتسماً.. «ما تخافش.. مش هقول لحد إنك حرامي.. ده أنا هكافئك واديلك 500 جنيه لو عملت اللي قولتلك عليه..» ..

اللص فرحاً.. «500 جنيه.. عايزني أعمل إيه؟»

يحيى مبتسماً بثقة: «حاجة بسيطة جداً.. هتفجر المترو..» ..

الثامنة وخمس دقائق.. كان اللص يتحرك بإحدى عربات المترو
بمهارة بين الركاب ولكن هذه المرة لا يسرقهم بل يحمل بعض
الأقلام وماكينات الحلاقة بيده ويصيح على الركاب ويتصنع بيعهم
وأخذ يصدح بصوت جهوري.. «أيوه ياهانم.. أيوه يابيه.. أبو مية
بقي ربع جنيه ..

ولا ين ولا دولار.. إحنا اللي فجرنا المترو بالأسعار..

لاتقولي ولا كحك ولا بيتي فور.. إحنا يابا اللي معانا السي
فور..».. أخذ اللص يتحرك وهو يحمل البضائع بيده ويصدح بتلك
الجميل بداخل عربات المترو.. ويتبعه من الخلف بتحفزٍ شديدٍ يحيى
وهو يتمعن بوجوه الركاب ويترقب رد فعلهم.. كانت خطة يحيى
مع اللص بسيطة للغاية قد أعطاه مبلغًا ماليًا صغيرًا وأخبره أنه
سيعطيه الباقي بنهاية مهمته واشترى بعض الحاجيات من الباعة
الجائلين وأعطاهما للصوص وأخبره أن ينطلق بداخل العربات وهو
يتجول ويصيح بتلك الكلمات التي بها انفجار مترو وسي فور..
لأنه مهما كان حرص أي شخص فإنه سوف يرتبك عندما يستمع إلى
بعض تفاصيل مهمته السرية على لسان شخص آخر.. وكانت مهمة
يحيى أن يتبع اللص ويراقب رد فعل الركاب ليجد محمد أحمد ضالته
المنشودة.. كان رد فعل معظم الركاب لا يخرج عن ثلاثة: الضحك
والسخرية من اللص.. أو عدم المبالاة التامة أو متابعة اللص
بفضول.. قام يحيى والصوص بالتحرك بداخل ثلاث عربات من قطار
المترو واستبعدوا بالطبع عربة السيدات من المعادلة وهكذا يكونون
قد غطوا 5 عربات وتبقى 4 عربات فقط.. كانت خطة يحيى تعتمد

على هذا الأمر فقط.. كان يخشى كثيراً ألا تنجح خُطَّته أو أن يكون محمد أحمد فطن الي خطته ولم يقع بها أو أن اللص يسأم ويفض شراكته القصيرة تلك فجأة.. كانت معدته تضطرب كلما فكر بأي من تلك الاحتمالات السلبية ولكنه كان يحاول عدم التفكير بتلك الأمور والتركيز فقط مراقبة ردود أفعال الركاب.. استمر الأمر على هذا المنوال حتى وصلوا للعربة السابعة التي ركبوها بمحطة حدائق المعادي.. كان متبقياً بعد تلك العربة عربتان أخريين وتصيب مهمة الفشل الذريع.. تحرك اللص بين الركاب ولكن مهمة أضعف بكثير من السابق وواضح أنه شعر بالضيق وأحس أن السرقة أسهل بكثير من العمل بكد كبائع متجول.. أخذ يصيح بصوت قوي ولكن بدون حماسة.. «أيوه ياهانم.. أيوه يابيه.. أبو مية بقى ربع جنيهه.. ولاين ولا دولار.. إحنا الي فجرنا المترو بالأسعار..

لاتقولي ولا كحك ولا بيتي فور.. إحنا يابا الي معانا السي فور..».. تحرك يحيى خلفه كالمعتاد وأخذ ينظر للركاب وردود أفعالهم وهنا شاهده بوضوح.. بجسده النحيل ووجه الأسمر، يرتدي قميصاً وبنطالاً باللون الأبيض والأسود ويحتضن حقيبة قماشية صغيرة.. ينظر إلى اللص بوجه محتقن مذعور.. شعر يحيى بالفرح الشديد عندما وجد هذا الرجل.. هل يكون هذا هو هدفه المنشود.. اقترب منه سريعاً ووقف أمامه وتحدث بصوت عالٍ.. «محمد أحمد».. وهنا نظر الرجل إليه فزعاً وسأله بخوفٍ.. «إنت مين؟».. ابتسم يحيى بفرح وقام بمسك الرجل بقوة شديدة وصرخ بعلو صوته.. «حرامي.. أنا مسكت حرامي».. فزع اللص الحقيقي

من فعل يحيى ووقف يراقبهم من بعيدٍ.. بينما محمد أحمد أخذ يصرخ على يحيى ويقاومه بشدة.. تجمع بعض الركاب لمحاولة معرفة الأمر فصرخ عليهم.. «ده حرامي.. سرق موبايل واحدة ست قدامي وانا سُفته أنا والراجل ده..» وأشار بيده إلى اللص الحقيقي الذي ارتبك قليلاً ثم صدق على حديثه.. «أيوه.. أيوه.. ده حرامي وسفته بيسرق فعلاً».. نظر له يحيى.. «قولهم.. قولهم إنك سُفته وهو بيسرق الموبايل أبو جراب وردي من البنت.. فتشه وانت تلاقي معاه الموبايل في جيبه».. وقف اللص مذهولاً من حديث يحيى بينما محمد أحمد أخذ يصرخ عليه ويُريد أن ينفلت من يحيى.. فصرخ يحيى على اللص.. «هفتشه ولا أخلي حد تاني يفتشه».. صاح أحد الركاب.. «أنا هفتشه».. هنا صاح اللص عليهم.. «لا.. أنا اللي هفتشه قدامكم أهو».. وبراعة شديدة أخرج الهاتف من ملبسه وقام بتفتيش محمد أحمد وأخرج منه الهاتف.. «أهو التليفون أهو.. كان سارقه الحرامي الغشاش».. نظر له يحيى مستنكراً.. «فتشوا تاني هتطلع منه حاجات كثير كان سرقها لو ما طلعتهاش كلها هطلعها أنا».. ابتلع اللص ريقه بقلق.. «لا.. أنا هطلع منه كل المسروقات اللي سرقها ابن الرضي ده».. وأخذ يخرج من محمد أحمد جميع المسروقات التي سرقها هو ويضعها في ملابس محمد ويخرجها منه.. ومحمد أحمد يصرخ مصدوماً وهو لا يدري كيف أتت إلى ملبسه كل تلك الأشياء.. هنا أمسك الركاب بخناق محمد أحمد وهم يتصارخون ويصيحون أنه يجب أن يتم تسليمه للشرطة.. ربت يحيى على كتف اللص بعد أن أرغمه على إعادة جميع المسروقات التي سرقها ثم وضع باقي الـ 500 جنيه في جيبه.. بينما أخذ اللص ينظر له بغيظٍ شديدٍ..

أمسكت جموع كبيرة من الركاب بمحمد أحمد وهموا عليه بالضرب والسب وسلموه للشرطة فسألهم أحد الضباط.. «إيه في إيه.. ماسكين الراجل ده ليه..».. صاح أحد الركاب الممسكين بخناق محمد أحمد.. «مسكنا حرامي ياباشا.. واحد من الركاب شافه وهو بيسرق وطلعنا منه الحاجات دي».. تحدث إليه الضابط مستفسراً.. «فين الشاهد اللي شافه بيسرق».. أجابه الرجل ثقة.. «موجود أهو ياباشا».. ثم نظر حوله على يحيى فلم يجده.. وأخذ جميع الركاب يبحثون عنه فلم يجدوا له أثراً.. ولكنهم شاهدوا اللص وهو يحاول أن يتسحب فشاوروا عليه.. «أهو ياباشا.. واحد تاني شافه وهو بيسرق أهو».. وقف اللص مصدوماً وبعض رجال الشرطة يقتربون منه ليستجوبوه بالحادث.. فتحدث اللص إلى نفسه مغتاضاً.. «عملتها فيها ولبستهاي.. أخ يابن الل..»..



يحيى يتحرك مسرعاً بين جموع المغادرين لمحطة المترو.. ركض على درجات السلم بفرح شديد كالطفل الصغير.. لفحه هوء الشارع ووصلت إلى مسامعه أصوات السيارات.. أخذ يتسم وهو غير مصدق بنجاح خطته وإتمامه لمهمته.. رن هاتفه سريعاً فرفعه إلى أذنه ليجد صوت سامي يضحك.. «برافو.. برافو عليك يا يحيى».. ضحك يحيى رغماً عنه عندما سمع مديح سامي له.. ولكنه تذكر وضعه فصمت في الحال.. فتابع سامي حديثه.. «بمناسبة نجاحك بمهمتك دي أنا عندي ليك خبر هيبسطك».. يحيى مترقباً.. «خبر.. خبر إيه»..

سامي مبتسماً.. «المهمة الجاية دي هتبقى آخر مهمة ليك.. لو نفذتها بنجاح هترجع لمراتك وابنك على طول».. يحيى فرحاً.. «بجد.. إنت مش قلت إن المهام في ثلاث أيام؟!»

يحي ضاحكاً.. «ماهو البركة في كفاءتك وشطارتك نفذت المهام كلها زي ما احنا عايزين.. ثم انت زعلان إنك هتقابل مراتك وابنك بدري.. إنت شكلك حبيت اللعب معانا ولأ إيه» يحيى مرتبكاً.. «إيه.. إيه اللي إنت بتقوله ده.. أنا مفيش حاجة أهم في الدنيا عندي كلها زي رجوع مراتي وابني لي..».. سامي ملاحظاً: «هير جعلك.. هير جعلك.. بس بعد ما تنفذ المهمة الأخيرة».. أخذ يشيح يحيى بيده مغتاضاً.. «وطبعاً المهمة دي هتبقى مصيبة كبيرة.. أخطف طائرة مثلاً.. ولأ أطلع بصاروخ على القمر».. سامي ضاحكاً.. «ههههه.. لا.. لا ماتقلقش.. دي مهمة بسيطة جداً.. وفي نفس الوقت خطيرة جداً».. يحيى قلقاً.. «يعني إيه.. مش فاهم»..

«هتفهم.. هتفهم كل حاجة.. اطلع على العنوان ده 28 شارع محمود مختار.. شقة رقم 5 الدور الثالث.. هتلاقي مفتاح الشقة تحت مشاية الجزم.. أول لما توصل هناك كلمني.. يلا شد حيلك يا بطل.. كل ما تنفذ مهمتك بسرعة كل ماتبقى مع عيلتك أسرع.. سلام مؤقت»..

أغلق يحيى الهاتف وهو مضطرب متعرق.. وأخذ يفكر بحيرة: «إيه.. خلاص دي آخر مهمة.. يا ترى هيصدقوا معايا ويرجعولي سمر ومروان.. معقول.. معقول الكابوس ده هيتتهي قريب.. مهمة واحدة وهبقى مع مراتي وابني.. طيب يا ترى المهمة دي هتبقى

إيه.. ربنا يستر.. ربنا يستر».. تحرك يحيى جهة إحدى سيارات
الأجرة وركبها..

توقفت سيارة الأجرة أمام أحد المباني وهبط يحيى من السيارة
التي انطلقت مبتعدة عنه.. وقف يتأمل المبنى أمامه الذي كان قديماً
ولكنه لا يخلو من لمسة معمارية جميلة تم افتقادها تلك الأيام.. كان
يحيى مضطرباً قلقاً فتجربته السابقة مع الشقق التي يدلّه عنها سامي
ليست بالجيّدة.. تفقّد محيطه جيّداً ولم يجد أي كاميرات بالمكان..
كانت المنطقة راقية وهادئة للغاية ولا يمر أحدٌ منها إلا بسيارته..
بحث بعينه سريعاً عن حارس العقار فلم يجد أحداً.. تحرك بترقب
بداخل البناية وهو حريص للغاية.. لم يستخدم المصعد وصعد على
قدميه ثلاثة طوابق بأكملها.. اضطربت أنفاسه قليلاً ولكنه كان قد
وصل إلى غايته بالنهاية.. هاهو يقف أمام باب شقة رقم 5.. أول
شيء فعله هو البحث عن كاميرات بالمكان ولكنه لم يجد أحدهم
بالدور بأكمله.. تحرك بالقرب من الباب ووضع أذنه عليه ليستمع
إلى أي أصوات خلفه ولكنه لم يجد أيّ أصواتٍ أبداً.. سحب مشاية
الأقدام فوجد مفتاح باب الشقة أسفلها كما أخبره سامي.. اقترب
ليمسكه ولكنه تراجع متردداً، ثم سحب طرف ملبسه وأمسك بها
المفتاح حتى لا يضع بصمةً عليه تحسباً لأي شيء قد نصبه سامي له
بالداخل.. فتح الباب بسهولة شديدة ثم وضع مفتاح الباب بجيبه..
عندما دلف إلى داخل الشقة اشتعلت إضاءتها بالحال فاضطرب يحيى
وأخذ يفتش بعينه عمّن أشعل الإضاءة فلم يجد أحداً أمامه..

ألقي نظرة سريعة على محتويات غرفة المعيشة أمامه فوجدها غرفة ملائمة واسعة تحتوي على أثاثٍ راقٍ وباهظ الثمن.. أخذ يتفقد محتويات غرفة المعيشة دون أن يحاول لمس أي شيء بها حتى يعلم ما هي طبيعة مهمته هنا.. قام بالاتصال على سامي ولكنه وجد صوت هاتف يرن بصوت عالٍ بمكان ما بالشقة.. شعر بالاضطراب قليلاً مما يحدث ولكنه لم يتحرك من مكانه وظلّ يتصل بسامي دون أن يجد رداً ومازال صوت الهاتف يصدر من مكان ما بالشقة.. وضع يمينه يميناً ثم تحرك بحرص جهة مصدر صوت رنين الهاتف ليجده يصدر من غرفة مغلق بابها.. وقف يمينه يميناً خلف الباب قلقاً ثم وضع أذنه بالقرب منه، ولكنه لم يجد إلا صوت رنين الهاتف الذي كان واضحاً للغاية.. حاول يمينه أن يفتح باب لغرفة ولكنه تراجع سريعاً ثم قام بفتحه بعد أن غطى يده بأطراف ملابسه وفتحه بهدوء ليرى الغرفة أمامه مكونة من سرير للنوم وبجوار السرير قطعتان من الكومود على أعلى قطعة الكومود على اليسار هاتف أرضي يرن بصوت عالٍ ومستمر ولم يكن هناك شيء غريب آخر بالغرفة إلا شيئاً واحداً فقط.. كان موجوداً بالقرب من السرير مقعد خشبي قوي ويجلس فوقه شخص مقيد من يديه وقدميه، ورأسه مغطاة بقماشة سوداء وأخذ يتلوى ويتحرك بسرعة فوق المقعد وهو خائف بشدة ويصدر همهمات من خلف قطعة القماش التي فوق رأسه.. هذا المشهد جعله مضطرباً للغاية وهو لا يدري ماذا يحدث أمامه.. رنين الهاتف ظل يتعالى أكثر فأكثر دون أن يتوقف.. يمينه نظر للهاتف للحظات ثم أخذ ينظر للرجل المقيد وهو لا يعلم ماذا يفعل.. ولكنه تحرك جهة الهاتف وهو ينظر للرجل المقيد بشفقة ثم

أمسك الهاتف بعد أن وضع طرف ملابسه على يده ورفع سماعة الهاتف دون أن يتحدث وفضل أن يستمع إلى الطرف الآخر أولاً وهنا وجد صوت شخص اعتاد على سماعه.. إنه بكل تأكيد صوت سامي فكري يحدثه من الهاتف الأرضي ولم يمهله أي فرصة للحديث حيث ظل يتحدث هو بصوت هادئ وواثق.. «عارف يا يحيى.. على الرغم من إن في 7 مليار بني آدم في العالم مختلفين في كل شيء تقريباً.. الديانات والأعراق والثقافات حتى في الأجسام واللغات.. تقريباً مغايرين لبعض في كل شيء ما عدا حاجة واحده بس.. مشاعرهم.. المشاعر مابتفرقش ما بين شخص وشخص ما بين غني وفقير.. ما بين راجل وست.. مهما كنت انت مين أو عايش فين هتاخذ حقك كامل من المشاعر.. سواء كانت ضحك وسعادة.. أو دموع وحزن.. المشاعر مابتظلمش حد.. عادلة جداً.. تكاد تكون هي الشيء الوحيد العادل في العالم ده.. علشان كده من حق مشاعرنا علينا زي ما بتعاملنا بعدالة وإنصاف.. إن إحنا كمان نعاملها بعدالة وإنصاف.. ماينفعش نستخبي منها.. ندفنها جوانا.. ننكر وجودها مع إنه فاضحنا كلنا بلا استثناء.. مهما حاولنا نغطي وشوشنا بمشاعر مزيفة بنقتل بيها مشاعرنا الحقيقية.. بنظلم الشيء الوحيد اللي العادل معانا.. مثلاً أنا لو سألتك مشاعرك إيه من ناحيتي يا ترى هترد وتقول لي إيه؟».. يحيى بضيق شديد.. «هردّ وأقول إني بكرهك.. بكرهك جداً.. ونفسي أشوفك قدامي علشان أقطعك بسناني».. هنا ضحك سامي وهو يصفق بيديه.. «جدع يا يحيى.. برافو.. برافو.. ده اللي أنا بتكلم عليه.. من الظلم إنك تخفي مشاعرك.. إنت بتكرهني.. وبتظهر مشاعرك الحقيقية أهو.. وأنا كمان هظهرلك

مشاعري الحقيقية.. على الرغم من إنك بتكرهني ولكني أنا
مشاعري الحقيقية إني بحبك.. علشان كده اخترتك للمهمة.. علشان
أثبتلك مشاعري الحقيقية ليك..».. يحيى ساخرًا.. «مشاعر إيه..
إنت مش عارف إني متجوز يا سامي».. ضحك سامي بشدة..
«هههههه.. حلوة يا يحيى.. حلوة.. ولكن ولا الجواز ولا الأولاد ولا
الفلوس تقدر تمنعك إنك تظهر مشاعرك.. وعلشان كده دي آخر
مهمة ليك.. إنك تظهر مشاعرك.. افتح الدرج اللي عندك يا يحيى»..
يحيى نظر الكومود أمامه فوجد أحد الأدراج به.. قام بفتحه بطرف
ملا بسه أيضًا.. ليجد بداخله سلاحًا ناريًا مزودًا بكاتم للصوت
وقفاز طبي لليد أخضر اللون.. نظر يحيى للسلاح الناري خائفًا
فصرخ على سامي غاضبًا: «إيه ده.. إنت عايزني أعمل إيه؟»..
ضحك يحيى ساخرًا.. «هههه.. عايزك تظهر مشاعرك الحقيقية»..
يحيى مرتبًا.. «يعني عايزني أعمل إيه مش فاهم قصدك».. تنهد
سامي بقوة.. «اااه.. لسه مصر إنك تحبي مشاعرك يا يحيى.. أنا
مش سألتك من شوية لو أنا قدامك دلوقتي هتعمل إيه قولتلي إنك
هتقطعني بسنانك.. فرصتك جت لك لحد عندك أهى».. وقف
يحيى مصدومًا.. «إنت هنا.. إنت هنا فين؟».. ضاحكًا.. «هكون
فين.. معاك في الأوضة هنا..».. نظر يحيى مندهشًا «في الأوضة فين..
مفيش حد هنا معايا غير...».. ثم نظر إلى الرجل المقيد على المقعد..
وهنا ضحك سامي.. «أيوه بالظبط أنا اللي متكتف وقاعد على
الكرسي.. مهمتك سهلة وبسيطة ومسهلها عليك خالص.. هتموتني
بالمسدس اللي معاك وبعد ما تضربني بالنار هتلاقي رسالة وصلتك
بمكان ابنك ومراتك..».. يحيى ينظر له وهو على المقعد مندهشًا..

«إيه اللي انت بتقوله ده.. إنت عايزني أموتك ليه.. إنت مجنون ولّا إيه؟».. سامي ضاحكًا.. «لا أنا مش مجنون.. أنا لي أسبابي علشان أطلب منك الطلب ده.. يلا يا بطل حقق انتقامك مني وانقذ مراتك وابنك».. أخذ يجيى ينظر إلى الرجل فوق المقعد وهو يفكر متحيرًا.. «إيه اللي بيحصل؟ معقول يكون ده سامي.. ولو هو، عايزني أموته ليه؟.. لا.. لا.. في حاجة مش طبيعية..».. هنا قاطع تفكيره صوت سامي وهو يحدثه من جديد.. «مالك يا بطل.. شكلك مش عايز ترجع لمراتك وابنك ولا إيه.. رصاصة واحدة وكل مشاكلك هتخلص».. هنا قام يجيى بسرعة بغلق الهاتف بوجه سامي وجلس على السرير يفكر بحيرة وهو ينظر إلى السلاح الناري الذي التقطه من الدرج.. ومن ثم ينظر إلى الرجل المقيد على المقعد بجواره . هنا رن الهاتف ثانية ولكن هذه المرة فتح مكبر صوت الهاتف بمفرده ليظهر صوت سامي يُحدّثه من جديد وهو يضحك: «ههههه شكلك لسه بتخادع نفسك وبتخون مشاعرك يا يجيى.. عمومًا.. علشان خاطر تبقى مشاعرنا أصدق.. شيل القماشة من على راسي وخلينا نتكلم وجهًا لوجه أحسن».. هنا نظر يجيى للرجل المقيد ثم تحرك ببطء جهته ومن ثم نزع القماشة من على رأسه وهنا شاهده أمامه بوضوح.. ولكم كانت صدمته حينها.. إنه ينظر له الآن وبعيون ممتلئة بالحقد.. إنه ليس سامي فكري كما كان يعتقد.. إنه شخص أسوأ من ذلك بكثير.. هنا أمسكه يجيى بقبضته غاضبًا بشدة.. حينها صدر صوت سامي من الهاتف خلفه وهو يضحك بشدة.. «هههههه.. تعرف يا يجيى.. الإنسان ممكن ينسى حد ساعده قبل كده.. ولكن عمره ما ينسى أبدًا..

حد أشقاه.. عمرك شفت في حياتك حد سخر كل وقته ومجهوده
علشان يكافئ حد ساعده.. ولكن شفت بالتأكيد إن في ناس بتبذل
كل جهدها وقوتها وتكرس حياتها كلها من أجل الانتقام.. أشهر
الروايات والأفلام في العالم مش اللي بتكلم عن الحب والسعادة
ولكنها اللي بتكلم عن الانتقام.. الناس كل يوم بتموت في الحروب
وبيتحولوا لأبطال علشان خاطر كانوا بيتقموا من ناس ماتوا قبلهم
كانوا بيتقموا الناس ماتوا قبلهم برود.. بقوا أبطال ويتعمل بإسمهم
مدارس وميادين ويشار إليهم بالبنان.. كل ده علشان إيه.. علشان
الانتقام.. الانتقام يا يحيى هو شيم العظام.. فرصتك.. فرصتك
جاتلك علشان تظهر مشاعرك وتتقم من فؤاد علام.. صاحبك اللي
خانك من خمس سنين».. أخذ ينظر يحيى إلى وجه فؤاد علام صديقه
السابق وهو ينظر له وملاحه بادية عليها الخوف وفمه مغطى بشريط
لاصق.. أخذ يحيى ينظر إليه غاضباً وهو يجز على أسنانه بضيق..
بينما صوت سامي خلفه يحدثه.. «فؤاد علام اللي ضحك عليك
وكان بيوهمك إنه صاحبك كل السنين اللي فاتت.. وأول ماجتله
فرصة طعنك.. باعك لشركة سماركو بتاعة الأدوية وضيع منك
حلمك بعقار التريفون اللي كنت هتقلب بيه العالم كله واسمك
يتردد بين الجميع.. قاعد يتنعم بفلوسك وانت ماكتتش لاقى تعمل
عملية تنقذ بيها قلب ابنك».. حديث سامي أشعل النيران برأس
يحيى وهو يتذكر كل الذي لاقاه على يد فؤاد علام من قبل.. بدأ
يعلو تنفسه وجسده يسخن والدماء تشتعل بعروقه.. أخذ سامي
يتابع حديثه ليحيى.. «واللي انت ماتعرفوش إن صاحبك وحبيبك ده
اتقدم لسمر مراتك 3 مرات وانت خاطبها وكان ينقلها كلام عنك

إنك شخص وسخ وبتاع نسوان وهي تتخانق معاك وتعمل مشاكل من غير سبب وانت كنت بتستغرب.. أديك عرفت من السبب في كل ده.. حتى اللحظة اللي انت فيها دلوقتي.. كانت بسبب فؤاد علام.. لولا اللي عمله فيك عمرك ماكان هيحصلك حاجة زي دي أبداً..».. اشتعلت نيران الغضب بنظرات يحيى ولهب الانتقام بدأ يزهر بين ضلوعه..».. سامي بصوتٍ ماكرٍ وخدّاعٍ.. «فرصتك جتلك يا يحيى.. فرصتك جتلك.. مهمتك الأخيرة دي مكافأة مننا ليك.. اقتل فؤاد علام.. خليه يختفي من الوجود وهتنجح وتروح لمراتك وابنك.. وتخلص من عدوك اللدود..».. تشرب يحيى بحديث سامي السام ورفع سلاحه فوق رأس فؤاد علام الذي نظر له بتحدٍ ولم يبدِ أي مقاومة.. عاد صوت سامي فكري وهو يتحدث بنبرة هادئة ومنخفضة.. «اقتل فؤاد يا يحيى.. اقتل فؤاد».. ارتعشت يد يحيى وهو يرفع سلاحه الناري فوق رأسه للحظات ولكنه صرخ بصوت سامي خلفه.. «مش هموته.. مش هموته من قبل ما أديله فرصة يدافع عن نفسه.. يشرحلي هو عمل كده ليه».. ثم سحب الشريط اللاصق من على فم فؤاد علام بعنف.. تألم فؤاد بشدة وأخذ يتحدث إلى يحيى بتحدٍ.. «إيه الجنان اللي بتعمله ده يا يحيى.. بتخطفني وتعمل الفيلم ده كله ليه.. إنت مش عارف أنا ممكن أعمل فيك إيه».. شعر يحيى بالغضب الشديد وصرخ على فؤاد وهو يرفع سلاحه على رأسه من جديد.. «اسكت خالص.. اسكت.. أنا مش عايز أسمع منك غير السبب.. ليه ختنتني؟.. أنا عملت معاك إيه وحش لده كله.. بعث حلمي ودمرت مستقبلتي وخلّيت سمّعتي زي الزفت بين زملائي وشهرت بي.. ليه كل ده.. أنا كنت شايفك

صاحبى الوحيد.. كنت بأتمنك على كل أسرارى ولما قررت أنفذ حلمى وأعمل عقار التريفون علشان أنقذ بيه ملايين الناس أول واحد فكرت فيه انت.. علشان تشاركنى حلمى وشهرتى.. علشان انت صاحبى واخويا.. كان ممكن أختار ألف واحد أذكى وأشطر منك ورفضت عروض كثير جداً من علماء وأجانب.. سبت كل دول واخترتك إنت.. ليه عملت كده يافؤاد.. إدينى سبب واحد بس وانا هسامحك».. صمت فؤاد قليلاً ثم دمعت عيناه وأخذ يحدث يحى بضيقٍ شديدٍ: «عايز تعرف أنا عملت كده ليه يا يحى.. عايز تعرف أنا عملت كده ليه.. أنا هقولك.. عملت كده علشان بغير منك.. دائماً.. دائماً إنت أحسن منى.. مهما أذاكر وأتعب بالشهور.. إنت تذاكر فى يومين وتجب تقدير أعلى منى.. مهما كنت أحاول أظهر كويس قدام الناس وأحسن من نفسى الأقي كل ده اتدمر أول لما تظهر انت ويقارنوني بيك.. أهلى بيعايروني بنجاحك كل لما يشوفوني ويحسسوني إني فاشل وماليش لازمة.. بتقول واخذنى صاحب.. إنت كنت معتبرنى تابع بتقوله يعمل الحاجة وهو ينفذها من غير نقاش.. حتى لما فكرت تعمل التريفون اخترتنى علشان تبقى ضامن إن مفيش حد يفهم الصيغ والمعادلات بتاعته ويسرقها منك.. اخترتنى علشان كنت فاكرنى أغبى واحد من الموجودين اللي مش ممكن أبداً يسرق منك سر التركيبة.. عشت حياتى كلها بقهر وأنا بتقارن بيك غصب عنى علشان اتولدت لقيتك ساكن جنبى.. حتى البنت الوحيدة اللي حبتها.. سمر بنت الجيران.. سابتنى واخترتك انت.. كل ده ومش عايزنى أكرهك.. ده أنا بكرهك من كل قلبى.. كل ثانية بشوفك فيها قلبى بيتقطع لما أعرف أن سمر

هتبقى ليك.. أول فرصة جاتلي علشان أبيعك انتهازتها وخذت
فلوس تعيشني ملك لباقي عمري.. ولولا إن شركة سماركو عملت
تسوية معاك غصب عني كنت سبتك مرمي زي الكلب في السجن
لحد دلوقتي..».. شعر يحيى بالصدمة الشديدة من كلام صديقه
فؤاد.. لم يكن يعلم أبداً أن كل تلك المشاعر السلبية بداخله.. شعر
بالحيرة الشديدة والغضب بآنٍ واحدٍ.. فصرخ عليه غضباً..
«اسكت.. اسكت.. ماتتكلمش أكثر من كده.. أنا حايش إيدي عن
روحك بالعافية..».. أخذ يحدثه فؤاد بتحدٍ وهو يضحك.. «موتني..
موتني يا يحيى.. تعرف لو موتني دلوقتي مش هتضايق.. لأنك
بكده هتروح في داهية.. وهتسيب سمر ومش هضطر أفكر فيها كل
يوم وهي في حضنك.. اقتلني مش مهم.. مادام كده كده هدمرك
معايا..».. نظر له يحيى صامتاً للحظات ودمعت عيناه بشدة ولكنها
مسحها وأخذ يتصنع القوة.. «أقولك أكثر حاجة مضايقاني وحادقة
قلبي.. إني لغاية دلوقتي لسه بعترك صاحبي الوحيد المقرب..
وكلامك ده دمرني من جوايا وخلاني أشوف الدنيا سودا.. أنا حزين
جداً جداً.. لأن الشخص اللي بحبه زي أخويا يتغير ويبقى أسود من
جوه.. أنا مش زعلان علشان انت بقيت وحش كده.. أنا زعلان
علشان انت بقيت كده بسببي أنا.. مهما كرهتني يافؤاد أنا ما
أقدرش أكرهك..».. وهنا قام يحيى بفك وثاق فؤاد الذي كان
مذهولاً من حديث يحيى له.. لقد كان يتوقع أن يواجهه يحيى
بكراهية مثل كراهيته ولكن لم يتوقع أبداً أن يسامحه هكذا.. دمعت
عينا فؤاد على الرغم عنه وتحاشى النظر بعيني يحيى وتحرك إلى خارج
الغرفة ولكنه استدار للحظات.. «تعرف يا يحيى على الرغم من اللي

انت عملته معايا ده.. لكن لو رجع بيا الزمن هبيعك وأختار الفلوس بردو ..» ثم تحرك إلى خارج الشقة وغادر.. وأخذ يحيى يمسك رأسه مصدومًا مما حدث.. قبل أن يعيده صوت سامي الذي كان غاضبًا.. «إنت عملت إيه يا يحيى.. إنت سبته يمشي.. إنت اتجنت».. صرخ عليه يحيى بغضبٍ.. «عايزيني أعمل إيه.. أنا عمري ما هبقى قاتل أبدًا مهما عملت»..

«يعني تضحي بنجاح مهمتك وفرصتك إنك ترجع مراتك وأبنك علشان خاطر واحد خاين زي ده باعك واختار الفلوس وكان سبب سجنك وشقائك لغاية دلوقتي».. صرخ عليه يحيى يائسًا.. «مهما تقول يا سامي.. مهما هتقول.. أنا عمري ما هضر فؤاد.. ولا عمري هابقى قاتل»..

هنا صمت الجميع للحظات.. وهذا الصمت جعل يحيى يخشى الأسوأ.. فأمسك سماعة الهاتف بسرعة وأخذ يتحدث بترجٍ.. «سامي.. أرجوك يا سامي.. أنا مستعد أعمل أي حاجة إلا القتل.. أرجوك قولي على مهمة تاني.. عشر مهمات.. عشرين مهمة اللي انت عايزه كله بس أرجوك ما تتذيش مراتي وابني».. هنا جاءه صوت سامي سريعًا: «إنت كان ليك مهمة محددة أخيرة.. مانفذتهاش.. المهمة فشلت.. جيم أوفر».. أخذ يحيى يصرخ يائسًا.. «لا يا سامي.. لا يا سامي.. أرجوك.. أنا مستعد أعمل أي حاجة.. هعمل أي حاجة بس ماتذيش مراتي وابني أرجوك».. هنا حدثه سامي بنبرة مستنكرة.. «مين اللي هيئذي مراتك وابنك».. يحيى مرتابًا.. «يعني إيه.. أنا مش فاهم حاجة»..

«مراتك وابنك في أمان تام».. يجيى مستنكرًا.. «أمان تام ازاي..
فهمني..»

مبتسمًا: «يعني مراتك وابنك من ساعة ماخرجوا من المستشفى
وهما عند أختها في الوراق..»

يجي مصدومًا.. «إيه.. عند أختها.. عند أختها ازاي..»..

سامي ضاحكًا: «هههه.. عند أختها زي الناس.. مروان خرج من
المستشفى وروحنا مراتك لأختها علشان تتابع من عيادة دكتور هناك
قريب من بيت أختها.. ده المبرر اللي أقنعنا بيه مراتك..»

يجي مصدومًا: «يعني أنا مراتي وابني كانوا في أمان طول الفترة
دي كلها وانت بتستغلهم علشان تخليني لعبة في إيدك..»..

أخذ يضحك سامي بشدة.. «هههه.. ههههه.. بالظبط كده.. هو
ده اللي حصل..»

أخذ يضرب يجيى سماعه الهاتف بغضبٍ شديدٍ على الكومود.. «اخ
ياولاد الكلب.. أخ ياولاد الكلب.. كل ده وبتلعبوا باعصابي.. كل ده
ياولاد الكلب..»

أجابه سامي بصوت هادئ.. «إهدا يا بطل.. إهدا علشان
أعصابك..».. يجيى صارخًا عليه بالهاتف.. «أهدا إيه.. إنت كنت
هتخليني أقتل أعز اصحابي من شوية.. كنت هتخليني قاتل وكل ده
على الفاضي.. إنت بتعمل فيه ليه كده.. إنت بتعمل فيه كده ليه..»

مبتسمًا بسخرية.. «للأسف يا يجيى.. مش هتعرف السبب ده
أبدًا..».. يجيى غاضبًا وبتحدُّ شديد.. «هعرف يا سامي.. هجيبك
من تحت طقاطيق الأرض.. وهعرف منك السبب وهطلع على

عينيك كل الي انت عملته فيا».. ابتسم ساخرًا.. «أفهم من كلامك إن ده تحدي..»

«أيوه ياسامي وانا مش هسيبك أبدًا.. كنت بتلعب بيا كل الوقت ده.. جه الوقت الي أقلب عليك اللعبة..»..

بثقة شديدة: «وانا قبلت التحدي يا يحيى.. بكرة هيبقى آخر يوم أنا موجود فيه في مصر.. لو وصلت لي فيه هقولك على كل حاجة وكنت بعمل معاك كده ليه.. لكن لو ماقدرتش يبقى هتعيش طول عمرك ومش فاهم الي حصلك..»..

يحيى بثقة شديدة.. «هو صلِّك يا سامي.. خليك واثق في كده..»
سامي بهدوءٍ شديدٍ.. «وانا مستنيك.. يحيى كامل.. مهمتك الأخيرة.. إنك تمسكني..».. ثم قطع المكالمة في الحال.

سمر جالسة مع أختها بمنزلها يتابعون أحد المسلسلات الأجنبية ولكنهم لا يعيرونه أيَّ اهتمام وانشغلا بحديث شيق فيما بينهما..
رن هاتف سمر فجأة فوق المنضدة أمامها فسحبته لترى رقمًا غير مسجل على هاتفها.. حدثت أختها متسائلة.. «رقم مش معروف بيكلمني يا هدى»..

«رددي عليه يمكن يكون جوزك».. سمر بترقب.. «يارب يا هدى يكون هو».. ثم وضعت الهاتف على أذنها سريعًا.. «ألو».. التقطت أذنها صوت يحيى بالحال.. «ألو يا سمر».. شعرت سمر بالفرح الشديد وأخذت تشير إلى أختها.. «هو يا هدى.. هو..».. ابتسمت لها أختها بالحال وتابعت سمر حديثها.. «إنت فين يا يحيى.. قلقنتني

عليك.. مش عارفة أوصلك خالص وانت ما اتصلتش بيا.. حتى أصحابك اللي كانوا بيظمنوني عليك مش عارفة أوصلهم..»
«أنا الحمد لله بخير يا سمر.. طمني بس.. إنتي فين إنتي ومروان دلوقتي؟»

«إحنا عند أختي هدى.. الدكتور سامي الله يكرمه قبل ما يسافر اتفق مع عيادة قريبة من بيت هدى علشان يبقى سهل علينا نتظمن على مروان وما نتبهدلش في المواصلات.»

يحيى مغتاظاً.. «آه سامي.. ما هو أنا هكافئه جداً لما أشوفه.. كل الخير اللي عمله معايا هرده ليه أضعاف مضاعفة.. المهم طمني على مروان.. عامل إيه بعد العملية؟»

«مروان الحمد لله بقى زي الفل.. العملية نجحت وهو في نقاهة دلوقتي.. كتبولي شوية إرشادات نمشي عليها في البيت وهي بقى كويس جداً وبعد كمان شهر هيقدر يلعب ويجري تاني زي باقي الولاد..»

بسرور شديد: «طيب الحمد لله.. ألف حمد وشكر ليك يا رب.. ألف حمد وشكر ليك.»

بقلق: «إنت فين يا يحيى.. إنت وحشني قوي.. مش هتيجي علشان تشوف مروان؟!»

«هاجي.. هاجي طبعاً يا سمر.. هو يوم واحد.. إدعيلي ربنا يوفقني فيه.. يوم واحد بس وبعد كده هنبقى مع بعض على طول.. عايزك تدعيلي قوي يا سمر.. أنا محتاج لدعاكي قوي..»

«ربنا يوفقك ويكرمك يا حبيبي.. ربنا يجعلك في كل خطوة سلامة
ورزق..»

«يارب يا سمر.. ربنا يتقبل منك..».. «أختي هدى بتسلم عليك
صحيح..»

«الله يسلمها.. قوليلها يحيى بيشكرك جدًّا على تعبها معاكي انتي
ومروان..»

مبتسمة.. «بتقولك لا شكر على واجب.. وهي مستنياك علشان
تعملك صينية البطاطس بالسجق اللي بتحبها».. مبتسماً: «ماشي يا
سمر.. أنا هضطر أقفل معاكي دلوقتي.. ماتتصليش على الرقم ده
خالص.. دي نمرة واحد زميل واحد صاحبي.. وهديله تليفونه
دلوقتي.. وانا بكرة هابقي أجيلك بنفسي.. ماشي..»
«حاضر.. حاضر يا حبيبي.. أنا مستنياك على نار.. إنت وحشتني
أوي..»

يحيى مبتسماً.. «وانتي كمان وحشتيني قوي.. قريب جدًّا هتبقي
في حضني من تاني إنتي ومروان.. هضطر أقفل دلوقتي.. لا إله إلا
الله..»

«محمد رسول الله.. ترجعلنا بالسلامة يا حبيبي..»

«الله يسلمك يا حبيبي.. سلام».. ثم أغلق الهاتف.. وضعت
سمر بضيق الهاتف على المنضدة أمامها.. فسألها هدى عما يضيرها..
«مالك يا سمر.. شكلك متضايق بعد المكالمة ليه؟».. سمر بقلق..
«مش عارفه ياهدى.. صوت يحيى مش مريحني.. شكله في حاجة
بتحصل معاه ومخبيها عني..»

«ليه بس يابنتي.. مش لسه مكلمك وكان الحمد لله كويس..
هتقعدى تتخيلي حاجات تقلقك ليه بس..»
بضيق.. «ياهدى ده جوزي وانا حفظاه.. هو أنا هتوه عن
جوزي.. فيه حاجة يحىي مخيها عليا.. بس هو متعود يحكي كل
حاجة.. مش عارفه إيه اللي جد المرة دي..»
«ياشيخة مفيش حاجة.. إنتي بس متهيألك علشان بعيد عنك
بقاله كام يوم وانتي خلاص.. هههه.. اتعودتي تبقي في حضنه..»
أخذت تضحك سمر بدلال.. «بطلي يابت بقى.. ماتكسفنيش..»
ضحكت هدى على رد فعلها.. «لا يابت.. ماهو انتي وش كسوف..
وحشتني يا يحيى.. مش هتيجي بقى.. كان ناقص تبوسيه في التلفون
ولا كأني قاعده..» وقفت سمر وهي خجلة.. «إنتي شكلك فايقة
ورايقة وانا مش ناقصاكي.. أنا هخش أطمئن على مروان جوه..»
ثم انسحبت تركض بخجل وظلت هدى تضحك على رد فعلها..

اقترب الليل من منتصفه ولكن على الرغم من ذلك كان زحام
المارة والسيارات يتعالى بكل كفاءة وقوة.. أمسك يحيى بهاتفه
وأخرج منه شريحة الهاتف وحطمها.. ثم أمسك ببطارية الهاتف
وألقاها بعيداً ثم ألقى الهاتف بالجهة الأخرى.. وقف أمام أحد
متاجر الملابس الشهيرة وأخذ ينظر إلى قطع الملابس بالفاترينات
وهو يُحدّث نفسه.. «طول الأيام اللي فاتت دي وانا كنت لعبتك
ياسامي.. دلوقتي جه وقتي علشان أردلك بدل القلم 100..» ثم
دلف إلى داخل متجر الملابس فتلقاه العامل بالمتجر مبتسماً.. «أهلاً
وسهلاً.. نورت المحل..» «منور بيك..»

«بتدور على إيه.. بنظلون ولا تي شيرت ولا قميص؟»..

«أنا عايز كله.. بنظلون و قميص وملابس داخليه».. البائع مبتسماً.. «كله كله.. تمام جداً.. في دماغك حاجة معينة؟».. «يحيى مبتسماً..» لا أنا عايزك انت تختارلي كل حاجة ومش مهم السعر».. ابتسامة البائع ملأت وجهه.. «عيوني يافندم.. هجبلك أحلى حاجة في المحل».. تحرك البائع وهو يقطع المتجر ذهاباً وإياباً ويختار بعض الملابس فوقف الأرفف.. أخذ يحيى يتابعه للحظات ثم نظر إلى كاميرا المراقبة الموضوعه فوق مكتب الكاشير بتحدٍ.. عاد إليه البائع سريعاً وهو يحمل بعض الملابس.. «اتفضل أهو يافندم.. اخترتلك أحسن حاجة في المحل.. قيسهم براحتك في البروفة وشوف اللي يناسبك فيهم ولو في حاجة في المقاس مش مريحاك غيرها».. ابتسم يحيى وهو يتحرك معه.. «ماشي».. اتجه الاثنان إلى مكان صغير بالمتجر مغلق مجهز لقياس الملابس.. دلف يحيى وهو يحمل بعض قطع الملابس ثم أغلق الباب خلفه.. نظر بتحدٍ للمرأة الكبيرة أمامه التي تعكس صورته وهو يفكر بعمق وهو ينزع ملابسه..» من أول لما سامي دخل على الخط مع مكالمتي للظابط ياسين وأنا قلت يبقى هو مخترق تليفوني.. علشان كده عملت مكالمة للنجدة من تليفون النقاش القديم اللي قابله صدفة وكنت هتجنن لما كلمني من على تليفونه بالذات لأن ماكانش في كاميرات مراقبة موجودة ساعتها.. وهنا اتأكدت إن التليفون مش متراقب ده أكيد أنا اللي متراقب.. أكيد حاطط سامي في هدومي جهاز تتبع أو ميكرفون في تتبع ومخدش بالي.. أنا ماقدرتش أبين اني عرفت كده ساعتها علشان كنت هستخدم المعلومة دي ضدهم ولكن بما إن اللعبة خلصت

يبقى لازم أختفي عن عيونهم تماما علشان أقدر أهاجمهم من غير ما يعرفوا».. أخذ يحيى يزيح ملابسه قطعة قطعة وهو يبحث عن أي مايكرفون صغير ولكنه لم يجد.. شعر بالحيرة.. هو متأكد أنهم يراقبونه عن طريق جهاز صغير.. أخذ يمسك حذاءه ويفتشه بعناية.. هنا سمع صوت البائع من خلف الباب.. «إيه يا أفندم في حاجة أساعدك بيها؟».. أجابه يحيى سريعاً: «آه ياريت تحبيلي جزمة من عندك أو من محل جنبك مقاس 43».. البائع مستفسراً.. «عايز جزمة.. طيب تحب لون معين أو شكل معين؟».. أجابه يحيى سريعاً وهو يمزق حذاءه ويفتش بداخله.. «لا.. أي حاجة على ذوقك».. البائع مبتعداً.. «هتجيلك حالاً يا أفندم».. قام يحيى بتمزيق أحذيته وأنعالها وعلى الرغم من ذلك لم يجد شيئاً.. «إزاي ده.. مفيش حاجة في الهدوم وفي الجزم».. هنا نظر إلى جسده العاري بالمرأة.. «مممكن يكونوا حطولي جهاز تتبع بميكرفون تحت الجلد؟».. وأخذ ينظر إلى ساعديه بالمرأة وفي ظهره ويبحث بين خصلات شعره.. ثم سمع صوت البائع يطرق على الباب.. «جبتلك الجزمة يا أفندم.. على الله تعجبك ولو ما عجبتكش أغير هالك حالاً».. قام يحيى بإخراج رأسه من الباب وابتسم إلى البائع وهو يأخذ منه الحذاء.. «متشكر قوي».. ثم أغلق الباب سريعاً..

بعد نصف ساعة كان يحيى واقفاً بداخل المتجر بملابس جديدة للغاية وحذاء جديد ووقف أمام البائع مبتسماً.. «الحساب كام».. ابتسم البائع وفرك يديه.. «1200 جنيه يا أفندم».. ابتسم يحيى وهو يناوله النقود.. «آدي 1500 جنيه ثمن الحاجة والباقي علشانك»..

ابتسم البائع فرحًا «تسلم يافندم.. كلك ذوق والله».. تحرك يحيى إلى خارج المتجر فنادى عليه البائع.. «استنى يافندم...».. توقف يحيى ليستمع إليه فذهب إليه البائع وهو يحمل ملبسه القديمة.. «الحاجات دي انت نسيتهما في البروفة يافندم».. ابتسم له يحيى.. «مش عايزها.. ارميها.. احرقها.. إعمل فيها اللي انت عايزه..» ثم تركه وانصرف سريعًا.. إلى خارج المتجر..

لمح من بعيد كشكًا صغيرًا للسجائر فتحرك جهته وسأل بائعه.. «لو سمحت ممكن أعمل تليفون؟».. أخرج له البائع هاتف محمول مربوطًا بسلسلة طويلة.. «اتفضل».. أمسك يحيى بالهاتف وضغط على بعض الأرقام، ثم تحدث سريعًا.. «الو.. كايرو فيجن.. لو سمحتم ممكن أحجز عندكم ميعاد بكرة الصبح»..

الساعة التاسعة صباح اليوم التالي ..

يحيى كان واقفًا أمام جهاز معدني بسرير كبير أسفله ويرتدي ملابس المرضى الخضراء ويقف أحد الأطباء أمامه يحدثه.. كده كملنا كل التحضيرات.. بس سؤال أخير حضرتك مركب منظم قلب أو أي مسامير بجسمك».. «لا يا دكتور مش مركب أي حاجة من دول».. «الطيب يومئ له برأسه.. «تمام جدا.. اتفضل استريح على الجهاز».. يحيى وضع جسده على الجهاز وتوجه إلى الطبيب بسؤال.. «هو يا دكتور الرنين المغناطيسى ده هيكشف أي حاجة جوه جسمي.. أي جسم غريب هيبان؟».. «الطيب مطمئنًا.. «أكد طبعا ماتقلقش.. لو في أي حاجة في جسمك هتبان في الأشعة».. «طيب

ممكن أستلم الأشعة دي بعد قد إيه.. أنا مستعجل عليها جدًا..» ..
الطبيب مجاوبًا.. «نصف ساعة وهتجيلك النتيجة إن شاء الله..» ..
يحيى مبتسمًا.. «طيب تمام جدًا» .. استلقى يحيى مسترخيًا على الجهاز
ثم دلف بداخله بعد أن قام الطبيب بالضغط على أحد الأزرار..
وبدأ الجهاز بإصدار صوت قوي..

بعد نصف ساعة تقريبًا كان يجلس يحيى بهو مركز الأشعة
وأتى إليه طبيب سريعًا يحمل ملف بيده.. «أستاذ يحيى.. اتفضل
الأشعة بتاعت حضرتك..» .. وقف يحيى متلهفًا وهو يمسك بملف
الأشعة بيده.. «طمني يادكتور.. لقيتوا في جسمي حاجة؟» .. الطبيب
مبتسمًا.. «هو مفروض الدكتور اللي متابع معاه هو اللي يبلغك بس
أنا هطمنك بردو.. الحمد لله الأشعة تمام وجسمك مفهوش أي
حاجة..» .. يحيى مندهشًا.. «مفهوش أي حاجة.. مفهوش أي حاجة
إزاي.. يعني مفيش أي جهاز أو جسم معدني صغير في جسمي..» ..
الطبيب ملاحظًا.. «لا مفيش حاجة الحمد لله..» .. يحيى مصدومًا..
«مفيش ازاي بس.. أو مال كان بيعرف اللي بعمله إزاي!» ..

الطبيب مستغربًا: «هو مين ده يافندم؟!»

«ها.. لا مفيش حاجة.. مفيش حاجة.. متشكر جدًا..» .. ثم
خرج إلى خارج المركز وهو ينظر إلى الأشعة الخاصة به دون أن يفهم
منها شيئًا.. شعر بالغضب من فشل نظريته فهو كان يتوقع أن سامي
يراقبه عن طريق شريحة صغيرة مزروعة بجسده ولكن بعد الكشف
اتضح أنه لا يوجد شيء مثل هذا.. تحرك إلى وسط الطريق وقام
بإلقاء صور أشعته بالشارع وأوقف سيارة أجرة وركبها..



الضَّابَط ياسين يقود سيارته وهو يدخن سيجار بنهم.. صوت المذياع يصدح بداخل السيارة وهو يستمع له باهتمام.. «جينة جهينة مُصنَّعة من خير مزارع مدينة جهينة.. عرض خاص الآن.. اشترى علبتين جينة جهينة وتأخذ معاهم علبتين هدية.. العرض لفترة محدودة.. تطبق الشروط والأحكام.. مع كايرو إف إم.. صباحك كله خيال.. باور فانك.. مشروب الطاقة الجبار.. إهزم الصعاب مع قوة وصلابة لمدة 48 ساعة.. مع باور باك إسحق مخاوفك من الامتحانات مع تركيز 400 %.. مع باور فانك.. كسر كل اللي في طريقك وحقّق أهدافك.. باور فانك.. 12 هدف بمشروب واحد.. كايرو إف إم.. صباحك خيال مع كايرو إف إم.. صابونة أسبوكس.. أجمل بشرة ونعومة.. مع صابون أسبوكس ابتسمي سيدتي..».. هنا قام ياسين بغلق المذياع بغضب.. «أسبوكس عليك وعلى أهلك.. أنا أسيب أم الإعلانات في التلفزيون تجيلي هنا.. دي بقت حاجة تقرف..».. نظر لساعته بضيق للحظات ومن ثم عاد وفتح المذياع مرة أخرى فاستمع إلى نفس القناة فقام بتغيرها ليظهر صوت مذيعة تتحدث بلهجة صارمة.. «الرئيس يستقبل اليوم رئيس دولة مدغشقر «هيري راجاوناريامبيانينا بزيارة رسمية يتم فيها مناقشة سبل التعاون المشترك وتحقيق الرخاء والتنمية بين البلدين.. وعلى صعيد آخر قبّل السيد رئيس الوزراء استقالة وزير البيئة والتجارة والصناعة ورئيس التنمية المحلية الذين تقدموا باستقالتهم اليوم وبهكذا يرتفع من قدّم استقالتهم من الحكومة 14 وزيراً خلال ثلاثة أيام فقط..».. تنهد ياسين وهو يستمع إلى الأخبار بالمذياع.. «أخبار تسد النفس على الصبح».. فجأة رن هاتفه فالتقطه في الحال..

«أيوه يا حمادة.. إيه.. يحى.. مكانه فين؟».. ثم أغلق الهاتف وغير اتجاه سيارته بالحال وعاود أدراجه عائداً..

يحي واقفٌ مترقبًا بداخل أحد الجراجات الواسعة الممتلئة بالسيارات المختلفة ومستندًا إلى سيارة بمكان منتقى جيدًا بعيدًا عن الكاميرة الوحيدة التي بالجراج.. أخذ يتربح الحضور بسيارتهم وهو يفكر بعمق.. «دلوقتي سامي ده شخص مجهول.. ما أعرفلوش صفة ولا ملة.. ظهر قدامي فجأة واختفى فجأة.. خلاني أعمل مهمات غريبة ومش مفهومة.. كلها ملهاش معنى أو مبرر.. إلا مهمة واحدة بس.. مهمة الدكتور منى الشيمي.. المهمة دي أكيد كانت لسبب.. وأكيد سبب شخصي.. ممكن تكون منى الشيمي تعرف سامي ده معرفة شخصية.. حتى لو ماتعرفوش ولكن سامي ده ليه علاقة بيها أنا ممكن أعرف أوصله عن طريقها أنا في دماغي خطة هنفذها عليها.. بس لازم أشوفها دلوقتي قبل ما سامي يوصلها بأي طريقة.. مواعيد شغلها والجدول بتاعها عرفته كله.. هي بتركن عربيتها هنا كل يوم وتدخل المستشفى..».. أخذ ينظر يحيى حوله بضيق.. «ياترى انتي فين يا منى.. ياترى انتي فين».. هنا دلفت سيارة إلى داخل الجراج ونظر لها يحيى بترقب وشاهد سائقها.. شعر يحيى بأنه يعرفه ولكنه لم يتذكره.. ولكن تذكره بالحال عندما نادى عليه.. «يحيى»... هنا علمه بالحال وكان مندهشًا من رؤيته.. «ياسين».. إنه بالفعل الضابط ياسين فتح باب سيارته ونادى على يحيى.. «يحيى.. تعالى».. شعر يحيى بالفرح لرؤية ياسين فركض جهته سريعًا..

ياسين.. ياسين باشا..».. ابتم له ياسين وحيّاه..» إزيك يا يحيى؟»..
صافحه يحيى بحرارة.. «ياسين باشا.. أخبارك إيه؟».. بادله ياسين
المصافحة.. «الحمد لله.. إنت أخبارك إيه يا حمادة.. عامل إيه..
مابتسألش انت خالص من ساعة ما انتهت القضية».. يحيى مُحْرَجًا..
«والله يا ياسين باشا.. أيام القضية دي كانت أيام ربنا ما يعودها..
علشان كده ماكتتش عايز أي حاجة تفكرني بيها.. ولكن ماقدرش
أنساك انت طبعًا..»

ياسين مبتسمًا بخبث: «عارف.. عارف طبعًا.. علشان كده انت
اتصلت بيا من كام يوم لما كنت في مشكلة صح».. امتقع وجه يحيى
هنا وابتلع ريقه بقلقٍ فتابع ياسين حديثه.. «إنت اتصلت بيا علشان
عارف إن أنا الوحيد اللي كنت مؤمن برأتك من خمس سنين وعارف
إن زي ما ساعدتك من خمس سنين هساعدك دلوقتي».. يحيى
مضطربًا.. «هتساعدني.. هتساعدني في إيه؟».. بخبث.. «هساعدك
في أي حاجة عملاك مشاكل.. مثلاً المشلكة اللي خلتك تحتك
مع الشحاتين في طلعت حرب.. وخلتك تركب جمل في فيصل..
وخلتك تساعد الشرطة في القبض على الإرهابي محمد أحمد اللي كان
معاه 2 كيلو قنابل سي 4».. جحظت عينا يحيى من حديث ياسين..
فهو لم يكن يعتقد أن الشرطة قد توصلت إلى هويته بالفعل.. فابتسم
قلقًا.. «هههه انت بتهزر أكيد ياسين باشا.. قنابل إيه وجمل إيه اللي
هركبه بس».. رفع ياسين صور يحيى على هاتفه.. «ياراجل.. يعني
الي في الصور والفيديوهات دي مش انت.. ده أنا شايفك بعيوني
بفيديو المترو النهارده الصبح.. ومعايا اعترافات الإرهابي والحرامي
الي ساعدك تمسكه.. كلهم أدلوا بمواصفاتك وبمواصفات لبسك

ساعتها».. نظر يحيى له بقلقٍ.. فحاول ياسين طمأنته.. «يحيى أنا مش عايزك تخاف أو تقلق من أي حاجة.. إنت ماعملتش أي حاجة غلط لغاية دلوقتي.. أنا مش بتهمك بحاجة.. أنا كل اللي عايزه منك تحكي لي حصل معاك إيه.. علشان أنا واثق إن اللي بيحصل معاك وجرائم قتل الوزراء ورجال الأعمال الأيام اللي فاتت دول مترابطين..».. يحيى مستغرباً.. «جرائم قتل.. قتل إيه؟»

رجل يرتدي ملابس صعيدية وبملاح صعيدية يقف أمام جسد شخصٍ ما ساقطٍ على الأرض وحوالهُ بِرُكَّةٍ من الدماء وهناك معول مثبت برأسه.. رنَّ هاتف الرجل سريعاً فنظر إلى شاشته ثم وجد صورة يحيى ومكتوبٌ أسفل منه «الدقي».. وهناك إشارة تومض بهاتفه باللون الأحمر فوق خريطة أمامه.. وضع الهاتف بجيبه مرة أخرى وقام بسحب المعول من رأس الرجل أمامه فلم يستطع.. وضع قدمه فوق كتف الرجل وقام بسحب المعول بقوة فتناثرت الدماء حوله ومعها بعض بقايا رأس الرجل.. أخذ الصعيدي يمسح المعول بجسد القتيل ثم وضعه على كتفه وتحرك مبتعداً..

ياسين واقفاً أمام يحيى يداعب ذقنه والسيجارة بفمه.. «يعني انت سحبت عشر آلاف جنيه وبعدين شحت عشر فيران».. يحيى مصححاً.. «لا.. شحت 200 جنيه وجمعت عشر فيران».. أخذ ينظر له ياسين مستغرباً وهو يدخن سيجارته بسرعة.. يحيى قرأ ملامحه فسأله سريعاً.. «شكلك مش مصدقني».. ياسين ملاحقاً..

«مش حكاية مش مصدقك.. بس أنا مش فاهم انت بتعمل الحاجات دي ليه ومش لاقى أي منطقية فيها غير حكاية المترو اللي مسكت فيها الإرهابي بتاع السي فور.. بس عامة.. الأمور بقت كده أوضح.. بس أنا مش لاقى رابط بين اللي بتقوله ومابين جرائم القتل الغربية دي..».. يحيى قلقاً.. «أنا فعلاً ما أعرفش أي حاجة بخصوص جرائم القتل اللي انت بتقول عليها دي».. ياسين ملاحظاً.. «مش مهم.. آدينا مسكنا خيط جديد في الموضوع بتاعك ده وهنحقق فيه.. فجأة رن هاتفه فنظر ياسين إلى الشاشة أمامه ثم أدار ظهره ليحيى وأخذ يتحدث بصوت منخفض.. «أيوه.. آه.. تمام.. تمام.. إمم».. ثم نظر إلى يحيى خلفه للحظات وأعطى له ظهره مرة أخرى وظل يتحدث بالهاتف بصوت منخفض.. شعر يحيى هنا بالقلق الشديد ينتابه وبدأ يتخلل الشك إلى قلبه.. أنهى ياسين مكالمته ثم عادى إلى يحيى.. «أيوه ياح.. أيوة يا يحيى.. كنا بنقول إيه؟ آه.. تعالى معايا دلوقتي واحنا هنحميك من هنا ورايح ماتقلقش».. وحاول أن يمسك ذراع يحيى.. فسحب يحيى ذراعه منه بعنف.. اندهش ياسين من رد فعله.. «مالك يا يحيى».. سأله حينها يحيى سريعاً.. «إنت عرفت مكاني منين».. هنا ارتبك ياسين ولم يرد أن يخبره أنه كان يراقبه حتى لا يفقد ثقته به.. «لا.. أنا كنت جاي في زيارة لحد معرفة هنا وقابلتك بالصدفة وكانت صدفة خير طبعاً علشان أقدر أساعدك».. حاول ياسين أن يقترب منه فابتعد يحيى عنه وحدثه مرتاباً.. «إنت معاهم.. صح؟».. ياسين مندهشاً.. «معاهم.. مع مين يا يحيى؟».. أو ما يحيى له برأسه مصدوماً: «إنت معاهم.. إنت معاهم وده اختبار تاني.. أنا كنت عارف إنك معاهم علشان كده

كنت بقولك المعلومات دي ولو لاحظت أنا ماجبتش اسمه خالص».. ياسين باندهاش.. «مع مين يا ابني.. إيه اللي انت بتقوله ده.. أنا مش فاهم منك حاجة».. هنا نظر له يحيى بثقة وتقدم منه سريعاً.. ثم صفعه بكل قوة على وجهه.. هنا أمسك ياسين بوجهه مصدوماً مدهوشاً من فعل يحيى واحمر وجهه وصرخ عليه غاضباً.. «إنت اتجنت يلا.. إنت اتجنت.. تضربني أنا بالقلم يا ابن الكلب».. شعر يحيى بغضب ياسين الشديد فحاول أن يركض هارباً.. فصرخ عليه ياسين وهو يرفع سلاحه الناري جهته».. اقف عندك.. اقف عندك بدل ما أضربك بالنار».. فتوقف يحيى مرتاعاً.. وأخذ ياسين يقترب منه.. وهو يصرخ عليه بغضب.. «بقي أنا يا حيوان بقولك هساعدك تقوم تمد إيدك عليا».. لم يدر يحيى ماذا يقول أو يفعل وظل رافعاً يده مستسلماً وهو يفكر كيف سيتخلص من تلك الورطة.. فجأة شعر يحيى بحدوث شيء مريب.. فلقد صمت ياسين خلفه ولم يتحدث لثوانٍ.. طالع الفضول يحيى وحاول أن ينظر خلفه ليرى ماذا يحدث.. ولكن ياسين ناداه من خلفه بصوت هادئ ومنخفض.. «ماتتحركش من مكانك».. نظر يحيى من جانب عينيه لما يحدث فوجد شخصاً يقف بعيداً ينظر إليهما.. أشاح يحيى بنظره إلى الرجل فوجده شخصاً أجنبياً يرتدي بنطالاً رياضياً وتي شرت رياضياً ويقف كلب بجانبه ويتكأ على سيارته خلفه التي ما زال ماتورها يدور.. ما زال ياسين يصبو سلاحه جهة يحيى ولكنه ينظر إلى الأجنبي ويحدثه بأن يتراجع.. «بوليس بيزنيس.. جو أواي.. جو أواي».. ابتسم له الأجنبي وظلَّ يحدق بهما.. شعر يحيى وياسين بشيء غريب بهذا الأجنبي..

فحدّثه ياسين مرة أخرى.. «بوليس بيزنيس.. جو أو..».. وهنا لما يكّد يكمل جملة حتى صوب سلاحًا ناريًا جهة يحيى فحوّل ياسين سلاحه بسرعة قصوى جهة الأجنبي وأطلق على يده الرصاص.. جفل يحيى من صوت الطلقات ومن صرخات الأجنبي وبعض أصابع يده مبتورة.. وسلاحه الناري أصبح بعيدًا عنه.. قفز الكلب جهة يد الرجل المصابة وأخذ يلعبها ويصدر أنينًا مكتومًا.. صرخ ياسين على الأجنبي وهو يحدث يحيى.. «شكله كان جاي يقتلك.. إنت تعرفه ده يا يحيى؟».. أو ما يحيى برأسه نافيًا.. «ولا عمري شفته».. ابتسم ياسين وهو ينظر للأجنبي بشماتة.. «حظك حلو لأنني كنت بطل الجمهورية في الرماية لمدة 7 سنين..».. نظر ياسين إلى يحيى معاتبًا.. «لسه بردو مقتنع إني مش عايز أساعدك».. حاول يحيى أن يجيب عليه ولكن قاطعها صوت صفيرٍ أصدره الأجنبي وهنا توقف الكلب عن لعق يديه وزجر وكشف عن أنيابه ووقف شعر جسده وهب متحفزًا.. ثم صفر الأجنبي مرة أخرى سريعًا ففز الكلب جهة يحيى يريد أن يفتك به.. ولكن تدخل سريعًا ياسين وأطلق النار صوبه ولكن الكلب تفادى الرصاصة برشاقة كبيرة ثم غرّ هجومه في الحال صوب ياسين الذي صوب سلاحه الناري جهته ولكن الكلب كان أكثر قوة ومرونة وسرعة منه.. فقام بإمساك السلاح الناري من يد ياسين بفمه ونزعه منه بقوة شديدة لم يتوقعها ياسين فسحبه من يده وأصبح السلاح بفم الكلب الذي أخذ يزجر وألقى بالسلاح من فمه بعيدًا خلفه وركض بسرعة جهة عنق ياسين وكاد أن يمزقه لولا أن وضع ياسين يده اليسرى فوق عنقه بشكل إرادي ليحميها.. فقام الكلب على الفور بغرز أنيابه بيد ياسين وأخذ

يضغط عليها بقوة شديدة تصل ل 60 كجم.. صرخ ياسين متألمًا فترك الكلب يده سريعًا وبسرعة شديدة توجه جهة عنقه ولكن ياسين وضع يده أمام عنقه مرة أخرى فأمسكها الكلب وعضه مرة أخرى وأخذ يحرك فمه بقوة ليمزق يديه بأسنانه لكي يمنعه من حماية رقبته بها ويمزق عنقه فيبدو أنه متدرب على قتل البشر بتلك الطريقة.. شاهد يحيى ما يحدث لياسين فركض مسرعًا جهته لينقذه فصرخ عليه ياسين متألمًا.. «ااه.. ماتخليش الأجنبي ياخذ سلاحه.. إمنعه يوصله.. اااه».. نظر يحيى جهة الأجنبي فوجده يتحرك بسرعة وهو يمنع يده من نزيها جهة سلاحه الناري خلف إحدى السيارات.. فركض يحيى مسرعًا جهة الأجنبي وركله بقوة ببطنه فأسقطه على الأرض وتوجه جهة السلاح الناري ليلتقطه ولكنه وجد نفسه فجأة يسقط على الأرض دون أن يشعر ثم وجد أقدام ناعمة وطويلة تلتف على جسده كالأفعى ووصلت إلى أنفه رائحة نسائية نفاذة، نظر خلفه ليشاهد ما يحدث له ولكنه وجد سلًا رفيعًا يضغط على رقبته بقوة منعه من التنفس نظر خلفه وهو يحاول مقاومة ما يحدث فوجد فتاة تحنقه من رقبته بقوة شديدة وتضع قدميها على جسده لتمنعه من الحركة وتعطي لها زخمًا أكثر.. لم يدر يحيى ماذا يفعل أو ماذا يحدث.. كل ما كان يدور بعقله أنه سيموت الآن.. وصلت إلى أذنه صرخات ياسين وزمجرة الكلب خلفه.. احتقن وجهه وارتفعت حرارة جسده واحتبست الدماء بعينيه ومنع رأسه من استقبال الأكسجين.. كان يحاول باستماتة أن يمنع ضغط السلك من على رقبته.. إنه سلك بيانو من أقوى وأصلب السلوك في العالم ويمكنه أن يمزق يديه ورقبة تحت ضغط قوي ولكن لحسن حظه

كانت الفتاة خفيفة الوزن أقل منه بكثير ولكنه كانت لديها خبرة كبيرة بالقتل بتلك الطريقة فيحیی مع كل مقاومة يديها يجد لتلك الفتاة ردّ فعل مقاوم لها في الحال.. وممارستها لرقصات البالية أعطى لجسدها مرونةً غير طبيعية.. كان من الواضح بأن ياسين ويحيى سوف يلقيان حتفهما في الحال الآن وهما بلا حول ولا قوة.. والأسوأ من ذلك أن الأجنبي قد تحصّل على سلاحه الناري وأمسكه بيده الأخرى وابتسم بوجه يحيى وهو يكاد يلفظ أنفاسه.. «good by poor bird».. نظرت له الروسية بغضبٍ فيبدو أنه سيطلق النار على يحيى متجاهلاً وجودها خلفه.. فقامت على الفور بالابتعاد عن يحيى بقفزة واحدة ثم قفزت وركلت بقدمها السلاح الناري من الأجنبي ثم قامت بركله بسرعة شديدة بقدمها الأخرى بوجهه فسقط على الأرض متألمًا لا يستطيع الحركة لعدة لحظات.. ترك الكلب هنا ياسين وأخذ ينبح وهو مترددٌ من أن يترك ياسين أو أن يساعد سيّده.. استغل ياسين هذا الأمر وهو يمسك يديه متألمًا وتوجّه بسرعة جهة سلاحه الناري ولكن لم يمهل الكلب أن يفعل ذلك فركض خلفه سريعًا وأمسكه من قدمة وأخذ يعضه بقوة شديدة من قدمه فسقط ياسين على الأرض فتوجه الكلب سريعًا جهة رقبتة يحاول انتزاع حنجرتة بسرعة ليعود إلى صاحبه.. أثناء تلك اللحظة أخذ يسعل يحيى وهو يحاول استنشاق الهواء بيأس شديد ويحاول أن يسحب الأكسجين بقوة ليعيده إلى جسده المشتاق لأي دفعات منه ولكن لم يستطع أن يهنأ فلقد طارت الفتاة الروسية بالهواء وضمت ركبتيها معًا وسقطت بهما على ظهر يحيى أسفلها فارتطم بالأرض بقوة.. ثم وضعت سلك البيانو خلف رقبتة مرة أخرى بسرعة

وتلك المرة لديها تحكم بها أكثر وتنوي أن تنزع رقبته من فوق جسده.. وأخذت تسحب السلك إلى الخلف وهي تضع ركبته على جسد يحيى وهي ممتطياه من الخلف.. كان اليأس قد دب في قلب الاثنين وآمنا أن أجلهما قد حان.. من فرط الحركة شعر ياسين بأن رئتيه تحترقان من الداخل وأخذ يسعل بشدة وهو يحاول مقاومة فك الكلب الشرس الذي حطم يده اليسرى تمامًا ولم يعد يشعر بها تقريبًا ولكنها كانت الشيء الوحيد الذي يمنع أنياب هذا الكلب عن تمزيق عنقه.. تحت سحق أقدام الموت قام ياسين بمحاولة أخيرة لإنقاذ حياته فقام باستغلال إمساك الكلب بيده اليسرى وقام بإطلاق وابل من اللكمات المحملة بالأدرينالين وتدفق الدماء في جسده فوق رأس الكلب الذي ظل يتحملها اللكمة تلو الأخرى لمدة ثوانٍ معدودة ومن ثم بدأ يتأثر قليلاً.. حيث اضطر أخيرًا تحت وابل من اللكمات غير الواعية من ياسين أن يجعله يترك يده من فمه وركض بعيدًا عنه قليلاً.. استغل ياسين تلك اللحظة وركض وهو يسعل ولا يقدر على الحركة وأمسك بسلاحه الناري.. وأخذ يطلق على الكلب الذي كان يتفادها بمهارة شديدة.. شاهد ياسين يحيى وهو يلتقط أنفاسه الأخيرة تحت ضغط المرأة الروسية.. فقام على الفور بالتصويب عليها.. نظرت له الفتاة وابتعدت عن يحيى بسرعة.. فقام ياسين بإطلاق النار عليها فأصاب كتفها وسقط يسعل متألمًا وهنا شاهد الأجنبي يستعيد وعيه ويبحث عن سلاحه.. وقام الكلب سريعًا بالعودة جهة ياسين ليفتك به مرة أخرى.. أدرك ياسين أنه ليس به قوى ليقاوم الكلب مرة أخرى ولكنه قام بتصويب سلاحه جهته ولكن لم يطلق فوجد الكلب يقفز بالأرجاء

ليتفادى أي طلقات سيطلقها.. ومن ثم تحرك راکضاً جهته مرة أخرى.. هنا هداه تفكيره إلى شيءٍ واحدٍ فقط بسرعة ليفعله.. صوب سلاحه بسرعة شديدة جهة الأجنبي الذي حمل سلاحه هو أيضاً.. وأخذ الكلب يركض جهة ياسين بالحال.. أمسك ياسين سلاحه بقوة ومن ثم حرّك يده المصابة بسرعة شديدة وهو يتألم ومن ثم صوّب على رأس الأجنبي وأطلق رصاصة في الحال فأرداه قتيلاً ولكن بعد أن أصابه بجانب يده اليمنى.. وقف الكلب أمام ياسين الذي لم يكن له أي قوة أو قدرة للذود عن نفسه.. ولكن وقف الكلب متردداً للحظات ومن ثم توجه إلى صديقه الأجنبي وأخذ يشاهده وهو صريع على الأرض أمامه فأخذ يلعق دماءه وهو يصدر أصواتاً وأنياباً حزيناً.. نظر له ياسين معجباً.. «تصدق إنك كلب ابن بني آدم..».. ثم اطلق النار على رأس الكلب الذي أخذ يصرخ ويصيح ومن ثم صمت للأبد.. جلس ياسين على الأرض منهزماً.. ويده اليسرى محطمة تماماً ومغطاة بالدماء ويده اليمنى مصابة بطلقة طائشة ولكنه جرح سطحي وليس خطيراً.. نظر إلى يحيى الذي كانت علامات السلك محفورة فوق رقبته ووجهه وعيناه محترقتان بالحمرة.. ولم يستطع الحديث وهو ينظر إلى يحيى أمامه وياسين يضحك وهو مصاب.. «ههههه.. شُفت يا عم.. أهو أنا طلع عين أهلي واتعلقت من الترتره علشانك..».. ولكن على الرغم من مزاحه هذا لم يجد يحيى يضحك نهائياً بل على العكس أخذ يصيح له وصرخ عليه دون أن يصدر صوته بوضوح.. نظر له ياسين مندهشاً.. «إيه يا يحيى مالك..».. أخذ يحيى يمسك رقبته وهو يشير له بيده ويصرخ عليه بصوت مخنوق وبعد محاولات كثيرة نجح بأن يصرخ

بصوت غير مفهوء.. «وراك.. وراك».. نظر ياسين خلفه بسرعة
ليشاهد سن معول يسقط جهته تحرك بسرعة شديدة ليتفاده وبالفعل
تفادى رأسه ولكن لم يتفادَ فخذه واخترقها.. فصرخ صرخة مدوية
بشدة.. «اااااااااااا».. هنا شاهد ياسين فخذه ينفر منه الدماء ومعول
يثقبه وشخص صعيدي يرتدي جلبابًا يضحك أمامه.. «اااا»..
سلامتك من الآه».. ومن ثم وضع يده على المعول فصرخ ياسين
متألماً.. صرخ يحمى بصوت محتقن عليه.. «سيبه يلا.. إبعده عنه
أحسنلك».. نظر له الصعيدي مبتسماً.. «اصبر على رزحك..
هاجيلك انت كمان.. أنا جايلك انت مخصوص وليك عندي موة
زين».. نظر مرة أخيرة إلى ياسين وهو يضحك فوجد ياسين يصوب
سلاحه في وجهه.. فصرخ الصعيدي.. «ياووووي».. وأطلق ياسين
النار ولكن لم يجد به رصاصاً.. أطلق مرة ثانية وثالثة ولكن
الرصاص قد نفذ بالفعل.. فألقى ياسين سلاحه بيأس فضحك
الصعيدي ساخرًا.. «هههع هههع.. خوفتني يا بجرة.. كنت هتموتني
ناجص عمر يا بن الفرطوس».. ثم نزع المعول من فخذه ياسين بعنف
فصرخ متألماً بشدة.. «اااااااااااا».. فضحك الصعيدي وأخذ يتحدث
إليه.. «يطربني صياحك.. جول كمان.. جول».. ومن ثم رفع معوله
إلى أعلى وهو يصيح.. «استعنا على الشجي بالله».. فضحك ياسين
بشدة وهو ينظر أمامه «يا ابن المجنوووووون».. توقف الصعيدي
بالمعول بالهواء.. «شكلك تعرف أمي الله يرحمها.. عموما إبقى
سلملي عليها».. وقام بالنزول بها بقوة على رأس ياسين الذي ألقى
بنفسه على الأرض وأغمض عينيه.. نظر الصعيدي إليه مندهشاً
وشعر بعدم الارتياح فنظر خلفه سريعاً ليجد يحمى يقود سيارة

الرجل الأجنبي ويندفع بسرعة جهته.. فصرخ عليه الصعيد وهو يضحك.. «عايز تدهسني يا ابن الفرطوس.. تعلا لي يواكل ناسك».. فصرخ يحيى وهو يضغط على دواسة البنزين أسفل قدمه ويزيد سرعته وياسين أسفل الصعيدي يغلق عينيه مرتاعاً وهو لا يرى شيئاً.. باللحظة التي قام يحيى بالاصطدام بها بالصعيدي كان هبط بمعوله على زجاج السيارة فاخرقها مقدمة المعوال وتشبث بالسيارة بقوة وهي تجرفه جهة الحائط وتمر بذات اللحظة فوق جسد ياسين الذي كان بوسطها بين العجلات تماماً وأخذ يصرخ مرتاعاً.. تدفق الأدرينالين وتضافرت رائحة الدماء والعرق بالجو.. اصطدم يحيى بالصعيدي بقوة بالحائط.. فصرخ الصعيدي متأماً وتحدث إلى يحيى بحنق.. «بتخليني أصيح.. بتسمع طربي يا ابن الفرطوس.. لو هعاود لماي هخذك معايا».. ومن ثم ضرب زجاج السيارة بقوة بالمعول بالنصف العلوي من جسده فاقترب المعول من جسد يحيى الذي شاهده يقترب منه مرتاعاً فقام بالضغط على دواسة البنزين وهو يصرخ بشدة فتقوم السيارة بهرس جسد الصعيدي أكثر بالسيارة ولكنه لم يستسلم وظلّ يحطم السيارة بمعوله وبكل مرة يصرخ يحيى مرتاعاً من اختراق المعول للسيارة وهبوطه بالقرب منه فيضغط على البنزين أكثر وأكثر واخذت لعبة الشد والجذب هذه عدة لحظات قبل أن تنتهي بسقوط المعول بداخل السيارة بجانب ياسين والصعيدي تخرج الدماء من فمه وينظر إلى يحيى ضاحكاً.. أخذ يحيى ينظر إلى الصعيدي بتقزز شديد وأمسك بالمعول وألقاه إلى خارج السيارة ومن ثم فتح بابها وهو متأماً لا يقدر على الحركة ولكنه هنا شاهد مشهداً مخيفاً أمامه جعله يرتعد.. الفتاة الروسية

تقف أمامه ويدها اليمنى حبل البيانو وكتفها مصاب وينزف دماء. تنظر إلى يحيى كالذئب الذي يشتهي فريسته على الرغم من ملامحها الجميلة التي تسعد أي رجل ولكن وجهها بتلك اللحظة كان يوقع الرهبة بأشد القلوب شجاعة.. علم يحيى أنها لن تتركه يمضي إلى حال سبيله.. سوف توقعه فريستها لها اليوم ولكنه أيضاً لن يرحل دون قتال.. فتحرك بضعف جهة السيارة والتقط المعول الملطخ بالدماء بيده وتقدم جهتها بثبات وتحدي.. ظلت تراقبه الفتاة وهو يقترب منها دون أن تبدي أي ردة فعل كل ما تفعله فقط هو أن تضغط على جرح كتفها المصاب.. هنا تعالت الصيحات وظهر عددٌ كبيرٌ من الناس بداخل الجراج ليشهدوا ما سبب الصياح والصراخ هذا الذي حدث.. نظرت الفتاة الروسية إلى جموع الناس القادمة فشعرت بالغضب الشديد ومن ثم انسحبت بسرعة شديدة وهي تقفز بمهارة كبيرة بين السيارات وفوقها لتختفي عن الأعين تماماً.. هنا ألقى يحيى بالمعول سريعاً ثم نظر إلى ياسين الذي كان مغشياً عليه وينزف بشدة.. اقتربت منه بعض الجموع وهو يضغط بحزام ياسين على جرح فخذة حتى يمنع نزيفه فسأله أحد الأشخاص سريعاً:

- «في إيه.. إيه اللي حصل.. مين اللي عمل كده..» أجابهم يحيى بصوت ضعيف غير مسموع.. «انقلوه المستشفى فوراً وخليهم يجيبو له أكياس دم.. قولو لهم إنه ظابط شرطة».. هنا قام البعض بالركض سريعاً جهة المشفى وحاول بعضهم مساعدة يحيى فذهب معهم ولكنه استطاع أن يختفي أثناء نقلهم لياسين بداخل المشفى.

بعد مرور ساعتين.. كان ياسين بإحدى الغرف يدها مغطتان
بالجبس وقدمه ملفوفة بشاشٍ كبيرٍ ومصاب ببعض الجروح
والسحاجات.. كان يقف أمامه أشرف مبتسماً.. «حمد الله على السلامة
ياباشا.. قلقتنا عليك».. نظر له ياسين مندهشاً.. «أنا فين؟»..

«إنت في المستشفى ياباشا.. جروحك كانت خطر وسببتلك
نزيف جامد بس الحمد لله كان في حد معاك وقّف النزيف عقبال لما
ودوك المستشفى.. هو إيه اللي حصل ياباشا.. وانت كنت جاي ليه
هنا؟».. أجابه ياسين سريعاً.. «يحيى.. فين يحيى؟»..

أشرف مستغرباً.. «يحيى بتاع فيصل اللي كنت بتسأل عليه؟»

«أيوه هو.. كان معايا ساعة لما هاجمونا.. حصله حاجة؟»

«لا ياباشا ما أعتقدش هما لقوا اتنين مايتين واحد باين عليه
صعيدي والثاني أجنبي وزمايلنا بيحققوا في القضية دلوقتي».. صرخ
ياسين بعد أن حاول أن يتحرك ولكنه تألم.. «أنا عايزك تطلع منشور
عن يحيى دلوقتي.. يتم القبض عليه فوراً».. أشرف أو ما برأسه..
«حاضر ياباشا.. هنفذ حالاً.. بس ياترى هو يحيى ده ليه علاقة
بالقضية بتاعتنا»..

ياسين بضيق.. «يحيى ده هو القضية أصلاً.. أنا إحساسي عمره
ما خيب أبداً.. لازم علشان نفهم اللي بيحصل.. لازم يكون يحيى
تحت إيدينا..»

الساعة الحادية عشرة وثلاث دقائق..

يحيى يخفي رقبته بلفافة على الرغم من الجو الحار حوله ويشرب بعض المشروبات الباردة وقد تحسن صوته وعاد بشكل شبه طبيعي.. قام بشراء بعض المسكنات الفعّالة وابتلعها دفعة واحدة كي يتغلب على الآلام التي حلت بجسده من معركته السابقة التي كادت حياة تنتهي خلالها لولا مساعدة ياسين له.. لم يجد أيّ طرف خيطٍ آخر يوصله لسامي أبدًا.. فكر أن يفعل ما يفعله دائمًا المحققون.. الذهاب إلى نقطة البداية لكل ما حدث.. فتوجه إلى المتجر الكبير الذي قابل سامي فكري به ولكنه كان حريصًا ألا يظهر للكاميرات بوجهه ولهذا وضع غطاء رأس فوقه ولبس نظارة سوداء كبيرة ابتلعت ما تبقى من وجهه وأخذ يتلفت يمينًا ويسارًا.. ثم أخذ يبحث عن مصدر يغذيه بالمعلومات ولأنه يعلم أن مصدر المعلومات الذي لا يندب هم دائمًا العجائز وأخذ يبحث عن عامل عجوز بالمتجر وبالفعل وجد ضالته سريعًا عجوزًا يرتدي الزيّ الموحد لعمال المتجر يحمل برشاقة شديدة بعض عبوات الطعام فوق كتفه وينقلها من جهة إلى أخرى.. فذهب إليه يحيى سريعًا.. «لو سمحت يا حاج».. توقف العجوز أمامه سريعًا مبتسمًا.. «أؤمر يا باشا..»

يحيى مبتسمًا يخرج له ورقة بمائة جنيه ويعطيها له.. «إمسك دي حاجة بسيطة علشان اتبسّطت منك لما اشترت من المحل هنا المرة اللي فاتت انا والمدام».. أخذها العامل بفرح ودسّها سريعًا وبخبرة كبيرة بين طيات ملابسه.. «الله يخليك يا باشا.. إحنا خدّامينك إنت والست هانم».. اقترب منه يحيى قريبًا وهو يتسم.. «كنت عايز أسألك عن

الكاشير الي كان قاعد هنا الصبح من يومين.. ساعة السيستيم ما وقع.. أصل مراتي وقع منها الخاتم بتاعها وهي بتحاسب ومخدتش بالها وهو كان أمين ورجلها الخاتم.. فأنا بصراحة عايز أكافئه على أمانته».. ثم أخرج ورقة أخرى بمائة جنيه وأعطائها للعجوز الذي كاد يطير طربًا.. «الله يخيلك يا بيه.. يدوم عزك.. إنت قصدك على الكاشير مرقص.. هو الي كان شفته الصبح الإسبوع الي فات».. ياسين أخذ يوصف له بيده.. «هو كان شاب حاجة وعشرين سنة كده وشعر رأسه خفيف شوية».. أوما العجوز له برأسه.. «أيوه.. هو مرقص يا بيه».. يحيى مبتسمًا.. «طيب تمام.. فين مرقص بقى علشان عايز أكافئه».. العجوز بضيق: «للأسف يا بيه قدم استقالة ومشي في نفس اليوم.. كل الي اشتغله أسبوع بس والله».. يحيى مندهشًا.. «اشتغل إسبوع بس»..

«آه يا بيه مع إن كان الكل بيقول عليه كويس وأمين.. بس جاتله سفرية مع عمه في ألمانيا وبعته التأشيرة وهيسافرله».. يحيى يتسم ساخرًا.. «طبعًا.. لازم يسافر لعمه.. طيب هو في حد ساب الشغل بردو الإسبوع ده؟».. العجوز بضيق.. «يووووووه.. دول خمسة مشيوا في نفس اليوم فيه منهم الي قال وفيه منهم الي بطل يحيى ومحدث يعرف عنه حاجة».. هنا نظر له يحيى بتمعن.. «مشيوا كلهم تمام.. طيب ممكن تقولي أساميههم ولو معاك عناوينهم يبقى كتر خيرك».. العجوز مبتسمًا «آه.. قوي قوي.. بس بصراحة أنا ما أعرفش عناوينهم، أعرف اساميههم بس».. يحيى أخرج ورقة وقلماً وأخذ ما يمليه العجوز.. «ماشي يا حاج هات أساميههم»..

وقف يحيى أمام المتجر يائساً وهو ينظر إلى ورقة الأسماء بيده..
«طبعاً الأسماء دي كلها وهمية.. وكلهم اشتغلوا من فتره بالمحل
وبعد ما خلصوا مهامهم مشيوا.. دول كانوا عاملين عليا رباطية بقى..
أخ يا اولاد ال...».. أخذ يتنهد حائراً وهو يضع يديه على خصره..
«طيب أعمل إيه دلوقتي.. أعمل إيه؟؟».. بتلك اللحظة ومضت
بعض الذكريات برأسه.. حينما كان يقف سامي معه بالصف
ويتحدث معه ويحى لا يعيره أيّ اهتمام.. فأمسك يحيى فمه مفكراً..
«هو لما كلمني قالي إنه بيطلب بيتزا دايماً من محل.. وإن بتاع الدليفري
زهق منه لما كان بيشغله أغنية كل شويه.. يبقى ممكن بتاع الدليفري
ده يعرفه أو يعرف مكانه.. طيب ازاي أوصل لبتاع الدليفري ده..
لازم أبحث عنه في جميع محلات البيتزا.. طيب وهعرفه إزاي وهو لا
يعرفني ولا أعرفه.. الوحيد المشترك ما بينا هو سامي فكري».. أخذ
يبتسم يحيى وهو يحدث نفسه.. «أيوه.. أنا ممكن أوصل لبتاع
الدليفري لو شغلته الأغنية اللي بيحبها سامي أكيد هيعرفها
ويتضايق منها زي ما سامي قالي.. طيب هو اسم الأغنية إيه.. مش
فاكرها خالص مع إن سامي قالي عليها وقالي على اسم مغنيها وقايل
إنها أغنية فيلم.. كل اللي فاكره إنه قالي إن الفيلم سنة 2007.. طيب
اسم الفيلم إيه.. مش فاكر..».. أخذ يحيى يفكر وهو يتحرك فوق
رصيف أحد الشوارع متحيراً.. «أنا متعلق بقشاية في وسط محيط..
يمكن يكون كل اللي قاهولي سامي أصلاً كذب وبيلاعب بيازي
ما بيعمل.. بس أنا حسيت إنه كان مهتم جداً وهو بيكلمني..
ممكن يكون بيحب الأغنية والبيتزا دي بجد.. أعمل إيه ياربي..
أعمل إيه».. رفع يحيى غطاء الرأس وأخذ يمسح رأسه بضيق..

«إنما كده كده ماقداميش حل تاني غير كده.. هو الدليل الوحيد الي
قصادي دلوقتي.. الخطوة الأولى أعرف اسم الأغنية دي ايه.. يا
ريتني كنت اهتميت ساعتها».. وهنا تحرك يحيى بعد أن اختمرت
برأسه خطة ينوي تنفيذها.. استقل سيارة أجرة وذهب إلى أحد
الأمكن بمنطقة المهندسين ووقف أمام أحد الأمكن المغلقة.. نظر إلى
يافطها فوجد مكتوباً عليها.. «الأبطال للإنترنت والبلايستشين»..
دلف يحيى إلى داخل المكان وجلس أمام أحد أجهزة الحاسوب المزود
بسرعة إنترنت عالية.. وأخذ ينفذ خطته.. كان يبحث عن أغنية دون
أن يعلم ما هو اسمها أو ماهو حتى نوعها.. كل ما كان لديه من
معلومات أنها أغنية لفيلم ما صنع عام 2007.. ولكنه كان لديه
قناعة أنه يستطيع أن ينفذ بتلك المعلومة الصغيرة خطته كلها.. فأخذ
ينفذها رويداً رويداً.. كان الجزء الأول بها هو معرفة اسم تلك
الأغنية.. دخل على محرك البحث الشهير وقام بكتابة بالإنجليزية
أفلام أمريكية عام 2007 فظهر له 337 فيلم تم إنتاجهم هذا العام
لوقام بمطالعتهم جميعاً بمعدل عشر دقائق لكل فيلم فإنه سوف
يحتاج إلى ما يقارب الثلاثة أيام من البحث المتواصل دون انقطاع
وهذا وقت طويل لا يمتلك رفاهية الحصول عليه الآن، ولذلك فكر
بأن يقوم باستبعاد أفلام الكارتون والإنيميشن أولاً من قائمة بحثه
فقلص عملية البحث بما يقارب 267 فيلم تقريباً.. ثم قام باستبعاد
أفلام الكوميديا وأفلام الرعب والأكشن مؤقتاً ويصب تركيزه على
أفلام الدراما، وإذا لم يجد ضالته خلالها سوف يعود للأكشن ومن ثم
للرعب.. ظل يبحث بالأفلام الدرامية لما يقارب الساعتين يبحث
عن أغاني الأفلام الموضوعية بالأفلام وبالنهاية وجد ضالته.. إنها

نفس الأغنية التي أسمعها له سامي فكري من قبل.. وجدها أغنية لفيلم تم عرضه يوم 21 سبتمبر عام 2007 باسم into the wild واسم الأغنية long nights.. للمغني eddi vedder... قام بتحميل الأغنية على الفور على هاتف قد ابتاعه وبالطبع لم يكن من النوع بس إكس 350، ووضع به شريحة باسم شخصٍ آخر بعد أن أعطى لعامل المتجر إكرامية كبيرة.. بعد أن انتهى من تحميل الأغنية حان الوقت للبدء بالجزء الثاني من خطته.. هو يتذكر من محادثته مع سامي من قبل عن أكلته المفضلة؛ البيتزا.. إنه كان يطلب بيتزا يابانية وهذا النوع بالتأكيد نادر ولا يُباع في الكثير من المطاعم وهذا سوف يساعده كثيراً بتقليل إطار بحثٍ عن تلك القشة التي بوسط المحيط.. وبالفعل أخذ يبحث عن مطاعم البيتزا الإيطالية في القاهرة ووجدها تربو عن 213 مطعم.. مع تقليل نطاق البحث قليلاً عن الأماكن التي على أطراف القاهرة مثل التجمع الخامس والقاهرة الجديدة نظراً لأنها سوف تأخذ وقتاً طويلاً في توصيلها وبالطبع سوف تبرد البيتزا وهذا أمر غير مرغوبٍ لأي شخصٍ سواء المطعم أو من يقوم بالشراء.. وبهذا قد تم تقليل نطاق البحث إلى مايربو 136 مطعم وهذا بالطبع عدد كبير للبحث من خلاله فقام بتقليص العدد عن طريق طرح فروع المطاعم التي لنفس المطعم وهكذا وصل للعدد 68 مطعم.. وهنا لم يكن لديه وسيلة أخرى لتقليل تلك المطاعم فقام على الفور بالاتصال على الأرقام الخاصة بتلك المطاعم ويسألهم في عجلة سريعة عن وجود بيتزا يابانية لهم بمكاملة حدّد لها دقيقتين تقريباً.. وبعد مكالمات كثيرة وخلال ساعتين تقريباً.. كان قد انتهى من طلب أرقام المطاعم ال 68 ووجد أن 13 منهم فقط لديهم البيتزا

اليابانية بقائمة طعامهم.. وهكذا دون عناوينهم وبدء رحلة البحث عن المطعم المشود.. كانت خُطَّته الذهاب إلى المطاعم الأقرب منه أولاً، ومن ثم إن لم يجد غايته يتجه إلى المطاعم الأبعد بعد ذلك اختصاراً للوقت فقد تعدت الساعة الثالثة ولن ينتظره الوقت طويلاً.. استقل سيارة أجرة لأقرب مطعم ومن ثم اقترب من عمَّال الدليفيري الذين يجلسون بخارج المطعم دائماً بجوار درَّاجاتهم النارية وقام بسؤالهم عن معرفتهم لشخص يطلب منهم طلباتهم ويستمع إلى تلك الأغنية.. وهنا وجدَ رَدَّ فعلٍ مُخْتَلِفٍ من العمَّال فمنهم من أخبره بأنه لا يعلم أحداً يسمع ذلك ولكن معظمهم كانوا ينظرون له مرتابين.. فسأله أحدهم بطريقة مباشرة.. «هو انت تبع الإدارة وجاي تختبرنا ولا إيه.. إحنا مانعرفش حاجة».. وهنا علم يحيى بأن عمَّال الدليفيري لن يساعده بملاء إرادتهم إما خوفاً من أن يكون أحد المديرين المتخفين الذين يشرفون عليهم أو أن يكون أحد مخبري الشرطة ويورطهم بشيءٍ ما.. فوجد أن بابَه مسدودٌ بعد أن ذهب إلى المطعم التالي ووجد نفسَ رَدِّ الفعلِ تقريباً.. هنا قرَّر يحيى أن يُغيِّرَ استراتيجيته فبدلاً من واجهَةِ عمَّال الدليفيري مباشرةً فإنه سيفعل معهم استراتيجية مغايرة مثل ما فعل الإرهابي والمترو.. لن يواجههم مباشرة ولكنه سيستشف ردود أفعالهم.. فبداية من المطعم الثالث كان يتصنع يحيى أنه يقف منتظراً طلباً له ويقف بالقرب من عمَّال التوصيل ويقوم بتشغيل أغنية the long night.. لأن سامي أخبره بأن عامل التوصيل يمقت تلك الأغنية من كثرة سماعها له دائماً عنده.. وأخذ يُراقب رَدَّ فعلِهِم تجاه ما يسمعونه.. ولكن وجد أن رد فعلهم الوحيد هو اللامبالاة وتجاهله تماماً مع نظرات مرتابة له كل بضع

لحظات.. علم حينها يحى بأن هذا المطعم ليس ضالته فتوجه للمطعم المقبل وحدث مثل ما حدث مع السابقين من عدم اللامبالاة والاهتمام ولكن هنا علم يحى بأن أحد العمال غير متواجد ويقوم بتوصيل طلبية لأحد الزبائن وهنا قرر يحى بأن ينتظره لعلّه يكون هو ضالته المنشودة.. مرّ وقت الانتظار كالدهر على يحى وشعر بأنه قد أضع الكثير من وقته الثمين فلقد مرت نصف ساعة بأكملها حتى عاد العامل أخيراً واستبشر حينها يحى عندما رآه وشعر بأنه أمله المنشود.. فهب مسرعاً بالقرب منه وقام بتشغيل الأغنية ولكن لم يعرّه العامل أيّ اهتمام وأخذ يتحدث إلى بعض زملائه ثم دلف إلى داخل المطعم.. شعر يحى باليأس مجتاحه وأن خطته تلك بلا جدوى وأنه بالتأكيد سامي كان يخبره بالهراء كل تلك الفترة وأنه يطارد سراّباً ووهماً وأنه لن يجده أبداً.. أظلم العالم بوجهه وشعر بأنه يطارد المستحيل ولكن على الرغم من حالته النفسية تلك ولكنه قد أصر على استكمال الأمر حتى نهايته لأنه يعلم جيداً أنه لو توقف الآن فسوف يلوم نفسه لباقي حياته ولكن لو قام بتنفيذ خطته حتى النهاية وفشلت فسوف يكون فشله هذا أقل إيلاًماً من نفسه اللوامة.. واستمر يحى يتحرك من مطعم إلى آخر ويفعل ما يفعله مع عمال التوصيل ولكن بصبر أقل فإنه عندما يمر بهم وهو يشغل الأغنية على هاتفه ولا يجد منهم أيّ اهتمام فيتركهم سريعاً ولا ينتظر أحداً يكون بالخارج حتى يعود فهو قد تمكّن منه اليأس وشعر أن ما يفعله تحصيل حاصل.. كرّر الأمر عدة مرات حتى أصبحت الساعة السابعة مساءً وحلّ الليل عندما كان بطريقه للمطعم التاسع وهنا شعر بالجوع فقرّر أن يطلب بيتزا بالجبنه

ليتناولها رمقًا لجوعه من المطعم القادم.. هبط أمام المطعم وذهبت سيارة الأجرة خلفه بسرعة، توجه بشكل روتيني إلى عمال التوصيل وقام بتشغيل الأغنية بجوارهم وكالمعتاد لم يبدِ أحدهم أي اهتمام وهنا لم يبدِ يحیی أي اهتمام أيضًا وذهب إلى داخل المطعم ووقف أمام الكاشير فوجده يأخذ حسابًا من شخصٍ آخر قبله فوقف يحیی منتظرًا أن ينتهي.. وهنا شاهد عامل ديلفيري يدلف بداخل المطعم فقام سريعًا بتشغيل الأغنية على الهاتف ولكن عامل الديلفيري كان قد تحرك مسرعًا إلى الداخل قبل أن يشغلها يحیی.. فترك يحیی الأغنية تعمل وهو يلعن حظه وعدم سرعة رد فعله فحدثه الكاشير مبتسما.. «أؤمر يا افندم».. أغلق يحیی بضيق الهاتف وتحدث إلى الكاشير.. «عايز بيتزا ميديم جنبه مشكلة والإضافات عليها تبقى جنبه بر دو لو سمحت».. الكاشير يضغط على الجهاز أمامه ثم يحدثه «حضرتك هتاخذها معاك».. يحیی أومأ براسه «آه.. هاخذها معايا مش هاكل هنا».. أخذ يضغط الكاشير على بعض الأزرار أمامه.. «الحساب 102 يافندم».. ناوله يحیی النقود ووقف منتظرًا أن ينتهي.. أثناء ذلك خرج عامل التوصيل يحمل علبة بيتزا بيده وتحدث إلى الكاشير.. «رؤوف.. أنا خارج أوصل البيتزا الياباني دي علشان لو سعيد سأل عليًا تقوله إني بره».. أومأ له الكاشير: «ماشي هقوله».. هنا جحظت عينا يحیی وهو يستمع لمحدثتهما.. فأعطاه الكاشير باقي نقوده فأخذها يحیی واجمًا.. فتحدث إليه الكاشير.. وهو يعطيه ورقة «حضرتك هتستلم الأوردر بتاعك من الكونتر اللي هناك».. فأخذ يحیی منه الورقة واتجه إلى ناحية الكونتر ولكنه توقف مترددًا ومن ثم عاد مسرعًا إلى خارج المطعم وسط نظرات اندهاش من الكاشير

الذي نادة عليه: «يا أستاذ.. الأوردري يا أستاذ».. ولكن لم يعيره يحيى أيَّ اهتمام وتبع عامل التوصيل إلى الخارج ليشاهده يتحدث إلى أحد زملائه ويقوم بتحضير طلبية البيتزا ويضعها بصندوق دراجته.. نظر يحيى حوله سريعاً فلم يجد سيارة أجرة بالقرب منه.. فقام على الفور بإخراج هاتفه وتصوير رقم لوحة الدراجة النارية دون أن يشعر عامل التوصيل.. ثم نظر إلى الشارع وهو يفكر بسرعة كيف سيخرج العامل هل إلى الأمام أم إلى الخلف.. لم يكن له خيار إلا أن يراه وهو يغادر وبلحظات كان عامل التوصيل يغادر إلى الأمام جهة الشارع الرئيسي.. ركض يحيى سريعاً ليلحقه ولكنه لم يستطع أن يجاريه بسرعه فتوقف لاهثاً عند بداية الشارع الرئيسي فوجد سيارة أجرة بالقرب منها فأشار لها فسأله السائق سريعاً.. «على فين يا بيه؟».. أجابه يحيى لاهثاً.. «آخر الشارع وهديك زيادة عن العداد 200 جنيه».. ابتسم له السائق «اركب يا باشا».. ركب يحيى سيارة الأجرة وانطلق بطريقة.. أخذ يبحث عن عامل التوصيل أمامه فلم يجده.. بوسط الشوارع وما بين السيارات.. هو يعلم بأنه مازال بالإمكان تداركه إذا قام سائق التاكسي بزيادة سرعه ولكن إذا طلب منه يحيى أن يتبع عامل التوصيل فسوف يرتاب ومن الممكن أن يطلب منه مغادرة سيارته وبهذا سيضيع منه عامل التوصيل للأبد.. وهنا طرأت على رأسه فكرة شيطانية.. فقام بإمساك هاتفه بيده اليمنى بعيداً عن أعين السائق وقام بتشغيل الأغنية التي على الهاتف ثم تصنع أن شخص يتصل به فأمسك الهاتف وقال بصوت عالٍ.. «ألو.. أيوه يا حسن.. إزيك يا حبيبي.. أخبارك إيه.. أنا والله كنت في مشوار كده في شارع شهاب.. انت فين.. ياراجل في شارع شهاب برضو..

فين في شارع شهاب.. إيه لابس هدموم الشغل ومعاك الماكينة ومروح.. طيب استنى.. استنى.. أنا راكب تاكسي أهو هدموم عليك وأقابلك ونروح مع بعض.. ثم أمسك الهاتف بيده وتحدث إلى السائق بجواره.. «بقولك إيه يا أسطى.. معلش دوس بنزين شوية علشان ابن أختي راكب ماكينة الشغل ومروح وعايز أخده في سكتي».. السائق مبتسمًا.. «ماشي ياباشا.. بس الأجرة زي ما اتفقنا».. يحيى مبتسمًا.. «آه طبعًا زي ما اتفقنا».. قام السائق بزيادة سرعته.. «خلاص اتكلنا على الله».. ثم تصنع يحيى أنه يتحدث بالهاتف مرة أخرى.. «طيب يا حسن علشان مانغلبش السواق معانا.. إنت لابس الشغل اللي لابسه إيه؟».. نظر إلى السائق وهو يتصنع الحديث مع حسن.. «إيه لونه برتقالي.. ومكتوب عليه مطعم فيدينو بيتزا.. طيب تمام تمام».. ثم تحدّث إلى السائق.. «مكتوب على هدمومه مطعم فودينو بيتزا يا أسطى ولا بس برتقالي».. السائق بضيق.. «طيب وهو أنا هركز في السواقة ولا هركز في هدمومه لا مؤخدة».. يحيى بقلق.. «لا.. ركز انت في السواقة وسيني أنا أدور عليه.. دوس بس بنزين شوية».. ضغط السائق على دواسة البنزين.. «أهو.. عمالين نحرق في بنزين أهو».. شعر يحيى بالقلق من تدمر السائق وأيضًا من عدم رؤيته لعامل التوصيل طوال هذا الوقت.. وهنا شاهده من بعيدٍ على بُعد ثلاثين مترًا تقريبًا يقود دراجته بملابسه البرتقالية اللافتة.. تحدّث يحيى إلى السائق.. «أهو يا أسطى هناك أهو».. فأجابه السائق سريعًا.. «آه شفته خلاص».. يحيى تصنع أنه يتحدث إليه بالهاتف.. «خلاص يا حسن أنا شفتك أنا والسواق

أهو.. هنمشي وراك لحد ما توصل وهقفل معاك علشان تركز ربنا
يستر طريقك.. حبيبي يا حسن.. يلا سلام يا حبيبي..» ثم أغلق
الهاتف وتحدث إلى السائق.. «خلاص يا أسطى إمشي وراه براحتك
بقى.. أهم حاجة ما يغش عن عينك علشان مانلفش وراه تاني»..
أخذ يتلفت السائق حوله وهو ينظر للطريق.. «ماشي يابيه».. ابتسم
يحيى بخبثٍ وهو يشاهد السائق يتابع الدراجة النارية كما خطط
تمامًا.. مرت عشرون دقيقة تقريبًا وتوقف عامل التوصيل أمام أحد
المباني.. فترجّل يحيى من سيارة الأجرة بعد أن حاسبها بسرعة
وبدون اهتمام.. وتحرك يحيى ليقف أمام المبنى الذي دلف بداخله
ولكم كانت صدمته كبيرة عندما تطلع إلى ذلك المبنى.. واقفًا فاغر
الفم مصدومًا مشدوهاً.. وعقله يكاد يجن.. أيعقل هذا.. أيعقل..
دقت ضربات قلبه كالطبول وهو يشعر بالغباء الشديد.. هل يعقل
أن يكون بمثل هذا الغباء.. أراد مغالبة ظنونه وقطع الشك باليقين..
فهو على بُعد خطوات من الحقيقة الكاملة أو هكذا كان يظن.. دلف
إلى داخل المبنى وهو يكاد يجن.. إنه هو.. انه نفس المبنى بنفس
سلامه.. صعد يحيى عدة طوابق وبالطابق الثالث وجد عامل
التوصيل ينظر له وهو عائد ويقوم بعد النقود بيده فنظر له نظرة
عابرة ثم تركه وهبط.. صعد يحيى الطابق ووجد أمامه شقتين واحدة
على اليمين وواحدة على اليسار بابها مفتوح قليلًا.. هنا شعر يحيى
بالصدمة الشديدة تجتاحه.. فهو لم يكن يتوقع هذا أبدًا.. فظر إلى
باب الشقة اليمنى فوجده هو بالضبط.. نفس الشقة التي كان يجتمع
بها البهادرا مع رجاله وخدعه سامي وجعله يذهب إليها..

أمام شقة البهادرا كان باب الشقة المقابلة لها مفتوحاً قليلاً.. هنا اندفعت الدماء إلى رأس يحيى وتحرك بسرعة جهة باب الشقة الأيسر وفتحه ليجد أمامه مشهداً لم يتصور بأن يراه أبداً.. سامي فكري يقف أمام مكتب حاسوب ومعه شخصان يأكلان من قطع البيتزا بنهم شديد.. وعندما شاهد سامي يحيى أمامه ابتسم وهو يمزغ طعامه.. «أهلاً يا يحيى.. اتأخرت ليه.. أنا مستنيك من بدري يا راجل..»..



تصدمه سيارة بجانبه.. الأمين متولي يصرخ عليه.. الشحاذون
يركضون وراءه.. يقود سيارة مايكرو باص والركاب يصفقون وراءه..
يقف دامعاً أمام باب منى الشيمي وهي تبكي وتصرخ على ابنتها من
داخل الغرفة.. اللص يرفع عليه سكينه بداخل المترو.. الفتاة الروسية
تخنقه بسلك البيانو بينما يشاهد ياسين تخرق قدمه معول الصعيدي..
الصعيدي ينظر له من زجاج السيارة وهو يضحك والدماء تسيل
من وفمه والمعول قاب إنشين من رأسه.. جميعها لمحات طغت على
ذاكرته.. اختلطت بشكل سريع للغاية ومرت أمام عينيه وهو ينظر
إلى سامي فكري أمامه وهو يبتسم ويأكل بنهم وبلامبالاة حينما رآه..
كل تلك المشاعر المتضاربة ما بين الفرح لإيجاده سامي والدهشة
من رد فعله والغضب مما فعله معه دارت بعقله.. لم يستطع إلا أن
يفجرها بوابل من الصريخ واللكمات على وجه سامي الذي سقط
على الأرض سريعاً بعد أن لكمه يحيى لكمتين متتابعتين.. الرجلان
اللذان مع سامي أمسكا يحيى بقوة ليمنعاه من الفتك بسامي ولكن
هيهات أن يتركه فقام على الفور بدفع أحدهما بقوة وأخذ يدفع
الآخر الذي تشبث بذراعه كالعصفور الصغير عدة مرات حتى
ألقاه على الحائط.. وقف سامي ليتحدث معه فركله يحيى بمعدته

فأمسك سامي معدته متألمًا وسقط على الأرض والرجلان أمسكا بيحيى وهما يحاولان تقييده ولكنها لم يستطيعا أن يمنعا من إيصال بعض اللكمات الطائشة إليهم.. سامي ما زال ساقطًا على الأرض أمامه وهو ينظر إلى يحيى الذي يندفع بين الرجلين كالثور الهائج.. فتنهد وأخذ يمسح الدماء من فوق فمه ثم تحرك جهة يحيى بسرعة شديدة ووضع إبهامه خلف رقبة يحيى وضغط بقوة وهنا شعر يحيى بشعور غريب للغاية.. لم يستطع أن يتحكم بجسده إطلاقًا وانهار ساقطًا أرضًا.. نظر له سامي وهو ساقط على الأرض.. «ماتقلقش.. أنا ما عملتلكش حاجة.. كل الموضوع اني ضغطت على نقطة أعصاب عندك علشان تهدا شوية».. يحيى غاضبًا.. «إنت عملت إيه.. عملت فيا إيه».. تحرك سامي جهته ووضع إصبعه على جهة أخرى من رقبته وضغط عليها وهنا شعر يحيى بالدماء تركض بعروقه وتصل إلى أطرافه وبدأ يشعر بجسده من جديد.. أخذ يحيى يتحرك ببطء فصرخ على سامي غاضبًا.. «إنت عملت في جسمي إيه..؟»

«ماتقلقش.. ماتقلقش.. استخدمت نقطة ضعف في جسمك ورجعتها تاني.. ماتزعلش مني بس كان لازم أعمل كده علشان تهدا ونعرف نتكلم مع بعض بعقلانية».. وقف يحيى بصعوبة وهو ما زال غاضبًا.. «كلام إيه.. هو لسه فيه ما بينا كلام».. سامي مبتسمًا.. «طبعًا.. أو مال إيه.. ده هيبقى في ما بينا كلام وكلام وكلام.. أنا قولتلك نفذ مهمتك الأخيرة وتمسكني وساعتها هجاوبك على أي سؤال.. وانت نجحت في مهمتك على أكمل وجه.. بصراحة ما كنتش متوقع إنك هتوصلني عن طريق البيتزا اللي كلمتك عليها قبل كده.. أحييك على ذكائك وخطتك دي.. بس كان فيها مشكلة بسيطة.. لأنني

أنا بجيب من مطعم غير الي كنت فيه.. وانت كنت هتفضل تدور وتدور وممكن تياس وماتكملش وده هيضيع مننا وقت كبير.. فقلت أساعدك تجيلنا هنا أسرع شوية».. يحيى مستغرباً.. «تساعدني؟!»

سامي ساخرًا.. «طبعًا ساعدتك.. او مال انت فاكر إن فجأة صدفة كده وانت بتجيب بيتزا أقوم أنا طالب صدفة بردو في نفس الوقت البيتزا الياباني الي انت بتدور عليها».. صمت يحيى وهو يشعر بأنه بالفعل أمر غريب أن يحدث كل ذلك مصادفة».. سأله يحيى بفضول.. «خلاص مدام لسه بنلعب لعبتك يبقى أنا نفذت المطلوب مني كله وجه الوقت الي تفهمني كل حاجة».. أخذ يشير سامي إلى الرجلين بجواره.. «خلاص يا جماعة شوفوا شغلكم».. فتوجه الاثنان أمام حاسوبين بشاشات كبيرة بها صورة صغيرة لأنحاء كثيرة من مصر يتابعان ما يدور بها باهتمام.. وأخذ يتابعهما يحيى باهتمام شديد فقاطعه صوت سامي وهو يحدثه.. «عايز تعرف إيه يا صديقي».. يحيى بضيق: «كل حاجة.. عايز أعرف كل حاجة».. انتم مين.. وليه اخترتوني.. والمهمات الي كنت بعملها دي كانت ليه وعلشان إيه.. وليه كنتم عايزين تقتلونني في جراح المستشفى وليه دلوقتي غيرت رأيك وعايز تجاوب على أسئلتني.. بدماعي مليون سؤال كلهم عايزين إجابة».. تنهد سامي وجلس على منضدة يضع عليها الحاسب خلفه.. «الح.. هقولك على كل حاجة.. بس الأول اقعد علشان الموضوع هيطول شوية».. وأشار إلى مقعد بجواره أمام المكتب.. نظر له يحيى بضيق».. لا.. أنا كده مستريح».. سحبه سامي من يده وأجلسه على المقعد بسرعة.. «يا جدع بقولك اقعد ماتبقاش دماغك ناشفة».. جلس يحيى على المقعد بضيق

وأخذ يستمع إلى سامي الذي داعب يديه وأخذ يتحدث إليه..
«بس ياسيدي.. قبل كل حاجة أنا إسمي سامي فكري زي ما انت
عارف.. وانا أبقي رئيس منظمة اسمها السامريون الجدد.. تسمع
عن السامريين؟»..

«أيوه.. مش دول نوع من انواع إيهود في عداوة مع باقي اليهود.»
سامي مبتسمًا.. «بالظبط.. لكن دول مش احنا.. السامريون الجدد
ماهمش توجه عقائدي.. الكل مرحب بيه بينا.. السامريون الجدد
دول نسبة لقصة السامري الصالح.. ودي قصة مشهورة بتحكي
باختصار عن واحد يهودي كان مسافر وطلعوا عليه ناس في صحراء
سرقوه ومر عليه اتنين منهم رجال دين يهود مرموقين ومحدث فيهم
ساعده ولكن بعدهم مر عليه راجل سامري ومعروف إن السامريين
بيكرهوا إيهود والعكس صحيح.. لكن على الرغم من العداوة دي
وإن المصاب في الصحراء عدوه إلا إن السامري ده خده وعالجه ورعاه
ونزله في فندق وقال لصاحب الفندق أي مصاريف هيحتاجها اكتبها
عليا.. وبكده ساعد عدوه اليهودي الي اليهود نفسهم مارضيوش
يساعده.. هو ده شعار السامريين الجدد.. نساعد أي شخص
يحتاج للمساعدة حتى لو كان عدونا.. علشان كده السامريين الجدد
منتشرين في العالم كله وفيها ناس من كل الملل والأديان والأجناس
المختلفة.. الي بيجمعنا فكر مش عقيدة.. والفكرة دايمًا أقوى من
أي عقيدة».. أخذ يستمع إليه يحيى بتركيز بينما استمر سامي بمتابعة
سرده له «أنا عايزك تاخذ بالك من حاجة مهمة.. إوعى تفكر إن
احنا بنشتغل في الخفاء أو إن الحكومات والدول ماتعرفش بوجودنا

على العكس تمامًا.. معظم المنظمات على مرأى ومسمع من العالم كله.. التنوريين والماسونيين والجهاجم والعظام والياكوزا والمافيا وغيرهم وغيرهم.. مفيش أي دولة أو حكومة في العالم تقدر تمنعهم.. لأن الحكومات والعالم مكون من بشر والبشر يختلف تفكيرهم دوليًا ولكن بتجمع مصالحهم عالميًا.. علشان كده هتظل المنظمات دي دائمًا وأبدًا موجودة.. كل المنظمات بتجمعها مصالح مشتركة وتوازن قوى مفيش منظمة تقدر تسطو على أهداف وموارد منظمة أخرى.. إلا منظمة واحدة بس.. «الوايت هاند».. هي الوحيدة اللي محدش قدر يوقفها لأنها بتعتمد على أذكى عقول في العالم ويديرها دايمًا شخص عبقري يسمى بالبهادرا.. منظمة الوايت هاند كانت قايمة على فعل الخير ومساعدة الناس وتأهيلهم لانتظار.. «اليوسي هموشيع» أو المسيح المخلص اللي هيخلص العالم من كل شروره وكأي جماعة شايفة نفسها هي الصبح والباقي غلط وهي الحق والباقي الشر والباطل اتقلبت أفعال الوايت هاند إلى كل شيء قامت ضده ومن هنا جه وقت السامريين الجدد للتدخل لوقف أفعال الوايت هاند.. مش هخبي عليك قعدنا ندمر في بعض 7 سنين.. كل منظمة بترمي بكل اللي بتملكه من موارد وعقول والمنظمة اللي بتمتلك عقول أذكى هي اللي هتتصر في الآخر.. لحد ما جت مهمة الوايت هاند الأخيرة في مصر وظهور الإتش ون اللي هتغير مجري اللعبة للنهاية.. وتقدر تسيطر الوايت هاند بيها على العالم».. أثار حديث سامي فضول يحيى.. «إتش ون.. إيه الإتش ون ده؟».. سامي مبتسمًا.. «هنوصلها.. بس في الأول لازم تعرف أهداف الوايت هاند في مصر إيه.. لأن الموضوع ده متصل بيك انت».. هنا ابتلع يحيى

ريقه بقلقٍ.. فتابع سامي حديثه.. «الوايت هاند لديها اهتمام كبير جدًا في مصر وبصراحة مش الوايت هاند بس.. كل منظمات العالم لديها اهتمام بمصر لأنها أكبر دولة في المنطقة من حيث السكان وتمركزها السياسي والديموغرافي وموقعها الاستراتيجي الهام.. ولكن على عكس كل المنظمات اللي بتدخل بطرق غير مباشرة.. الوايت هاند دخلت بقوة وثقل كامل.. الوايت هاند عندها موارد وإمكانيات في كل أنحاء العالم ومنها شركات دوائية ضخمة زي شركة سماركو».. هنا شعر يحيى بالغضب الشديد عندما سمع اسم سماركو من سامي الذي تابع حديثه إليه وهو يتسم.. «طبعًا دي الشركة اللي سرقت منك براءة اختراع عقار التريفون بتاعك.. ده يدل على مدى قذارة الشركات دي واللي كلها بتعمل تحت منظمة الوايت هاند.. طبعًا علشان حجم الأدوية اللي بتنتجها فهي محتاجة سوق ضخم تبع فيه منتجاتها ولكن ما اكتفوش بمصر كسوق بس ولكنهم رغبوا إنهم يستخدموا سكانها كحقل تجارب لأدويتهم وعقارتهم.. اتفقوا مع بعض النواب وأعضاء في الحكومة المصرية إنهم يمرروا عدة قوانين تساعد في مقابل رشاوي مالية ضخمة.. وأهم تلك القوانين.. قانون بيتيح إجراء التجارب السريرية على المرضى المصريين في المستشفيات الحكومية وقوانين تانية تتيح تجارة الأعضاء بطرق وهمية مثل إنهم يستأصلوا أعضاء المرضى اللي حياتهم ميؤس منها أو ضحايا الطرق والكوارث بدل ما يتم علاجهم ه يتم استئصال أعضائهم على طول.. مستغلين أن مصر بقت أكبر دولة على مستوى تجارة الأعضاء في العالم فكانوا عايزين يستغلوا الأمر ده ويقننوه.. ولكن تأتي الرياح بما لا تشتهي السفن.. ناس كثير من الحكومة وأعضاء النواب

رفضت تمرر القوانين دي فقامت الوايت هاند بعدم تقبل الأمر ده وهنا البهادرا بنفسه رفض أن يمر الأمر كده وقرر إنه يغير شكل مصر كلها خلال ثلاثة أيام.. لأن الوضع السياسي والاقتصادي في مصر متشابك.. 80% من الاقتصاد المصري في إيدين رجال أعمال من 20 أسرة.. ومعظم رجال السياسة والقانون متزوجين من العائلات دي.. فالوضع سهل جداً للوايت هاند.. تقوم باغتيال كبار رؤوس العائلات دي فينشرب صراع كبير ما بين أفراد العائلة على الورث وتتفكك الشبكة الاقتصادية الضخمة دي بسرعة كبيرة جداً وتنخفض أسهمهم بالبورصة.. وهنا تسيطر الوايت هاند على الأسهم دي.. الشق الثاني السياسي.. عمليات اغتيال سريعة ومتلاحقة لبعض أعضاء الحكومة والمرشحين لخلافتهم ولعدد كبير في نفس الوقت يظهر أن في تعمد واضح للاغتيالات دي مما ينتج عنه تقدم عدد كبير من أعضاء الحكومة باستقالتهم علشان يبعدوا عن مصدر الخطر وفي نفس الوقت هيتقدم اذرع الوايت هاند من الحكومة ساعتها والحكومة هتشكرهم كمان علشان تضحياتهم الخطيرة دي وفي خلال 3 أيام بالظبط هيكون كل شيء انتهى والحكومة والاقتصاد بقم تحت رحمة الوايت هاند وده اللي حصل بالظبط لولا تدخلنا ومنعنا تنفيذ مخطط الوايت هاند بنفسنا».. يحيى متسائلاً.. «مادام أهدافكم نبيلة كده زي ما بتدعي ليه ما ببلغتوش معلوماتكم للشرطة علشان تقدر تكشف المخطط ده وتعطله..»

سامي مبتسماً.. «الموضوع مش سهل زي ما انت فاكر كده يا يحيى.. الشرطة عندكم وفي البلاد العربية كلها متعودة دايمًا على رد الفعل. كشف الغموض عن الحدث ولكن بعد حدوثه.. ما عندهم مش

قدرات تحليلية استباقية تمنع حدوث الموضوع ده.. وماتنشاش قدرة الوايت هاند ومواردهم الجبارة.. وكم ان خطتهم دي مش معموله في يوم ولا اتنين دي خطة ناتجة عن دراسة سنوات طويلة للأوضاع في مصر وكم اننا علشان أقدر أمنع تنفيذ مخطط الوايت هاند في مصر كنت بجهز بقالي 8 شهور للخطة دي.. حتى لو كانت الحكومة المصرية تعرف وعندها كل الإمكانيات مكانوش هيقدروا يوقفوا أبداً الإتش ون.. لأن ما فيش حد في الدنيا يقدر يوقف خطتهم بالإتش ون غيري أنا بس.. وبمساعداك طبعاً..».. يحيى متمعناً في حديثه للحظات سأله بفضول شديد.. «إيه بقى الإتش ون ده اللي عمال تكلم عليه من بدري؟»

وقف سامي وتنهد بقوة.. «الإتش ون.. الإتش ون ده.. شيء خطير جداً.. يمكن أخطر شيء تم اكتشافه حتى الآن.. أخطر من أي سلاح سيتم استخدامه لأنه هو نفسه سلاح خطير.. وعلشان تفهم الإتش ون لازم تركز جداً في كل كلمة أنا بقولها لك دلوقتي.. لأن مفيش وقت نقعد نعيد كلامنا ده تاني..».. ابتلع يحيى ريقه بقلق ثم اعتدل بجلسته وأخذ يصغي لسامي بحماسة..

«بُص الإتش ون ده عبارة عن عقار زي التريفون اللي انت صنعته ولكن مع الفرق الكبير جداً لسبب إنتاج كل عقار منهم.. انت صنعت التريفون لعلاج الناس.. أما الإتش ون تم صنعه لقتلهم..».. يحيى بفضول شديد.. «قتلهم.. إزاي فهمني؟»

«بص ياسيدي.. الإتش ون ده مادة مركبة تم استخراجها من نبات اسمه العلمي السنفلين ومشهور وسط العالم السفلي باسم سم

الشیطان.. النبتة دي اللي بیستهلكها بیحصله حاجة غریبة جداً.. بیبقى مطیع جداً لدرجة فقهه القدرة على نفسه وتنفيذ أي أمر یوجه له وما یقدرش یخالفك فی أي أمر تطلبه منه والأسوأ من كده إن مع استهلاك نسبة معينة منه یحصل خلل كبير فی أداء الناقل العصبی مما یسبب بدوره خلل فی أداء وظائف المخ وبشكل محدد وظیفة تخزين الأحداث فی الذاكرة بنوعیها سواء قصيرة الأمد أو طويلة الأمد.. أي إن الإنسان أثناء تناوله لنبات سم الشیطان ده ینفذ أي أمر تطلبه منه وکمان ما یفتكرش اللي عمله أبداً ولا كأنه عمله من الأساس..».. یحیی مندهشاً.. «یا نهار أبيض.. ده مصیبة سودة، النبات ده لو انتشر بین الناس».. قاطعه سامی سریعاً.. «ماهو ما انتشرش بین الناس لعدة أسباب أولها أن مخبرات عدة دول بقت تستخدمه وتحصل علیه بكمیات كبيرة والمافیا وبعض المنظمات الدینیة علشان تسيطر على إنتاجه ولكن حدث أعراض جانبیة كثیر للنبات ده أهمها إن الإنسان اللي یتناوله بعد مرور وقت قصیر یتحول لشخص عدواني جداً وما یفرقش ما بین العدو أو الحیب ساعتها..»

یحیی ملاحظاً.. «یتحول لشخص عدواني ومالوش إرادة.. یعنی بمعنی أصح یتحول لزومبی»

سامی مبتسماً.. «علیک نور.. یتحول لزومبی.. هو ده التشبیه الصح.. إیه فایدة إنی بتحكم فی واحد ولكن بعد فترة قصيرة ما بقدرش أسيطر علیه.. یعنی أمتلك سلاح قوي جداً ولكنه قابل ینفجر فی وشي بأي لحظة علشان كده ولحسن الحظ ما بقاش یستخدم على نطاق واسع.. لكن الوایت هاند هنا جت قلبت الطاولة وقوانین

اللعب كلها بمواردها الجبارة ومساعدة شركات أدوية بتاعتها صنعت عقار الإيتش ون المستخلص من نابتة سم الشيطان وجعلته مادة ماهاش ولا طعم ولا لون ولا ريحة وسهل دمجها مع أي حاجة تانية والناس ماتلا حظش مع بقاء نفس القدرات الثانية للعقار ولكن البهادرا عمل فكرة عبقرية وبنفس الوقت شريرة جداً..»

يحيى متأثراً: «عمل إيه البهادرا..»

سامي بضيق: «البهادرا قرر يستخدم الإيتش ون كسلاحه الأقوى والأسمى وسيطريه على العالم.. وقام بتنفيذ الأمر ده على مرحلتين الأولى إنه استخدم نسبة 18 ٪ من عقار الإيتش ون مع مشروب طاقة تاني اسمه باور فانك ودمجهم مع بعض.. مشروب الطاقة بمكوناته الطبيعية جداً بيديك نفس مفعول مشروب الطاقة ومختلط معاه نسبة من عقار الإيتش ون غير ملحوظة ولكنها بتجعل متعاطي الباور فانك تحت تأثير الإيتش ون لمدة 24 ساعة كاملة ينفذ فيها أي أمر يصدره البهادرا والوايت هاند ليه».. أمسك يحيى برأسه غير مُصدّق.. «يانهار اسود.. الباور فانك اللي إعلاناته مالية التلفزيون ليل ونهار. ده مصر كلها بتشربه..»

سامي ملاحقاً.. «ماهي دي الكارثة يا يحيى.. تخيل جيش تحت أمرك من الناس العادية جداً بينفذوا أي حاجة بتقولها ممكن بأمر منك تعمل مذبحه كاملة يموت فيها ملايين البشر ويدمر بلاد كاملة».. هنا أخذ يداعب يحيى ذقنه.. «علشان كده لما أول مرة قابلتك والبنت البياعة عرضت عليا الباور فانك المجاني إنت خدته مني..».. ضحك يحيى.. «ماكنتش أقدر أخليك تضيع من أيدي يا

بطل».. نظر له بضيق.. «وانا الي كنت بقول عليك طفس وعايزها لنفسك».. تابع سامي حديثه.. «المشكلة يا يحيى إن الباور فانك بقى رقم 3 في المشروبات الطاقة العالمية تخيل تغلغل في الأسواق بسرعة رهيبة إزاي.. معظم دول العالم بقت تحت رحمة الوايت هاند دلوقتي وهايحي الوقت الي يستخدموا فيه الكارت ده لو ماوقفنهمش».. أخذ يفكر بتعمق.. «لكن أنا مش فاهم بردو.. إزاي الوايت هاند هتدي أمر لكل الناس دي في وقت واحد.. دي حاجة شبه مستحيلة..»

فرقع سامي بأصابعه بالهواء.. «بينجو.. هو ده السؤال الصح.. إزاي البهادرا هيتحكم في الناس الكثير دي في وقت واحد.. وده الي هو بينفذه ويبجربه في مصر دلوقتي ومع نجاح تجربته هيتم تعميمها في العالم كله.. وهنا نوصل للشق الثاني من سلاح الإتش ون.. إزاي بيستخدم الإتش ون في عمليات اغتياله سواء كانت محددة أو شاملة.. وهنا هيظهر قدامنا مفهوم الرسائل الضمنية.. ياترى سمعت عنها؟»
يحيى بحيرة: «لا.. ماسمعتش عنها..»

«طيب اسمع كويس جداً إزاي بيتم التحكم في العالم.. Subliminal Messages أو الرسائل الضمنية دي بتبقى رسائل مخصصة للوصول للعقل اللاواعي بدون مايشعر العقل الواعي بيها.. وعلشان تفهم أهمية الرسائل دي هشرحلك حاجة.. عقل البشر كلهم بيتقسم لجزئين عقل واعي وعقل لاواعي.. عقلك الواعي ده بيستقبل من 2 إلى 9 معلومة في الثانية أما العقل اللاواعي يقدر يستقبل 2 مليون معلومة في الثانية.. شايف الفرق مهول إزاي..».. أو ما يحيى له برأسه مصدقاً على حديثه.. «تمام.. تمام..»

تابع سامي حديثه.. «يعني عقلك الواعي دلوقتي مركز معايا ومع كلامي حرف حرف صح..»

يحيى سريعاً.. «صح».. سامي ملاحظاً.. «أوما مال مين اللي بيتحكم بقى وانت بتكلمني كده في نفسك..».. نظر له يحيى مندهشاً بينما تابع سامي حديثه.. «مين اللي بيتحكم في ضربات قلبك.. مين اللي بيعمل كل حاجة أثناء انت مش مركز أو سرحان.. هو عقلك اللاواعي.. قدرات أكبر بكثير من العقل الواعي وكمان هو اللي بيكوّن شخصيتك وقراراتك الداخلية.. إيه بقى اللي بيشكل عند البشر مفهوم الصواب والخطأ.. إيه اللي يخلي البشر لما يشوف حد يسرق يقول عليه ده غلط.. لما حد بيدي لحد محتاج ساعتها يقول صح.. عقلك الواعي.. هو الحارس اللي يفلتر ويصفي المعلومات اللي داخلة لعقلك اللاواعي ويقولها ده قرار صح أو قرار غلط.. تخيل بقى لو أنا بعت لعقلك اللاواعي معلومات أنا اللي مشكلها من غير ماتر على عقلك الواعي ويقولها ده صح وده غلط.. عقلك اللاواعي هينفذها على طول.. هي دي الرسائل الضمنية.. يحاول من خلالها إرسال رسائل لعقلك من غير ماتر على عقلك الواعي بحيث تأثر فيك بعد كده طول حياتك.. الموضوع ده كان شاغل ناس كتير لفترة ولكنه ابتدا يظهر على السطح بسبب شخص اسمه جيمس فيكري James Vicary وخطرت في بال الراجل ده فكرة جهنمية عملت ضجة كبيرة جداً بعدين وكانت ولا زالت أكثر القضايا المثيرة للجدل!.

«فيكري» سنة 1957 عمل تجربة في إحدى دور السينما في

نيويورك، واستخدم جهاز «تاتشيسيتوسكوب» في عرض عبارات تظهر كل خمس ثوانٍ بشكل خاطف على الشاشة أثناء عرض الفيلم، يعني المشاهدين مش هيلاحظوا ظهور العبارات الخاطفة خلال مشاهدة الفيلم، والعبارات دي كانت إيه بقى.. إذا كنت جعان كل فشار واشرب كولا.. بعد ستة أسابيع وحضور 45000 مشاهد، أثناء عرض العبارات الخاطفة دي على الشاشة باستمرار، اكتشف «فيكري» خلال مراقبته لعملية البيع في الاستراحة الخاصة لدار العرض أن نسبة مبيعات الفشار ومشروبات الكوكاكولا قد ارتفع بشكل كبير! ارتفعت مبيعات الفشار بنسبة 57% وارتفعت مبيعات كوكاكولا بنسبة 18%.. تخيل نسبة مبيعات أدّ إيه بمجرد جملتين بيظهرو في أقل من الثانية علشان دخلوا لعلقك اللاواعي بدون أي ممانعة.. بعد ما نشر جيمس تجربته، الدنيا اتقلبت وظهرت مصطلحات الرسائل الضمنية لأول مرة.. هو صحيح طلع جيمس بعد كده وقال إن الموضوع ده مفبرك ومش حقيقي ولكنه حتى لو مفبرك مع إن كل الدلائل بتقول عكس كده لكن الرسائل الضمنية بقت حاجة طبيعية دلوقتي بتستخدم في الأفلام والإعلانات وكل شيء حوالينا تقريباً.. وأقرب مثال على ده في الأفلام الأمريكية.. لو تابعت الأفلام الأمريكية من 100 سنة هتلاقي إن القصة بتدور عن بطل وبطلة ما بينهم قصة حب طبيعية تنتهي بالجواز أو ما خلافه ولكن آخر عشر سنين توجه السينما كلها والألعاب والموسيقى إن البطل شاذ وغير طبيعي وفي علاقة غير طبيعية ويظهر للمتلقين بسهولة إن الموضوع ده مقحم بالقوة لتقديم رسائل معينة ويطلع الأطفال شايفين أن اللي بيحصل ده طبيعي ويتعودوا الكبار

إن الموضوع ده من الحريات مع إن تناول المخدرات وتجارها يعتبر
بردو من الحريات ومش بعيد نشوفهم قريب بيتباعوا ويستخدموا
بطريقة قانونية علشان اللي متحكم في الإعلام عايز يظهر كده.. أنا
بحكيك الحكاية الكبيرة دي ليه؟ علشان أقولك إن ده مثال واحد
من الأمثلة اللي بتحصل.. الرسائل الضمنية دي أشكها كثير جداً
ومنها اللي هوريهولك ده».. وهنا اعتدل سامي بجلسته وقام بتشغيل
مجموعة فيديوهات لإعلانات الباور فانك.. وأخذ يتابعها يحيى
باهتمام شديد.. مرت عشرة دقائق كان شاهد يحيى خلالها أكثر من
7 إعلانات لمشروب الباور فانك.. هنا أوقف سامي الفيديوهات
وتحدّث إلى يحيى.. «ها.. خدت بالك من حاجة».. يحيى أخذ يداعب
ذقنه بتركيز.. «آه.. كل الإعلانات تقريباً لحن أغنيتهم واحدة.. ولحن
ده لأغنية قديمة ومشهوره جداً وهما عاملين ليها إعادة توزيع من
جديد».. صفق له سامي بحماسة.. «برافو يا يحيى.. برافو.. بس
ماخدتش بالك من حاجة تانية بتكرر في الإعلان.. كلمات معينة
مثلاً».. أخذ يتذكر قليلاً.. «آه.. خدت بالي إن في كلمات بتكرر كثير
في الإعلان زي.. إمم.. اسحق.. ودمر.. وحطم.. واهزم.. حاجات
زي كده.. واه.. كلمة 12 هدف بمشروب واحد».. صفق له سامي
مرة أخرى.. «الله ينور عليك.. الله ينور عليك».. ده اللي بيحصل..
بيكرر جمل معينة في كل مرة في الإعلان بحيث تدخل عقل المشاهد
اللاواعي من غير ما يشعر نهائياً.. كسر.. حطم.. دمر.. دي بقت في
عقله من غير ما يشعر.. ده أمر البهادر ليه.. لكن لسه الموضوع
ماكملش.. لازم البهادر يدي للمشاهد هدف الاغتيال اللي هو
عايزه.. وهنا يحيى جزء مهم جداً.. الدعايا الممولة.. لو تلاحظ

في العشرة أيام السابقة كان معظم القنوات الفضائية بتظهر صور رجال أعمال ووزرا بعينهم وتجب عنهم أخبار وحوارات وفضائح أي حاجة وخلاص المهم صورهم وأسمائهم تبقى موجوده على كل القنوات.. علشان تنطبع صورتهم في عقل الناس العادية اللي في دماغهم رسائل الاغتيال غير مفعلة لسه.. طبعًا الإعلاميين اللي كانوا بيعملوا كده ماكانوش يعرفوا إنهم بينفذوا أجنده الوايت هاند.. هما كانوا يشوفوا شغلهم وبينفذوا اللي اتعودوا عليه من اللي بيقبضهم أكثر وده حال كل رجال الإعلام في العالم مش في مصر بس.. وكده تكون تمت المرحلة الثانية من مخطط الاغتيال.. وهنا نخش للمرحلة الثالثة.. الموسيقى المصاحبة للإعلان باور فانك.. إשמعنى تم اختيار أغنية قديمة وفي نفس الوقت مشهورة.. علشان يكون ترددتها على الأذن سهل ومحجب ونستعيد مشاعر النوستالجيا بسهولة وتكون مقاومة العقل للرسائل الموجودة في الأغنية دي أقل..» هنا اندهش يحيى بشدة.. «رسائل.. رسائل إيه.. هو في رسائل في الموسيقى».. ضحك سامي سريعًا.. «طبعًا في رسائل.. في معظم الأغاني والموسيقى في رسائل.. استنى هوريك».. وهنا قام سامي بسحب سماعات أذن من جوار الحاسب ووضعها طرفها بمدخل الحاسب ثم وضعها على أذن يحيى.. ومن ثم قام بتشغيل الإعلانات وهو يتحدث إليه.. «أنا عايزك تركز كويس قوي دلوقتي.. أنا هالغي كل الأصوات بتاعة الإعلان ما عادا الأصوات اللي ترددها منخفض واسمع بيتقال إيه..». وقام بتشغيل الإعلانات وهنا أخذ يستمع يحيى مندهشًا وجحظت عيناه غير مصدق.. نظر إلى شاشة الحاسب أمامه ليتأكد من أن مصدر الصوت هو نفسه من الإعلانات وظل

يستمع حتى انتهى الإعلان ثم خلع السماعات من فوق أذنه ويحدثه غير مصدق.. «يا نهار اسود.. كل الكلام ده كان بيشتغل في موسيقى الإعلان من غير مناخذ بالناس.. ده ذاكر أسماء ناس بعينها ويكرر أوامر اقتل ودمر وحطم.. يا خبر أبيض.. إزاي محدش خد باله من الكلام ده..»

ابتسم سامي له.. «يووووه يا يحيى.. خد من ده كثير.. الأغاني والموسيقى أسهل في الرسائل الضمنية من الصور كمان بالذات لما تبقى الرسائل محطوبة في اغاني مشهورة وبنسمعها على طول بيتقبلها العقل في ثواني.. وزى ما انت شفت دلوقتي البهادرا دمج أكثر من طريقة للرسائل الضمنية للمشاهدين العادين علشان يغتالوا أهدافهم اللي هو حددهم بالصوت والصورة.. ولكن في حاجة وحيدة بس ناقصة.. لازم يبقى فيه أمر أو زناد.. لما منظمة الوايت هاند تطلق على أي حد تحت تأثير الإتش ون ويكون خضع للرسائل الضمنية يتم إلغاء عقله الواعي ساعتها وبتبدي ينفذ أمر الاغتيال المخزن بعقله.. زي التنويم المغناطيسي بالظبط مع إن الفرق هنا إنك ما بتعرفش إنك خاضع أصلاً للتنويم المغناطيسي.. والزناد اللي عاميلن الوايت هاند لتنفيذ الاغتيالات هو رقم 12.. أي عضو من منظمة الوايت هاند يتأكد إن الهدف اللي مراد اغتياله في نطاقه المحدد.. ويتجه لأقرب شخص عادي يكون متأكدين إنه هو تحت تأثير الإتش ون أو يكون شرب الباور فانك وهنا يقرب منه وهو ماشي عادي خالص ويقول رقم 12 وفي اللحظة دي بيتلغي العقل الواعي الضحية وبتبدي تظهر الرسائل الضمنية المخزنة بعقله اللاواعي.. اقتل ودمر وكسر.. وأول لما يشوف الهدف اللي هيغتاله هتظهر على طول صورته اللي شافها على الإعلام واسمه اللي اتكرر في موسيقى الإعلانات وبتبدي يتحرك

وينفذ الأمر بطريقة عادية هدفها كله القتل والتدمير والتكسير.. ولما يعود لرشده آخر 24 ساعة حصلت من بعد تشغيل الزناد وسماعه لرقم 12 يختفي كل شيء من ذاكرته ولا كأنه عملها نهائي.. وبكده تفضل الشرطة تدور على مبرر أو سبب أو دافع لجرائم القتل دي وماتلاقيش.. وكمان مايقدروش يمنعوا حدوث الجرائم دي لأن في وزيرين اتقتلوا على رغم الحراسة الشديدة اللي حوالهم واحد مات من الحارس اللي بيحميه والثاني مات على إيد بنته.. شفت الإتش ون ممكن يعمل إيه يا يحيى.. وقف يحيى مذهولاً مما سمعه وشاهده منذ قليل وسأل سامي بفضول.. «طيب وانا علاقتي إيه بده كله.. وكل اللي انت عملته معايا والتعذيب اللي انت عذبتھولي ده ليه..»

اقترب سامي من يحيى ثم دفعه بقبضة يده بمزاح.. «أنا هقولك ليه يا بطل.. كل اللي أنا عملته معاك ده والمهمات اللي كنت بتنفذھا.. كانت كلها اختبارات ليك يا يحيى..»

يحيى مندهشاً.. «نعم.. اختبارات.. اختبارات إيه وعلشان إيه.. لما أروح أسوق ميكروباص بناس وأوصلهم لبيوتهم ده كان اختبار إيه لا مؤاخذه وليه.. مفيش أي حاجة من اللي انت عملتها معايا دي تنفع تتحط تحت مسمى اختبار أبداً..»

ابتسم سامي واستند على المكتب خلفه مرة أخرى.. «بص يا يحيى.. مفيش حاجة أنا عملتها معاك كانت اعتباطي.. كل أمر أنا طلبته منك وكل رد فعل انت عملته كان محسوب ومدروس كويس جداً جداً.. حتى وقفك وكلامك معايا دلوقتي حالاً.. أنا مرتبها من 8 شهور فاتوا..»

يحيى غضبًا: «لا.. انت شكلك بتخرف بأي كلام.. عايز تقنعني
إنك عارف إني هقف معاك وأسألك السؤال ده دلوقتي من 8
شهور..»

سامي مبتسمًا: «أيوه..»

يحي بضيقٍ: «ليه.. بتشوف الغيب حضرتك..»

«لا.. مابشوفش الغيب، ولكن بعرف أقرأ اللي قدامي كويس
بنسبة 90%.. يمكن اللي قولتهولك ده ماتصدقوش دلوقتي يا يحيى..
ولكن أنا مش عارف أقول إيه.. مريض.. ولا موهوب.. ولكن أنا
بشوف البشر قدامي على هيئة قطع بازل.. كل شخص قدامي ليه
مكان مخصوص خطتي.. ليه وقت معين يتلعب بيه..»
بضيقٍ شديدٍ.. «يعني أنا بالنسبة لك مجرد قطعة بازل بتلعب
بيها..»

سامي مبتسمًا.. «إنت بالنسبة لي أهم قطعة استخدمتها في خطتي
بحياتي كلها.. إنت ماتعرفش انت عملت إيه للعالم بالمهات اللي
انت نفذتها..» أخذ يضحك يحيى ساخرًا.. «إنت شكلك فعلاً
بتخرف.. عايز تقنعني إن أنا أنقذت العالم لما رحت اصطدت فيران
من الزبالة..»

سامي بثقة.. «طبعًا.. ده حصل فعلاً..» يحيى بضيقٍ شديدٍ..
«بقولك إيه.. أنا تعبان ومتدمر نفسيًا.. أنا مش قادر فعليًا أبص
في وشك.. لو في حاجة مخيها قولها.. أنا في حالة ماتستدعش إني
أستمر في الغاز.. قولي الجزء اللي يهمني.. إنت ليه عملت فيا كده
وكنت بتعذبني بالعابك السادية دي..»

وقف سامي وأخذ يشبك يده وهو يحدثه باهتمام.. «يحيى.. أنا عايز أقولك إن أنا متابعتك مش من 8 شهور بس أنا متابعتك من 5 سنين فاتوا.. من ساعة لما أثرت القضية بتاعت عقار التريفون بينك ومابين شركة سماركوا.. ماتتصورش صدمتي كانت أدّ إليه لما عرفت إنك رفضت مبلغ خرافي في بيع العقار ده علشان خاطر تخلي حقوق بيعه مجانية للناس كلها ومحدث يسيطر على الدواء ويظهر جشع شركات الأدوية.. ماكتتش متخيل إن في إنسان لغاية دلوقتي بالعقلية دي.. قلت لو في إنسان موجود بالقلب والإخلاص ده فلازم يكون مكانه وسط السامريين الجدد.. بصراحة ماكتتش مقتنع إنك صادق وكنت شاكك إنك بتخبي حاجة وراك.. وفضلت أتابعك وأتابع قضيتك لحد ما انتهت وفكرت إني لازم أضملك ولكن بصراحة انشغلت بمعاركي مع الوايت هاند في أماكن وبلاد تانية لحد ما عرفت خطة الوايت هاند في مصر.. وهنا افتكرتك على طول وساعتها بقى أنا بنفسى توليت عملية مراقبتك وإعداد اختباراتك علشان تنضم لينا..»

ابتسم يحيى ساخرًا.. «أنا أنضم ليكم.. ههههه.. إنت بتحلم».. تجاهله سامي وتابع حديثه.. «ولكن احنا ما بنقبلش أي حد.. ما بنعملش طلبات توظيف.. أي شخص موجود في السامريين الجدد احنا اللي مختارينه.. وبنعمله اختبارات عملية.. مفيش وقت للنظري أو للشفهي.. اختبارات ذكاء.. مهات بتطلب منه.. كل مهمة بنقيس فيها نوع معين من أنواع الذكاء لأن الذكاء أنواع كتير مش نوع واحد.. وفي حالتك انت.. أنا كنت متوقع ليك مستقبل هايل

وعلشان كده عملتلك اختبار في جميع أنواع الذكاء المعروفة وبنسبة صعوبة كبيرة جدًا وكم ان زيادة عليهم كل مهمة انت بتنفذها لقياس ذكائك كان بنفس الوقت بتدمر مهمة حيوية جدًا للمنظمة الوايت هاند.. إنت ماتعرفش انت البهادرا هيتجنن ويشوفك ميت ازاي.. وعلى فكرة هو اللي بعث الناس الي كانوا هيقتلوك الي قلت عليهم مش أنا».

«يعني مش انت اللي بعث الثلاثة دول يقتلوننا..»

«وهبعث ناس تقتل الي أنا مرشحه بنفسه للمنظمة ليه؟ وكم ان نجاتك من الثلاثة دول تبين إنت قد إيه شخص استثنائي ومتميز.. الثلاثة دول من أخطر قتلة الوايت هاند في الشرق الأوسط.. طرقهم في القتل استثنائية ومختلفة.. أنا كنت بحاول بكل الطرق إني أبعدك عن طريقهم الأيام اللي فاتت دي كلها ولكنك لما غبت عن عيننا فجأة قدروا يوصلوك.. إنت ماتعرفش انت بالنسبة لينا إيه يا يحيى.. إنت شخص استثنائي جدًا»..

يحيى ساخرًا.. «ما هو واضح.. واضح إن أنا شخص استثنائي عندكم.. ولنفترض إن كلامك ده صح وان كل ده اختبار.. عايز أعرف إيه الاختبارات دي وتفهمني المغزى من وراها..»

أوما سامي له برأسه.. «حقك.. حقك.. يا صديقي.. أنا هقولك.. الذكاء مش هو بس سرعة في الفهم والبديهة.. لا وكم ان أشياء تانية كتير.. العلماء في العالم وضعوا ليه تصنيفات كتيرة وأهم التصنيفات ديه.. طبعًا رقم واحد.. الذكاء المنطقي والرياضي.. اللي هو القدرة على حل الألغاز والتجارب والحسابات المنطقية..»

وفي الذكاء الحركي والجسدي.. وهو ما مدى ذكاءك في التحكم
بعضلاتك وقدرات جسدك.. يعني مثلاً تلاقي شخصين لهم نفس
القدرات البدنية واحدة ولكن واحد فيهم جسده أرشق وأسرع في
تأدية مهامه مع انهم يخضعوا لنفس التدريبات ولنفس المهام.. بس
واحد منهم يمتلك ذكاء جسدي أكثر من الثاني.. وفي ذكاء بصري
ومكاني.. وده اللي بيتم فيه تذكر صور وأماكن مختلفة.. وفي الذكاء
اللغوي.. مامدى قدرة الإنسان في استخدام ألفاظه وقدراته اللغوية
لخدمته لأي غرض هو عايزه وأشهر ناس على المستوى ده السياسين
ومقدمي البرامج الإعلامية.. وفي الذكاء العاطفي والاجتماعي..
وبقيس من خلاله ما مدى قدرة الإنسان إنه يسيطر على مشاعر
المحيطين بيه ويجعلهم يرغبوا إنه يبقى بينهم ويسمعوا لأوامره وأكبر
أمثلة على دول قادة الدول الديمقراطية طبعاً.. ههههه.. وفيه الذكاء
الموسيقي.. اللي هو قدرة الإنسان على فهم وتحليل أي قطعة موسيقية
ويقدر يطلع الأشياء الشاذة والغريبة في أي شيء سمعي.. وده طبعاً
أكبر مثال ليه الموسيقيين.. طبعاً كثير من الناس يمتلكوا أكثر من
نوع.. ولكن العباقرة بس هما اللي يمتلكوا كل دول.. وانت يا يحيى
واحد منهم..»

يحيى يشعر بالفخر ولكنه يحاول أن لا يظهر ذلك..» إيه.. إزاي..
أنا عبقرى إزاي..»

سامي مبتسماً.. «أنا استخدمت كل الاختبارات دي عليك في
مهامك ونجحت فيها كلها..»
مندهشاً.. «إزاي.. اشرحلي..؟»

سامي يتحرك بمكانه وهو يشبك أصابع يده.. «أنا هاشر حلك يا يحيى.. أنا لما قابلتك بنفسى اتأكدت إنك فعلاً الشخص المطلوب.. ولكنك شخص طيب زيادة عن اللزوم.. أو بمعنى أصح ساذج.. علشان كده اخترت أعمل معاك خطة بالشكل ده.. علشان كان لازم أدملك صدمة نفسية قوية تخيلك تبقى عندك شكوك تجاه أي شخص تقابله بعد كده.. أنا ما يهمنيش إنك تبقى طيب.. لأن في المنظمة عندنا.. لازم يبقى جنب حسن الظن.. الحرص.. أنا خليتك تروح لمكان البهادرا لسببين مهمين جداً جداً.. الأول إن محدش كان يعرف إن البهادرا جاي غير عدد قليل جداً من رجالته.. عايز أقولك إن شكل البهادرا عشرة بس اللي عارفينه على مستوى العالم.. علشان كده لما انت دخلت مكان البهادرا كلهم ظنوا إن انت البهادرا وفي نفس الوقت شليت تفكيرهم لأن البهادرا لم يكشف عن وجهه لشخص من المنظمة قبل كده ولكن انت دخلتهم ووشك مكشوف وده عملهم ربكه في تفكيرهم.. تاني سبب لما البهادرا شافك في وسط المقر السري بتاعه ومتقمص شخصية.. كانت صدمته عاملة ازاي.. ازاي معلومات عن مقره السري اتسربت كده.. ومين الشخص اللي خد مكاني وتحداني وجها لوجها ووراني وشه وخافش مني أنا البهادرا اللي راعب العالم.. في اللحظة دي انت اتحولت لعقدة عند البهادرا.. ظهورك فجأة كده قلب الموازين كلها في خطته واربكه.. شكله بقى سيء جداً قدام رجالته اللي بيجلوه زي إله.. وثقته هو في رجالته اتمزت.. الإي معلومات مقره اتسربت وظهور شخص غريب وتقمصه لشخصيته.. ده خلّى البهادرا بقى شكاك جداً في اللي حواليه ومابقاش ينفذ أي أمر إلا تحت إشرافه هو الشخصي علشان يقدر

يتوصل لمسرب المعلومات دي وده عطل شبكة اتصالتهم الضخمة والسريعة جدًا وده كان طبعًا في صالحنا.. وفي نفس الوقت ضيِّع نسبة كبيرة من موارده ورجالته في البحث عنك ومحاوله التوصل إليك.. إنت كنت الضربة القاضية اللي استخدمتها ضد الوايت هاند وضد عقل البهادرا العبقري اللي عمره مكان يتوقع ظهورك المفاجئ ده أثناء تنفيذه لأكبر عملية في حياته..»

أخذ يحيى يتسم مندهشًا وهو يفرك شعر رأسه.. «كل ده بيحصل واحنا مش حاسين.. أخ يا اولاد ال..».. ثم نظر إلى سامي بفضول.. «طيب أنا عايز أعرف أسباب مهماتي.. سحبت 10000 آلاف جنيه دي مفهومة علشان خاطر المصاريف اللي هتحتاجها المهام الثانية.. لكن موضوع الشحاته ده كان ليه 200 جنيه هيعملوا إيه..»

«طبعًا ولا ليهم لازمة.. ولا كان يهمني إنك تجمعهم أصلًا.. ولكن ده مهم لعدة أسباب.. أولًا.. كان في شخص مهم جدًا جدًا في الحكومة ه يتم اغتياله في المكان ده في الوقت ده وظهورك ومناوشاتك مع الشحاتين جعلت الأمن يلغي رحلة الشخصية الهامه دي من المنطقة وبكده منعنا عملية الاغتيال دي.. وطبعًا كنت لازم تظهر قدام رجاله البهادرا المنتشرين في وسط البلد علشان تظهر قدام البهادرا من جديد وانت بتطلع له لسانك وتقوله أنا بوظنك عملياتك أهو.. وراجل تعالى امسكني.. وده خلاه يتجنن أكثر ويصدر أمر باغتيالك من جميع قتلة الوايت هاند وقتها وده قلل وتيرة الاغتيالات للأهداف الباقية.. أما الجزء اللي نخلصنا بقى.. إننا عملنا كده علشان لما يطاردك الشحاتين هنشوف هتهرب منهم ازاي

وعلشان تعمل كده.. لازم تستخدم ذكاءك المنطقي والذكاء الحركي
والجسدي مع بعض.. وقد كان ونجحت في مهمتك..»

يحيى مندهشاً.. «يخربيت دماغك.. يعني كنت بتلاعب البهادرا
وبتدمر عملياته وفي نفس الوقت بتختبرني بوقت واحد.. وأحلى
حاجة إنك عمال تلاعب البهادرا ده على رقبتى..»

ضحك سامي هنا بقوة.. «هههههه.. ما تخافش يا يحيى.. أنا
عامل حساب كل حاجة.. عمري ما كنت هسيبهم يأذوك أبداً..
إنت دورك في الخطة بتاعتنا.. الجوكر المحروق..»

باندهاش.. «جوكر محروق.. ازاي مش فاهم..»

«هقولك.. الجوكر أو العميل المحروق ده مصطلح مخابراتي
منتشر.. مثلاً مخابرات دولة ما عايزه تبعت جاسوس لدولة ما..
فتجند جاسوسين.. الأول الجاسوس الحقيقي الخفي اللي محدش
يعرف عنه حاجه.. وفي الجاسوس الثاني الجوكر المحروق.. ده
المخابرات بتقوله انت جيمس بوند وعايزينك تعمل مهمات وطنية
وكده وتقوله روح مبني المخابرات الثانية ولف حواليه وانت راكب
عربية حمراء وخالي بالك لحد يعرفك.. والبيه يقعد يلف حوالين
مبني المخابرات الثانية ويلف ويلف وهو فاكر إنه جاب الديو من
ديله والمخابرات الثانية تبقي عرفته خلاص وبتقول ماله العبيط ده
بيعمل ايه.. ووقت ما هم منشغلين الجاسوسو الحقيقي بيتم مهمته..
نفس مبدا شوف العصفورة اللي احنا كنا بنعمله واحنا صغيرين..
انت الجوكر المحروق في لعبتنا.. البهادرا انشغل بيك وقعد يطارذك
وفي نفس الوقت كنا بننفذ احنا خططنا المضادة عليه..»

يحيى ساخرًا.. «يعني أنا طلعت في الآخر عصفورة..»

سامي بجدية.. «عصفورة.. إنت باين عليك مستهون بالبهادرا.. أنا علشان اعرف شكل البهادرا فضلت بنفسي سايب كل حاجة في أيدي وتتبعته لمدة سنتين.. كل خطوة بتتعمل دلوقتي تم التضحية فيها بفلوس ورجال وموارد عمرك ماتحلم بيها.. هفوة واحدة غلط وكنا كلنا هنموت ولكن أنا كنت مراهن عليك وعلى نجاحك..»
«طيب أنا عايز أعرف باقي الاختبارات.. ليه ركبت عربية ميكروباص؟»

«طبعًا علشان عدة أسباب برضو.. منها إن البهادرا كان بيدور عليك في كل مكان بجنون وعلشان كده خليناك تختفي عن أنظاره بطريقة مايفكرش فيها أبدًا وخليناك تسوق ميكروباص وتوصل كل راكب لحد بيته وطبعًا ده هياخد أماكن وأوقات مختلفة وهتختفي فجأة من على ردادر البهادرا وده هيجننه ويخلي تركيزه عليك أكثر.. وبالنسبة لاختبارنا إحنا بنقيس ذكاءك الاجتماعي واللغوي.. ونجحت فيهم بامتياز..»

يحيى سريعًا.. «طيب ومهمة منى الشيمي؟».. ابتسم سامي بخبث.. «ده كان لتلات أسباب.. الأول فيهم إننا نقيس ذكاءك اللغوي والعاطفي وازاي هتقدر تقنع أم محبة لبتتها إنها تموتها بأيديها.. بصراحة شديدة جدًا.. أنا مكنتش متوقع أبدًا إنك تنجح في المهمة دي بالذات.. أنا كنت عامل المهمة دي لسبب إن مدام سمر تشوفك في المستشفى وتظمن عليك وتصدق كلامي عنك بعد كده.. والسبب التالت مش هقدر أقولهولك إلا لما تبقى عضو رسمي معانا في السامرين الجدد.. لأنه سر مهم جدااا»..

وقف يحيى بضيق وحدث سامي غاضباً.. «أنا كان ممكن اسامحك
على أي حاجة إلا انك تدخل مراتي وابني في لعبتك..»..
ضحك سامي بشدة.. «ههههههه.. ههههههه»
أمسك يحيى بملابسه غاضباً.. «بتضحك على إيه.. بتضحك على
إيه؟»..

وقف رجال سامي متأهبين فأشار إليهم سامي بيده أن يتوقفوا..
فعادوا إلى أماكنهم وباشروا أعمالهم مرة أخرى.. وتابع سامي حديثه
إلى يحيى مبتسماً بخبث.. «تقدر تقولي احنا عملنا إيه وحش في
مراتك وابنك.. إحنا عاجلناهم بأفضل وأغلى علاج موجود في العالم
وحيناهم من أي ضرر يقع عليهم سواء من رجالة البهادرا أو من أي
ضرر تاني.. وتكفلنا بمبلغ ضخم جداً في سبيل علاج ابنك بدون
مقابل.. وانت ماحصلكش ضرر..»

يحيى أخذ يهزه بقوة بين يديه.. «ماعملتليش ضرر.. إنت كنت
عايزيني أقتل أعز اصحابي بإيدي..»

هنا قام سامي بسحب يدي يحيى من فوق ملابسه وأخذ يهندهما
سريعاً.. «لما طلبت منك إنك تقتل فؤاد علام عدوك.. كنت
بعملك اختبار نفسي.. بشوفك لو اتخطيت تحت ضغط كبير ممكن
يكون رد فعلك إيه.. هل من الممكن إنك تخالف مبادئك والقيم اللي
بتشددق بيها ولا فعلاً تهفضل صاحب مبدأ لحد الآخر حتى ولو
كان في الأمر تهديد عليك أو على عائلتك بطريقة مباشرة.. ونجحت
في الاختبار زي ما كنت متوقع.. حتى لو كنت فشلت.. ماكانش
هيحصل حاجة لفؤاد لأن السلاح فارغ مفهوش رصاص.. كنت

هاكتفي بس إني أخليك تسمع صوت تكات المسدس الفاضية وانت بتطلقها على مبادئك وقيمك اللي احتفظت بيها طول عمرك.. أنا بعد المهمة دي.. قولتلك انت حُر.. وعرفتك مكان مراتك وابنك فين.. وكان قدامك فرصة انك ترجع لهم وتحاول تنسي كلي اللي حصل ده وتمحيه من حياتك.. ولكن على الرغم من كده.. انت سايب مراتك وابنك اللي انت بتقول إنك بتعمل كل ده علشانهم.. وواقف أهو قدامي بتكلم عن المنظمات وعن العالم.. تفسر ده بإيه.»

هنا ارتبك يحيى للغاية وحاول أن يدافع عن نفسه.. «إيه.. لا انت غلطان.. أنا بعمل كل ده علشان مراتي وابني.. كان لازم أتطمئن عليهم إنهم في أمان علشان كده كنت لازم أدور عليك»

سامي مبتسمًا بخبث.. «لا.. مش دي الحقيقة.. الحقيقة أن انت هنا.. علشان تكمل لعب.. شعور الادرينالين وتحدي الخطر والمكسب اللي شعرت بيه الأيام اللي فاتت ادالك متعة مابعدھا متعة.. متعة افتقدتها في وسط حياتك الروتينة اللي عايشها وانت بتقول ده مش مكاني.. دي مش حياتي.. أنا ما اتخلقتش علشان كده.. أنا لازم أعيش المغامرة كل يوم.. تعرف إيه اللي يثبت أن كلامي صح.. اني على الرغم من اني عرضت عليك تدخل المنظمة أكثر من مرة.. مفيش ولا مرة فيهم قولتلي لا..»

هنا امتقع وجه يحيى وشعر أنه تعرى أمام سامي.. وأنه نجح بالكشف عن يحيى الحقيقي المختبئ تحت شخصيته الأخرى.. وظل ينظر له بصمت..

تابع سامي حديثه إلى يحيى.. «أنا برضو مش هضغط عليك..

آديك عرفت أسباب كل اللي بيحصل حواليك.. شفت العالم بيتدار ازاي وانت غافل عنه.. أنا بعرض عليك فرصة.. إنك تكون مشارك في صناعة أحداث العالم أو تكتفي بإنك تكون مشاهد من بعيد مالوش حتى قدره انه يبدي أي رد فعل.. فكر.. فكر وخذ وقتك تمامًا.. ووقت ما تبقى جاهز.. هتلاقيني في انتظارك»

ثم تحرك وتحدث إلى رجاله.. «جه وقت الصفر.. عايزكم تبقوا جاهزين لأي تطورات.. عايز تركيز من حديد.. فاهمين».. أوما الرجال برؤسها وعادا إلى أعمالهما.. وتحرك سامي جهة باب الشقة فأوقفه يحيى: «إنت سايبني ورايح فين؟»

سامي مبتسمًا بخبث: «رايح أحط آخر قطعة في خطتي بمكانها.. رايح أقول للبهادرا وجهًا لوجه كش ملك.. تحب تيجي معايا؟»
اعتلت ابتسامة كبيرة وجه يحيى: «طبعًا..»
ثم تحرك الاثنان إلى خارج الشقة..

كان يحيى بسيارة عادية للغاية ومعه سامي يقود السيارة وأخذ يحيى يفكر بعمق شديد عن كل ما حدثه به والعالم الخفي الذي فتح سامي عينيه عليه.. وكانت بداخل رأسه آلاف الأسئلة والتي كان كلما طرح على سامي سؤالاً منها يجده يتسم ويخبره عندما يصبح عضوًا بالمنظمة فسوف يخبره به ولكن سؤالاً أخذ يلح على رأسه وكان يريد أن يعلم إجابته بأي طريقة فطرحه على سامي حتى ولو لم يجاوبه ولكن كان يريد أن يطرحه وليكن ما يكون.. «كنت عايز

أعرف حاجة وماتقوليش لما تبقى في المنظمة زي كل مايسألك ده
سؤال عادي جدًّا.. وانا هموت واعرفه..»

نظر له سامي سريعًا.. «قول سؤالك».. ثم عاد يقود السيارة
بتركيز شديد..

فألقي يحيى سريعًا بسؤاله.. «أنا مستغرب جدًّا من حاجه.. مهما
أبعد عن الكاميرات واغير في تليفونات قديمة أو جديدة كنت بتعرف
مكاني.. والأغرب من ده كله.. إنك كنت بتدخل في مكالماتي حتى لو
كنت بتكلم من تليفون واحد ولا أعرفه ولا يعرفني ولا شفنا بعض
قبل كده حتى.. كنت بتعملها ازاي.. أنا شكيت إنك كنت حاططي
جهاز تتبع وتنصت في جسمي ولكن عملت أشعة وطلع مفيش
حاجة.. وساعتها كنت هتجنن وأموت واعرف عملتها ازاي»..
ابتسم له سامي ساخرًا.. «هو سؤال حلو.. ومع إنه مفروض
ماتعرفش إجابته دلوقتي.. ولكني هقولك».. مد سامي يده
بملاسه ثم أخرج زجاجة عطر صغيرة.. «هات إيدك يا يحيى.. خد
شوية برفان».. اندهش هنا يحيى من فعله ولكنه قدم يده إليه فقام
سامي برش بعض العطر على يد يحيى.. فأخذ يحيى العطر من على
يده ووضعته على باقي وجهه وجسده وأخذ يشتمه.. «برفان ريحته
حلوه.. بس بردو مجاوبتش على سؤالي.. كنت بتعمل كده ازاي؟»
نظر له سامي سريعًا.. «كنت بعرف عن طريق اللي بتشمه ده»..
نظر يحيى للعطر الذي على يده مستغربًا.. فعاود سامي حديثه إليه..
«البرفان اللي انت حطيته ده بيخليني أقدر أعرف مكانك لمدة سبع
أيام متواصلة.. لو كنت تحت البحر حتى لمسافة 15 متر أقدر أعرف

إنت فين».. أخذ يجي يشتم يده مصدومًا.. «ازاي الكلام ده.. عن طريق البريفم؟»

«البريفم اللي انت حطيته على إيدك ده في مادة مشعة غير مضره لجسم الإنسان.. المادة دي بتقدر تلقطها الأقمار الصناعية بسهولة في أي مكان بالعالم.. والمادة على الرغم من إنها ممكن تتصنع على أي صورة ولكن بتفضل تبقى في صورة غازية لأنها بتبقى أقل اشتباها من أي شيء تاني.. طبعًا وبعد ما أعرف طريقك عن طريق الأقمار الصناعية.. وأحدد انت فين بالضبط.. بخرق أي شبكة اتصالات انت بتبقى متواجد فيها في إطار 3 كم.. وكل المكالمات اللي داخله واللي خارجه من مكانك بتبقى عندي أول بأول سواء غيرت تليفونك أو تليفون حد تاني أو حتى اتكلمت من تليفون العفريت هعرف انت بتكلم مين وبتقول إيه».. صدم يجي بشدة وهو يتذكر جميع المحاولات التي كان يصنعها للهروب من رقابة سامي له ولم يكن يعلم بأن كل تلك المحاولات كانت بلا جدوى.. فحدثه بضيق: «بس كده انتم بتلغوا حاجة اسمها خصوصية للإنسان».. ضحك سامي بشدة ساخرًا.. «خصوصية.. خصوصية إيه بس يا يجي.. الخصوصية دي وهم.. بيصنعها الإعلام على الناس العادية علشان يتابعوا حياتهم وهما فاكرين إن أسرارهم محفوظة.. كل شركات الإنترنت اللي بتدفعها فلوس.. كل شركات الهاتف في العالم.. كل مصممي البرامج زي الويندوز وغيره بيعرفوا كل شيء بتعمله.. كل مكان بتتحرك ليه.. كل محادثة بتعملها.. وفي الآخر بيعوها للي بيحتاجها.. عصر الخصوصية ده انتهى من 100 سنة تقريبًا.. الوقت اللي احنا فيه دلوقتي يا تبقى انت اللي بتجسس على

الناس الي بتجسس عليك يا إما خلاص هتبقى لقمة صائغة تحت
ضرسهم.. إنت لسه بدري عليك شويه يا يحيى.. إنت لسه هتشوف
معايا الي أغرب من الخيال..»

تنهد يحيى بضيق: «كده أقدر أقول وأنا متظمن إن حياتي العادية
انتهت للأبد.. ماقلتليش إحنا رايجين فين لغاية دلوقتي؟»

سامي ضاحكًا: «هههه.. إيه يا يحيى.. مالك انت عقلك لف من
الي سمعته ولا إيه.. إحنا رايجين للبهادرا دلوقتي..»

يحيى مصدومًا: «إنت بتكلم بجد.. إنت هتروح للبهادرا
برجلك.. إنت عايزنا نموت ولا إيه!»

اكتفى سامي بالابتسامة له وتابع طريقه بتركيزٍ بينما قفز قلب
يحيى بين ضلوعه وهو لا يدري ماذا يخطط سامي وماذا سيفعل..
مضت نصف ساعة ثم توقف سامي بالسيارة بالقرب من أحد
الارصفة.. «يلا بينا يا يحيى.. وصلنا..»

يحيى هبط من السيارة بقدمين مرتعدتين وهو قلق بشدة بينما
سامي كان مبتسمًا وتبدو عليه الثقة بالنفس.. هنا تحرك سامي
وبصحبة يحيى بجهة مطعم أمامهما.. نظر يحيى إلى المطعم فوجده
المطعم الفرنسي الذي ذهب إليه من قبل.. فتحدث إلى سامي قلقًا..
«مش هو ده المطعم الي بعنتي ليه بالمهمة».. ضحك سامي.. «أيوه
هو.. تعالى معايا ماتقلقش.. ماتقلقش..»

اضطرب يحيى بشدة وهو يعود إلى هذا المطعم من جديد
وامتقع وجهه عندما دلف من باب المطعم خلف سامي وأخذ
ينظر حوله بقلق فوجد أناسًا عادية تأكل طعامها بهدوء وحولهم

بعض النُدُل يخدمونهم.. فرقع سامي إصبعيه سريعًا إلى يحيى خلفه فنظر له يحيى مضطربا وأشار إليه أن يتبعه فتبعه يحيى بقلق شديد فتوقفا أمام إحدى الطاولات الموجودة بركن هادئ بالمطعم ويجلس عليها شخص في منتصف الخمسينيات يرتدي بدلة كاملة ويأكل بنهم شديد ويقف بجواره نادل أجنبي يصب له الشراب بكأسه.. فابتسم سامي سريعًا وجلس أمامه على المقعد وتحدث بالإنجليزية إليه».. مساء الخير.. أتمنى تكونوا بتقضوا وقت سعيد».. ابتلع يحيى ريقه وهو ينظر إلى الرجل الجالس أمامهم بخوف شديد.. أيعقل أن يكون هذا هو البهادرا الذي يجعل الولدان شيبًا.. وهو يجلس هادئًا هكذا يتنعم بطعامه.. نظر له البهادرا فجأة فسقط قلب يحيى في قدمه ولكن البهادرا تجاهل يحيى ثم تحدّث إلى سامي أمامه بحدة.. «انتم مين وعايزين إيه؟».. فابتسم له سامي وأخذ يحدثه بهدوء.. «احنا الل كنا بنبوظ كل خططك الفترة الي فاتت دي يا بهادرا..».. تحدث إليهم الرجل مندهشا».. خططي.. خطط إيه.. انت بتقول إيه.. أنا مش فاهم حاجة».. ابتسم له سامي سريعًا.. «أنا مش بكلمك انت.. أنا بكلم البهادرا».. ثم نظر إلى النادل الذي يقف بجوار الرجل ويصب إليه الشراب بكأسه.. وهنا صدم يحيى بشدة عندما شاهده.. إنه نفس النادل الذي افتعل معه مشكلة الفئران بالسابق.. هل يعقل أن يكون هذا هو البهادرا..».. ابتسم النادل إليهم وأشار إلى طاولة بعيدة.. «اتفضلوا معايا».. وهنا ابتسم سامي وهو يتبعه.. وارتعد يحيى عندما تلاقى أعينهم أخيرا.. البهادرا.. هذا الشاب الاجنبي الوسيم الذي يتصنعه بانه نادل بالمطعم.. كشف عن نفسه أخيرًا وجلس أمامهم على المنضدة وأخذ يبتسم بهدوء شديد

لا يغالبه إلا هدوء سامي فكري.. أخذ يحيى ينظر إليهما وهو يرد أن يحفر هذا المشهد بعقله.. رئيس منظمة الوايت هاند البهادرا.. يجلس مبتسماً أمام رئيس منظمة السامريين الجدد.. هل هذا هو لقاء أصحاب المنظمات.. هل لقاءهم يكون رزيناً هكذا.. ولا يوجد دماء أو أشلاء ممزقة ورصاص ومتفجرات.. قطع تفكيره ضحكة البهادرا الغربية أمام سامي وهو يحدثه بالإنجليزية. «ههههه.. تعرف.. أنا مش مصدق نفسي.. أنا كنت هتجنن.. إزاي ده بيحصل.. مين دول اللي بيتدخلوا في خطتي العبقريّة.. ولكن دلوقتي اتضح كل شيء.. انت.. انت اللي وراء كل ده.. كده بقت الأمور منطقية.. بقت واضحة وبينة جداً.. لكن اللي مش قادر أفهمه.. ليه.. أنت بتعمل كل ده ليه.. هستفاد إيه.. انت عارف أن البلد دي كده كده أي حد بيعمل فيها اللي هو عايزه.. على الأقل تحت نفوذ الوايت هاند كانت العمليات هتبقى منظمة.. كان هيصبح كل شيء مخطط له ومضبوط.. انت عارف إننا مش عايزين ندمر البلد دي.. محدش مهما كانت قوته هيتحكم في 120 مليون.. لكن انت تدخلت وحاولت تبوظ شغلي.. أنا عايزك تقولي السبب ليه..»

سامي ببرودٍ شديدٍ.. «علشان أقدر أقولك أسبابي واطلعتك على خطتي لازم تبقى عضو في السامريين الجدد.. فكك الوايت هاند وتعالى انضم لمنظمتي..»

ضحك البهادرا بصوت عالٍ للغاية.. لفت الانتباه إليه.. فكتم أنفاسه وهو ما زال يضحك.. «آسف.. آسف.. لسه عندك روح الدعابة العالية دي زي ما انت.. تعرف أنا طول عمري كنت

بحترمك ونفسي أبقى زيك.. لكن الكلام ده قبل ماتخوننا وتعمل اللي بتعمله ده.. هنا نظر ليه سامي باقتضاب.. فأمسك البهادرا فمه سريعاً.. «إيه ده.. هو اللي معاك ده مايعرفش اللي انت عملته ولا إيه..».. ثم نظر إلى يحيى مبتسماً ومد يده إليه ليصافحه.. «لسه ما اتعرفناش صحيح.. أنا زعيم الوايت هاند واسمي البهادرا.. وانت».. هنا مد يده يحيى له ليصافحه فأمسك البهادرا يده بقوة وهو بيتسم.. بينما أخذ يضرب سامي يده بسرعة على الطاولة.. شعر يحيى بالاندهاش لما يحدث ولكنه شاهد ما حدث أمامه الآن.. فالبهادرا يصافحه بيده اليمنى بينما يده اليسرى تحمل سكيناً صغيرة موضوعة فوق رقبة يحيى لولا أن منعه سامي وأمسك بيده لكان يحيى قد تمزقت رقبته من دون حتى أن يشعر.. قفز يحيى إلى الخلف مرتاعاً.. بينما نظر سامي إلى البهادرا بتحدٍ.. فتراجع البهادرا وهو مازال بيتسم.. «معلش.. آسف.. آسف.. ساعات مشاعري بتتحكم فيا زي ما انت شايف..».. نظر البهادرا إلى يحيى الذي كان مرتاعاً.. وسأله سريعاً.. «كنت عايز أسألك حاجة يا صديقي.. هل كنت مستمتع وانت بتقلدني.. هل كنت مستمتع وانت فاكر نفسك البهادرا؟».. ثم وقف غاضباً بسرعة وصرخ بصوتٍ عالٍ.. «بقى انت يا حقير.. تشبه نفسك بالبهادرا.. الكيان الأعظم والأسمى فوق كل شيء.. انت تبقى البهادرا.. انت عارف أنا عملت إيه علشان أبقى البهادرا.. عموماً.. أنا هسألك سؤال واحد بس.. تحب نحتفظ بجثتك انت وعائلتك في ثلاجة خنازير.. ولا الأفضل.. إني أفرمك وأكل لحمك لعائلتك لقمة لقمة.. بعد مايشوفوا كل مراحل سلخك وتقطيعك وتحميرك بزيت سم سم وعلى درجة حراره 150 وتقدم

سامي مبتسماً بثقة.. «أيوه.. دلوقتي حالاً».. بدا على البهادرا القلق.. «وهتدمرهم بإيه.. ياريت تشرحلي».. سامي سريعاً.. «بالإتش ون»

هنا أخذ يفكر البهادرا للحظات وهو يداعب ذقنه.. «بالإتش ون.. بس انت عارف إن أنا الوحيد اللي أقدر أوصل للإتش ون.. وانا الوحيد اللي أقدر أوصل لكل شخص في الوايت هاند.. وعلشان تدمرني وتدمر الوايت هاند بالإتش ون.. يعني لازم تسيطر انت عليا بالإتش ون»

سامي مبتسماً.. «وهو ده اللي حصل».. أخذ يضحك البهادرا ساخرًا وهو يرفع يديه بالهواء.. «للأسف يا صديقي.. خطتك فاشلة.. أنا اللي بنتقي مكونات شرابي وطعامي.. وانا اللي بصنعه بإيدي.. مستحيل مادة الإتش ون توصلي عن طريق الاكل أو الشرب أنا متأكد مليون في المية».. هنا نظر إلى يحيى الذي كان لونه ممتقعًا وأشار إليه بيده ساخرًا.. «ولو كنت قصدك على الحركة الخايبة بتاعت الفيران اللي عاملها زميلك ده.. أحب أبلغك إنه ملمسنيش.. أنا تأكدت من كده.. من ساعة لما دخل المطعم برجله وشافني وش بوش وانا قلت يبقى في حاجة مريبة هتحصل.. ولما رد فعله كان عادي معايا اتأكدت انه مايعرفش إن أنا البهادرا.. وقولت أن في شخص ثاني وراه هو اللي بيحركه.. مكنتش أتوقع إنه انت.. ولكن كنت عارف إن في حد بيدبر حاجة.. وعلشان كده أنا اتأكدت كويس جدًا إنه ملمسنيش»

سامي ضاحكًا.. «هههه.. أيوه بالضبط.. هو ملمسكش.. ولكن

أنا لمستك».. البهادرا مصدومًا.. «إنت.. مش ممكن أنا متأكد أن مفيش حد لمسني».. وهنا فجأة طرأت إلى رأس البهادرا ذكريات الموقف.. عندما قام يحيى بفتح صندوق الفئران أمامه وساد الهرج والمرج سقط عجوز وزوجته أرضا وقام البهادرا بمساعدتهما على الوقوف.. وهنا كاد البهادرا قلبه يقف من الصدمة»... فضحك سامي وهو يحدثه شامتًا.. «هههههه.. أيوه.. أنا.. العجوز اللي انت قومته».. ثم أشار إلى خاتم بخنصر يده اليمني.. وده الخاتم اللي أنا ضخيت الإتش ون فيه بنسبة %45.. يعني ما زال تأثيره معاك لغاية دلوقتي.. أنا عارفك كويس يا بهادرا.. وعارف إن أعصابك بتنفلت بسرعة.. وطبعًا انت اتجننت لما شفت يحيى اللي كان واخذ دورك كبهادرا قدامك في مقر عملك.. وكان كل تركيزك عليه.. في اللحظة دي أنا استغلّيت الأمر ده واستخدمت سلاحك الإتش ون ضدك.. أنا عارف.. انك مش هتفتكر حاجة عملتها وانت تحت تأثير الإتش ون علشان كده أنا حبيت اجي بنفسي واكلمك وجها لوجه ووريك يحيى رئيس المنظمة الجديد اللي هزمك وهيخيلك تدمر منظمتك بإيدك..».. ثم تحدث إلى يحيى مبتسما.. «يحيى.. قوله زناد الإتش ون إيه.. واديله أمر ينفذه».. انتاب البهادرا الجنون مما حدث وحاول أن يركض بسرعة فصرخ عليه يحيى سريعًا.. «12».. هنا توقف البهادرا عن الحركة واتسعت حدقتا عينيه بشدة وتحولت شفثاه اللي اللون الأزرق ووجهه تحول إلى الصفرة.. اقترب منه هنا يحيى متشفيًا وصرخ عليه بصوت عالٍ.. «12.. بهادرا.. دمر الوايت هاند»..

هنا قام البهادرا بدون أن يشعر بإخراج هاتفه وضغط على بعض أرقام.. ثم أصدر صوت وظل يكرره بالفرنسية.. «Maman pardonne»

moi.. Maman pardonne moi.. Maman pardonne m
Maman pardonne moi oi.. Maman pardonne moi.. Maman pardonne moi.. Maman
pardonne moi.. «.. كان مشهد البهادرا غريباً عجبيا يتحدث بسرعة شديدة للغاية وبمقولة واحده فقط بوسط
المطعم الذي رحل زواره وهم مندهشون من فعل البهادرا الغريب وسطهم.. وقف زملاء البهادرا من النادلين يحاولون التحدث إليه
ولكنه لم يبدأ أي رد فعلاً أبداً.. نظر أحد النُدل إلى يحيى وسامي مستنكراً وهم ينظرون إلى البهادرا.. تحرك سامي وهو يشير إلى يحيى
بأن يتبعه وتحرك إلى خارج المطعم.. فتبعه يحيى سريعاً وهو ينظر إلى البهادرا خلفه الذي وقف كالصنم ويتحدث بالهاتف ولا يستجيب
لأي رد فعل من النُدل زملائه.. ابتلع يحيى ريقه وسأل سامي بفضول وقلقٍ.. «هو بيعمل إيه ياسامي؟».. ابتسم له سامي.. «كل منظمة
ليها كود.. لو حصل حاجة والمنظمة دي أصابها مكروه.. ساعتها
رئيس المنظمة بيطلق كود تدمير المنظمة الذاتي.. جميع رجالها بتنفك
وجميع مواردها بتتحرق وتدمر وأموالها بتختفي من حساباتها..
واللي سمعته ده كان كود تدمير الوايت هاند..».. وقف سامي بعيداً
عن المطعم ينظر في ظلمة السماء وهو يتمطى بجسده براحه شديدة
.. «ياااااه.. ماتعرفش يا يحيى.. أنا إحساسي إيه دلوقتي.. أنا سعيد
جداً إني اتعرفت عليك.. لولاك خطتي دي عمرها ماكانت هتنجح
أبداً..».. نظر ليه يحيى بقلق.. «أنا كنت عايز أكلمك عن موضوع
رئاسة المنظمة دي..».. ابتسم له سامي وأوقفه بيده.. «مش وقته..
مش وقته يا يحيى.. دلوقتي روح لمراتك وابنك.. احضنهم واقعد
معاهم.. دلوقتي مفيش خطر عليك من البهادرا والوايت هاند..»

لأن البهادرا لو ماقتلش نفسه بعد ما دمر منظّمته بإيده هتكون
نهاية على إيد حد من أتباعه أو على إيد منظمة تانية.. مش هتفرق..
المهم إن الوايت هاند اتمرت للأبد.. وعلشان تبقى متظمن أكثر
أنا هابعت أسماء وعناوين رجالة البهادرا والوايت هاند اللي نعرفهم
هنا في مصر لياسين ومعها المعلومات اللي تدينهم.. وأهي تبقى
مكافأة ليه بعد ما أنقذك..»

هنا سأله يحيى بفضول: «هو ياسين شغال معاكم زي الأمين
متولي كده..»

ابتسم له سامي ثم ربّت على كتفه.. «سلام.. سلام يا يحيى»..
ثم تحرك بعيداً عنه وتركه ينظر إلى ظهره متحيراً وما زال برأسه ألف
سؤال لم يجب عنه..



بعد عدة ساعات.. وقف يحيى أمام باب منزل أخت زوجته وطرق الباب وعندما فتح الباب وجد زوجته التي احتضنته بقوة شديدة ودموعها منسابة فوق وجنتيها بينما شعر يحيى بين أحضانها براحة الدنيا كلها تنساب إلى جسده المهلك وأعصابه المحترقة.. فجأة شعر بشيء صغير يحتضن قدمه فنظر أسفل قدمه فوجد مروان الصغير مغطى بالشاش من صدره ويحتضنه بشوق وينادي عليه.. هنا حمله يحيى بين أحضانه وانهمرت دموعه وهو يقبله بشوق شديد وهو على لسانه.. «كل الدنيا فدا ظفرك يا حبيبي.. وحشتني قوي يا مروان.. وحشت بابا قوي».. قامت زوجته بإدخاله إلى المنزل وهو يحتضن ابنه بين يديه وأخت زوجته وزوجها يهنئونه بسلامة ابنه وعودته سالمًا..

بسقوط منظمة الوايت هاند انقلبت أوضاع العالم بيوم وليلة.. فلقد حدث انقلاب في دولة فنزويلا وسقطت حكومة بنجلاديش بدون أي أسباب.. وانهارت إحدى عشر شركة أدوية بالبورصة وتم الاستحواذ عليهم من شركات أخرى.. تم سقوط بعض الأقمار الصناعية المجهولة من مداراتها بالفضاء على بعض الأماكن بدولة البرازيل.. تم تقديم بعض نواب مجلس العموم البريطاني باستقالتهم بدون أي أسباب.. تم اغتيال عدد كبير من رجال الأعمال الروسين وأعلن إقليم كاتلونيا عن استقلاله فجأة وحدثت اضطرابات في جميع أنحاء اسبانيا.. تم تفجير خمسة ملاح ليلية بفرنسا ولم تعلن جهة ما عن مسئوليتها.. خلال أسبوع كامل كان العالم على صفيح ساخن بدون أن يعلم أحد ما سبب كل تلك التغيرات المفاجئة..

(تحذير)

لا تفتح الصفحة التالية

بمكانٍ ما مجهول جلس سامي فكري أمام حاسب آلي متطور يشاهد بعض الصور والأسماء أمامها ومكتوب فوقهم مرشحون جُدُد.. أخذ يتابع سامي الصور أمامه وملفاتها وشاهد أمامه صورة لشخص يدعى «عادل مهران» ومكتوب أسفل منه «الشماس».. ولكن وضع سامي علامة إكس حمراء عليه.. ثم أخذ ينظر إلى الصور والملفات أمامه ليُشاهد مرشحين آخرين ثم وقف على صورة شخص أمامه وأخذ يبتسم بخبث.. ثم قام بفتح ملفه وأخذ يفتح بثاً مباشراً للكاميرات التي بجوار هذا الشخص وهو يقرأ معلومات عنه.. فجأة قطع جلسته تلك رنين هاتفه.. فنظر إلى شاشة الهاتف فوجد كلمة رئيس الولايات المتحدة.. فابتسم سامي وقام بالرد على الهاتف: «ألو.. بقالك كثير مابتنصلش».. هنا وصل إلى أذنه صوت شخص يحدثه الفرنسية وهو غاضب بشدة.. «إيه اللي انت عاملته ده.. إزاي تدمر الوايت هاند؟!».. ابتسم سامي وهو يحدثه بهدوء: «مش أنا اللي دمرت الوايت هاند.. ده البهادرا مش أنا.. ما انت عارف كويس يا بهادرا..»

أجابه البهادرا غاضبًا.. «مادام انت عارف إن أنا البهادرا.. عملت كده ليه.. أنا مش قادر أفهمك.. إنت نفسك كنت بهادرا للوايت هاند وانت اللي اخترتني أبقى بهادرا مكانك.. ليه تدمر اللي انت بنيت».. أجابه سامي بثقة.. «علشان انت يا بهادرا خالفت أوامري وبقيت تعمل كل شيء قامت المنظمة علشان تهده.. وبعدين اختفيت انت وسبت المنظمة للأحمق اللي مسميه البهادرا يديرها.. ودي كانت النتيجة».. أجابه البهادرا غاضبًا.. «بس انت عارف البهادر الاحمق ده يقربلي إيه.. وعارف إن انت كده بتعلن حرب البهادرا يا بهادرا.. عموما إنت اللي ابتديت الحرب وانت عارف كويس أنا أقدر أعمل إيه.. لأنك انت اللي اخترتني أبقى بهادرا.. عارف مقر نابولي طبعًا بتاع السامريين.. وعارف أهميته إيه بالنسبة لكم.. مقر نابولي من النهارده باي باي».. هنا شعر سامي بالغضب الشديد وهو يستمع إلى حديثه.. فضحك البهادرا ساخرًا.. «مالك يا بهادرا.. ساكت ليه.. إنت اللي أعلنت حرب البهادرا.. أكيد عارف اللي هيحصل ومستعدله.. مع السلامة يا بهادرا..»

ابتسم سامي «مع السلامة يا بهادرا..»

هنا قام سامي بوضع الهاتف بضيق أمامه على الحاسب ثم ضمَّ يده ورفعها إلى أعلى متحمسًا بشدة.. «يس.. أيوه كده.. أخيرًا قامت حرب البهادرا.. ههههههه.. ياااااه.. أنا كنت مستنيها من سنين.. أخيرًا مواجهة تستاهل».. تنهد سامي وهو ينظر للبت المباشر أمامه مسلطة على شركة بمكان ما وأخذ يتنهد وهو يحدث نفسه.. «واحد بس.. واحد بس.. لما أضمه بصفي هيقرب حرب البهادرا كلها

رأسًا على عقب.. لا.. ده هيقرب العالم كله رأسًا على عقب.. واحد بس هو اللي أنا لازم أضمه.»

وأخذ ينظر إلى شاشة حاسبه وفجأة ظهر اتصال على الهاتف وتحدّث إليه الحاسب.. «آدم عاصم يتصل بك.. آدم عاصم يتصل بك».. ابتسم يحيى بخبث وتحدّث إلى الحاسب.. «ارفض المكالمة».. فتوقف الاتصال ولكنه عاد من جديد بعد عدة ثوانٍ: «آدم عاصم يتصل بك.. آدم عاصم يتصل بك»..

حدث الحاسب سريعًا.. «ارفض المكالمة».. ولكن هنا تحدّث إليه الحاسب.. «تم قبول المكالمة.. ليظهر أمامه آدم عاصم جالسًا على مكتبه بشركته يتحدّث إليه.. «إنت مين.. وبتدور عليّ ليه.. هو انت العايش؟!»

أخذ ينظر إليه سامي وهو يضحك بشدة.. وآدم أمامه ينظر له بتحدّ..

انتهت أحداث الرواية وليس لها أجزاء أخرى ولكن من الممكن أن نرى بعض شخصياتها بأعمال أخرى.. أتمنى أن تكون حازت أحداث الرواية على إعجابكم..

مع تحياتي / إسلام عبد الله

إذا كنت تعتقد نفسك تمتلك قدرًا من الذكاء فحان الوقت لتثبت ذلك..

(يوجد لغز بسيط بالرواية حله بأرقام الصفحات التالية)

(1 - 23 - 2 - 26 - 8 - 10 - 1) / (1 - 26 - 10 - 28) / (2 - 22 - 24)

إذا استطعت حل اللغز أرسل إجابتك على صفحة الكاتب إسلام عبد الله الشخصية

- <https://www.facebook.com/eslamthefighter>

أعمال الكاتب السابقة

الشماس «عودة أيواس»
الشماس الجزء الثاني «الآلام»
العابث «سجين لاسبانيتا»
جهينة «توقع الا توقع»
عائلة حتحور

تحت الطبع

الشماس الجزء الثالث (الهزيم)
جهينة مدينة الغرائب (الجزء الثاني)
العابث الجزء الثاني (اصدقاء واعداء)



noon_publishing@yahoo.com

0235860372- 01127772007

رواية

H1 اتنس وون

حرب البهادرا

قواعد قراءة الرواية

لا تقرا تلك الرواية اذا كان ضغطك مرتفع او منخفضا ابد

لاتقرا تلك الرواية وانت تفعل شي هام لأنك بالتأكيد سوف تهمله

يجب ان لا تلهث كثيرا وانت تركض بين أحداث الرواية

حاول ان لا تنسى ان تلتقط أنفاسك كل بضع صفحات اذا كان سقف توقعاتك للرواية عاليا حاول ان ترفعه أكثر وأكثر

اذا كنت تعتقد نفسك تمتلك قدرًا من الذكاء فحان الوقت لتثبت ذلك

فالتكن مستعدا للأتس وون .. فالتكن مستعدا لغمرة حرب البهادرا ..

غلاف : إسلام مجاهد

ISBN : 9789777781435



9 789777 781435



812

812



إسلام عبد الله

اتنس وون H1